

Katujaku Wangka Ngaatja Irrititja Ngarrinyi

Katutjalu tjuta palyalku
Yurrunitja 1:1—2:4

Rarrpa kutju ngaraku
Yurrunitja 1:1-5

Yurrunpa manta anta yilkariwiyangka tjungu Katutjalu palyalkitjalu kuwarripa kuliñu. Mantawiya yuti ngarangi, kapi kutju tina ngarringi. Walpa kutju pirrtjipayi kapi palulawana. Munga ngarapayi. Katutjaku kurrunpa ngalya tjarukatirra nyinayinkupayi. Palulanguru Katutjalu watjañu, “Tjin̄tu mungarrtji rarrpa nguwanpa ngaranytjaku.” Palunyangka rarrpalpi ngarangi. Nyakula Katutjalu watjañu, “Ngaatjanya yini kutjupa, rarrpa ngaranyi.” Rarrpa ngarala mungarringu. Katutjalu nyakula watjañu, “Ngaatjanya yini ‘Munga.’” Palulanguru munga ngarala rarrpa kutjupa ngarangi.

*Rarrpa kutjupangka watjalku, yilkari
ngaranytjaku*
Yurrunitja 1:6-8

Katutjalu yalatji watjañu tjunkukitjalu, “Yilkari-
rirriwa!” Palulanguru watjañu, “Yutuwari
ngaranytjaku.” Palulanguru watjañu, “Yutuwari-
ngka yunnguwana yuru ngarrinytjaku.” Paluru
yalatji palyañu. “Ngaatja yilkariña yini watjañi.”

Palulanguru munga ngarala rarrpa kutjupa ngarangi.

*Rarrpa kutjupangka watjalku, manta yutitjar-rinytjaku, yukiri watiya tjuta ngaranytjaku
Yurrunitja 1:9-13*

Katutjalu yalatji watjanu tjunkukitjalu, “Yuruwana manta yutitjarrinytjaku.” Yalatji watjanutjangka yilta mantarringu. Katutjalu yunyparringkula watjanu, “Ngaatja mantanā yini watjanı. Kutjupanā ngaatjanya watjanı, ‘Yuru tiña.’” Palulanguru Katutjalu yalatji watjanu, “Mantatjanu yukiri pakara ngaranytjaku. Kutjupa tjuta yunyintjarra, kutjupa kalkatjarra.” Yalatji watjanutjangka, yilta yukiri watiya pakanu. Palulanguru Katutjanya nyakula yunyparringu. Munga ngarala rarrpa kutjupa ngarangi.

*Rarrpa kutjupangka watjalku, tjintu pira
pintirri ngaranytjaku
Yurrunitja 1:14-19*

Palulanguru Katutjalu watjanu, “Tjintu pira pintirri tjuta ngaranytjaku.” Tjintu nyakula yañangulu kulilk tjintu tjinturripayi. Yañangulu nyakula tjintu kulinı waru. Yalatji ngarala maanytjangka warrirringkupayi. Pira nyakula kuka tjuta nyurrkarringanyi, yurarringanyi. Palulanguru tjana pakani maanytjangka. Yalatji Katutjalu watjara palyanu tjintu pira, pintirri tjuta ngaranytjaku. Yañangulu tjintu nyakula kulinı aali. Tjintu katu kulinı kałala. Tjintu yunngurringkunyta watjanı, mungarrtji mungarrtji. Pira

pintirri tjutanya palyanu mungangka tilingku kanyintjaku. Katutjalu yalatji palyanu, mantangka tili ngaranytjaku, mungangka tili ngaranytjaku. Yalatji palyara Katutjanya yunyparringu, nyakula. Palulanguru munga ngarala tjinturringu.

*Tjintu kutjupangka watjalku, kuka yuru ngurrara tjuta, tjulpu tjutatarra nyinanytjaku
Yurrunitja 1:20-23*

Palunyangka Katutjalu watjañu, “Yuruwana kuka kutjupa kutjupa tjuta nyinanytjaku. Katuwana tjulpu kutjupa kutjupa tjutaya yankulinkunytjaku.” Yalatji nguwanpa Katutjalu yuru ngurrara tiña tjuta palyanu, tjulpuṭarr. Palunya tjuta nyakula Katutjanya yunypalpi nyinangi. Palunya tjutanya watjañu, tjukutjuku tjuta mantjintjaku. “Mantjiranyurra tjutatarra tjwarriwarringka nyinanytjaku.” Munga ngarala tjintu kutjuparringu.

*Palulanguru ngantilpi yanangulpi palyalku
Yurrunitja 1:24-31*

Palunya Katutjalu watjañu, “Kuka tjuta mantawana nyinarra waninytjaku, kukawiya tjutanyatarra.” Katutjalu yalatji watjanutjangka, kuka tjuta, kukawiya tjutanya yulta yutirringu. Yalatji palyantjatjanu Katutjanya nyakula yunypalpi nyinangi. Palunyatjanu Katutjalu yalatji watjañu, “Kala, yanangulpila palyalku tjungungku, nganañanya nguwanpa. Yanangu mayutju tjanampa nyinanytjaku kukaku, tjulpuṭku yuru ngurrarakutarra.” Wati anta kungka

pulanya watjañu Katutjalu, “Nyinarrapulan pipirri tjuta mantjintjaku. Yalatji yañangu tjutarringkunytjakuña yunyparringanyi, manta tjwarriwarriwana. Yukiri tjutaña nyurrampa ngaratjunkula wantingu, mangarri yuninytjarra, kalkatjarra tjutatarra ngalkura nyinanytjaku. Mangarri yuninypa wiyarringkunytjawiya kutu ngaramalpa.” Mantangka tjanampa mangarri, yukiri kutjupa kutjupa ngaratjunkula wantingu. Katutjanya nyakula pulkara yunyparringu. Munga ngarala tjintu kutjuparringu.

Katutjanya waarrka wiyarringkula nyinamalpa

Yurrunitja 2:1-4

Katutjanya waarrka wiyarringkula nyinangi. Tjintu katukatungka Katutjanya waarrkarirra tjuta palyara wiyanu, yilkari, manta, kuka yañangu tjungu. Palunyatjanu paluru waarrkarirra tjintu kutjupangka wiyalpi nyinangi. Tjintu palunyaku yunyparringkula Katutjalu yalatjilu watjañu, “Tjintu ngaatjanya waarrkawiya nyinanytjaku. Yilta tjintu ngaatjanya tinalingku, waarrkawiya nyinanytjaku, tjintu yini Tjarrityingka.”

Kaana Yiitanangka Katutjalu mayi pakaltjinggañku

Yurrunitja 2:5-25

Kaanangka wati kutju nyinatjunku

Yurrunitja 2:5-14

Yurrunpa Katutjalu manta yilkari palyanuŋtja, wiya yukiri ngarangi. Yuŋinypa wiya ngarangi kapi punkantjawiyangka. Katutjalu wiya wantirriyanu. Kaana mangarritjarra wiya ngarangi. Yaŋangungku wiya tjawara ngaratjunangi, kapi walu kutju ngarripayi. Mayutju Katutjalulpi manta mantjira yaŋangu wati palyara ngaratjunu. Mulya puyura kana nyinatjunu, ngaalypa waltyatjarra. Wati paluru kana nyinangu. Palulanguru mayutju Katutjalu ngurra yini Yiitanangka kaana palyara pakaltjinganu. Watiya tjuta mangarritjarra ngarangi, kutjupa kutjupa. Ngurra palula wati palunya katirra nyinatjunu. Kaanangka ngururrpa watiya kutjarra ngarangi. Kanya watiya kutjupanya mangarri palyatjarra, yaŋangulu ngalkura kana kutu nyinanytjaku. Kanya watiya kutjupanya ngalkura kutjupa kutjupaku ninti nyinapayi. Yaŋangulu ngalkura kuya tjutaku ninti nyinanyi. Yalatjitarra ngalkura palya tjutaku ninti nyinanyi. Ngurra palula kaanangka karru kapi raanarringangi. Karru palulawana yukiri watiya tjuta ngarangi. Kaanangka munkarra karru puupala tjarrarringu. Karru kutju yini Piitjanya kapi raanerringangi, manta Yapilawana. Manta palula yaŋangu tjuta nyinarraya mantjilpayi puli kuultatjarra. Puli kutjupa kutjupa tjutaya mantjilpayi. Karrku nguwanpaya palula mantjilpayi. Karru kutjupa yini Kiiyunya manta Yitjiyupiyalawana raanerringangi. Karru kutjupa yini Takiritjinya, manta Yatjiriyangka kakarrarawana raanerringangi. Tjarra kutjupa

yini Yupurititjala raanarringangi.

Watjalku watiya kutjutjanu wiya ngalkunyt-jaku

Yurrunitja 2:15-17

Palulanguru mayutju Katutjalu watjanu, “Kaana ngaawana mangarri tjutaña palyaňu nyuntu palya ngalkuntjaku. Watiya kutjutjanu wiya mangarri nyuntu ngalkunytjaku. Watiya panyapanya kutju ngururrpa ngaranytjanya yaŋangungku ngalkura ninti nyinaku, yuwankarraku kuyaku anta tjukarurruku. Yalatjingkamarra mangarri panyapanya wiya ngalkunytjaku, watiya kutjungka.” Katutjalu watjaňu, “Mangarri panyapanya nyuntu ngalkura yiluku, tjintu kutjungka.”

Minyma palyalku

Yurrunitja 2:18-25

Palunyatjanu Katutjalu walytjalu kulinu, “Wati panyapanya kutju nyinanyi. Ngayuluñara malpa palyalku.” Palulanguru Katutjalu manta mantjira kuka tjuta palyara kana nyinatjunu. Tjulpu tjuta yurukarratja yalatji palyaňingi. Palulanguru wati paluru yini watjaňingi kuka tjutanya anta tjulpu tjutanyaтарра, kutjutu kutjuňu. Palulanguru kuka tjuta tjulpu tjuta yinitjarra yinitjarra nyinangu, kaana palula. Palulanguru wati paluru puťu nyakula ngurriňingi malpa palunya nguwanpaku. Palulanguru Katutjalu wati panyapanya kunkunktjura kantilypa tarrka mantjira malakulu patiňu. Tarrka palunyatjanu Katutjalu minyma palyaňu. Wati paluru kanarringkula

nyangu minymalpi ngarrinytjala. Wati paluru nyakula yunyparringkula watjañu, “Yilta malpalpitju nyinanyi, ngayunya nguwanpa kantilypa ngayukuñutjarra. Yiniñanta watjaní, ‘Minyma.’” Paluru kutjarra miñtararra rawa nyinapayi. Kuwarrila palunya kutjarra nguwanpa, tiñarringkula paapa maamanya wantirra miñtalpi yaltinyi. Rawa nyinarra walytjarringanyi. Yurrunpapula tjaatawiya nyinangi, kuñtawiya.

*Pilkatilu pulanya tjingapungku
Yurrunititja 3:1-24*

*Pilkatilu minyma tjingapungku
Yurrunititja 3:1-6*

Yurrunpa mayutju Katutjalu kuka kutjupa tjuta palyañu pilkatitarra palyañu. Pilkati palunya matjiki ngarringu, yanangu tjingapungkupayi. Pilkati palunya yanangu nguwanpa wangkarra, minyma palunya tjapinu, “Katutjalu nyupalinya watjañu watiya ngaa tjutatjanu mangarri wiyapulan ngalkunytjaku, yilta?” Minymalu pilkattingka yalatjilu watjañu, “Katutjalulinyatju marrkuñu watiya ngaatjanu wiya mangarri ngalkunytjaku. Kaanangka ngururrpa watiya ngaatjanya ngaranyi. Wiyalitju pampuntjaku. Tjinguru ngalkuralitju yilupayingka.” Pilkatinya minymakutu wangkangu, “Ngunytjintapula watjañu. Mangarri ngaatjanyapulan ngalkura wiya yiluku. Ngalkurapulan Katutjanya nguwanpa ninti nyinaku, yuwankarraku. Nintipulanu nyinaku kuyaku anta tjukarurruku.”

Palulanguru minyma paluru nyakula kulinu, watiya ngururpa ngarangitjangka. Paluru punturalingku kulinu, watiya mangarritjarra, “Tjinguruña yatjira ngalkulku, ninti nyinakitja.” Yalatji kulintjatjanungku warrpura ngalkunu. Palulanguru katirrara yungu palumpa miita. Watilu mantjira ngalkunu.

*Mungurapula pina alytjurarriku
Yurrunitja 3:7*

Yiltapula ngalkura pinalpi alytjurarringu. Nyakulapula kuñtarringu, “Nikitili ngaranyi, mantarrawiya.” Palulangurupula parrka mantjira nyiilatjarrangku wakañu mantarra nguwanpa. Mantarratjarra nguwanpapula nyinangi.

*Katutjalu pulanya tjapilku
Yurrunitja 3:8-13*

Yalatjipula parrkatjarra nyinangi mungarrtji mungarrtji. Palunyangka kaanawana Katutjanya yankulinangi. Kulrapula tjatangka kumpiñu. Katutjalu pulampa tjapira ngurriñigi, “Nyaangkamarra nyupali kumpiñi?” Pakaralpi kuñtakunñalu watilu watjanu Katutjalakutu, “Kulinunanta ngalya yananyingka, kaanawana. Ngulurringkulaña kumpiñu nikiti mantarrawiyalitju kulira.” Katutjalu tjapinu, “Nganalunta nintiñu?, nyupali nikiti nyinanyingka. Tjingurupulan mangarri panyapanya ngalkunu. Ngayulu nyupalinya marrkuñu wiya watiya panyapanya pampuntjaku.” Watilu watjanu, “Ngayuluña ngurrpa. Minyma panyapaluñi mangarri ngalya katirra yungu. Minyma

panyapa nyuntu malpa ngayuku palyaṇu. Yilta paluruṇi yungu.” Palulanguru Katutjalu minymanya tjapiṇu, “Nyaaku nyuntu watiya panyapanya pampuṇu?” Minymangku watjaṇu, “Wiya, pilkaṭiluni tjingapungu, ngalkunytjaku.”

*Katutjalu pulanya witura iyalku
Yurruntitja 3:14-21*

Palulanguru mayutju Katutjalu pilkaṭi palunya watjaṇu, “Nyuntu tjingapungutjangka, nyuntunya kutjuṇanta kuyalku, kuka kutjupa tjuta, wiya. Tjunilulpin pampurinamalpa mantawana.” Katutjalu pilkaṭi palunya watjaṇu yalatji, “Yunytjuwiyangkupulan nyinamalpa pilkaṭipa kungka. Kungka palunyakuṇu yuntałpiṭi kapalipitiluntaya pungamalpa, nyuntukunu kapali tjamu nyakula.” Palulanguru Katutjalu kungkangkalpi watjaṇu, “Yalatji nyuntu palyaṇutjangka ngayuluṇanta kuyalku. Palunyatjanu pipirri mantjira nyuntu mikin pułkatjarralpi nyinaku. Nyuntupa miita mayutju nyuntupa nyinaku.”

Palunyatjanu watingkalpi watjaṇu, “Yalatji nyuntupanta watjaṇutjangka kulira nyuntu ngalkunu. Nyuntu ngalkuwiyangku wantimara. Yirritiṇanta watjaṇu wiya ngalkuntjaku. Nyuntu alatji palyaṇutjangka mantaṇanta kuyalku. Mayi ngalkukitja nyuntu kutu waarrkarrimalpa. Ngayulu kuyaṇutjangka tjlkalatarra pakara ngarala waṇiku. Mayi wiima walytja pakara ngaranytja tjuta kutju nyuntu yan-tara ngalkunmalpa, rawa puṭu waarrkarrirra. Palunyangka pakaltjingalkitjalu nyuntu tiṭu puṭu

waarrkarrimalpa, yakuri yintirra. Kutu yalatji waarrkarrinytjatjanu nyuntu yiluku. Nyuntu ngarirra piyku mantarringkuku.”

Palulanguru wati Yatamalu yini watjañu, “Yiipanya.” Yini panyapa watjañu yañangu tjutaku maama nyinanytjaku. Mayutju Katutjalu pulampa kuka pangkitjanu mantarra palyara yungu, tjarrparrapula nyinanytjaku.

*Kaananguru payira iyalku
Yurrunitja 3:22-24*

Palunyatjanu mayutju Katutjalu alatji watjañu, “Yañangu palunya kutjarra nganana nguwanpalpi ninti nyinanyi. Kuyakupa palyaku nintilpipula nyinanyi. Watiya kanalpayikutupula malaku yankula piyku ngalkutjipingkamarra, wañmala pulanya iyalku, ngalkurapula kutu kana yilunytjawiya nyinatjipingkamarra.” Palulanguru Katutjalu pulanya watipa kungka palunya watjara iyanu, kaana palunyangka wañma nyinanytjaku. Wantirra iyanu pulanya yankula watilu tjawara mayi pakaltjingantjaku, mantangka. Yañangu palurulpi manta tjawara waarrkarringu, mayiku.

Kaana palula kakarratjayiti Katutjalu nyalpitjarra mañkurrpa ngaratjunu, yanťayanťara kanyintjaku, tjuula waławaratjarra, tilitjarra, yañangu malaku tjarrpatjipingka.

*Yatamaku katja kutjarra nyinaku
Yurrunitja 4:1-16*

*Kayinanya Yipulaku ngurrkurriku
Yurruntitja 4:1-7*

Palunyatjanu Yatamanya Yiipanyapula tjungu nyinarra pipirritjarrarringulpi, katjalpi mantjingu. Mantjira watjaŋu, “Katutjalunu yungu.” Katja palunya yini watjaŋu, “Kayinanya.” Palulanguru nganṭi katja kutjupalpi mantjingu. Paluru yini “Yipulanya.” Paluru tiŋarringkula tjiipi tjuta kanyiŋingi, kanya palumpa kaakangku tiŋarrirra manta tjawara waarrkarirra mayi pakaltjingalpayi. Palunyatjanu Kayinalu rawa waarrkarirra mayi pakaltjingara mutura ngulaku tjunu. Mayi pułka pakaŋutjangka Katutjanya walkulkitjalu kulinu, kunaṭinpa yungkukitjalu, mayi kutjupa tjuta mantjira. Mayi kutjupa tjuta mantjira Kayinalu katirra Mayutju Katutjanya kunaṭinpa yungu.

Palunyatjanu Yipulalu tjiipi tjuta kanyiŋingi. Paluru tjiipi wiima kutju pungu, mantjira, Katutjaku kunaṭinpa yungkukitjalu. Tjiipi wiima paluru yurruntitja. Kuka palunya yiṭjilinkula katirra tjunu, kuka palya maŋkurrpa. Yalatji nyakula yunyparringu Katutjanya, Yipulakura. Kanya Kayinaku nyakula wantingu, yunyparrinytjawiyangku. Palulanguru Kayinanyaara Katutjaku puntura mirrpaŋarrirra, nyinangu. Palulanguru Katutjalu tjapinu, “Nyaakun mirrpaŋpa nyinanyi? Nyuntu tjukarurru palyaŋutjangka ngayuluŋanta yilta pukularrimara. Nyuntu wiya kuya kutu kulintjaku. Kala, nyuntu ngayuku tjukarurru palya nyinanytjaku.” Yalatji Katutjalu Kayinanya

watjara wantingu.

*Kayinalu Yipulanya pungkuku
Yurrunitja 4:8-10*

Palulanguru Kayinalu palumpa malanypa watjanu, “Tjungulika yarra!” Tjungupula yankula ngururpalpi Kayinalu malany palumpa mirri pungu. Yalatji pungkula wantirra ngurrakutu malaku yanu. Mayutju Katutjalu Kayinanya tjapiṇu, “Yaalytji nyuntupa małanypa?” Yalatji Kayinalu ngunytji watjanu, “Ngurrpampaṇa. Wampa paluru yanu.” Mayutju Katutjalu tjapiṇu, “Nyaangurumpan mirri pungu? Nyuntu pungkuwiyangku wantimara. Palumpa ngurrka yintinytjatjanu, yanangu yutitja nguwanpani wangkangu. Yalatjini watjanu, ngaparrtjiṇanta pungkunytjaku.”

*Kayinanya Katutjalu watjalku, manta kuyalkitjangku
Yurrunitja 4:11-14*

Katutjalu Kayinanya piyuku watjanu, “Malanypa nyuntupan mirri pungutjangka ngayuluṇanta manta kuyalku, nyuntupa malanypa ngurrka mantangka yintingutjangka. Nyuntu puṭu mayi pakaltjingalku, wiima wiya kutju pakalku. Ngurra kutjungka nyinanytjawiya nyuntu nyinarinamalpa, ngurra tjuṭawana.” Wangka yalatji kulira Kayinalu watjanu, “Puṭuna kuliṇi kana nyinakitjangku. Kuunyi nyinarraṇa wiyarriku. Yalatji nyuntu ngayunya watjara wantirra iyanı, tjunguli nyinanytjawiyalu. Ngurrawiyanı

nyinarinamalpa, yanangu kutjupa tjutawana.
Nyakulaŋiya mirri pungku.”

*Kayinaku yaltururriku
Yurrunitja 4:15,16*

Mayutju Katutjalu watjaŋu, “Nyuntunyanta pungkunyaŋka, ngayuluŋa tjananya ngaparrtji mirri pungku, walytja palumpa tjapanpala.” Palulanguru Katutjalu Kayinanya maakatjunu, kutjupalu nyakula wiya palunya mirri pungkunyaŋtjaku. Palunyatjanu Kayinanya Katutjalu wantirriyaŋu. Palulanguru Kayinanya yanu ngurra kutjupakutu, yini Naatakutu. Ngurra palulawana ngurra Yiitanangka kakarrara nyinari-nangi.

*Kapi puntungku tjananya wiyalku
Yurrunitja 6:5—9:17*

*Yanangu tjuta kuyarringutjangka
Yurrunitja 6:5-8*

Yaŋangu tjutarringulpiya ngurra tjivarriwarri nyinarra waŋingi. Rawaya kuya palyaŋingi. Palulanguru Katutjalu tjananya nyakula tjanampa mirrpaŋarringu. Yalatji kuliŋu, “Yaŋangu ngaa tjuta tjuta tjananya wiyalku, kuka tjuta tjulpu tjuta. Yilta palyantjawiyaluna tjananya wantimara.” Palunyangka wati kutjuku pukularringu, Nuuwaku.

*Nuuwaku Katutjanya pukulpa nyinaku
Yurrunitja 6:9-12*

Yara ngaatja Nuuwanyatjarra. Nuuwanya kutju wati palya nyinangu, Katutjaku

tjukarurru. Katutjaku walytja yilta, kanyaya yanangu winkiya kuyarringu. Yañangu kutjupaya mirri pungkupayi, kutjupa tjuta wañngilpayi, kutjupa tjuta turaangkarringkula pika pungkupayi. Yalatji Katutjalu nyakula tjanampa mirrpañarringu. Nuuwala kanyinu katja mañkurrpa. Yini yalatjiya nyinangu, Tjiimanya, Yiimanya, Tjiipitjanya.

Nuuwanyalpi watjalku puuta tiña puntu palyantjaku

Yurrunitja 6:13-22

Palunyatjanu Katutjalu yalatji Nuuwala watjañu, “Yañangu tjuta palatja kuyarringu, yuwankarraña tjananya wiyalku. Nyuntu puuta tiña palyara ngaratjurra!, watiya kunputjarra. Yunngutjayiti ruuma tjutatjarra palyala! Kiñi nguwanta nganytjatjurra patila!, kapi tjarrpatjipingkamarra. Katuwana palyala dintawu tjuta!, patilpayitjarra. Puutangka kultutjayiti palyala tuuwa patilpayitjarra!” Nuuwala Katutjalu piyuku watjañu, “Kapi tiñanga katunguru wantirra iyalku, yiluntankunytjaku kuya palyalpayi tjuta. Kapi tiñangku tjananya mantanguru taara pakara yiluntanku. Yañangu kuka tjuta tjarrparra yuwankarra wiyarriku. Ka nyurrangarri kutju kana nyinaku. Kanalkitjaluña nyurranya watjanı. Puutangkaya tjarrpa nyuntu!, nyuntupa miñta, nyuntupa katja mañkurrpa, nyuntupa ngunyarri mañkurrpa. Kuka tjuta miñtararra miñtararra tjarrpatjurra! Kukawiya tjuta miñtararra miñtararra ka tjananya tjurra! Yalatji tjananya

tjarrpatjurra!, tjana piyuku tjuṭarrinytjaku, kutjupa tjuṭa kapingku wiyanjtala. Mayi tjuṭaṭarra tjarrpatjurra puutangka!, tjanampa, nyurrangarrimpaṭarra.” Yalatji Katutjalu Nuuwanya watjaṇutjangka, paluru kulira palyaṇu.

*Kapi pulka ngarriku manta winkingka
Yurruntitja 7:1—8:12*

Puuta kala palyara ngaratjunutjangka Katutjalupi Nuuwanya watjaṇu, “Puutangkaya tjungu tjarrpa! Kuliṇiṇa yaṇangu tjuṭangkuya kuya palyaṇingka nyuntu kutju tjukarurru nyinanyi.” Katutjalu Nuuwangka piyuku watjaṇu, “Kuka kunatiṇpaṇinyurra yungkupayi. Kuka palunya tjananya tjarrpatjurra!, miitarrarra miitarrarra puutinpala. Kunatiṇpa palunya kuka tjulpuṭarra tjarrpatjurra!, miitarrarra miitarrarra, puutinpala. Kukawiya tjuṭa miitarrarra tjarrpatjurra! Tjuṭa kutu tjananya tjarrpatjurra kapingkamarra!, tjana piyuku tjuṭarrinytjaku. Tjinṭu tjanapala wiyarrinytala kapi puntulpina wantirriyalku. Rawalingku nyurranya pungamalpa pira kutjarra nguwanpa. Yaṇangu tjuta, kuka tjuta ngurra winkingka yurungku wiyaliku kapi tiṇangku, ngayuluṇa wantirra iyantjangka. Ngayuluṇa palyara ngaratjunutja, yuwankarra wiyarriku.”

Yalatji kulira Nuuwalu palyaṇu. Kuka tjuṭa, kukawiya tjuṭanyaṭarra Nuuwalungarri katirra tjarrpatjunu. Puutangkaya nyinangu. Nuuwaku katja maṇkurrrpa palumpa ngunyarri maṇkurrrpa, yuwankarra tjarrpangu.

Palunyatjanu Katutjalulpi kutu kutju patinu, tuwa. Palunyangka Nuuwanya nyinangu tjilpilingku, tjikitji yantata yiya. Kapingkulpi tjananya rawa pungangi. Kapi kutjupa tjuta kanintjarranguru pakaningi, mantanguru. Kala puuta palunya kapilu katuŋulpi. Kapingka katulpi puuta paluru ngaralinangi. Kapi palunya piyuku pulkarringu, katunguru yunngunguru. Katulingkulpi ngarangi, pulingka munkarra. Kapilu tjananya yuwankarra wiyanu, yaŋangu tjuta, kuka tjuta, kukawiya tjutanya, mantawana yankupayi tjutanya, katuwana yankupayi tjutanya. Nuuwanyangarri kutju puutangka kanarringu. Kapilu pungkula wiyarringutjangka, kapi palunya rawa ngarringu, pira tjikitjipala nguwanpa.

Katutjalu Nuuwanya puntura kuliŋingi, wiya wantingu. Piyuku watjaŋu, walpa wangkanytjaku, tjintulu kampanytjaku. Walpa wangkarra tjintulu kampanytjatjanu kapi paluru kanintjarrarringulpi. Palunyatjanu puuta palunya pulingka ngarangu, yini Yararatangka, katu. Rawaya nyinangu puutangka, pira tjirripala. Palunyangka kapi wiyarringulpi, puli tjuta yutitjarringu. Pira kutjulpiya nyinangu puutangka. Palunyatjanu Nuuwalu kaŋkalpi wintawu katu yalara iyaŋu. Puutanguru pakara yanu. Wiya piyuku ngalya yanu. Titu parra yankula maa yanulpi.

Piyuku Nuuwanya nyinarra ngatapuka nguwanpalpi wantirriyaŋu. Yalatji paluru wantirriyaŋu, kulilkitjangku, “Paluru watiyaku putu ngurrira malaku ngalya yanku.

Palunyangkaña kulikku, kapi kutu ngarrinyi.” Puuta palunya pulingka katu ngaranyangka, Nuuwalu puṭu nyangu, manta nyakukitjangku. Yilta ngatapuka paluru putu ngurrira ngalya yanu, Nuuwalakutu. Nuuwaluppi witira tjarrpatjunu. Tjintu tjapanpala paṭara ngatapuka palunya piyuku wantirriyanu. Yankula mungarrtjilpi ngalya yanu. Tjaangka nyalpi ngalya katingu. Kala Nuuwaluppi kulinu, kapi wiimarringutjangka. Tjintu tjapanpala paṭara piyuku ngatapuka palunya wantirriyanu. Yankula wiya malaku ngalya yanu, kutu kutju maa yanu.

*Puuta tiñanguruya tjarukatirra yanku
Yurrunitja 8:13-22*

Palunyatjanu Nuuwalu katutjayiti yalanu, nyakukitjangku. Nyangulpi kapi wiima kutju ngarrinytjala, kapi yulpata�ulpata. Palunyangka Nuuwanya tjikitji yantañan waan nyinangu. Palulanguru pira kutjarra nguwanpa nyinangu. Nyangulpi manta turayirringutjalpi. Katutjalu Nuuwanya watjanu, “Kala, yarralpiya!, waltyjararranpa. Kuka kutjupa kutjupa tjuṭa walatjurra!, kukawiya tjutatarra, yankulaya tjuṭarrinytjaku.” Palulanguru Nuuwanyangarri puutangka tjarukatirra yanulpiya. Kuka tjuṭa waltyjararra waltyjararralpiya tjarukatirra yanu. Nuuwaluppi puli tjuṭa mantjira ngalya katirra tjunu, tiipula palyalkitjalu. Kuka palunya manta ngurrara kutjupa kutjupa Nuuwalura pungkula ngarritjunu Katutjaku, yilkari ngurraraṭtarra. Ngatapuka kutju,

kuka tjulpu kutjupa, yiimiyu kutju, kipara kutju. Yalatjira kutjuṭu kutjuṭu pungkula ngarritjunu. Katutjakulpira ngarritjunkula kunatinpa palunya tjuta kutjara wantingu, Katutjanya wal^kulkitjalu.

Kuka palunya pantira mayutju Katutjanya yunyparringu. Yalatji watjanu, “Yaŋangu tjuta ngula kuyarringanyingka, wiyaŋa kapi pulkangka piyukuna tjananya wiyalku. Wantikuṇa tjananya. Nintiluṇa kulinī yaŋangu yuwankarralu kuya palyanyangka. Yaŋangu tjuta kuka tjutatarra, wiyaŋa tjananya piyuku kapingka wiyalku. Ngaatja yiltanā nyurranya watjanī.” Katutjalu watjanu, “Manta kutu ngaranytjala, yaŋangulu waarrkarrirra mayi pakaltjingarantjaku. Mayi palya tjanampa pakanmalpa mantanguru. Pakara pulkarrinytja mantjiraya tjunamalpa. Tjin̄tu pakara tjarrpamalpa, munga ngarala tjinturrimalpa.”

*Katutjalu Nuuwala watjalku
Yurrunitja 9:1-17*

Katutjalu tjananya tjukarurru palyalkitjalu, watjanu tjananya, “Nyinarranyurra pipirri mantjilku. Palulanguruya maa tjutarriku, nyurrangarrimpa kapalipiṭi, tjamupiṭi, piyukuya maa tjutarriku. Ngurra tjiwarriwarriwanaya nyinayinku. Nyurrangarri mayutju nyinaku, kuka tjutaku, kukawiya tjutaku, kapi ngurraraku, manta ngurraraku. Ngulunyngulunypa nyurrangarrimpaya nyinaku. Palya tjananya nyurrangarri pungkula ngalkula nyinamalpa. Yukirinā nyurrampa pakaltjingantjatanu,

palyanyurra ngalkula nyinamalpa. Yalatjina nyurranya yunganyi. Kuka pungkula ngurrka yintira wiyarringanyingka kutjunyurra ngalku. Ngurrka yintintjawiya wiyanyurra ngalku. Ngayulu Katutjalu kulinji ngurrka palunya matupurra. Ngurrka paluru kana kanyini.” Katutjalu piyuku tjananya watjañu, “Yañangu kutjupa mirri pungkunyangka ngaparrtjiña palunya pungku. Kuka pikati lu yañangu warrpura yiluntankunytjala pikati palunya ngayulu mirri pungku.”

Katutjalu tjananya piyuku watjañu, “Ngayuluna Katutjalu yañangu palyanu, ngayunya nguwanpa nyinanytjaku. Yañangu kutjupaku yunytjuwiyarringkula mirri pungutjangka, yañangu kutjupa tjutalu ngaparrtjilu mirri pungkunytjaku. Palunyangka yañangu kutjupanya mirri pungkupayi, palunyanyurra ngaparrtji pungkunytjaku. Pipirri tjutanyurra palya mantjintjaku, nyupalimpañu waltya ngantitja tjutalingkulpi nyinanytjaku. Ngurra tjutawanaya nyinamalpa.” Katutjalu watjañu Nuuwala piyuku, palumpa katja tjutangka tarra, “Tjukarurruña nyurranya watjañi. Wiyana kapingka wiyalu piyuku, yañangu tjuta. Wantikuña tjananya. Tjutiranguña ngaratjunamalpa, yañangulu nyakula kulintjaku, wiyana nyurranya kapingka piyuku wiyalu. Ngayulutarra tjutirangu nyakula kuliklu panyapa watjantjatjanulu. Yalatji kulinutjalu wiyanja yañangu piyuku kapingka yiluntankuku.”

*Katutjalu wangka kutjupa kutjupa tjananya
palyalku*
Yurrunitjja 11:1-26

*Katutjaku ramarrirra, walytjalungkuya
pulkawaninytjakitjangku kulilku*
Yurrunitjja 11:1-9

Nuuwaku tjamu tjuta kapali tjuta, tjutarringuya, wangka kutjutjarraya nyinangu. Kakarraya nyinayinkula ngurra yini Papilunakuturringu. Manta palunyangkaya rawa nyinangu. Waala palyalkitjangkuya alatjingku watjanu, “Pakaralaka waarrkarri! Pulì nguwanpa tjutala palyala pilkitjanu!, tjintungka ngarirra piltirringkunyangka pulì nguwanarrinytjala.” Yalatjiya palyara pulì nguwanpa tjuta kanyiningi, waala palyalkitjangku. Kitì panyapa nganytjalpayiya mantjira kanyiningi. Watjanuya waala tjuta palyalkitjangku. “Waala kutju waṭawaralingkulaka palyala, yilkarikutu! Yanangu kutjupa tjutalulanyaya nyakula mirra waṇinytjaku. Yalatjilaka palyala!, ngurra kutjungkala tjungu nyinakitjangku. Ngurra tjiwarriwarriwana tjaalpan tjaalpa nyinanytjawiya.” Yalatjiya palyanu.

Palunyangka Katutjalulpi nyangu, waala palunya palyantjala, waala tjuta kutjupatarru. Nyakula Katutjalu kulinu, “Pala tjutaya nyinanyi walytjararranpa, wangka kutjutjarra, ngurra kutjungka. Tjana wiya alatji nyinanytjaku. Ngurra kutjupa kutjupakutuna tjananya wantirriyalku, ngurra kutjungkaya

nyinarrayanku pulkawaŋipayingkamarra. Wangka tjaalpan tjaalpaña tjananya palyalku, ngurra kutjupa tjutangka nyinanytjaku.” Yalatji Katutjalu tjananya wangka kutjupa kutjupa palyanu. Yiyanulpi tjananya ngurra kutjupa tjutakutu.

*Nuuwaku waltyta ngantitja tjuta, yini alatji
Yurrunitja 11:10-26*

Nuuwaku katja Tjiimalu Yapatjatanya mantjingu. Yapatjatalu mantjingu katja, Tjiilanya. Tjiilalu katja Yipanya mantjingu. Yiipalu katja Pilikanya mantjingu. Pilikalu katja Ruuwanya mantjingu. Ruuwalu katja Tjarukanya mantjingu. Tjarukalu katja Niyuwunya mantjingu. Niyuwulu katja Tiiranya mantjingu. Tiiralu katja Yipumanya mantjingu. Ngula Katutjalu watjanu Yipumanya yini kutjupa alatji, “Yipuramanya.”

*Katutjalu Yipumanya ngurra kutjupakutu
yiyalku
Yurrunitja 11:27—12:9*

*Yipumaku waltyta tjuta
Yurrunitja 11:27-32*

Tiiralu katja mankurrrpa mantjingu, yini Yipumanya, Niyuwunya, Yarananya. Yaranalu katja Laatanya mantjingu. Yipumalu miita Tjarayinya yaltingu. Pipirriwiyyapula rawa nyinangu. Tjilpi Tiiralu tjananya palumpa waltyta tjuta yaltingu, manta Kayinanalakutu yankukitjangku. Alatjiya yanu, Tiiranya, Yipumanya, Laatanya, Tjarayinya. Tawunu yini Yaaranya wantikatirra yankulaya ngururrrpa

nyinangu, tawunu yini Yaranangka. Palulaya rawa nyinangu, Yipumanyangarri. Nyinarraya minytjirringu, paapa tjanampa wiyarringu.

*Yipumanya watjalku yankunytjaku
Yurrunitja 12:1-3*

Palulanguru Katutjalu Yipumanya watjañu, “Nyuntupa walytja tjutanya wantikatirra pakara yarra!, nyuntupa ngurraṭarra. Ngurra kutjupangkan yankula nyinanytjaku. Nyuntu yankunytjala ngururrpañanta nintilku ngurra palunya. Kuliñiña walytja ngantitja tjuta nyuntupa nyinatjunkukitjangku. Yilta ngantitja tjuta nyuntupa nyinaku. Yilta kanyirananta tjukarurru palyanmalpa. Yalatjinanta tjukarurru palyantjala yañangu tjutantaya ninti nyinaku. Yañangu kutjupalunta tjukarurru palyantjala, ngayulunara tjukarurru palyalku. Yañangu kutjupalunta yinkaku, palunyangkaña ngaparrtji palunya yinkarra kuyalku. Yañangu tjutakuna tjanampa pukularrirra tjukarurru palyalku, nyuntutjun tjukarurru nyinangutjangka.”

*Yipumanya kala yankuku
Yurrunitja 12:4,5*

Katutjalu panyapa watjañu, palunyangkaya wantirra yanu, Yipumanyangarri. Alatjiya anu Yipumanya, miiṭa palumpa Tjarayinya, Laatanya, waarrkana tjutaṭarra.

*Manta yungkukitjangku piyuku Yipumanya
watjalku
Yurrunitja 12:6-9*

Yipumanyangarri manta Kayinanalakutu yanu tawunu Tjikimangkaya nyinangu. Katutjalu Yipumanya watjañu, “Ngurra palatja nyuntu nyanganyi palunyaña nyurranya yunganyi, nyuntupa kapali tjutañku tjamu tjutañtarra, kutunyurra kanyintjaku.”

*Yipumanya Laatanya kutjarra
Yurrunitja 13:1—14:24*

*Yulytja puntutjarra Yipumanya Laatanya nyinamalpa
Yurrunitja 13:1-9*

Manta Kayinanala nyinarra manta Yitjipi-lakutu anu, Yipumanyangarri. Yitjipila nyinarra paluru kutjarra yulytja pułkapula mantjiñu. Alatjipula mantjiñu, mani kuulta, puluka tjuta, tjiipi tjuta, nanikuta tjuta, waarrkana tjutañtarra. Kanya Laatalu kanyiningga, puluka tjuta, tjiipi tjuta, nanikuta tjuta, waarrkana tjuta. Manta palulaya nyinarra piyukuya malaku yanu, manta Kayinanalakutu.

Pulukatarra kanyirapula puñu kulinu, ngurra kutjungka kanyilkitjangku. Palulanguru pikarringuyanku waarrkana tjutangku, puluka tjungurringkula yukiringka ngalkunytjala. Palulan-guru Yipumalu Laatanya watjañu, “Walytjarar-rali nyinanyi. Wiya waarrkana ngayukuñu tjuta pikarrinytjaku waarrkana nyuntupa tjutañya, tjungu nyinanytjawiya yankuli tjaalpan tjaalpa nyinanytjaku, pikangkamarra. Ngurra palun-yaku nyuntu yunytjurringkunyangka ngayulu ngayuku kuka tjuta ngurra kutjupakutu katirra

nyinaku Watjalani! Nyuntu ngurra yaalytjingka nyinakitja yunytjurringanyi?”

*Laatalu Yipumanyalpi wantirra yanku
Yurrunitja 13:10-13*

Laatalu parra nyakula paluru nyangu karru Tjuutanangka tjayitingka, yukiri pulka ngarala wañinytjala. Manta palula kapi puntu ngarringi, karruwana. Yalatji nyakula watjanu, “Ngayulu palyaña nyinaku, karrungka yila.” Palulanguru kala Laatalu katingu puluka tjuta, yuwankarra, tjiipi nanikutañarra. Kala tawunungka yila nyinangu, Tjutumala. Tjutumanya ngurrara tjuña Katutjaku mingarrtju tjuña nyinangi, kanya Yipumanya manta Kayinanalawana palya nyinangi.

*Yipumanyalpi Katutjalu piyuku watjalku
Yurrunitja 13:14-18*

Laatanya yanutjangka Katutjalu ngan̄ti Yipumanya watjanu, “Puli palanguru ngarala parra nyawalpilta!, nyuntupa ngurra palunya. Nyuntupa walytja ngan̄titja tjutalu ngula kanyilku. Nyuntupa walytja ngan̄titja tjutalingkuya nyinaku, puñu nyuntu kaantamilalku. Ngurra palulawana nyuntu tjarukatirra ankula nyakulirra!” Palunyatjanu yankula ngurra Yipurunala tiipula nguwanpa palyanu, pulitjanu. Tiipula palula kunatiñpa pungkula kutjanu, Katutjanya pulkapungkukitjangku.

*Yipumalu Laatanyangarri mantjilkatiku
Yurrunitja 14:1-16*

Ngurra kutjupatjanuya ngalya yanu mayutju puupalaku, tjilirratjarra tjuṭa. Palunyatjanuya pungangi tjananya Tjutumanya ngurrara Kumuranya ngurrara. Laataku walytja tjungurringangi tjanalawana. Palunya ngurrara tjuṭaku mani yulytja kungka tjuṭa tjananya paluru tjana katingu, Laatanyangarri palumpa yulytjaṭarra. Yalatji tjananya pungkula katingutjangka wati kutju tjalkalungu, Yipumala tjakultjunu. Kala Yipumalu kuliṇu Laatanya katingutjangka. Palumpa tjilirratjarra watjanu kutjungkarirra yankunyjtjakuya. Kala Yipumalulpi tjananya katingu tjilirratjarra tjuṭa. Wanaraya Yuupangka yulparirra tjananya pungkula pungkula ngulutjingara wantirriyaṇu, mungangka. Mani, yulytja, tjiipiṭarra, Laatanyangarri ngalya katingu malaku.

*Milkitjistikalu Yipumaku Katutjanya tjapilku
Yurrunitja 14:17-24*

Yipumalu tjananya ngalya katinyangka ngururrpa, Tjutumaku mayutju tjungurringu, mayutju kutjupa yini Milkijitikanyaṭarra. Milkijitikanya palunya Tjiilumanya ngurrara tjuṭaku mayutju nyinangi. Paluru Katutjaku tulkuṭku mayutju nyinapayi. Paluru Yipumaku mayi anta pulakina ngalya katingu yungu. Katutjanya tjapiṇu Yipumaku, “Mayutju Katutjalunta tjukarurru palyanmalpa, manta yilkari palyalpayilu. Tjilirratjarra kutjupa tjuṭa ngalya yankunyangka, nyuntu palunya tjuṭa ngulutjingalku, Mama Katutjalunta

aalpamilaningga. Palulanguru nganana Katutjanya walkuṇi.” Kala, Milkitjistikakura yungu ngalytjapungkula mani anta yulytja, tjiipiṭarra.

Tjutumaku mayutjulu Yipumanya watjanu, “Mani tjiipi yulytjaṭarra nganampaṇu yunganyilatjunta. Ngayuku walytja tjutaṇya kutjuṇi yuwa!, waarrkana tjutaṭarra.” Yipumalu watjanu, “Katutjangka mirangka kanyintjawiyalunanta yungku, mani yulytja tjiipi tjuta, walytja tjutaṭarra. Wiyanā kanyilkku, nyuntupa miyala. Nguntinanta nyuntupa ngalya katingu, yungkuṇanta nyuntu alatji kuliltjipingkamarra. ‘Ngayuluṇara Yipumaku mani yulytja tjuta yunganyingka, Yipumanya yulytja puntutjarralpi nyinanyi.’” Yipumalu piyku watjanu, “Katutjaluṇi yungkupayi mani yulytjaṭarra.”

Yipumakura tjukarurru palyalkitjangku wat-jalku

Yurrunitja 15:1—18:15

Yipumalu tjukurrpa nyakula kulikku

Yurrunitja 15:1-4

Yipumanya ngurrangka nyinarra tjukurpalpi nyangu. Katutjalu watjanu alatji, “Ngulurrinytjawiya ngayuluṇanta yanṭayanṭalku, kutjupa tjutaluntaya pungkutjipingkamarra. Purinypangku kanyiraṇanta ngurra, yulytjaṭarra yungku.” Yipumalu watjanu, “Mayutju Katutja. Nyuntu kutju pułkanya nyinanyi, ngayulu puṭu kulinī, pipirri wiya mantjintjatjanungku. Ngayuku

katjawiyangka ngayuku waarrkanalulpi mantjilku, ngurra yulytjaтарra, Yalitjalu, ngayulu wiyarringkunyangka. Ngayulu yunytjurringanyi ngayukunu katja walytjalu mantjintjaku.” Katutjalu Yipumanya watjanu katja yungkukitjangku, “Yalitjalu wiya nyuntupaŋu ngurra yulytjaтарra kanyilkku, katja nyuntupa walytjalu. Ngula yutirringkula pulkarringkula kanyilkku.”

*Katutjalu Yipumanya piyuku watjalku
Yurrunitija 15:5-16*

Katutjalu watjanu Yipumanya, “Yurilkutu pakara yarra!” Yipumanya pakara ngaranyingka Katutjalu piyuku watjanu, “Pintirri tjutalpi nyawa! Yulta, nyuntu puŋu kaantamilalku, tjutalingku. Pintirri pala tjuta nguwanpa nyuntupa walytja nganitja tjuta nyinaku, tjutalingku.” Katutjalu yalatji watjanutjangka Yipumalu puntura kulinu, “Yiltalingkuŋi watjanu.” Palulanguru Katutjanyara pukulpa nyinangu, palumpa wangka kulinutja.

Katutjalu Yipumanya piyuku alatji watjanu, “Ngayulunanta mayutjulu yanṭayaṇṭara ngalya katingu tawun Yaaralanguru, ngurra ngaatjananta yungkukitjangku.” Yipumalu tjapinu, “Yunytjurrinya manta ngaatjanya kanyilkitja. Kanyilkitaluŋa puŋu kulinu, yiltanin yungku? Nintilanı ngayulu yilta kanyintjaku!” Katutjalu watjanu, “Kala, nintilkunanta. Kuka tjutatju ngalya katirra tjurral!, puluka kutju, tjiipi kutju, nanikuta kutju, ngatapuka kutjarra.” Yipumalu ngalya katirra pungkula

tjananya tjunu. Kuka palunya kilytjuntankula tjunkula wanañu. Yalatji paluru palyañu, puluka tjiipi nanikuta. Tjuŋpu kutju, paluru winki kutjarra tjunu. Tjuŋpu kutjarra kilytjuntankuwiyangkukampa tjunu. Palulanguru Yipumanya ngulu ngarirrira yanku puntulpi ngarringu. Katutjanya paluru tjukurrrpa nyangu.

Yalatji Katutjalu watjañu, “Nyuntupa walytja ngantitja tjuta ngula manta kutjupangka nyinamalpa. Palunyangkaya kutjupa tjutangku mayutju kuya tjutangku tjananya kanyinmalpa, paña palula. Yuwa, yilta tjana waarrkar-ringkula nyinamalpa, mayutju kuya tjutaku. Rawa puntuya nyinamalpa ngurra palula, puu yantaña yiya. Ngurra palunya ngurrara tjuta, mayutjutarraña tjananya pungku. Palunyatjanu nyuntupa walytja ngantitja tjuta manta ngaakutuya ngalya yanku. Mani anta yulytja pulkaya mantjira ngula ngalya yanku ngurra ngaakutu. Ngaangkalpiya kutu nyinamalpa.”

*Piyuku manta yungkukitjangku watjalku
Yurrunitja 15:17-21*

Tjin̄tu palunya mungarringu. Palulanguru Yipumalu nyangu kanilpatjarra nguwanpa, ngalya yankunyangka, tjangi tili nguwanpatjarraṭtarra. Palunya nyangu kuka pangkapungkula tjunutjawana ngalya yankunyangka. Palulanguru Yipumalu kulin̄u, Katutjalu watjañutjangka, “Yiltaña tjanampa manta ngaatjanya yungku, nyuntupa walytja ngantitja tjutaku. Ngurra tjanampa manta winki ngaraku. Wilurarra Yitjipilakutu maa

ngaraku. Kakarrara karru yini Yupurititjalakutu maa ngaraku. Ngurra ngaa ngurrara tjutaku tjanampa yilta kanyilku, nyuntupa walytja ngantitja tjutalu.”

*Yayikalu mantjilku katja Yitjumilanya
Yurrunitja 16:1-6*

Yipumaku miita Tjarayinya pipirri mantjintjawiya nyinangu, rawa. Palumpa waarrkana kungka Yayikanya tjungupula nyinangi, Yitjipinya ngurrara. Yipumanya yalatji watjañu, “Mayutju Katutjalunu marrkunu nguwanpa, pipirri mantjintjawiyaña nyinanyi. Palunyangka Yayikanyapulan ngarrinytjaku, pipirri ngayuku yutitjarrinytjaku.” Yipumalu yuwa wangkangutjangka Tjarayilu Yayikanya yaltirra ngalya katirra ngaratjunu, Yipumaku, ngarrinytjakupula.

Yayikanya tjunitjarrarringkula Tjarayiku yunytjuwiyara nyinangu. Palulanguru Tjarayilu Yipumanya watjañu, “Yayikanya yunytjuwiyatju nyinanyi, nyupalipulan ngarringutja. Tjungu ngarrinytjawiyangku nyuntu wantimara, ngayuku yunytjuwiya nyinatjipingkamarra.” Yipumalu Tjarayinya watjañu, “Yayikanya nyuntupa waarrkana nyinanyi. Nyuntu yunytjurirra palyala!” Palunyatjanu Tjarayilu pikarringkula pungkutjipingkamarra Yayikanya ngululpi yanu. Ngula kutju, paluru ngalya yanu ngurra palunyakutu nyinangu. Palulanguru Yayikalu katjalpi mantjinu. Yitjumilanyalpi yiñ ngarringu. Palulanguru Yipumalu yinilpi ngula watjañu, “Yitjumilanya”.

Katutjalu Yipumanya Tjarayinya yini kutjupa watjalku

Yurrunitja 17:1-6,15,16

Palulanguru Yipumanya rawalingku nyinangu, yiya nayintyi nayinpala. Palunyangka Katutjalulpi palunya watjanu, “Ngayuluñanta mayutju tiña nyinanyi. Palunyangka nyuntu tjukarurru kutu nyinama!, kuya palyantjawiya. Ngayuluñanta watjani, nyuntupa waltyja ngañtitja, tjuñalingku nyinaku.” Kulira Katutjanya wal̄kulkitja Yipumanya watungarangu. Katutjalu piyuku watjanu, “Yiltan̄anta tjamu tiña nyinatjunku, ngurra kutjupa ngurrara tjuñakuñarra. Yini palunya Yipumanya wiyalpin nyinaku, yini kutjupalpin nyinaku, ‘Yipuramanya’.” Katutjalu Yipuramanya piyuku alatji watjanu, “Nyuntupa miīta Tjarayinya wiyalpi watjala!, yini palunya ‘Tjaaranyalpi’ watjala! Ngayuluñanta watjani, nyuntupa miītalu katja mantjilku, ngayuluñara yungkunytjala. Manta kutjupa kutjupa ngurrara tjuñaku Tjaaranya kapali tiña nyinaku.”

Katutjalu watjalku tjana watirrinytjaku

Yurrunitja 17:9-14

Katutjalu Yipuramanya alatji watjanu, “Nyurrangarri tjukarurru kutu nyinanytjaku, ngayuluñanta watjanutjawana. Nyuntupa kapali tjuta tjamu tjuta wangka palulawana tjukarurru nyinanytjaku. Ngayuluñanta watjanutjawana katja tjutanyurra tjamu ngañtitja tjuta wati palyantjaku. Yalatji kutunyurra palyantjaku. Nyuntupanu pipirri

mantı yutirrinyangka tjintu tjapanpala ngarrinytjatjanu kutju nyuntu wati palyantjaku, nyuntupañu waarrkanakuñutarra. Tjana watirrinytjatjanungka yañangu tjutalu kulilku, ‘Yipuramanyangarriya watirrinytja tjuñalpi nyinanyi, Katutjalu manta yungkukitjangku tjananya watjanutjangka. Yilta Katutjaku walytjalingkuya nyinanyi.’”

*Katutjalu watjalku Yipuramaku katja yungkukitjangku
Yurrunitja 18:1-15*

Tjintu kalala Yipuramanya tiinta yalytjurangka nyinangi. Palunyatjanu paluru nyangu wati mañkurrpa, ngalya yankunytjala, tiintakutu. Nyakula tjanala yankula pupakatingu. Pakaralpi tjananya watjañu, “Ngurrakutuya ngalya yarra, wayinta yankunytjawiya! Puri palangkaya nyina!, kapina nyurrampa mantjintjala, tjinanä nyurranya paltjintjaku. Kuka mayitarrana nyurranya yungku, ngalkuranyurra palya yankunytjaku. Yunytjurringanyiña nyurranya yanťayantalkitja.” Kuliraya watjañu, “Yuwa, puringkalatju yankula nyinaku.” Yipuramalu yankula kukapa mayi mantjiñu. Ngalya katirra tjananya yungu, puringkaya nyinanytjala.

Ngalkulaya Yipuramanya tjapinu alatji, “Yaalytji Tjaaranya nyuntupa miňa?” Watjañu tjananya, “Tiinta palangka yila nyinanyi.” Palulanguru wati kutjungku watjañu, “Ngula, maanytja nayinpalangkaña ngalya yankunytjala Tjaaralu katja mantjilku.” Tjaaralu

tiintangka yunngu nyinarra wangka paluru kuliñu. Tjaaranya wulkumanu nyinangu, Yipuramanyaтарра tjilpi nyinangu. Tjaaralu wangka palunya kulira purinypa yinkangu. Kuliñungku, “Wiya wulkumanulu kutjuna katja mantjilku. Yipuramanyaтарра tjilpilingku nyinanyi.”

Wati palunya mayutju Katutjanya yilta ngarangu, yañangu nguwanpalingku. Alatjilu Yipuramanya tjapiñu, “Nyaaku Tjaaranya yinkanyi? Walytjalungku watjañu, ‘Ulkumanulu wiyanा pipirri mantjilku.’” Tjaaranya ngulurringkula wiya wangkangu, “Wiyana yinkangu.” Mayutju paluru kuru watjañu, “Yuwa. Yilta nyuntu yinkangu.” Mayutju paluru piyuku watjañu, “Mayutju Katutjalu wiya puñu palyalpayi. Panyapananta watjañu, maanytja nayinpalangkanा ngalya pitjanyangka, Tjaaralu yilta katja mantjilku.”

Yipuramalu tjapilku Tjutumanya ngurrara tjutaku

Yurrunitja 18:16-33

Wati paluru tjana Yipuramanyaтарра tjungu yanu puli murrpunguru Tjutumanya nyakukitja. Mayutju Katutjalu yañangu nguwantu watjañu, “Yañangu tjutangkuyanku watjani, tawunu pala ngurrara tjutangkuya kuya puntu palyalpayi. Ngurra palulawanala yankula nyakulinkuku, yitjipungkukitjangku. Wanyula nyakunytjakuwarri yarra!”

Wati paluru kutjarra yanu Tjutumalakutu. Katutjanya Yipuramanyapula tjungu ngarala

wangkangi. Yipuramalu tjapiṇu, “Yilta tjananya nyuntu ngurra palunya ngurrara pungkula wiyalku, yuwankarra? Kutjupa tjuṭa palya nyinanyangka, wantikun? Tjinguru kuya palyalpayi kutju yitjipungkunytjaku? Tjinguru yañangu pipitiyipala palya nyinanyangka, wantiku tjananya?” Katutjalu kuliralpi watjañu, “Tjinguru yañangu pipitiyipala palya nyinanyangka, wantikuna tjananya.” Yipuramalu piyuku kulira tjapiṇu, “Tjinguru yañangu puutiyipala palya nyinanyangka, nyuntu wantiku?” “Yuwa wantikuna.” Yalatji Yipuramalu mankurrrngara tjapiṇu Katutjanya. Palunyangka yitjipungkuwiyangku wantikitja wangkangu. Palunyatjanu Yipuramalu piyuku tjapinu, “Tjinguru yañangu tiinpala palya nyinanyangka, nyuntu tjananya wantiku?” Katutjalu watjañu, “Yañangu tiinpala tjinguru palya nyinanyangka, wantikuna tjananya.” Yalatji wangkarra Katutjanya yanu, kanya Yipuramanya palumpa ngurrakutu małaku yanu.

*Tjutumanya anta Kumuranya ngurrara tjuṭa warungku wiyalku
Yurruntitja 19:1-29*

*Marrkulku pulanya Laatalu
Yurruntitja 19:1-3*

Wati paluru kutjarra nyalpitjarrarringkula anu tawunu Tjutumalakutu. Paluru kutjarra piyuku yañangu nguwanarringkula mungarrtji mungarrtjipula tjarrpangu. Laatalu pulanya ngalyananyingka nyangu. Paluru tjanala

yankula tjungurringkula yanu palumpa ngurrakutu. Laatalu pulanya watjañu, “Ngayuku ngurrakutupula ngalya yarra, ngarrikitja! Tjintungkapulan palya ngarrirra yanku.” Laatanyapula watjañu, “Wiya. Palyalitju ngarriku ngaangka yurilta.” Ngurrangka tjarrpatjunkukitjangku pulanya watjañu. Palunyangkapula palumpa ngurrangka tjarrpangu.

*Wati tjuta kuya palyakitja nyinamalpa
Yurrunitja 19:4-11*

Paluru kutjarra tjaapa ngalkuñu ngarrikitja. Palunyatjanu wati tjutalpiya ngalya yanu waalakutu. Laatalu puñu kuliñu, wati tjutaluya parra yangatjunutjangka, palumpa ngurrangka. Laatanyaya watjañu, “Wati palunya kutjarra pulanya pakaltjingala!, ngaangkalatju nyinanytjaku.” Wati palunya kutjarra kungka nguwanpa kanyilkitjaluya kuliñu. Laatalu kulira tuuwa yalytjurankula tjananya watjañu, “Walytja tjuta. Kulilaya! Wati palunya kutjarrangka wiyanurra kuya palyantjaku. Ngayuku yuntalpa kutjarra kutjuña nyurrampa ngalya katiku, watiku ngurrpa kutjarra. Palunya kutjarrangka kutjunnyurra kuya palyantjaku.”

Kuliraya mirrpañarringu waalangka tjarrpakitjaya. Palunya kutjarralupula Laatanya puulamilara yunngukutu, tuuwa patiñu. Palunyatjanu paluru kutjarralupula kuru tjananya patiñu, yatjikilu. Palunyangka kuru patirringkulya puñu kuliñu. Tuuwakuya puñu pampura wantingu.

*Nyalpitjarra kutjarrangkupula Laatanya-garri katiku, warungkamarra
Yurrunitja 19:12-21*

Nyalpitjarra kutjarrangkupula Laatanya alatji watjanu, “Watjalkulitju tawunu ngaatjanya kamparra wiyanjtaku. Yalatjingkamarra nyuntupa walytja tjuta tjananya wanma kati! Mayutju Katutjalulinyatju wantirriyanu ngurra ngaatjanya nyakunytjaku. Kuwarri paluru kulin ngurra ngaangka yañangu tjuta, kuwarri nyinanytja tjutanya wiyalikitjangku.” Laatalu pulanya mungangka puwat watjanu waputju kutjarra pakara yankunytjaku. Laataku wangkapula kulira wantingu. Tjin̄tukutu nyalpitjarra paluru kutjarralu tjananya puwat watjanu, parrpatu yankunytjaku, Laatanyangarri. Palunyatjanu Laatanyangarri mara witira katingu, palumpa miita yunta kutjarratarra. Tawunungka wañma ngarala nyalpitjarra kutjulu tjananya watjanu, “Kana nyinakitjaya tjukarurru tjalkaluwa, puli nyarrakutu!, ngunt̄ilangarala nyakunytjawiya.”

*Tjutumanya anta Kumuranya kamparra wiyalu
Yurrunitja 19:23-29*

Tjalkalungkulaya Laataku miitalu waru kampattyala taañarringkula nyangu. Nyakula puli nguwanarringu. Tjin̄turringkula Laatanyangarri ankula tawunu wiimangka tjarrpangu, yini Tjuuwangka. Palunyangka tawunu kutjarrangka katunguru wañingu waru, Katutjalu, Tjutumangka anta Kumurangka. Ngurra pala

kutjarra ngurrara, yanangu uwankarra kam-parra wiyanu.

Wangka palunya, Yipuramanya kulira Laatanyangarri kananu, warungkamarra, Katutjalu. Tjintu palula Yipuramanya puli katu kalparra waru puyu puntu nyangu.

Yipuramalu katja ngarritjunku kunatinpa yungkunyta nguwanpa.

Yurrunitja 21:1-12; 22:1-19

Yatjikanya yiti ngaanmanku

Yurrunitja 21:1-12

Mayutju Katutjalu yurrunpa watjanutjangka Tjaaranya pipirritjarralpi nyinangu. Nyinarra katjalpi mantjinu. Katja mantjintjala Yipuramalu yini palunya watjanu, "Yatjikanya." Tjintu tjanpalpa nyinangutjangka palunya watinu, Yipuramalu, Katutjalu yurrunpa yalatji palyantjaku watjanutjangka. Yatjika paluru yititjanu maa tjinarringu. Tjungupula yinkangarapayi Yitjumilanya kutjarra. Yitjumilanya waarrkana Yayikaku katja nyinangi. Yinkangaralapula Yatjikaku pikapikarringu, Tjaaralu nyakunytjala. Nyakula Yipuramalakutu yankula watjanu, "Waarrkana palunya pulanya maamararra wantirriyala! Wiya Yitjumilalu kanyilku yulytja nanikuta pulukatarra, nyuntu wiyarrinytjala. Ngayukunu yulytja kanyilku, Yatjikalu. Kala wantirriyala pulanya!" Yipuramalu katjaku putu kulinu, Yitjumilaku. Palulanguru Katutjalu watjanu, "Nyuntu pulanya palya wantirriyantjaku, Tjaaranya yunytjurringutjangka. Panyapañanta watjanutja kulila! Nyuntupa katjalu tjamupiti

kapalipiti tjuṭa kanyilku, Yatjikalu. Ngurra tji-warriwarriwanaya nyinaku.”

*Katutjalu Yipuramanya yatjilku
Yurrunitja 22:1-5*

Palunyatjanu Yipuramanya yarrkantjakitjangku yaltingu, Katutjalu. “Yipurama.” Kulira Yipuramalu watjaṇu, “Ngaatjaṇa ngaranyi.” Katutjalu piyuku watjaṇu, “Ngayuluna kulinji, nyuntu katjaku Yatjikaku puntura yunytjurringanyi. Katja palunya yaltirra kati! Manta Murayalakutupula yarra! Nyupali yananyingka pulinqantapula nintilku, murrpu. Pulı palula kalparra katja nyuntupa mirri puwa!, kunatinpa ngayunya yungkukitjangku.”

Mungawinki pakara Yipuramalu waru kurkalpa tjuṭa mantjiṇu karrpira yuṭitjunu tungkiyingka. Yatjikanya waarrkana kutjaratarrpa pulanya yaltingu. Yaltirra tjananya katingu.

Tjintu maŋkurra yankula Yipuramalupi nyangu waṇma, ngurra palunya ngaranytjala. Waarrkana kutjarra pulanya watjalkatingu, “Tuungkiyipula kanyila ngaanguru!, nyarrakutlitju yananyingka, Katutjangka wangkakitja. Wangkarralitju malaku ngalya yanku.”

*Yipuramalu Yatjikanya katiku mirri pungkunytjaku
Yurrunitja 22:6-9*

Yipuramalu watjaṇu Yatjikanya waru kurkalpa katinytjaku, kanya Yipuramalu katingu tjuula waru tjangitarra. Tjungupula yankula Yatjikalu kulira yaltingu, “Mama.” Yipuramalu

watjañu, “Nyaakuñin tjapiñi?” Yatjikalu watjañu, “Tjangi anta kurrkalpa kutjuli katiyananyi. Yaalytji Katutjanya kunañinpa yungkunytjaku?” Yipuramalu watjañu, “Katutjalulinya yungku, kunañinpa.”

Puli palulapula kalparra Yipuramalu pulingka tiipula nguwanpa palyañu. Waru kurrkalpa tjunkula Yatjikanya witira karrpira kurrkalta katuwana ngarritjunu.

*Yilkari ngurrarangku Yipuramanya
marrkulku, Yatjikanya wakalpayingka
Yurrunitja 22:10-14*

Yipuramalu tjuulatjarra mara katurringu wakalkitja. Palunyangka ilkari ngurraralulpi palunya marrkuñu, “Yipurama, kulila!” Yipuramalu watjañu, “Kulininqanta.” Ilkari ngurraralu piyuku watjañu Yipuramanya, “Katja nyuntupa wanti, wakalwiyangku! Nyuntu mularrpa pungamara katja nyuntupa, kaangkinytjingku. Nyuntu yilta Katutjaku kaangkinytji mularrpa.” Yipuramalulpi nguntılangularala nyangu tjiipi watiyangku nganytjanutja. Kala palunyalpi Yipuramalu pungkula kunañinpa ngarritjunu, katja palumpakunu tjuungka. Yipuramalu ngurra palunya yini watjañu, “Katutjalu yungkupayinya”.

*Katutjalu piyuku watjalku Yipuramaku
tjukarurru palyalkitjalu
Yurrunitja 22:15-19*

Katutjaku waarrkana yilkari ngurrara paluru Yipuramala piyuku alatji tjakultjunu,

“Mayutju Katutjalunanta wangkanyi. Yilta tjukarurruṇanta palyalku. Nyuntupa katja kaangkintjingku yilta ngarritjunu, mirri pungkukitjangku, kunatinpa yungkukitjangku. Yilta nyuntu ngayunya kuliṇu, katja kanyilwiyangku.” Katutjalu watjanu, “Nyuntu kuliṇi piṇṭirri tjutalingku, nyuntu mungangka nyakupayi. Nyuntupa waltya ngantitja, tjutalingku nyinaku, ngurra tjiwarriwarringka. Tali nyuntu puṭu kaantamilara wantiku, tali kutjupa tjuta ngaramalpa, waṇma. Yalatji nguwanpa nyuntupa waltya ngantitja tjutalingku nyinaku. Yaŋangu pungkupayi tjutangkamarra, ngayuluṇa tjananya yaṇṭayanṭara kanyinmalpa. Yilta nyuntupa tjamu tjutangku tjananya tjana payira wantirriyalku. Ngurra kutjupa kutjupa ngurrara tjutangku nyuntupa tjamu tjutanya nyakula kuliklu, ‘Yilta Katutjalu tjananya yaṇṭayanṭara kanyini. Palulanguru ngananaṇalpi tjapintjaku, Katutjalu nganaṇanyalpi yaṇṭayanṭara kanyintjaku.’ Yilta nyuntupa tjamu tjuta tjukarurruṇa tjanampa kanyilku, nyuntu kaangkintjingku katja nyuntupa ngarritjunu, mirri pungkukitjangku.” Katutjalu yalatji pulanya wangkangu. Palulangurupula Yipuramanya katja palumpa tjarukatirrapula yanu. Waarrkana kutjarrangkapula tjungurrirra yanu, ngurra Piitjpalakutu. Ngurra palula Yipuramanyangarri tjunguya nyinangi.

*Yatjikalu miṭa mantjilku
Yurrunitja 23; 24; 25:7-9*

*Yipuramaku miita wiyarriku
Yurrunitja 23:1-19*

Tjaaranya yilungu, Yipuramaku miita. Paluru rawalingku nyinangu wanaranangi yantaṭan tuuntiyi tjapan yiyyangka wiyarringu. Ngurra Yipurunala Yipuramanya miitawiyarringu. Tjana kulira yulangu. Paluru mirri wantirra yanu tjapilkitalu, palumpa mirri miitaku manta payimilantjaku. Paluru tjapinu Yiitjaku tjamupiṭi manta payimilalkitjangku. Tjana wangkangu, “Yipuranaku ngurrangka kulpi yini Makapilanya ngaranyi.” Yipuramalu tjananya tjapinu, “Tjinguru nyurrangarri wati palunya tjapilku?, kulpi palunya ngayulu payimilantjaku?” Yipuranalu watjanu Makapilanya yungkukitjalu yintjanulu. Kala Yipuramalu marrkuṇu manitjarrangku payimilalkitjalu. Paluru yulta payimilau yanangu tjutangka kurungka, Yiitjaku tjamupiṭingka. Paluru małaku yanu palumpa walytja tjutakutu. Yipuramalu tjananya watjanu, “Ngayuku miitaña katirra kulpi Makapilangka ngarritjunku.” Palunyatjanu Yipuramalu katingu palumpa miitanya kulpingka tjunkunytjaku. Yipuramaku walytjapiṭiluya tjunkukatirra wantirra yanu.

*Yatjikaku miita mantjira ngalya katiku
Yurrunitja 24:1-9*

Yipuramanya tjilpilingkulpi nyinangi. Mayutju Katutjalu palunya yantayantara purinypangku yungkuła kanyiñgingi. Mani anta yulytja tjutatjarra nyinangi. Yipuramalu

yaltingu palumpa waarrkana tiñanya. Paluru watjañu, “Ngayuku katja ngaangka nyinanyi miñawiya. Nyuntu yalinytjarra yarra!, ngayuku walytja tjuñakutu. Yankulara miña mantjira ngalya kati, Yatjikaku! Nyuntu tjukarurru yarra!, ngurra palulakutu. Wiya mantjintjaku ngurra ngaa ngurrara. Tjukarurruñi watjala!, ngurra palunya ngurrara kutju mantjila! Yangkalpani pampura tjukarurru watjala!”

*Yirritiya yalatji watjara wangkapayi,
“Yangkalpani pampula!” Yilta wangkakitjalu.*

Waarrkanalu Yipuramanya tjapiñu. “Tjinguruna yankula ngurra palula puñu tjapilku, nyuntupa katjaku miña ngalya katinytjakitja. Tjinguruniya wiya watjalku. Wiya wangkanyingkaña yaalytjirriku? Tjinguruna ngalya yankula watjalku nyuntupa katjanya, yankula kungka palunya mantjintjaku.” Yipuramalu watjañu, “Wiya Yatjikanya ngurra palulakutu wantirriyantjaku. Ngurra ngaatjanya nyinarra kanyintjaku. Katutjaluní tjangkura yungu manta ngaatjanya, ngayulu kanyintjaku. Ngayuku walytja nganñitja tjuña kutu ngurra ngaangka nyinanytjaku.” Yipuramalu palumpa waarrkana piyuku watjañu, “Katutjalunta yilkari ngurrara ngalya wantirriyalku nyuntunya nintintjaku. Palurunta nintiku kungka palunya mantjira ngalya katinytjaku, Yatjikaku. Wiya wangkanyingka nyuntu wantirra ngalya yarra!” Yalatji waarrkana paluru yangkalpa pampura watjañu yankula miña Yatjikaku mantjintjaku.

*Waarrkana paluru Katutjanya tjapilku
Yurruntitja 24:10-14*

Palulanguru waarrkana tiṇa paluru watjanu kutjupa tjuṭanya kamula tiinpala mantjira ngalya katinytjaku, yankukitjangku ngurra yalinytjarra manta Mitjiputayimiyalakutu, Niyuwuku ngurrakutu. Rawaya yankula yankula ngurra palula mungarrtji tjarrpangu. Tawunungka waṇma kapi wiilangka tjana kamula tjuṭa pupatjunu, wiilangka yila. Mungarrtjiya kungka tjuṭaya kapi mantjilkitja ngalya yanu, wiilakutu. Palulanguru tjananya waarrkana tiṇalu nyangu kungka tjuṭa ngalya yananyingka.

Paluru Katutjanya tjapinu, “Kulilani! Nyuntu Yipuramaku mayutju tiṇa nyinanyi, kanya Yipuramanya ngayuku mayutju nyinanyi. Yipuramalunı ngayunya watjara wantirriyaṇu, Yatjikaku miṭa mantjira katinytjaku. Nyuntu Yipuramanya watjanu ngayunya nintintjaku. Kuwarrilpinı nintila kungka palunya! Ngaangkaṇa wiilangka ngaraku kungka tjuṭaya ngalya yankula kapi mantjilkuya. Palulanguruna tjapilku kungka kutjuluṇi kapi yititjunkunytjaku, yalatji, ‘Turaama tjurra! Yititjurraṇi ngayulu kapi tjikintjaku!’ Palulanguru kungka paluru watjalku, ‘Yuwa, tjikila! Ngayuluṇa maṇmara yintilku nyuntupa kamula tjuṭaku, tjikintjaku.’” Mamalakutu piyuku wangkangu waarrkana paluru, “Kungkaṇi yalatji wangkanyingka ngayuluṇa yilta kulilku, ‘Yiltanā kuliṇi Katutjalu

ngurrtjanu kungka ngaatja, Yatjikaku miita nyinanytjaku.’”

*Waarrkanalu tjapinutjangka Katutjalura tjukarurru nintilku
Yurrunitja 24:15-27*

Waarrkana paluru Katutjanya tjapira wi-yarringutjangka, kungka Ripikanya ngalya yanu, Pitjulaku yuntałpa, kapi mañmalkitja. Wati paluru Niyuwuku katja nyinangi. Niyuwunya Yipuramaku malanypa nyinangi. Ripikalnu turaama manyirrkangka katianangi. Kungka paluru yunpa palya ngarangi, watiku ngurrrpa. Ngalya yankula wiilangka kapi mañmara yanu katangka tjunkula, wayinta katikitjangku.

Palunyatjanu waarrkana paluru maa wanara tjapiṇu, “Turaama tjurra! Kapini yititjurra!” Kungka paluru Ripikalnu watjanu, “Palyaṇanta kapi yititjunku.” Tjilpi paluru tjikira ngarangi, wangkanytjawiya. Ripikalnu watjanu, “Ngayuluṇa nyuntupa kamula tjuṭaku kapi yintilku, tjana tjikintjaku. Rawangkuṇa mañmara yintilku.” Tjuṭangara mañmara tjanampa yintiṇu kañilpa tiñakutu. Wiyarringutjangka Ripikanya ngarangi.

Palunyatjanu waarrkana paluru riinga, kuultatjanu palyaṇutja mantjira yungu, kungka palunya mulya witintjaku. Riinga tiṇa kutjarra kutjupara mantjira yungu, manyirrkangka tjunkunytjaku. Yungkulara tjilpi paluru tjapiṇu, “Nyuntupa mama yini ngananya?” Ripikalnu watjanu, “Ngayuku mama yini ngaatja Pitjulanya nyinanyi. Paluru tjilpi Niyuwuku

katja, wulkumanu yini Milkakuñu.” Tjilpi paluru piyuku tjapiñu, “Palyalatju ngurra palula ngarriku, ngayuku waarrkana tjutañarra.” “Yuwa, palyanyurra ngarriku ngayuku mamaku waalangka. Waala tiñalampatju ngaranyi. Watiya yukiri tjuta ngaranyi, nyuntupa kamula tjutangku ngalkunytjaku.” Pupakatirra tjilpi waarrkana paluru Katutjanya yalatji wañkunu, “Walkuñinanta, Katutja nyuntu ngayuku mayutju Yipuramaku mayutju tiña nyinanyi. Nyuntuñinu katirra tjukarurrungku nintiñu Yipuramaku walytja tjutanya.”

*Piitjulalu watjalku Ripikanya palya katintjaku
Yurrunitja 24:28-53*

Ripikanya tjalkalungu palumpa maamakutu anta kaakakutu tjakultjarra. Ripikaku kaakalu yini Liipanalu kulira tjalkalungkula wiilangka yaltirra ngalya katingu tjananya, ngurra palumpakutu. Ngalya yankulaya tjarukatirra tjukarurru tjarrpangu waala palula. Tjarrparraya nyinangi Yipuramaku waarrkana tjutanya ngalkunytjawiya wantirra. Waarrkana paluru watjanu, “Mangarri kuwarripa, wanti! Ngayuluñu wangkakitja yunytjurringanyi.” Liipanalu watjanu, “Palyalinyatju watjala!”

Liipanalu anta Piitjulalu kutjarralu kulinjingu Yipuramaku waarrkanalu yara rawangku wangkangi, “Yalatjina watjanu Yipuramaluñi watjara wantirriyanu.” Watjara pulanya tjapiñu, “Tjingurupulan Ripikanya ngayuku mayutjuku katjaku yungkuku? Tjingurupulan wiya

kuliñi. Wiya kulirañipula tjukarurru watjala! Wiya wangkanyingkaña ngayulu kulilkú.” Liipanalú anta Piitjulalupula watjanú, “Mayutju Katutjalunta tjukarurru nintiñu, panyapan nyuntu wiilangka wangkangi. Wiyalitju wiya wangkaku, Katutjalunta tjukarurru nintiñu, kungka palunya. Palya nyuntu katiku Ripikanya Yatjikalu miiña mantjintjaku. Palyalatju kuliñi.”

Wangka palunya Yipuramaku waarrkananya kulira pupakatirra Katutjanya walkunu, waarrkana paluru. Walkura pakara Ripikaku yungu mani nguwanpa puli kuulta, puli tjiilpa puli kilaatja nguwanpa tjuña, mantarra palyatarrá. Liipanakutarrara yungu mani kuulta nguwanpa tjuta. Ripikaku maamakuñarrá yungu puli mani kuulta nguwanpa.

*Yatjikalu Ripikanya marriti mantjilku
Yurrunitja 24:54-67*

Ngurra palunyangka nyinarra Yipuramaku waarrkanalu Ripikanya manta Kayinanalakutu mantjira katingu. Yankula yankulaya mungarrtji mungarrtji tjarrpangu Yipuramaku ngurrangka. Palunyangka tjananya Yatjikalu nyangu kamula tjuñatjarra ngalya yananyingka. Yatjikanya yunyparringkula tjalkalungu tjanalawana paluru tjungurringu. Waarrkana paluru watjanú Yatjikanya, “Nyuntupa miiñatalju ngalya katingu, Yipuramaku walitja.” Palunyatjanu Yatjikalu kulira Ripikanya yaltirra katingu palumpa kallikutu. Tjungupula miiñatarra yunypa rawa nyinapayi.

*Yatjikanya yapuntarriku
Yurrunitja 25:7-11*

Yipuramanya tjilpirringkula wanaranangi yantaṭan tjapantyi payipi nyinarra paluru wiyarringu. Palumpa katja kutjarrangku Yatjikalu anta Yitjumilalú katirrapula kulpingka ngarritjunu, palumpa miita Tjaarala yila. Kulpi palunya yini Makapilanya Yipuramalu yurrunpa talatjarrangku payimilara wantingu, Yitatuku tjamu tjutangka, wati yini Yipuranala.

*Yitjuwunya antapula Tjikupanya nyinamalpa
Yurrunitja 25:19—28:5*

*Yitjuwunya anta Tjikupanya pipirri
ngaanmanku
Yurrunitja 25:19-26*

Yatjikanya yiiya puutiypalangka nyinarra miita mantjiṇu, Ripikanya. Rawapula nyinangi pipirri mantjintjawiya. Yatjikalura Katutjanya tjapiṇu. Katutjalu kuliṇu. Ripikanya tjunitjarra nyinangulpi. Pikatjarra nguwanpa nyinangi. Palulanguru Ripikalū tjapiṇu, Katutjanya. Mayutju Katutjalulpi watjaṇu, “Yiti kutjarranta yutirriku. Tinarringkulapula tjamupiti kapalipiṭi mantjilku. Katja yurrunitjaku ngantitja tjuṭa tjaalpa nyinamalpa, katja ngantitjaku tjutangkamarra. Yiltantapula yutirriku katja kutjarrapula. Katja ngantitja katja yurrunitjaku mayutjurrikura.”

Palulanguru Ripikalū katja kutjarra mantjiṇu, tjintu kutjungka. Katja yurrunitja pangki tjatjaka ngarringi yinyu puntu. Palunyangka yini watjaṇu yalatji, “Yitjuwunya.” Katja

palunya yutirringkula katja ngantitjalu luku witira kanyiningi, palumpa kut̄a. Palunyangka katja ngantitja yini yalatji watjanu, Tjikupanya. Palunya kutjarrapula yutirringu, Yatjikanya yi-iya tjikitjiyingka nyinangi.

*Yatjikanya Yitjuwuku layikirringamalpa, kala
Ripikanya Tjikupaku layikirringamalpa
Yurruntitja 25:27,28*

Pipirri paluru kutjarra tiñarringkula Yitjuwunya wilinyi yankula kuka pungkulinkula ngalya katipayi. Palunyangka paapara Yatjikanya yunytjura nyinapayi, kuka wakalpayiku. Kanya Tjikupanya ngurrangka nyinapayi. Palunyangka Ripikanya yunytjura nyinangi.

*Yitjuwulu mangarritjirratjangku par-
rpatungku watjalku
Yurruntitja 25:29-34*

Tjikupalu mangarri tjatjaka ngurrangka kutjalpayi. Yitjuwunya wilinyitjanu paltjatjirratja ngalya yanu. Ngalya yankula Tjikupanya tjapiñu, “Mangarritjirratjana. Mangarri tjatjakanyañi yuwa!” Tjikupalu palumpa kaakanya watjanu, “Kaaka. Nyuntu paapakunu yulytja tjuña mantjira kanyinmalpa, paapa wiyarrinytjala. Nyuntu watjalani!, ngayululpiña yulytja tjuña mantjira kanyinmalpa. Yalatjitet jun wangkanytjala, ngayululpiñanta mangarri yungkuku.” Yitjuwulu parrpatu nguwanpa watjanu, “Palya nyuntulpi yulytja tjuña mantjilku. Mangarriñi yuwa!, mangarriwiyanä nyinarra wiyarringkupayingka.” Tjikupalu

mangarri yungkukitjangku watjañu, “Wanyu. Paapakuñu yungkukitjaluni yilta watjala!, Katutjala kurungka.” Yitjuwulu watjañu, “Katutjangka kurungkañanta yilta nyuntulpi palya mantjintjaku, paapakuñu yulytja tjuta.” Palunyangka Tjikupalu mangarri palunya Yitjuwukura yungu.

*Ripikalu anta Tjikupalu kutjarrangku
Yatjikanya ngunytjinytjunamalpa
Yurruntitja 27:1-24*

Yatjikanya nyinayinkula manta Kayinalawana tjilpirrirra kuru paangalpi, paluru nyinangi. Waarrkana yaltirra watjañu, “Katja yurruntitjanya yaltirra ngalya kati!” Yitjuwunya ngalya yanu. Yatjikalu watjañu, “Katja. Nyuntu ngayuku ninti nyinanyi. Ngayulu waṭalpi tjilpirringulpi nyinarra wiyarringkukitja. Puwanarratjarrangku kuka wakaratju ngalya kati! Palunyangka kuka kutjaratju ngalya kati!, ngayuluña ngalkunytjakuna. Ngalkula Katutjanyañanta tjapilku, wiyarringkukitjangku. Katutjanya ngayulu tjapilku paluru nyuntupa tjukarurrungku palyantjaku. Yalatjilatju yirriti katja yurruntitjaku tjapilpayi.”

Yatjikalu Yitjuwunya wangka panyapa watjañingka, Ripikalu pulanya kulin̄ingi. Palulanguru Yitjuwunya kukakulpi yanutjangka Ripikalu yankula Tjikupanya watjañu, “Ngayuluña kuwarri kulin̄ingi nyuntupa paapangku Yitjuwunya watjantjala Katutjanya tjapilkitjangku.” Ripikalu Tjikupanya marrkuñu, yalatji, “Katja. Kulilañi! Ngayuluñanta watjani.

Nyuntu yankula yalatji palyala! Yankula nanikuta kutjarra pungkula ngalya kati!, ngayuluṇa kutjantjaku nyuntupa paapaku, Yatjikaku. Paluru kuka yalatjiku yunytjurripayi. Palulanguru nyuntulpi kuka palunya katirra yungku. Nyuntupalpi Katutjanya tjapilku. Katutjalu nyuntupa tjukarurru palyalku.”

Yirriṭiya tjilpirrirra katja yurruntitjaku Katutjalakutu tjapilpayi. Yalatji Tjikupalu kulinu, katja ngantitjalu. Paluru yalatji Ripikanya watjanu, “Ngayulu wangkanyingka palurunu kulilkukatja ngantitja. Tjingurunu paluru pampulku, yinyuwiya. Yitjuwunya yinyu tiñatjarra paluru kulilkuk. Ngunytjintjunanyingkañi paluru kuru watjalku.” Ripikalupl Tjikupaku maamangku watjanu, “Yalatji kulintjaku, wiya. Ngayuluñanta watjanı, yankula palyala!”

Palulanguru Ripikalupl kuka palunya kutjanu. Ripikalupl nanikuta pangki yinyutjarra mantjira Tjikupala karrpiñu, miñawana, nguntiwana. Yitjuwuku mantarrangka tjarrpatjunkula Tjikupanya palumpa paapakutu wantirriyanu, kuka anta mangarritjarra. Yatjikanya tjilpi paanga nyinangi. Tjikupalu katirra watjanu, “Paapa. Ngayulu ngalya yanu.” Yatjikalu tjapinu, “Nyuntu ngananya? Nyuntu tjinguru katja yurruntitjanya, tjinguru katja ngantitja.” Tjikupalu ngunytji wangkangu, “Ngayulu katja yurruntitjanya, Yitjuwunya. Nyuntu panyapa ngayunya watjanu. Yankulaña kuka pungkula ngalya katingu. Pakara nyina! Kuka ngaatjananta ngalya katingu, nyuntu ngalkunytjaku. Nyuntu ngalkura ngayukulpitju Katutjanya tjapila!”

Yatjikalu tjapiṇu, “Ngayuluṇa puṭu kulinī. Nyuntu waṇmawana kukaku ngurrilpayi. Ya-altyjiyaalytjikampa nyuntu parrpaṭulu yankula kuka wakara ngalya katingu, rawawiyangku?” Tjikupalu piyuku ngunytjintjunu, “Nyuntupa mayutju Katutjalunī kuka parrpaṭu nintinū.” Yatjikalu piyuku watjaṇu, “Ngalya yarra, ngayulakutu! Yilarriwa!, ngayuluṇanta pampunktjaku. Tjinguru nyuntu Yitjuwunya ngaranyi, tjinguru nyuntu Tjikupanya.” Yatjikalu Tjikupanya pampura kutu kulinīngi, watjaṇu, “Nyuntu Tjikupanya nguwanpa wangkanyi. Miṇa yinyu tiṇatjarra Yitjuwunya nguwanpa.”

Tjikupanya puṭu nuumilanīngi, yinyu Yitjuwunya nguwanpa pampura. Piyuku tjapiṇu, “Yilta nyuntu Yitjuwunya ngaranyi?” Tjikupalu ngunytji wangkangu, “Yuwa. Ngayuluṇa Yitjuwunya ngaranyi.”

*Yatjikalu Katutjanya Tjikupaku tjapilku
Yurrunitja 27:25-29*

Yatjikalu Yitjuwunya nguwanpa kulira watjaṇu, “Kuka panyapanī ngalya katirra yuwa! Ngalkuraṇa Katutjanya nyuntupa tjapilku.” Tjikupalu kuka anta tjurratja katirra yungu. Yatjikalu watjaṇu, “Nyunytjulaṇi!” Tjikupalu nyunytjuṇu Yatjikanya. Paluru tjaatā kukatjanu yakuri yiwarrtjura watjaṇu, “Nyuntupa tjaatāṇanta yiwarrtjunu kukatjanu yakuri.” Yitjuwunya nguwanpa kulira Yatjikalu Katutjalakutu yalatjilu tjapiṇu, “Ngayuluṇa yunytjurringanyi Katutjalunta yaṇtayanṭara kanyintjaku, rawa. Paluru nyuntupa kapi

puntu wantirriyantjaku, kulyarrpaṭarra. Kaana nyuntupa tjuta mangarri tiñatjarra ngaranytjaku. Mangarri anta tjurratja tiñatjarra nyuntu nyinanytjaku. Manta kutjupa kutjupa ngurrara tjuta nyuntupa waarrkana nyinaku. Nyuntupa walytja tjutaku, nyuntu mayutju tiña nyinaku, nyuntupa maamaku walytja tjutakutarra. Kutjupa tjutaluntaya wiyananalu kuyalkitjalu yini watjaningka, Katutjalu tjananya ngaparrtjilu yiluntankuku. Kutjupa tjutaluya nyuntupa tjukarurru palyaṇingka, Katutjalu tjananya ngaparrtji tjukarurru palyara kanyilku.” Yalatji Yatjikalu Katutjanya tjapinu, Tjikupaku tjukarurru palyantjaku.

Yitjuwulu watjalku Tjikupanya mirri pungkuk-itjalu

Yurrunitja 27:30-41

Yatjikanya panyapa Katutjalakutu wangkarra wiyarringu. Palulanguru Tjikupanya pakara yanu wayinta. Palunyangka palumpa kaaka Yitjuwunya ngalya yanu, wilinyitjanu. Kuka anta mangarri kutjara Yitjuwulu katingu tjilpi Yatjikaku. Paluru katirra yungu. Yatjikanya tiltirmankula watjaṇu, “Nyuntupa malanypangkuṇi ngunytjintjunangi. Nyuntunya nguwanpaṇanta kuliṇingi. Ngayuluna Tjikupaku Katutjanya tjapinu. Yalatji kutu ngaraku.”

Yitjuwulu kulira yularra Yatjikanya watjaṇu, “Paapa ngayukutarratju Katutjanya tjapila!” Yatjikalu watjaṇu, “Ngayuluna kala wangkangu, Tjikupanya nyuntupa

mayutju nyinanytjaku. Nyurrangarri palumpa waarrkana tjuta nyinaku. Katja kulila! Nyuntupananta Mamanya tjapilkitjalu puṭu kulinji." Yitjuwulu kutu tjilpi Yatjikanya watjaṇingi, "Katutjalakutu tjapila, ngayuku!" Yitjuwulu puṭu watjara yulangu. Palulanguru Yatjikalnu Katutjanya tjapiṇu, "Katutjalunku wiya nyuntupa kapi anta kulyarrpa wantirriyalku. Nyuntupa kaana mangarri tjutatjarra wiya ngaraku. Pikaṭi tjutaluntaya nyuntunya tjuula waṭawaratjarrangku pika pungku. Nyuntunu tjuula waṭawaratjarra nyinaku. Nyuntupa małanypaku waarrkana nyuntu nyinaku. Nyuntupa malanypa, nyuntu wantirra yanku ngurra kutjupakutu, nyinakitja." Yalatji Yatjikalnu watjara wantingu. Palunyatjanu Yitjuwunya Tjikupaku mulyarralpi kutu nyinangu. Yitjuwululpi kulinu, "Ngayuku paapa yilunyingka nganṭiṇa Tjikupanya mirri pungku."

*Yatjikalnu watjara Tjikupanya wantirriyalku
Yurrunitja 27:46—28:5*

Ripikalnu Yatjikanya watjaṇu Tjikupanya wantirriyantjaku Yitjuwulu mirri pungkupayingka. Ripikalnu watjara waarrkana tjutanya wantirriyāṇu, palumpa wangka kuliltjipingka. Palulanguru Ripikalnu watjaṇu Yatjikanya, "Ngayuluna wiya Yitjuwuku miiṭa kutjarraku yunytju nyinanyi. Paluru kutjarra Yitatuku kapali nyinanyi, walytjawiya. Tjinguru Tjikupalu kungka Yitatuku kapali yaltinyingka, ngayuluna wiya yunytju nyinaku." Palunyangka Yatjikalnu Tjikupanya yaltirra watjaṇu, "Nyuntu

wiya kungka ngaa ngurrara mantjintjaku, Kayinananya ngurrara. Nyuntu tjamu Piitjulaku ngurrakutu yankula miiṭa mantjila!, manta Mitjiputamiyalakutu. Ngurra palula nyuntupa kamuru nyinanyi Liapananya. Paluru yuntałalpa mañkurra pa kanyini, nyuntupa watjirra. Palya nyuntu mantjilku miiṭa. Yunytjurringanyiña Katutjaluntapula miitarrarra yañtayañtantjaku, katjapiti yuntałpiti palya mantjintjaku. Nyuntu paapa tiña tjanampa nyinaku, tjutaku. Tjamu kapali tjutatjarra nyinaku. Katutjalu Yipuramaku tjukarurru palyantja nguwanpa, nyuntupalpi Katutjalu tjukarurru palyantjaku. Nyuntu nyinarra pipirri tjutatjarra ngalya yankula manta ngaatjanya kanyintjaku. Katutjalu ngurra ngaatjanya Yipuramaku walytja tjutaku watjara yungu.” Yalatji Yatjikalu Tjikupanya Piitjulaku ngurrakutu watjara wantirriyanu.

*Tjikupalu ngarrirra nyakukulpi tjukurrrpa
Yurrunitja 28:10-22*

Ngurra Piitjipanya Tjikupalu wantirra malpawiya yanu. Yankula ngurrrpa mungarringu. Ngurra palula lukurrmalawiya Tjikupanya pulingka ngarringi kutunarringu. Ngarrirra tjukurrrpa nyangu, mantatjanu katukutu Laata ngaranyingka. Laata palunyangka nyalpitjarra tjuta nyangu tjarukatingu kalpangulpi. Mayutju Katutjanya nyangu ngaranyingka, tjayitingka, Tjikupalu, kanya Tjikupanya wangkangu, “Ngayuluña Katutjanya ngaranyi, mayutju tiña, Yipuramaku, Yatjikakuṭarra.” Katutjalu Tjikupanya piyuku

wangkangu, “Nyuntu kuwarri ngarrinyi manta ngaangka. Ngurra ngaatjaña nyurranya yunganyi, nyuntupa katja tjutaku, yuntałpa tjutaku, pilirri tjutaku. Ruunytjalingkuya yilta nyinaku. Manta ngaaniya ruunytjalingku nyinaku. Palulanguru yankulaya ngurra kutjupa kutjupangka nyinamalpa. Yalatjiya ruunytjalingku nyinaku, nyuntupa pilirri tjuta. Nyuntupa pilirri tjutakuña tjukarurru palyalku, kutjupa kutjupa ngurrara tjutakułarraña. Nyuntu ngurra Yaranalakutu yananyingka, ngayulunanta purinypangku katiyankuku. Ngulañanta ngalya katiku ngurra ngaakutu. Ngayulunanta watjañu yanṭayanṭalkitjangku. Wiyan̄anta wantiku, kutuñanta purinypangku katiyankuku.”

Tjikupalu tjukurrmankula nyakula kanarrirra watjañungku walytjangku, “Yilta, mayutju Katutjanya ngaangka nyinanyi, ngurrpaña ngalya yanu.” Tjikupalu ngulurringkula watjañu, “Yilta, manta ngaatjanya Katutjaku ngurra, ngulurringanyiña paluruni pungkutjipingka. Ngurra ngaangka yilkari yala ngaranyi, yilkarikutu yankunytiaku.” Tjukurrpa nyakunytijanu piyku tjintungkalpi pakañu. Puḷi katamala palunya mantjira ngaratjunu, kutjupa tjutangkuya ngula nyakula yalatji kulintjaku, “Yirriṭi Katutjanya ngurra ngaangka Tjikupangka wangkangu.” Puḷi palula paluru tjira yintiṇu. Yintira ngurra palunya yini watjañu, “Pitjilanya.” Palunyatjanu Tjikupalu Katutjanya watjañu yalatji, “Nyuntu ngayunya yanṭayanṭara mangarri,

kuka, mantarraṭarra kutu yunganyingka, ngayuluŋangku tjukarurru nyinaku. Nyuntu ngayunya yantayaŋtara ngayuku paapaku walytja tjutakutu maa katinyingka, palulanguru ngurra walytjakutulpitjunu piyuku malaku katiku ngayuku paapaku ngurrakutu, ngayuluŋanta kutu tjukarurru nyinamalpa. Puli ngaatjanya ngayulu ngaratjunu, tjutangkuya nyakula kuliklu nyuntunya walkuntjakitjangku. Mani, mayi, yulytjaṭarra nyuntu ngayunya yungkula yantayaŋtanutjangka, ngayuluŋanta nyuntunya wiima mantjira yungamalpa, ngaparrtjingku tjawirrilyi.”

Tjikupanya manta Yaranalakutu yankula nyinamalpa
Yurrunitja 29:1—31:55

Tjikupanya Liipanaku ngurrakutulpi yanku
Yurrunitja 29:1-14

Tjikupalu ngurra Pitjilanya wantirra yalintjarra yanu. Rawa yankula kapi wiila nyangu pilangka. Wiila palunyangka yurrunpaya puli tiŋa yunta patilkitjalu ngaratjunu. Wiila palunyangkaya tjiipi tjuta ngarrirra wanangi, kaputu kutjupa, kaputu. Tjiipiku mayutju tjutangku mungarrtji tjiipi tjuta ngalya katirra wiilangka yila tjunkula puli wanirra yalalpayi, kapiku. Puliya ngaratjunkula kapi manmalpayi, tjiipiku kapi yungkukitjalu. Palulanguru tjiipiku mayutju tjutalu puli yunta wiila patilpayi. Tjikupalu tjananya nyangu tjiipiku mayutju mankurrrpa, ngaranyingka. Tjana

pañaningi kutjupa tjutaku, tjungungku puli tiña yuntañtuntjaku.

Nyakula tjananya tjapinu, Tjikupalu, “Ngurra yaalytji ngurraranyurra?” Watjañuya, “Nganañatju ngurra Yaranalanguru ngalya yanu.” Tjikupalu tjapinu, “Wati Liipanakunyurra ninti? Tjilpi Niyuwuku tjamuku?” “Yuwa. Nintilatjura tjilpi Niyuwuku tjamuku.” Tjikupalu tjananya piyuku tjapinu, “Paluru palya nyinanyi?” Watjañuya, “Yuwa paluru palya nyinanyi. Nyawa, nyarratja Riitjilanya! Palatja Liipanaku yuntañalpa ngalyananyi, tjiipi tjutatjarra.” Riitjilanya yilarringu tjiipi tjutatjarra wiilakutu. Tjikupalu yankula puli tiña yuntañuyuntura ngaratjunu, kutjungku. Palulanguru tjanampa mañmara kapi yintiñingi, Riitjilaku tjiipi tjutaku.

Tjikupalu watjañu, “Ngayuluña watjirra nyuntupa. Ngayuluña Ripikaku katja.” Riitjilalu kulira tjalkalungu palumpa paapakutu, tjakultjunkukitja. Liipanalu kulira tjalkalungu Tjikupanya nyakukitja. Nyakula yulta Liipanalu Tjikupanya nyunytjuñu. Nyunytjura yampura mara witira yaltirra katingu ngurrakutu.

*Tjikupalu pulanya miita kutjarra mantjilku
Yurrunitja 29:15-30*

Liipanalu kanyiñingi yuntañalpa kutjarra. Palumpa yuntañalpa yurrunitja yini Liiyanya, kanya kutjupa yini Riitjilanya. Riitjilanya yunpa palya nyinangi. Tjikupanya Riitjilaku yunytjurriñra nyinangi. Ngurra palula nyinarra Tjikupanya waarrkarringi. Palunyangka

Liipanalu tjapiṇu, “Nyuntutjun rawa waarrkarripayi. Mani nyaa nguwanpaṇanta yungku?” Tjikupalu watjaṇu, “Wiya mani, waarrkarrimalpaṇanta yiya tjapanpala nyinarra, Riitjilanyaninu yungkunytjaku.” Tjikupalu watjaṇu Liipananya, “Tjangkulatju Riitjilanya!, ngayulu ngulaṇa miita mantjintjaku.” Liipanalu watjaṇu, “Yuwa. Palyaṇanta kulinu, nyuntu ngayuku yuntałpa mantjintjaku. Palyanu ngaangka nyinanytjaku waarrkarirra.”

Tjikupanya rawa waarrkarirra yunypa nyinangi Riitjilanya yaltikitja.

Tjikupalupi Liipananya watjaṇu, “Kala, ngayuluṇa wilki yiyya waarrkarringu. Yuwani nyuntupa yuntałpa!, nyuntu tjangkuṇutja.” Palulanguru Liipanalu palumpa waltyta tjuṭa yaltirra kapuṭunu. Ngurra palulaya kuka tjuṭa kutjara yunyparrirra ngalkuṇingi. Palulanguru Liipanalu Liiyanya katirra wantikatingu Tjikupaku ngurrangka, mungangka. Tjikupalu kulinu, “Ngaatja Riitjilanya.” Palulangurupula ngurrangka ngarringi.

Tjinṭungka Tjikupalu nyangu Liiyanya ngarringitjangka. Tjikupanya Liipanaku mul-yarrarringu paluru kikiri tjalkalungkula Liipananya kuru watjaṇu, “Nyaakuṇin ngunytjinytjunu? Ngayulu nyuntupa rawa waarrkarringu Riitjilanya mantjilkitjangku. Nyaakun nyuntu Liiyanya katirra ngayuku ngurrangka wantikatingu.” Liipanalu watjaṇu, “Nyuntu kulila! Ngurra ngaangkalatju yuntałpa yurruntitja yungkupayi, watiku. Palulanguru

yuntaŋpa ngantitja yungkupayi, mała. Kuwarrripa paṭala! Kuwarrilatju yunyparrirra maa Purayitiyirringkulaŋanta Riitjilanya yungku. Palya nyuntu kangkururra pulanya kanyilku. Nyuntu piyukutjun wiłki yiya nyinarra waarrkarriku.”

Tjikupalu kulira yuwa watjaŋu, “Ngayulunanta waarrkarriku.” Liipanalu Riitjilanya Tjikupaku katirra yungu. Tjikupanyara yunyparringu pulkara Riitjilaku, kanya Liiyakura tjukutjuku yunytjurripayi. Liipanalu kungka waarrkana kutjarranya katirra Tjikupaku ngurrangka wantikatingu. Riitjilaku waarrkana yini Pilananya, kanya Liiyakura waarrkana yini Tjilpanya.

Palulanguru Tjikupalupi katja tuwalpala mantjilku

Yurrunitja 29:31—30:24; 30:25-43; 35:18

Tjikupanya rawa nyinarra Liipanaku ngurrawana waarrkarriipayi. Paluru tjiipi anta puluka yanṭayantälpayi, Liipanaku. Palulanguru Liiyalura Tjikupaku katja tjuta kanyinu. Katja tjuta yini yalatji, Ruupinanya, Tjimiyananya, Lipayinya, Tjuutanya nyinangi. Kanya Riitjilanya pipirri wiyapilku nyinangi. Palulanguru Riitjilalu Tjikupanya watjaŋu palumpa waarrkanawana ngarrinytjaku, Pilanalawana, Riitjilaku pipirri mantjintjaku. Tjikupalawana ngarrirra Pilanalu yilta katja kutjarra mantjinu, Taananya anta Napatalinya.

Rawa nyinarra Liiyalu puṭu kulinu piyuku pipirri mantjilkitjalu. Paluru Tjikupanya waarrkana palumpa katirra yungu ngarrinytjaku,

Tjikupalawana, Liiyaku pipirri mantjintjaku. Yiltara Tjilpalu mantjiṇu katja kutjarra Kaatanya, Yaatjanya.

Palunyatjanu Liiyalu piyuku katja kutjarra kutjupa mantjinu yini Yitjikanya anta, Tjipulananya. Palulanguru yuntałpaṭarra mantjiṇu, yini Tayinanya.

Riitjilanya rawa nyinangi pipirriwiya. Paluru rawangku tjapinu Katutjanya pipirriku. Katutjalu kulinu Riitjilanya, paluru pipirri mantjilkitjalu tjapiningi. Yiltalpi Riitjilalu katja kutju mantjiṇu, yini paluru Tjutjupanya. Manta kutjupangka Kayinanala Riitjilalu piyuku katja mantjiṇu, yini paluru Pintjiminanya.

Tjikupakura yulytja tjutarringu, tjiipi anta nanikuta tjutarringu. Liipanaku tjiipi anta nanikuta tjuta Tjikupalu yanṭayanṭara kanyilpayi. Liipanalura tjiipi tjuta anta nanikuta tjutara yungu mani nguwanpa, Tjikupanya. Tjikupalu tjukarurru yanṭayanṭara waarrka palyalpayi, palunyangka Liipanalu tjiipi anta nanikuta yungu tjutalingku. Tjikupalungku waltyjalu kanyilpayi tjiipi tjuta anta nanikuta tjuta, puluka, tuungkiyi kamulaṭarra. Paluru kanyilpayi waarrkana tjuta, palumpa waarrkarripayi.

*Palulanguru Tjikupanyangarrilpiya ngurra
walytjakutu yankuku
Yurrunitja 31:1-55*

Tjikupalu kulinu yara, palumpa watjirra tjutangku watjanuṭjangka. Yalatjiya watjanu, “Tjikupalu kanyiṇi nanikuta tjuta anta tjiipi, nganampa paapakuṇu mulyatangku. Paluru

mani anta yulytja tjutatjarra nyinanyi, nganampa paapakuṇu.” Liipananya nyinangi mulyarra Tjikupaku. Palunyatjanu Katutjanya wangkangu, Tjikupalakutu, yalatji, “Nyuntu yarra malaku!, nyuntupa paapaku ngurrakutu, nyuntupa walytja tjutakutu.” Katutjanya piyku wangkangu, “Ngayuluṇa nyurranya yanṭayaṇṭara katirinamalpa ngurra palulakutu.”

Palunyangka Tjikupalu tjiipi tjuta kanyiṇingi Liipanaku ngurrangka waṇma. Tjikupalu wikaṛru watjara waarrkana wantirriyanu, Rikitjilaku anta Liiyaku, palunya kutjarra yaltirra ngalya katintjaku. Tjungurriraya wangkangu ngurra kutjupakutu yankunytjaku, manta Kayinalakutu. Liipananya waṇma waarrkar-ringi, palumpa ngurrangka munkarra. Tjikupalu wiya waarrkana palumpa wantirriyanu Liipananya watjantjaku. Paluru tjana watjant-jawiya yankukitjalu kulinu.

Tjikupalu kamula tjuta pupatjunkula yulytja tjuta yurrara tjunu kamulangka. Palumpa waarrkanatarrpa paluru kalpatjunkula wantirriyanu. Tjikupalu tjananya watjaṇu “Yurrunpaya kati!, nanikuta tjiipiṭarra.” Paluru yanu, palumpa miitja kutjarraku anta pipirri tjutaku. Kamulangka tjananya kalpatjura yanu. Ngurra palula tjana Liipananyangarri wantirra yanu, watjant-jawiya.

Tjintu maṇkurarrirra Liipanalu kulinu, Tjikupanyangarri kumpira yanutjangka. Liipananya anta palumpa waarrkana tjutangkuya wanara wirrkanu. Wirrkankula Liipananya pikarringu Tjikupaku, palumpa

yuntałtjirratja anta tjamu kapalitjirratja. Rawangkupulangku wangkangi pikangku. Palulangurupula wangkarra kalyparringulpi. Kalypa kutu nyinakitjalupula puli tjuṭa mantjira kapuṭu tjunu. Liipanalu watjañu, “Yiwarra ngaanili yankula, puli ngaatjanya ngula nyakula kulintjaku, kalypali nyinanytjaku.” Tjikupalu kulira yuwa watjañu, “Ngurra ngaatjanya yini Kilatanya.” Liipanalu yuntałpa kutjarra anta tjamu kapali tjutanya nyunytjura wantikatingu, paluru małaku ngurra walytjakutu yankukitjalu, kanya Tjikupanyangarri kutuya yanangi manta Kayinanalakutu.

*Tjikupanya yankula ngurra Kayinanalakutu
Yitjuwukulpira kalyparriku
Yurrunitja 32:, 33:, 35:*

*Tjikupalu kuka tjiiptarra yungkuliyaliku
Yitjuwuku kalyparrikitjangku
Yurrunitja 32:1-21*

Tjikupanyangarri yankula ngururrpa munga maṅkurra ngarrirra, paluru waarrkana maṅkurra watjara wantirriyanu, palumpa kaaka Yitjuwunya watjantjaku. Waarrkana maṅkurrenpaya maa tjarrparra małaku parrpatu yanu Tjikupala watjalkitja. “Yitjuwunyangarri ngalya yananyi pikaku tjilirratjarra tjuṭa, yantata puupala.” Tjikupanyangarri kulira ngulurringu. Palunyatjanu Tjikupalu tjapinu, Katutjanya, “Katutja, nyuntuñin watjañu ngayuku ngurrakutu małaku yankunytjaku. Yiltanin ngampuṭu yanṭayanṭalku? Ngayuluñanta ngululu tjapini, ngayuku kaakalu

pungkupayingka. Panyapanin yirriṭi watjanu, nyuntulanyatjun yanṭayanṭantjaku, ngayuku walytja ngantitja tjuṭa nyinanytjaku ngurra Kayinanala, palya. Kanalalanyatju mirri pungkupayingka, maama tjuṭa anta pipirri tjuṭa!”

Mungangkaya ngarirra Tjikupalu pakara nanikuta tjuṭa kaputura wantingu, tuu yantatan tuuntyi, Yitjuwuku wantirriyalkitjalu. Paluru palumpa waarrkana tjuṭa yaltirra watjanu, “Nanikuta ngaanpanyaya kati yurrunpa!, ngayuluṇa ngaangka nyinanyingka. Yitjuwulu nyurranya nyakula yalatjilu tjapilku, ‘Nanikuta ngaan tjuṭa nganaku? Yaalytjikutunyurra katinyi?’ Yalatjiluya watjala! ‘Ngaa tjuṭa yintjanulunta yiyanu, nyuntupa waarrkanalu, Tjikupalu. Paluru maławana ngalya yananyi.’”

Palunyatjanu Tjikupalu waarrkana kutjupa tjuṭanya yaltirra watjanu, “Nanikuta tjutaya katingu. Nganṭiwanaluya tjiipi tjuṭa kati!, tuu yantatan tuuntyi. Ngayuluṇa nyinanyi. Yitjuwulu nyurranya nyakula yalatjilu tjapilku, ‘Tjiipi ngaan tjuṭa nganaku? Yaalytjikutunyurra katinyi?’ Yalatjiluya watjala!, ‘Ngaa tjuṭa yintjanulunta yiyanu, nyuntupa waarrkanalu, Tjikupalu. Paluru maławana ngalya yananyi.’”

Palulanguru piyuku paluru wantirriyanu kamula wiima tjaatiyipala anta puluka pipitiyipala, tuungkiyi tjaatiyipala.

Tjikupalu kulira wantirriyanura, “Yitjuwulu kuka tjuṭa nyakula tjingurutju kalyparriku, yirritiṇa ngayulu ngunytjilyinutjangka.”

*Palykupungkulapulanku yampura
ngaramalpa, Tjikupanya anta nyalpitjara
ilkaritja*

Yurrunitja 32:22-32

Tjikupalu tjananya watjara iyanu palumpa walytja tjutanya yurrunpa yankunytjaku. Tjana karru Tjapukanya wantikatirra yulparirra tjayiti paṭara ngarringu, Tjikupaku miiṭa kutjarra anta palumpa pipirri tjuta, kanya Tjikupanya karrungka yalintjarra kutju nyinangi, paluru Katutjalakutu wangkakitja. Mungangka nyalpitjarra yaŋangu nguwanpa ngalya yankula Tjikupanya yampura palykupungkulapulanku puṭu palira mantangkapulanku kanyiŋingi. Yalatjipulanku palykupungkula tjinturringu. Yilkari ngurraralu kuliŋu, “Ngaangkuṇi Tjikupalu piitamilaṇi.” Palunyatjanu Tjikupanya tjunta palira pulyku kilytjuntanu. Palulanguru Tjikupanya nyumpurringu.

Kutu Tjikupalu wati palunya ngamira kanyiŋingi. Wati yilkari ngurraralu watjanu, “Ngamilwiyaluni wanti!, tjinturringu.” Tjikupalu watjanu, “Wiya. Ngamirananta kanyiṇi nyuntu Katutjanya tjapintjaku, ngayuku.” Kulira wati paluru Tjikupanya tjapiṇu, “Yinin ngananyan?” Tjikupalu watjanu, “Ngayuluṇa Tjikupanya.” Wati paluru piyku tjapiṇu, “Nyuntunya, wiwantaya Tjikupanya watjalku, nyuntupa yini kutjupa. Nyuntunyantaya Yitjurilanya watjalku.” Tjikupalu tjapiṇu, “Yinin ngananyan? Watjalaṇi!” Kanya wati paluru watjanu, “Wiya ngayunya yiniku tjapintjaku.” Yalatji

wangkarra paluru Tjikupaku Katutjanya tjapiṇu. Wati paluru ngarala wiyarringu. Tjikupalu puṭu kuliṇu, “Kuwarriṇa Katutjanya nyangu. Ngayuluṇa nyakula yilumara. Yilta ngayuluṇa kana kutu nyinanyi. Palunyangka ngurra ngaatjanyaṇa yini watjalku, ‘Katutjanya yunpa.’”

*Tjikupanya Yitjuwunyapula kalyparrikulpi
Yurrunitja 33:1-20*

Tjikupalu tjananya nyangu wañmanguru Yitjuwunyangularri ngalya yananyingka, tjilirratjarra tjuta. Palulanguru nyakula kungka waarrkana palunya kutjarra maamararranpa tjananya Tjikupalu yurrunpa ngaratjunu. Nganṭiwana tjananya ngaratjunu Liiyanya anta Riitjilanya, pipirri tjutatjarra. Tjikupalu tjananya ngaratjunkula maa wayintarirra Yitjuwukutu maa yankula tjanṭarrngarala pupakatingu, tjapanpalangara. Yalatjiya yurrunpa palyalpayi yunngurirraya pakalpayi, mayutju tiṇa ngalya yananyingka. Yitjuwulu numilara ngalya tjalkalungkula Tjikupanya yampura nyunytjuṇu. Yampurapula yulangi.

Yitjuwulu nyakula tjapiṇu, “Ngananyangularri nyarratja?” Tjikupalu watjaṇu, “Mayutju Kututjaluni yungu pipirri nyarra tjuta.” Palunyatjanupula rawa wangkangi. Yitjuwunyalpi wangkangu, “Katikulatju nyurranya ngayuku ngurrakutu, kutjupa tjutalu nyurranya pungkutjipingkamarra.” Tjikupalu watjaṇu, “Wiya, nganaŋatju maławana maa yankuku, purinypa. Nyurrangarri yurrunpa maa yarra!”

Palunyatjanu Tjikupanyangarri ngantiwana paña Kayinalakutu maa anangi. Yankulaya ngurra Tjakutjala nyinangi. Palunyatjanu yankulaya tawunu Tjikimala yila nguwanpa nyinangi.

*Katutjalu Tjikupanya watjalku,
yantayantalkitjalu
Yurrunitja 35:1-19*

Katutjalu Tjikupanya watjañu, “Yarraya ngurra Pitjilalakutu! Ngurra palulañanta ngayulu yurrunpa yutirringu, nyuntu Yitjuwulamarra ngulu tjalkalungu. Yankula pulitjanu palyala tiipula nguwanpa!, ngayunyañin pulkawanikitjangku.” Palulanguru watjañu tjananya Tjikupalu, “Kulilaya!, ngurra ngaatjanyaala wantikatinyi, yankulala ngurra Pitjilala nyinanytjakitja. Kulilaya wangka ngaatjanya! Kutjupa ruunytjalunyurra Katutjanya nguwanpa walkulpayi, wiyawanalu. Nyurrangarri kuwarri wantintjaku, Katutjanya kutju walkuntjaku. Yankulaya mantjila Katutjanya nguwanpa!, nyurrangarri walkulpayi. Yankulaya mantjira ngalya katirra, ngatingka tjawara tjarrpatjurra! Palunyatjanu nyurrangarri mantarra nyuwanatjarra nyinama! Palunyatjanu yankulala ngurra Pitjilala tiipula nguwanpa pulitjanu palyalku, Katutjanya walkulkitjangku. Yurrunpa ngayunya Katutjalu yantayantara katiyankupayi. Ngayukutju malpa yulytjayankupayi.”

Palunyatjanuya yankulaya Katutjanya nguwanpa yurrunpa palyantjatjanu, mantjiraya

ngalya katirra ngat̄ingka wañingu. Tjikupalu watiya palunya tjuta tjawara ngat̄ingka tjutunu, tawunu Tjikimala ila kurrkara kutju ngarapayi.

Palulanguru ngurra Pitjilalakutuya yanu. Yankulaya pulitjanu palyanu tiipula nguwanpa. Palulanguru ngurra palula Katutjalu Tjikupanya watjañu, “Nyuntu yini Tjikupanya watjalpayintaya. Kuwarri ngayuluñanta yini kutjupa tjunanyi, ‘Yitjurilanya.’ Ngayuluñanta kañtilya puntutjarrangku watjañi. Nyuntupa walytja ngant̄itja ruunytja nyinaku. Ngurra kutjupa, ngurra kutjupa tjiwarriwarriwanaya nyinaku, nyuntupa ngant̄itja tjuta. Kutjupa tjutaya mayutju tiña nyinaku. Yirritiña pulampa manta ngaatjanya Yipuramaku Yatjikaku yungu, yurrunpa. Kuwarriñanta nyuntunya yunganyi, manta ngaatjanya, nyuntupa ngant̄itja tjutangku witira kanyintjaku.”

Palunyatjanu ngurra Pitjilanyaya wantirra Yapatjalakutu yanu. Yankulaya ngururrpa nyinangi, Riitjilalu iti mantjinutjangka. Riitjilalu pipirri wiima mantjira pika puntutjarrangkula ilungu. Palunyatjanuya puntura ularra mantangka tjawara tjarrpatjunu. Pipirri wiima paluru iti ngarrinytjala Tjikupalupi yini tjunu, “Pintjiminanya.”

*Tjilpi Yatjikanya iluku
Yurrunitja 35:27-29*

Palulanguru Tjikupanyalpi yanu palumpa paapa nyakunytjakitja, kutjupa ruunytjañarraya yanu palulawana, ngurra Mamarilakutu. Ngurra Mamarinya ngurra Yipuranala ila ngarangi.

Ngurra palula Yatjikanya nyinarra ilungu. Tjilpi paluru rawa nyinangi, waan antaṭa an yayitiyi yiiya. Palulanguru Yitjuwulu anta Tjikupalu tjawara mantangka tjunu.

*Tjutjupanya kaaka tjutangkuya tjalamilalku
Yurrunitja 37:1-35*

*Tjikupanya Tjutjupaku yunytjurringkula nyi-namalpa
Yurrunitja 37:1-4*

Tjikupanyangarrilpiya manta Kayinanalawana nyinapayi, palumpa paapaku ngurrawana. Palumpa katja ngantitja Tjutjupanya nyinarra tiñarringulpi. Tjutjupaku kaaka tiña tjutangkuṭarralpiya kanyilpayi tjiipi, nanikutaṭarra. Wiya tjana puraapawayi yanṭayaṇṭalpayi, ngunytji tjana kanyira kumpira yankupayi. Palulanguru Tjutjupalu yankula Tjikupangka tjakultjunu, “Ngayuku kaaka tjutangku nanikuta tjiipi kanyira kumpira yankupayi. Wiyaya puraapawayi kanyilpayi.” Palulanguru palumpa kaaka ruunytjalpi kulira ngurrkurringuya Tjutjupaku.

Tjikupanyalpi Tjutjupakulpi puntura yunypa nyinangu, katja ngantitjaku. Tjikupalu kuuta waṭawara palyara yungulpira Tjutjupa palumpa. Alatji Tjutjupaku yungutjangka, palumpa kaaka ruunytjalpiraya ngurrkurringkula nyinangi. Rawa, kuturaya ngurrku nyinapayi, Tjutjupa palumpa.

*Tjutjupalu tjukurrpa nyakula tjanala
tjakultjunku
Yurrunitja 37:5-11*

Palunyatjanu Tjutjupalupi tjukurrmara nyangu, mungangka. Palulanguru mungawinkilpi pakara ankula palumpa kaaka ruunytjangka tjakultjunu, “Kulilaya! Mungangkaña ngarrirra tjukurrpa nyangu. Nyanguña wiita nganaña tjungungku muṭura tjunkulinangi. Wiita palunya tayimapirala tjunkulinangi. Ngayulu tayimapira ngarritjunutja wiita palunya, paluru pakara tjukarurrulpi ngarangi mayutju tjukarurru ngaranytja nguwanpa, kanya nyurrangarrimpa wiita tayimapira tjunutja pakara mantawana ngarringi. Nyurrangarrimpa wiita waarrkana nguwanpa ngarringi.”

Palunyatjanu palumpa kaaka ruunytjangku kuliralpiya palunya watjanu, “Nyuntu wiyalampatjun mayutju nyinaku. Nyuntu ramaramalu kulin.” Palunyatjanu palumpa kaaka ruunytjaya palumparaya ngurrkurrirra nyinangi. Palunyatjanu munga kutjupangka Tjutjupalu piyuku tjukurrmara nyakula kaaka tjuta watjanu, “Kulilaya! Alatji ngaa nguwanpa nyanguña. Tjintu, pira pintirri lipinpala ngaa tjutaña nyangu, ngayuku nguwanpatjuya waṭungarakatirra walkuṇinginiya.”

Palunyatjanu paluru palumpa paapakutulpi yankula tjakultjunu. Tjakulpa palunyalpi Tjikupalu kulira kulin, “Tjinguru alatji ngaa nguwanpa paluru nyinaku, nganaña palunya

walkunmalpa, tjinguru.” Palunyatjanu Tjikupalulpi kulira palunya watjaŋu, “Wiyawana nyuntu ramaramalu nyangu. Wiyalatjunta nyuntunya walkulkku.” Tjikupalulpi parra ulyt-jarra rawangku kulirinangi, “Tjinguru paluru ngula mayutju puntu nyinaku”, kanya palumpa kaaka ruunytjalpi rawaraya ngurrku nyinapayi.

*Tjutjupanyaya tjalamilalku manta
Yitjipilakutu katinytjaku
Yurrunitja 37:12-30*

Palunyatjanu Tjutjupanyalpi nyinapayi, palumpa paapaku ngurrangka, ngurra paluru Yipurunanya. Palunyatjanu palumpa paapangkulpi palunya watjaŋu, “Nyuntupa kaaka ruunytjaya nyarrangka nyinanyi, ngurra Tjikimala. Yankula tjananya nyawa, Tjikimala! Tjinguruya nanikuta anta tjiipi ruunytja palya kanyinji. Palunya tjuṭaṭarra tjananya maa nyawa! Tjinguruya palya nyinanyi? Maa nyakula tjananya ngalya yankulaŋi tjakultjurra!” Palunyatjanu paluru yanulpi malpawiya. Yankula tjanampa puṭu ngurririnangi, ngurra Tjikimanyaṭarra puṭu nyakulinangi. Palunyatjanu wati kutjupalpi tjapiṇu, “Nyuntu, ngayuku kaaka ruunytja nyangu?” “Yuwa. Nyanguṇa nyarratjaya yanu ngurra Tuutjananalakutu.”

Palunyatjanu paluru yankula nyangu tjananya. Paluru tjana tjiipi nanikutaṭarra kanyiningga. Paluru waŋmanguru tjananya nyangangi. Tjutjupanya tjana nyakula palumpa kaaka tjuṭa wangkapaiya, Tjutjupanya mirri

pungkukitja. “Mirrilaka palunya pungkula wañi, wiila palula! Wiila kapiwiyangkala pungkula wañi! Palunyatjanu yankulalaka ngunytji tjakultjurra!, layina pikatilu patjañutja. Palunyatjanu wiya tjukurrpa nyakupayinya kana nyinaku, mirrilaka puwa palunya! Paluru wiyalampa mayutju nyinanytjaku.”

Palunyatjanu palumpa kaaka tiñangkulpi Ruupinalu watjañu tjananya, “Kulilaya! Palunya wiyalaka mirri puwa! Pungkuwiyangkula palunya kana tjarrpatjurra wiila palula! Palulangurulpila palunya wantirra yanku.” Yalatji ngaa nguwanpa tjananya watjañu Ruupinalu, tjana yankunytjala, ngan̄ti paluru pakaltjingga wantirriyantjakitjangku, palumpa paapalakutu. Tjutjupanya ngalya yankula ngaranytjala paluru tjana witira kuuta palumpa yarrara palunya katirra wiilangka tjarrpatjunu. Palunyatjanu ngurrakutulpiya ngantikutu yankula mayi kuka ngalkuralpiya nyangu, kutjupa runyjtaya ngalya yanangi, kamulatjarra. Luutu tiñalingkuya katianangi.

Yañangu paluru tjana Yitjumilaku walytja ngantitja tjuta ngalya yanangiya. Paluru tjana manta ngurra Yitjipilakutu yankunytjakitjaya ngalya yanangi. Palunyangka Tjuutatalupi tjananya marrkura watjañu, palumpa malanypa tjutangkalpi, “Wiyala iluntankunytjaku panya palunya. Yaalytjinyurra kulin? Nyarra tjutangkala tjalamilala! Nyarra paluru tjana ngurra wañmakutu ananyi.” Ngaatjanya Tjuutalu tjananya palumpa malanypa tjutakutu

kulira watjañu. Tjana palunyalpi kuliraya yuny-parringu.

Palunyatjanu Tjutjupa palunyalpiya yankula mantjilkatingu, paluru tjana wilangka tjarrpatjura wanikatingutja. Palunyatjanuya tjalamilañu kamulatjarra tjutangka mani tjiilpa tuwintiyipala nguwanpa. Palunyatjanu Ruupinanya ngurra kutjupangka yankula nyinangitjangka tjana palunya wiyangka ngan̄tiya tjalamilañu, palumpa tjanampa kaaka tiña ngurra kutjupakutu yanutjangka. Palunyatjanu Yitjumilaku ngantitja tjutangku katinguya ngurra yini Yitjipilakutu. Palunyatjanu Ruupina paluru rawa nyinarra ngalya yankula puťu nyakula małanypa palunyatjirratjangku kuuta palumpa, wintarrpungu. Paluru małanypa palunyatjirratja puntura yulatjarrarringkula nyinangi.

Tjutjupaku tjakulpa kulira tjilpi Tjikupanya yulaku

Yurrunitja 37:31-35

Tjutjupaku kaaka ruunytjangku kuuta palumpaňungka nanikutatjanu ngurrka kañilpangkaya yintiraya kanyiñingitjangku, kuuta palumpaňu nyapaňu ngurrka palunyatjarrangku. Palunyatjanu palumpa paapakutu katirraya nintiňu, kuuta palunya. Paluru tjana ngunyjtinytu ngurrpa nguwanpa wangkangi, “Kuuta ngaatjanyalatju mantangka ngarringitja mantjiňu. Tjinguru kuuta ngaatjanya nyuntupa katjaku?” Palunyatjanu

Tjikupalupi mantjira kuuta palunya nyakula watjañu, “Yuwa, ngaatjanya ngayuku katjaku kuuta. Tjinguru layina pikatingku patjara wañingu. Yuwa, kuunyi ngayuku katjatju layinangku patjañu.” Tjutjupanya yilungutja nguwanpa Tjikupalu rawa kulira yulapayi. Paluru rawa yularra watjilarriipayi nyinangi.

Tjutjupanya Patipaku ngurrangka nyinarra tjilangka nyinamalpa

Yurrunitja 39:1—40:23

Patipaku ngurrangka paluru nyinamalpa

Yurrunitja 39:1-6

Yitjumilaku ngañitja walytja palunya tjutangkuya katirra Tjutjupa palunya tjalamilañu, ngurra Yitjipila. Mayutju Patipa paluru payimilañu. Mayutju Katutjalu palunya kantilya puntu palyanutjangka Tjutjupa palurupi ngurra palulalpi paluru rapa waarrkarriipayi. Palunyatjanu Tjutjupanya mayutju nyinatjunkukitjalu kuliñingi. Tjutjupanya waalaku mayutjulpi nyinatjunu. Mayutju Patipa palumpa yulytja ruunytja paluru nyakula kanyilpayi. Waarrkana palumpa tjutakulpi tjanampa Tjutjupanya mayutju puntu nyinapayi.

Patipaku miita Tjutjupakura yunytjurringkula nyinamalpa

Yurrunitja 39:7-18

Tjutjupanya yunpa palyalingku nyinapayi. Palunyatjanu Patipaku miitälpi paluru palumpa yunytjurringangi. Minyma

palurulpı Tjutjupanya tjapiṇu ngurrangkapula ngarrikitjangku. Tjutjupalulpi minyma palunya watjaṇu, “Wiya. Ngayuku mayutjuluṇi nyinatjunuṇi waala ngaaku mayutju. Palunyatjanu mayutju Patipanya yulytja ngaa tjutaku wiya paluru kuliṇi. Paluru yunypa nyinanyi, ngayuluṇara yulytja ngaa tjuṭa kanyiṇingka. Nyuntunya kutjuṇanta wantintjaku, palumpa miita. Nyuntunyananta kanyira Katutjangka mirangka kurraṇanta palyaltjipingka.”

Tjintu kutjupa tjintu kutjupangka tjapira ngarapayi minyma paluru Tjutjupangka ngarrikitjalu. Tjutjupa paluru kutu wiya watjalpayi.

Tjutjupa palurulpı rawa waarrkarringkula yaatjayiṭi yankula parra waarrkarringiya. Rawa parra waarrkarringkula paluru kutju yanu ngurrangka yunngu waarrkarrikitja, kanya minyma Patipaku miita paluru kutju yunngu waalangka nyinangi. Tjutjupanya yunngu tjarrpangutja minyma palurulpı nyakula ngalya yankula kuuta witira watjaṇu, “Yarralika ngurrangka ngarrinytjaku!” Kuuta palunya witiṇutjangka paluru yirriwiltjira tjalkalungu, kanya minyma paluru kuuta palumpaṇunya kanyiṇingi, paluru tjalkalungutjangka. Kanya minyma paluru kuuta kutju kanyira, paluru puntura ngurrkurringura. Minyma palurulpı yankula tjananya parrpaṭu yaltingu, waarrkana waalangka waarrkarripayi tjuṭanya. Ngalya yankuļalpiya waarrkana palunya tjuṭa ngarangitjangka tjakultjunu tjananya, “Kuuta ngaatjanyaya nyawa! Wati kutjungku Yipuru wangkatjarrangkuṇi ngar-

ritjunkukitjangku palykupungkula tjalkalungu. Palunyangka ngayulu katu mirrangutjangka paluru ngulu tjalkalungu, kuuta ngaatjanyalpi wañikatingu.”

Minyma palurulpi patara kanyiningga palumpa miita tjakultjunkukitjalu. Patipanyalpi ngalya yanutjangka minyma palurura tjakultjunu, Tjutjupalukunu ngarritjunkukitjalu palykupungu.

Tjutjupanya Tjiilangka tjarrpatjunutja nyinamalpa

Yurrunitja 39:19-23

Palulanguru Patipa paluru iltarringkula watjañu tjananya Tjutjupanya witira katirra nyinatjunkunytjaku tjiilangka. Tjiilangka nyinanytja mayutju Katutjalu yilangku nyakula kanyiningga. Tjutjupanya tjukarurru nyinanyangka tjiilaku mayutju pukulpara nyinangi. Mayutju paluru Tjutjupanya nyinatjunu tjiila ngurrara tjutanya palyangku kanyintjaku. Tjutjupalupi tjananya waarrkarirra palyangku antantanningi. Mayutju Katutjalu palunya rapañu.

Tjukurrapula nyakunytjatjanu Tjutjupalu pulanya nintilku

Yurrunitja 40:1-23

Ngurra Yitjipiku mayutju pulkara pulampa ngurrkerringu waarrkana kutjarraku. Wati kutjungku mayutjuku pulakina tjutira yungkupayi, kanya wati kutjupangku mayi kutjara mayutjuku yungkupayi. Mayutju paluru tjananya watjañu palunya kutjarra

tjiilakutu katirra tjarrpatjunkunytjaku. Tjilangkapula nyinanyangka Tjutjupalu pulanya yilanguru antantalpayi. Paluru kutjarra mungangka ngarirra tjukurrpa nyangu. Tjin̄turringkunyangka paluru kutjarra nyinarra kuliningga tjiila unnungunguru. Tjin̄tu palula Tjutjupalu pulanya nyangu, “Nyaakupulan watjilarrinyi?” Nyarra palulangurupula Tjutjupanya nyakula watjanu, “Ngalitjulitju mungangka tjukurrpa nyangutjangku, nyuntulakutu wangkanyi.”

Pulakina tjutilpayilu nyakula watjanu, “Ngayuluna nyangu watiya tjirripala kuripitjitjarra unmirringkula ngaranytjala. Maraluña panikina kanyiningi, mayutju pulkaku. Palulanguruña kuripitji tjulkura tjutura kanyiningi, mayutju pulkaku. Palulanguruña katirra mayutju palunya yungu.” Tjutjupalu watjanu, “Kulila! Watiya kuripitjitjarra tjirripala nguwanpa tjin̄tu tjirripala ngaramalpa. Palunyangka palurunta nyinarra kulira watjalku, nyuntu tjin̄tu mañkurarrinyangka tjiilanguru pakalku. Palunyangka mayutju palurunta watjalku waarrka kutju palunya palyantjaku.” Tjutjupalu wati palunya piyku watjanu, “Nyuntu pakara mayutjungka wangka!, ngayunya tjiilanguru pakaltjingantjaku.”

Tjukurrpa yuti palunya kulira Tjutjupanya watjanu mangarri kutjalpayilu, “Yuwa, ngayuluṭarraṇa tjukurrpa nyangu. Kan̄ilpa nguwanpa mañkurra paṭi kutjungku katangka kanyira katiyankupayi. Kan̄ilpa palula

mayi tjuta ngarringi, mayutju pulkaku. Tjulpu tjutangkulpiya ngalya yankula mayi palunya ngalkuningi.” Tjutjupalu wangka palunya kulira watjañu, “Kañilpa mañkurrpa nguwanpa tjintu mañkurrpa ngaramalpa. Palunyangkalta mayutju palurunta kuliranta watjalku, tjilangurun pakalku tjintu mañkurrarrinytja. Palulangurunta watjalku waralytjunkunybjakitjangku. Waarrkana kutjupa tjutangku nyuntunya waralytjunkula mirrintanku Palulangurunta tjulpu tjutangkulpi ngalkunmalpa.”

Wangka panyapa Tjutjupakuñu iltarringu. Pulakina yungkupayinya palya pakara mayutju pulkaku waarrkarringu. Mayi kutjalpayi palunya pakaltjingara iluntanu. Tjutjupakura wangka panyapakura ramarringu, pulakina yungkupayinya. Wiyara mayutjungka tjakultjunu Tjutjupanya pakaltjingantjaku.

Tjutjupanya mayutju punturriku

Piirululpi tjukurrpa ngarrirra nyakuku

Yurrunitja 41:1-13

Palunyatjanu Tjutjupanya yiya kutjarra nyinangi tjilangka unngu. Ngurra Yitjipinya ngurrarangku mayutju pulkangku ngarrirra tjukurrpa nyangu, Piirulu. Manta Yitjipingka Piirunya ngarangu karru tiñangka. Palulanguru paluru karrunguru puluka tjuta pakantjala nyangu. Puluka yakura tjapanpalangku pakara yukiri ngalkulinangi karru tjayitinguru. Puluka paluru tjana yukiritjanu pałtja ngarangi, kanya puluka kutjupa tjutaya pałtjatjirratja

nyurrka karrunguruya pakara ngarangi. Nyur-
rka tjutangkuya ngarala nyangangi kutjupa tjuṭa
ngalkura wiyalitjalu. Kala tjananya ngalkura
wiyaṇu. Alatji panya mayutju pulkalu tjukurrpa
nyakula kanarringu.

Palunyatjanu Piirululpi tjukurrpa nyangu,
watiya pakara ngarangi mangarri tjapanpalat-
jarra. Mangarri palunya tjana uṇmilpi ngarangi,
kanya watiya kutjupa tjayitingka ngarangi, man-
garri tjapanpala pilti ngarangi. Mangarri
pilti paluru tjutangku, mangarri uṇmi palunya
tjananya ngalkura wiyaṇu. Tjukurrpa pa-
nyapalpi nyakula kanarringu, mayutju Piirulu.
Mungawinki ngarirra puṭu kulin̄ingi tjukur-
rpa panyapa. Paluru pakara watjilpa nyin-
nangi. Wati ninti pułka tjananya paluru nyakula
yaltingu, tjuṭa kutjupatarra, yatjikilu palyalpayi.
Ngalya yankula ngaranytjala tjananya mayutju
paluru tjananya watjaṇu tjukurrpa nyangut-
jangku. Palulanguru kulira ngarangi, nintilkit-
jalu puṭuya kulin̄ingi.

Palunyangka mayutju pulkaku walyt-
jangku watjaṇu, pulakina yungkupayili,
“Ngayulunanta yurrunpa watjalmarra.
Ngayuluna ramarringu. Tjiilangka nyinarra
niṭayirralulinyatju Yipuru wangkatjarrangku
watjaṇu, tjungungkulitju tjukurrpa palunya
nyakupayi. Palumpaṇu wangka yiltarringu.
Paluru iltu tjukurrpa kulira nintilpayi.”

*Tjutjupalu nintiku Piirulu tjukurrpa nyangut-
jangka*
Yurrunitja 41:14-36

Wangka panyapa kulira mayutju Piirulu wantirriyañu Tjutjupanya yankula tjiilanguru pakaltjingantjaku. Palulanguru Tjutjupanyalpi katingu mayutju pul̄kaku ngurrakutu. Tjarrparra mantarra kutjupangkalpi tjarrpangu, ngan̄kurrrawiyalpi pakañu. Yankula mayutju pul̄kangkalpi ngarangi, Piirungka. Palulanguru Piirululpi watjañu, “Mungangkaña tjukurrrpa nyakunytiyatjanungku ninti tjutakutu tjakultjunu. Tjukurrrpa palumpaya puñu kuliñgingi. Tjingurun nyuntu tjukurrrpa nintilpayi. Ngaaluni watjañu wayina yungkupayilu.” Tjutjupalu watjañu, “Wanyu mayutju, ngayuluna wiya tjukurrrpa nintilpayi. Wanyulika kulila mayutju Katutjanya!, palurulinya tjukarurrungku tjukurrrpa palunyaku nintilku.”

Palunyangka mayutju paluru tjukurrrpa palunya Tjutjupakutu tjakultjunu. Palunyangka Tjutjupalulpi watjañu, tjukurrrpa panyapa kutjarra wangkarra tjukarurruntjaku. Yalatji watjañu, “Nyuntu mayutju, wangka kutju kulintjaku, Katutjakuñu wangka. Palunyangka puluka tjapanpala paltja ngarangi. Palunya nguwanpa watiya tjapanpala mangarritjarra ngarangi. Wangka palunya nguwanpa yiiya tjapanpala ngaraku mangarritjarra rawa nyinanytjaku. Palunyangka puluka tjapanpala nyurrka ngarangi. Palunya nguwanpa kutjupa watiya tjapanpala pilti ngarangi.

“Wangka palunya nguwanpa paltjatjirratja rawala nyinamalpa, yiiya tjapanpalangara. Palunyangka kapiwiya mayiwiya kukawiya

nyinamalpa. Alatji mayutju Katutjalulanya watjañu, palya kutju nyinanytjaku yiya tjapanpala. Palulanguru mangarriwiya kukawiya kapiwiya nyinamalpa.” Tjutjupalulpi piyuku watjañu, “Mangarriwiyalpila nyinatjip-ingkamarra, nyuntu wati kutjupalpi nyinatjurra ninti pulkanya!, paluru waarrkana kutjupa tjutanya watjantjaku. Waarrkana paluru tjana yankula mangarriku ngatjira payimilantjaku, ngurra kutjupa tjutangka. Ngurra palula mangarri pakaltjingalpayi. Palunyangka tjana tjinguru mantjira mangarri tjutanya ngalya katirra waalangka purinytjungku kanyintjaku. Palunyangka waala mangarritjarra tjuta ngaramalpa ngurra tjiwarriwarringka. Ngula kapiwiyarryningka waala palula tjanalaya payimilara ngalkunmalpa, yanangu tjutalu.”

*Tjutjupanya mayutju tina ngaratjunku
Yurrunitja 41:37-57*

Wangka panyapa kulira pukularringu mayutju Piirunya. Palurulpi tjananya watjañu palumpa waarrkana tjutanya, “Wati ngaatjanya tjinguru ninti Katutjaku kurrunderjarra. Wati kutjupa tjutanya nintiwiya puťu kulira nyinanyi.” Palunyangka Piirululpi Tjutjupalakutu wangkangu, “Katutjalunta nintiñu mangarriku ngatjira kanyintjaku waalangka, nyuntu ilta ninti pulka nyinanyi. Palunyangka wati kutjupa tjuta ngatalpa nguwanpa nyinanyi. Kalananta mayutju pulkalpi nyinatjunku, yanangu tjutaku, ngurra uwankarraku. Palunyangka nyuntulpi

watjantjala kulilkuya palyantjakitjangku. Nyuntulpi mayutju pulka nyinaku, ngayula ngan̄ti.”

Manta Yitjipilawana Tjutjupanyangarri parra ulytjarinangi ngurra kutjupa tjutawana, mangarri payimilalkitja. Palulanguruya katirra waala tjutangka tjarrpatjunkula wantingu. Palunyangka waarrkana kutjupa tjuta tjananya tjana watjanu nyakula kanyintjaku. Palulanguru manta Yitjipilawana putu kulin̄ingiya mangarri wiyarringanyingka. Palulanguruya puṭu kulira tjapinu mayutju Piirunya. Piirulu watjanu Tjutjupanya, “Yankula wangka!, nyuntupa waarrkana tjutangku mangarritjarra alantjaku, yaŋangu kutjupa tjutangku payimilantjaku.” Palunyangkaya Yitjipinya ngurrara tjutangkulpi payimilara palya nyinangi mangarritjarra. Palunyangka manta kutjupa ngurrara tjuta ngalya yankupayi, ngurra Yitjipilakutu mangarri payimilalkitja.

Tjutjupaku kaaka tjuta Yitjipilakutu iyalku mayiku

Yurrunitja 42:1-36

Tjikupalu katja tjuta wantirriyalku Yitjipi-lakutu

Yurrunitja 42:1-8

Manta Kayinanangka ina Tjikupanya nyinarra kulin̄ingi, manta Yitjipingka mangarritjarraya nyinangi. Palunyangka palumpa katja tjutalpi watjanu, “Yankulaya ngurra Yitjipilakutu mangarri payimilara ngalya katilampa!, nganaŋala mangarriwiyalpi nyinatjipingkamarra.” Yalatji

tjananya Tjutjupaku kuṭa tjuta tjananya tiinpala watjaṇu. Palulanguruya ngurra Yitjipi-lakutu yanu. Palunyangka Tjutjupaku malanypa Pintjiminanya ngurrangka kanyiṇingi, ngurra kutjupa ngurrarangku pungkutjipingkamarra. Palunyangka manta Yitjipingka yankulaya pupakatingu mayutju tiṇangka. Palunyatjanuya pakara ngarala tjapiṇu, mangarri payimilalkitjalu. Palunyangkaya wiya ngarala kulinu Tjutjupanya mayutju tiṇalpi ngaranytjala. Irritiya mayutju tiṇangka pupakatirra ngara-payi. Tjutjupalu tjananya nyakula wiyalpi unyaparringu. Palunyangka wiyaya Tjutjupanya kulinu mayutju tiṇa Yitjipinya ngurrara kutjupa nguwanpa ngaranytjala. Paluru Yitjipikuṇu wangka kanyiṇingi.

*Tjutjupalu kaaka tjuta tjananya watjalku
Yurrunitja 42:9-17*

Tjutjupalupi watjaṇu palumpa waarrkanangku Yipuru wangkatjarrangku watjantjaku. Waarrkana palurulpi tjananya tjapiṇu, “Ngurra yaalytjingurunyurra ngalyanu?” Kaaka tjutangkulpi watjaṇu, “Manta Kayinanalangurulatju ngalyanu, mangarri payimilalkitja.” Tjutjupalupi watjaṇu palumpa waarrkanangku Yipuru wangkatjarrangku watjantjaku yalatji, “Wiya, nyurrangarri nguntinytju tjuta ngaranyi. Nganampatju ngurrangka parra ngarala malakunyurra yankuku watjalkitjalu nyurrampa mayutju tiṇangka. Palunyangkanyurra warrmalapi ngalya pakalku ngurra ngaakutu.”

Palunyangkalpi Tjutjupaku kaaka tjuṭangku kuliraya ngulurringu. Watjaṇuya, “Wiya, mangarrikulatju ngalya yanu. Nyuntupa walytja tjutlatatju nyinanyi. Palunyangkalatju kaakararranpa nyinapayi ngurra Kayinanangka, paapa kutjutjanu. Palunyangkalampatju malanypa kutjulpi yankula wiyarringu, ngurra irriṭi. Palunyangka malanypa kutjulampatju nyinanyi paapawana.” Waarrkana palurulpi tjakultjunu Tjutjupalakutu Yitjipikuṇu wangka, kulintjaku. Tjutjupalulpi kulira Yitjipikuṇu wangkangku waarrkanala watjanu paluru taanamilantjaku wangka yalatji, “Wiya, nyurrangarri ngunytjinytjunanyi, nganampatju manta nyakula katirra tjakultjunkukitjalu.” Palunyangka Tjutjupalulpi ngarala kuliŋingi piyuku watjalkitjalu. Tjutjupalu palumpa waarrkana piyuku watjanu wangka yalatji taanamilantjaku, “Nyurrangarriyurra ngayunya ngunytjinytjunanyi, tjinguru nyurrangarri tjukarurru wangkanyi nyuntupa malanypa ngurrangka nyinanyi. Palunyangka wati kutjululpi yankula altikatinytjaku, ngalya katirra ngayula nintintjaku, kanya kutjupa tjutanyurra tjiilangka tjarrparra nyinamalpa. Malanypa palunya ngayulu ilangku nyakunytjaku. Nyakula watjalkuṇa nyurranya tjiilanguru pakara ngurrakutu ankunytjaku.”

*Tjutjupalu Tjimiyananya tjiilangka
tjarrpatjunku*
Yurruntitja 42:18-24

Palulanguruya	Tjiṇtu	maṇkurrarringu
tjungu	tjiilangka	nyinangi.

Palunyangka

Tjutjupaluppi yankula tjananya palumpa kaaka tjutakutu. Ngarala paluru palumpa waarrkanangka watjaŋu wangka yalatji taanamilantjaku, “Katutjanya ilta nyinanytjala ngayulu kulinji. Palunyangka althururingkulana nyurranya watjanji. Tjutanyurra ngaangka nyinanytjawiya, yanangu kutju kutju ngaangka nyinaku. Palunyangkanyurra tjuṭa kutjupangku mangarri payimilara katiku ngurra Kayinanalakutu, nyurrangarrimpa walytja tjutaku. Palunyangkanyurra nyinarra nyurrangarrimpa malanypa ngalya kati! Małanypa palunyaŋa nyakula watjalku iltanyurra wangka palunya watjanu. Nyurrangarrimpa malanypa ngantitja nyakula ngayulu wiya tjananya watjalku nyurrangarrinya mirri pungkunytjaku.”

Palunyangka kaaka tjutangkulpi Tjutjupaku wangka kulira yunyparringu. Palulanguruya wangkarra wanŋingi, “Ilta małanypa Tjutjupanyalpila irriṭi kawalinu, palunyangkalpila tjiilangka nyinanyi. Katutjalulpilampa ngurrkurringkula tjarrpatjunu tjiilangka. Palunyangka irriṭi Tjutjupanyalpila kawalinu althuruiyangku. Palurulpilanya watjaŋu ngurra walytjangka yankula nyinanytjaku, ngurra Kayinanala. Nganaŋala kaaka tjutangku małanypa kawalinutjangka, palunyangkalanya Katutjalu yitjipunganyi.”

Tjutjupalu tjananya wangka panyapa kulira paluru yankula yulangi, waalangka yurilta. Tjutjupanya ngaranytjala kulinjuya, “Wiyalanya

ngaangku kulinji, wati kutjupa Yitjipikuñu wangkatjarrangku.”

Palunyangka Tjutjupanya yurilta yulanytjanu pakara ngalya yanu. Ngalya yankula tjananya watjanu palumpa waarrkana tjutanya, wati Tjimiyananya witira tayimapira tjiilangka kutu kanyintjaku. Paluru piyuku watjanu kutjupa tjutalpi pakara tjiilanguru ankunytjaku.

Manta Kayinanalakutu kaaka tjuta malaku yankuku

Yurrunitja 42:25-38

Tjutjupalu watjanu palumpa waarrkanangka yankula tjanampa mangarri tjutira payiki kutjupangka kutjupangka puulapankunytjaku. Palunyangka piyuku Tjutjupalu watjanu, “Mani tjanampa payiki tjutangka tjarrpatjunkula wanti!, payiki mangarri tjutatjarrangka, kumpilpa ngarrinytjaku.” Palunyangka kaaka tjutalpi ngalya yankula payiki mangarritjarra tuungkiyi tjutangka utitjunkula katingu.

Palunyangkaya waala palunya wantikatingu yankulaya ngururrpa ngarringu, ngurra Kayinanakitja. Palunyangka wati kutjulupi payiki mantjira arrara nyangu, mani panyapa ngarrinytjala. Palunyangka tjananya wati kutjupa tjutanya watjanu, “Mani panyapa ngaatja ngarrinyi.” Palunyangkaya kulira ngulungulurringu, palunyangka putu kulinangi. Ngulurringkulaya katingu tjlpi Tjikupalakutu. Palunyangkaya

nyakula watjañu, “Tjimiyananya tjiilangka nyinanyi. Mayutju Yitjipinya ngurraralulanyatju watjañu Pintjiminanya katirra nintintjaku, mayutju tiñangka.”

Palunyangka Tjikupalulpi watjañu, “Wiya Pintjiminanya katintjaku, ngurra Yitjipilakutu, kutjupalu pungkutjipingkamarra, ngayuku katja nguwanpa, yini Tjutjupanya nguwanpa.” Palulanguru kaaka tjutangkulpi payiki tjuta arrara nyangu, mani ngarrinytjala, payiki unngu. Palulanguru nyakulaya ngulungulurringu.

*Kaaka tjutangkuya Pintjiminanya
Yitjipilakutu katiku
Yurrunitja 43:1—45:24*

*Tjikupalu tjananya piyku wantirriyalku
mayiku
Yurrunitja 43:1-15*

Manta Kayinanala kutuya mangarriwiya kapiwiya nyinangi. Palunyangka wiya tjanampa kapi punkara ngarringi. Mangarri panyapa tjutanya ngalkuraya wiyanu. Palunyangka tjananya Tjikupalu watjañu, “Yankulaya manta Yitjipilakutu mangarri payimilala! Payimilarraya ngalya kati!” Katja ngururrtitjalu yini Tjuutalu watjañu, “Pintjiminanyalatju katiku ngurra Yitjipilakutu? Mayutju tiñangku watjanutja. Palunyangka ngayuluña katirra ilangku nyakula kanyinmalpa, kutjupalu pungkutjipingkamarra. Tjinguru kutjupalu pungku, palunyangka ngayunyalpiñi nyurrangarri ngaparrtjilu mirri iluntanku.”

Palunyangka Tjikupalulpi tjananya watjañu, “Kalalpi Pintjiminanya kati! Mingkulpa pulka, ngalypuru pulka kati!, mayutju tiña inytjanungku ungkunyjtaku. Mani panyapa payikingka ngarringitja katirrara yuwa mayutju tiñaku! Mani kutjupatarra katirrara yuwa!, mangarri kutjupa payimilantjaku. Ngayuluña Katutjanya tjapiñi altururringkula nyurrampa nyinanytjaku, mayutju tiña palunya, palunyangka ngayuku katja kutjarra Tjimiyananya, Pintjiminanya ngalya wantirriyantjaku, mayutju Yitjipinya ngurrarangku.” Palulanguruya kaakararranpa yanu ngurra Yitjipilakutu mañanypa kutju, panyapatjarra.

Tjutjupalu tjananya palumpa waalangka tjarpatjunku

Yurruntitja 43:16-34

Yankulaya mayutju tiñangka ngarangi. Tjutjupalulpi tjananya nyakula watjañu, palumpa waarrkanakutu, palumpa ngurrakutu tjananya katinytjaku. Palunyangka waarrkana palurulpi tjananya yaltirra katingu Tjutjupaku ngurrakutu. Yankulaya kulirinangi, “Nyaakulanya mayutju tiñaku ngurrakutu katinyi? Tjinguru mani panyapa tjutanguru mayutju tiña ngurrkurringu. Palulangurulanya tjinguru rungkara kanyinmalpa, palumpa ngurrangka, tjiilangka nguwanpa. Tjingurula palumpa waarrkanarrikula waarrkarringamalpa, ngurra palumpañungka.”

Palunyangka yankulaya Tjutjupaku waalangka yurilta ngarangi. Waarrkana panyapaya watjañu, “Irritilitju ngalya ankula mangarri payimilara anu. Palulangurulatju ngula kutju payikitjarra mani palunya nyangu, payiki tjutangka ngarringutja. Mani palunyalatju ngalya katirra kanyini yungkukitjalu. Mani kutjupa tjutalatju kanyini mangarri payimilalkitjalu. Palunyangkalatju puťu kulinji. Nganalulampatju mani panyapa tjutanya payikingka tjarrpatjunu?” Waarrkana paluru tjananya watjañu, “Wiyanyurra ngulurrinytjaku. Tjinguru Katutjalu nyurrampa tjarrpatjunu. Mani panyapa ngayuluña katirra tjarrpatjunu waalangka, mangarriku.”

Palulanguru waarrkana paluru mantjira katingu Tjimiyananya, tjiilangka nyinangitja. Watjañu tjananya tjungungku tjintu katurrinyangka ngalkuntjaku, mayutju tiňangka. Tjikupaku katja tjutangku yankulaya tuungkiyingka tjutangka mingkulpapa ngalypuru mantjiraya ngalya katirra waalangka yunngu tjunu, mayutju tiňa yungkunytjakitjangku. Tjana waalangka yunnguya paťara nyinangi mayutjuku. Tjutjupanya ngalya yanu mayutju tiňa. Palulanguru tjana nyakula pupakatirra tjana walkuňu. Tjutjupalu tjananya nyakula waarrkana watjañu, wangka yalatji taanamilantjaku, “Pupakatiwiyaya pakala!” Tjutjupalu watjañutjangka palumpa waarrkanangku piyuku tjananya tjapiňu, “Paapa nyurrangarrimpa kana nyinanyi?” Tjana yuwa wangkangu. Tjutjupalu

palumpa malanypa Pintjiminanya nyakula palumpa waarrkana watjañu wangka yalatji tañañamilara tjapiñu, “Palatja nyurrangarrimpa malanypa? Panyapatjunyurra yirriñi watjañu?” “Yuwa”, wangkanguya. Tjutjupalu nyakula Pintjiminanya palumpa waarrkana watjañu wangka yalatji tañañamilantjaku, “Ngayuluna yunytjurringanyi Katutjalunta nyuntunya yantayanantjaku.” Kaaka tjutangku kuliltjipingkamarra paluru pakara yanu kumpilpanguru yulanytjaku, mañanypanguru. Yunpa paltjira piyuku paluru malaku yanu kaaka tjuñakutu. Yankula ngarala waarrkanangka watjañu, mayi anta kuka ngalya katirra tjunkunytjaku tjanampa. Tjutjupalu tiipula kutjungka wañmanguru nyinarra ngalkuñgingi, kanya kaakararrantuya tiipula kutjupangka ngalkula tjikira paltjarringu.

Tjutjupalu tjananya watjalku, “Nyaakunyurra panikina mulyañangku katingu?”

Yurrunitja 44:1-34

Manta Kayinanalakutu kaakararranpaya piyuku mañaku yankunytjakitja. Tjutjupalu palumpa waarrkanangka watjañu yalatji, “Palan tjuñaku payiki tjutangka mayi yintira puulaparra! Manintaya kuwarri yungkunytjala tjunkula wanala payiki kutjutukutjutungka! Mañanypa ngantitjaku payikingka tjurra!, panikina palya ngayuku, tjiilpatjanu palyañutja.” Tjutjupalu watjantjawana waarrkanangku yankula payiki kutjutukutjutungka tjunangi.

Mungawinki pakara kaakararranpaya tuungkiyingka kalpakatirra yanu manta Kayinalakutu yankunytjakitja. Yitjipila yilaya tjana yanangi. Tjutjupalu palumpa waarrkanangka watjañu, “Kala, wanara tjananya nyakula tjapila raapangku!, ‘Nyaakunyurra mulyatangku panikina palya katingu? Ngayuku mayutjungku nyurrangarrinya palya kutju kanyilpayi.’” Tjutjupalu watjantjawana paluru wanara tjananya tjapiñu, “Nyaakunyurra panikina mulyatangku katingu, mayutjuku?” Tjana ngulurringkula watjañu, “Wiyawanangku nyuntu kuru nganañanya watjañi. Panikina wiyalatju mulyatangku mantjiñu, ngurrrpalatju. Tjinguru nyuntu panikina nyakula mantjira nyuntu nyakula palunya kutju mirri puwa! Kutjupa tjutalatju mayutju tiñaku palyalatju puntura waarrkarimalpa.” Waarrkanangku watjañu, “Panikina mantjintjatjanu kutju puntura waarrkariku, kutjupa tjutanyurra palya yarurringkunytjaku ngurrakutu.”

Tjutjupaku waarrkanangku purinypa ngurriñingi, payiki tjuñangka, panikinaku. Kaaka tjutaku payikingka yurrunpa puñu ngurriñingi. Palumpa mañanypaku payikingka ngurrira mantjiñu, kala Pintjiminakuñungka. Tjuni kuyarringkula tjana puñu kuliñingi. Piyukuya malaku yanu tawunukutu. Tjutjupaku waalangka yankula tjana Tjutjupakuya pupakatingu, mayutju tiñaku. Tjutjupalu watjañu palumpa waarrkanangku wangka tañañamilara yalatji tjananya watjantjaku,

“Pakaraya ngara! Nyaakunyurra panikina ngayuku mulyaṭangku katingu?” Watjaŋulpiya, “Puṭulatju kulinji wiya wangkanytjaku. Wiya panikina mantjiṇutja kutju waarrkana nyinaku, tjutalatju palya waarrkarrimalpa.”

Tjutjupakuṇu wangka waarrkana paluru tjananya watjaṇu, “Wiya tjuta waarrkariku, mulyaṭangku katingutja, paluru kutju puntura waarrkarringkunytjaku. Kutjupa tjutanyurra palya yankunytjaku paapa nyurrangarrimpakutu.” Tjuutalulpi yilarringkula Tjutjupanya mayutju Yitjipinya ngurrara kutjupakutjura paluru kulira marrkuṇu, “Mayutju. Nyuntu manta ngaaku mayutju puntu ngaranyi. Kulilani ngurrkurringkunytjawiyangku! Yirriṭilanyatjun watjaṇu malanypa ngalya katinytjaku. Yankulalatju puṭu tjapinu Paapanya. Paapangku watjaṇu, ‘Pipirri ngaatja wiya katinytjaku.’ Ngula piyukulatju paapanya tjapinu pipirri ngaatja katinytjaku. Palulanguru paluru yuwa wangkangu, ‘Yuwa. Pipirri palatja katirra yaṇṭayaṇṭala!’ Wiyalatju pipirri ngaatja wantikatiku. Nganaṇatju yankula tjakultjunkunytjala, tjilpi nyarrangku kulira watjilarirra yilupayingkamarra. Ngayululpiṇa kaaka pułka ngaangka nyinarra waarrkarrimalpa, palunyangkaya Pintjiminanya palya katinytjaku, tjilpi nyarratja kulira watjilarirra yilupayingkamarra.”

*Tjutjupanya palumpa kaaka tjutaku kalypar-
riku*

Yurrunitja 45:1-24

Tjutjupalu wangka palunya kulira yulakit-jarrirra tjanala waarrkana tjutangka watjanu, “Yankulaya yurilpangka nyina!” Palunyatjanu paluru kaaka tjutangka nyakula puntura yulangu. Palulanguruya yurilpanguruya ngarala kulinu yulanytjala, waarrkana tjutangku.

Tjutjupanya wangkangu palumpa kaakangkapa malanypangka Yipuru wangka tjana kulintjaku, “Ngayuluŋa ngaatja ngaranyi, Tjutjupanya.” Tjutjupalu watjanutjangka kaaka tjuta tjanaya ngulurringkula yataŋpa ngarangi. Tjutjupalu tjananya piyuku watjanu, “Ngulurringkuwiya yilaya ngara! Ngayulu nyurrangarimpa malanypa wangkanyi, Tjutjupanya. Yirritinyurra ngayunya tjalamilara manta ngaakutu wantirriyanu, manta Yitjipilakutu. Wiya nyurrangarri ngayula ngulurringkunytjaku. Katutjalu kutju ngurra ngaakutu wantirriyanu ngayunya, mayutju tiŋa nyinanytjaku. Mayi palyana nyurrampa yunganyi kananyurra nyinanytjaku, yanangu yuwankarra mayiwiyarringkunytjala mirrirringkupayingkamarra. Yiya payipalangka kapingu wiya pungkuku, an mangarriwiya pakalku. Nyurrangarri yankula malaku ngalya yankunytjaku ngurra Kuutjinalakutu, mayi palyangkanyurra nyinanytjaku. Ngayuku paapangkaya yankula tjakultjurral!, mayi palyakutunyurra ngalya yankunytjaku, mayiwiyangka. Yankula tjanala wangka!, tjamupiti kapalipiŋti ngalya katinytjaku ngaakutu mayi palyangkaya nyinanytjaku. Tjiipi tjuta, nanikuta tjuta, puluka tjutatarra ngalya

kati!, yukiri palyakutu. Nyurrangarri ngalya yankunytjala ngayulu nyurrangarrinya mayi palyatjarrangku yanṭayaṇṭalku. Ngurra Kuutjinalanyurra nyinaku.”

Palulanguru Tjutjupanya yankula Pintjiminanya yampura yulangu. Palulanguru kuṭa tjutangkalpi yampura yulangu. Palunyangka kuṭa tjutaya yunyparringkula Tjutjupala wangkangu. Piirululpi tjananya kulira pukularringu Tjutjupanyalpi watjanu, “Yankulaya nyuntupa walytja tjuta mantjira ngalya katinytjaku. Ngalya yankulaya palya nyinamalpa manta Kuutjinala, mayi palyangka. Palya, wakina tjuta tjanampa yuwa!, yulytjaya mantjira ngalya katirra ngurra ngaangkalpi nyinanytjaku, ngurra yini Kuutjinala.”

Palulanguru Tjutjupalu tjananya wakina tjuta yungu yulytja tjuta kalpatjunkula ngalya katinytjaku. Paluru mangarri kuka yungkula tjananya watjanu, “Yankula tjananya mantjira ngalya kati!, yulytja tjutatarra, ngaangkanyurra palya nyinanytjaku mayingka, yukiri palyatjarrangka.” Kala, yuwaya wangkangu.

Tjikupanya manta Yitjipilakutu yankula, nyinarra mirrirriku
Yurrunitja 45:25—50:21

Tjikupalaya tjakultjunku, “Tjutjupanya kana nyinanyi.”

Yurrunitja 45:25-28

Palunyatjanu paluru tjana manta Kayinalakutu yanu. Tjana yankulaya Tjikupala

tjakultjunu, “Tjutjupanya palya kana nyinanyi. Manta Yitjipinya ngurrarakulpi mayutju nyinanyi.” Tjikupalu kulira, wiwayanangku kulira watjañu, “Wiya. Ngayuku katja yirriṭi mirrirringu.” Palulanguru wakina tjuta nyakula tjana watjanu, “Ngaatjanya nyuntupa katjaku wakina, Tjutjupaku.” Yiltalpi paluru kulira watjañu, “Kala, yananyilpila yuwankarra, ngaangkana ngayuku katja nyakunytjawiya nyinarra mirrirritjipingkamarra.”

*Tjikupanyangarriya manta Yitjipilakutu yanku
Yurrunitja 46:1-27*

Tjikupungarri yulytja tjuta yutitjunkula tjananya watjañu, “Yankulala ngurra Piitjipala kunaṭinpa pungkula ngalkunytjaku, Katutjanya walkuntjakitja.” Yankulaya Katutjanya walkunu ngurra Piitjipala. Palulanguru Katutjanya wangkangu Tjikupala yalatji, “Ngayuluña nyuntupa paapaku mayutju tiña wangkanyi, Katutjanya. Palyanyurra manta Yitjipilakutu yankunytjaku, ngulurringkunytjaku wiya. Nyuntu ngurra palula nyinarra mirrirringkunytjala, Tjutjupalunta nyuntunya kanyilku, malpalu. Nyuntupa ngantitja tjutanya ngayulu tjananya yanṭayanṭara ngalya katiku ngurra ngaakutu, tjanaya nyinanytjaku ngaangka, ngurra Kayinanala, palyangka.”

Palulanguruya Tjikupanyangarri wakinatjarra yanu Yitjipilakutu. Yanangu tjutaya yanu tjikitji tjikitj yanangu, watipa minyma pipirri wiima tjutaṭarra.

*Ngurra Kuutjinalaya yankula nyinamalpa
Yurrunitja 46:28—47:12*

Tjikupanyangarri yankulaya yilarringkula Tjuutanyalpiya wantirriyanu, yankula Tjutjupala wangkanytjaku yalatji, “Nganaŋatju ngurra yilalpilatju nyinanyi, ngalya yankulalanyatju nyawa!, Kuutjinalalpilatju nyinanytjala.” Kala, palulanguru Tjutjupalu kulira yunyparringkula yanu paapa palumpa nyakunytjaku. Paluru yankula palumpa paapangka yampura yulangi. Tjikupanya wangkangu “Ngayuku Katjaŋanta nyakula kutju yunyparrinyi.”

Kaaka payipalalpi tjananya yaltirra katingu, yankula Piirunya nintintjaku. Katirra tjananya nintintjaku mayutju pulka Piirunya, Tjutjupalu yilarringkula Piirula wangkangu, “Ngayuku walytja tjutaya tjarrpangu ngurra Kuutjinangka. Ngayuku kaaka tjutaŋa tjananya ngalya katingu ngurra ngaakutu, nyuntunyantaya nyakunytjaku, mayutju tiŋa.” Piirulu tjananya nyakula tjapinu, “Waarrka nyaanyurra palyalpayi?” Watjaŋuraya, “Tjiipi kutjulatju kanyilpayi, yirrititja tjutaluya kanyilpayi, palunya nguwanpa. Ngaatjalatju ngalya yanu mayi wiyarringanyingka. Yaalytji?, palyalatju nyinaku ngurra Kuutjinala?” “Yuwa, palya nyurrangarri nyinanytjaku ngurra nyarra palula.” Piirululpni tjananya wangkarra tjananya iyanu. Tjutjupanyalpi watjaŋu, “Nyuntupa walytja tjutangkuya tjana katirra yanṭayanṭantjaku yukiri palyangka, ngayuku tjiipi tjuta, nanikuta tjutatarra.”

Ngula kutju katirra Tjutjupalu Piiruku nintiñu, palumpa paapa, “Ngaatja ngayuku paapa.” Palulanguru tjilpi Tjikupalu Katutjanyara tjapiñu, Piiruku, kala Piirunyara yunyparringu. Paluru pukularrira malaku yanu ngurra Kuutjinalakutu.

Ngurra palulaya palya nyinapayi. Tjutjupalu tjananya palya kutju nyakula tjananya yantayantara yungkupayi, palyaya tjana nyinanytjaku, ngurra palula.

*Tjikupanya yiluku
Yurrunitja 49:29—50:14*

Tjikupalu paluru rawa nyinarra paluru kulinulpí, katja tjutangka watjalkitjangku. Paluru yaltirra tjananya watjañu mirririkitjangku, “Ngayulu mirririkitjangku nyurrangarrila tjakultjunanyi. Mirrirrinijaniya katirra tjurra, manta Kayinanala! Kulpi panyapangkañiya yini Makapilangka katirra tjarrpatjunkula ngarritjurra!, tawunu Mamarinkga kakarrara. Tjamuwana paapawananiya katirra ngarritjurra!” Yalatji tjanala wangkarralpi paluru mirrirringu. Palulanguruya Tjutjupanyangarri puntura yulangi, Yitjipinya ngurra tjutañarra. Palunyatjanuya Tjutjupalungarri mirri palunya katingu manta Kayinanalakutu, Tjutjupaku kaaka tjutangku. Yitjipinya ngurrara mayutju tjutaya tjungu yanu waarrkana kutjupa tjutañarra. Ngururrpaya piyuku puntura yularra katingu kulpi Makapilangkalpi ngarritjunu. Yitjipilakutulpiya malaku yanu ngurrakutu.

*Tjutjupalu tjananya marrkulku nguluwiyyaya
nyinanytjaku*
Yurrunitja 50:15-21

Paapa tjanampa wiyarringutjangka ngan̄tiya ngulurringkula kulinu Tjutjupaku kaaka tjutangku, “Tjinguru Tjutjupalu kulinu ngaparrtjilulanya pungkunytjakitjangku, yirritila tjalamilara wantirriyanutjangka. Tjingurulampa kutu ngurruku nyinanyi.” Yalatji kuliraya wati kutju Tjutjupalakutu yiyānu, yalatji tjakultjunkunytjaku, “Nganampa paapangku kana nyinarra watjañutjangka, nyuntunya tjapintjaku. Yalatjilatjunta kuwarri tjapini. Ngaparrtjingku pungkuwiyyangkulanyatju wanti! Nganañatju yirriti wiawanangku nyuntunya tjalamilara wantirriyanu. Kalyparringkulalampatju nyinama!” Tjutjupalu wangka panyapa kulira yularra watjañu, “Ngayulu wiya nyurrangarrimpa ngurruku nyinanyi. Yirritiña nyurrampa kalyparringu.”

Tjutjupaku kaaka tjutaya ngalya yankula watungaralaya Tjutjupala wangkangu, “Palyalatju nyuntupa waarrkanalpi waarrkarriba nyinamalpa.” Tjutjupalu tjananya watjañu, “Pakalaya! Nyaakunyurra ngaangka watungaranyi? Nyaakunyurra ngulurringanyi? Ngayulu wiya nyurrangarrimpa ngurruku nyinanyi. Waarrkana wiyatjunyurra waarrkarrimalpa. Nyurrangarri ngayuku kaaka tina tjuṭa. Yiltaninyurra mirri pungkukitjalu tjalamilara wantirriyanu. Kala, Katutjalu kuliranytjawanañinyurra ngalya wantirriyanu,

palya, mayiwiyangkaṇa nyurranya yanangu tjuṭa kanantjaku. Kuwarri kananyurra nyinanyi, ngaakutuṇinyurra ngalya wantirriyanu. Ngayukutjuya ngulurringkuwiya nyinama! Ngayulu nyurrangarrinya pipirri tjuṭatarra yanṭayantara kanyinmalpa.”

Tjikupaku ngantitja tjuṭaya kutu Yitjipila nyinamalpa

Yurrunitja 50:22-26

Tjutjupanyangarriya palumpa kaaka tjuṭatarra kutuya manta Yitjipingka nyinangi. Yirriti Tjutjupalu miṭa Yitjipinya ngurrara yaltirra katja kutjarra mantjinu. Yini yalatjipula nyinangi Yipurimanya, Manatjanya. Watirringkula Manatjaku katjalpira yutirringu yini Makiranya. Tjutjupalu tjilpirringkula palumpa tjamupiti kapalipiṭi nyangu, Makiraku katjaṭarra. Palulanguru Tjutjupalu tjananya palumpa kaaka tjuṭa yaltirra watjanu, “Kuwarrina mirrirriku. Palulanguru nganti Katutjalu nyurrangarrinya kutu manta ngaangka yanṭayantara kanyinmalpa. Ngaangka nyurrangarrinya kanyira ngula manta palulakutu katiku, manta Kayinananalakutu. Yirriti manta panyapa nyurranya yungkunytjakitjalu Katutjalu tjananya watjanu, Yipuramanya Yatjikanya, Tjikupanya.” Palulanguru Tjutjupalu tjananya piyuku watjanu, “Katutjala mirangka, watjalaniya ngayunyanjiya tarrka manta palulakutu katintytjaku!” Yuwa wangkanguya. Palunyatjanu Tjutjupanya

manta Yitjipingkalpi mirrirringu. Yalatji Tjutjupanya rawa nyinangi, yantatan tiin yiya. Yirrii tjananya Yitjipinya ngurrara tjutangku mirrirringutja waalangka kuupanangka tjunkula wantipayi tarrkarrinytjaku. Tjutjupanyalpiya mirrirringutjangka katinguya waalangka yunngu tjunkula wantingu, kuupanangka. (Palulanguruya Yitjurilaku walytja ngantitja tjutangku tarrka mantjira katirra kulpi palula tjunu, ngurra Kayinanala.)

Muutjanya yiti puunarringku
Yanutja 1:1—2:10

*Yitjipinya ngurraralu mayutju kuya tjutalu
 kanyilku*
Yanutja 1:1-22

Tjilpi Yitjurilanya, Tjutjupanya palumpa kuta tjuta ngurra Yitjipila nyinarra wiyarringu. Katja tjuta yuntalpa tjuta nyinarra tjutarringu. Yitjurilaku walytja ngantitja tjuta, tjutarringu. Palunyangka Yitjipila mayutju tina kutjupa Piirunya nyinangu, Tjutjupaku ngurrpa. Yitjurilaku walytja ngantitja tjuta, tjutarrungulpi, palunyangka Yitjipiku mayutju paluru ngulurringu. Paluru ngulurrrirra watjanu tjananya palumpa walytja tjutangka yalatji, “Yitjurilaku walytja ngantitja tjuta, tjutalpiya nyinanyi. Tjinguru paluru tjanalanya pungkutjipingkamarra. Yalatjingkamarra wiyaya katja tjuta kutjupa mantjintjaku, tjutarrungkupayingka.”

Palunyatjanu Yitjurilaku walytja ngantitja tjuta watjañu, waarrkana tjutalpiya waarrkarinytjaku, mani mantjintjawiya. Palunyangka Yitjipinya ngurrara tjutalu tjananya mayutju kuyalu kanyin̄ingi, waarrka tiñaya palyantjaku. Yalatjiya waarrkarirra waala tiña tjuta palyara ngaratjunu. Yitjurilaku walytja ngantitja tjutaya rawa tjutarringkula nyinangi, Yipuru wangkapayi tjuta. Kutuya Yitjipinya ngurrara tjutalu tjananya yalturuwiyalu ngulurrirra waarrkaku tjingapungkupayi. Palunyangka wulkumanu kutjarra Yipuru wangkapayi nyinapayi. Paluru kutjarra minyma tjuta yan̄tayan̄talpayi, pipirri mantjin̄ingka. Palunyatjanu mayutju tiñalu pulanya yalatji watjañu, “Kungka Yipuru wangkapayingku ula wiima yutira kanyintjala, yilangku puwa! Tjinguru kungka wiima yutirrinytjala pungkuwiyalu wanti!” Puťu pulanya marrkura Yitjipiku mayutju pulkalu tjananya Yitjipinya ngurrara tjuta watjañu yalatjilu, “Yipuru wangkapayilu ula wiima yutira kanyintjala, tjulyaraya katirra karru yini Nayilangka wan̄i kapingka unngu ilunytyaku!, kanya kungka wiima tjutaya wanti!”

*Muutjanya pipirri ngarriku
Yanutja 2:1-4*

Palunyangka Yipuru wangkapayipula miit̄ararra nyinangi, katjalpi mantjin̄u yini Muutjanya. Pipirri palya nyakula palumpa maamalu waalangka yarrkatjunu, Yitjipinya ngurraralu nyakula tjulyara katipayingka. Pipirri palunya pira man̄kurrrpa

ngarrinytjala, palumpa maamalu puuta wiima palyaŋu katuwana patilpayitjarra. Puuta palula maamalu yangatjunu kapi tjarrpatjipingka, kititjarrangku. Muutjanya yunngu ngarritjunkula katingu yamultatjiwana yarrkatjunu. Muutjaku yayi yila ngarangi, nyakula kanyintjaku.

*Piiruku yuntałpalu Muutjanya mantjilku
Yanutja 2:5-10*

Palunyangka Piiruku yuntałpa tiña yanu karrukutu, paltjintjaku. Paluru tjatławana yamultatjiwana puuta wiima nyangu. Paluru nyakula watjaŋu palumpa waarrkana yankula mantjintjaku. Waarrkana paluru mantjira ngalya katirra yalara nyangu pipirri wiima ngarrirra yulanyingka. Nyakula yaltururringkula watjaŋu, "Kuunyi nyawa!, pipirri ngaatja Yipuru wangkapayiku." Palunyangka Muutjaku kangkuru ngalya yankula tjapiŋu, "Yaltikuŋa minyma Yipuru wangkapayi?", pipirri wiima ngaatjanya yantayantantjaku, paluru waarrkana nyuntupa nyinanytjaku." Piiruku yuntałpalu watjaŋu, "Yuwa, yankula yaltirra ngalya kati, minyma palunya!" Kungka paluru yankula Muutjaku maama yaltirra ngalya katingu. Muutjaku maamalu watjanu, Piiruku yuntałpa yalatji, "Pipirri ula wiima ngaatjana kanyira tiŋalku. Tiŋarringanyingkaŋanta yungku." Piiruku yuntałpa wiya ninti nyinangu Muutjaku maamaku. Piiruku yuntałpalu watjaŋu, "Kanyiratju tiŋala! Maniŋanta yungamalpa

pipirri kanyiñingka.” Ama tjikintjawiya nyinarra tiñarringulpi. Muutjaku maamalu katirra yungu Piiruku yuntałpalu kanyintjaku.

*Muutjanya ngulu tjalkalungku
Yanutja 2:11-25*

*Yitjipinya ngurrara pungkula Muutjanya ngulu tjalkalungku
Yanutja 2:11-15*

Muutjanya nyinarra watirringkula yanu walytja palumpa tjuṭa nyakunytjaku. Paluru yankula nyangu Yipuru wangkapayi tjuṭa puntura waarrkarrinyingka. Yitjipinya ngurrara tjuṭangku tjananya pungkula kanyiñingi. Muutjalu nyakula yaltururringu. Paluru nyangu Yitjipinya ngurraralu punganyingka palumpa walytja kutju. Nyakula paluru nyaarringu?, yaltururringu wati palumpa. Muutjalu parra nyangu kutjupangku nyakupayingka. Paluru wati Yitjipinya ngurrara pungkula yiluntanu ngaparrtjilu. Muutjalu pungkula ngulungulungku parrpaṭu tjawara talingka yarrkatjunu, kutjupangku nyakula nintilpayingka.

Tjiṇtu kutjupangka Muutjanya yanu nyakunytjaku palumpa walytja tjuṭanya waarrkarrinyingka. Yankula paluru nyangu Yipuru wangkapayi kutjarralupulanku punganyingka. Muutjalu watjanu, “Nyaakupulankun walytjatjarrangku punganyi?”

Wati Yipuru wangkapayilu watjanu, “Nyaakutjun tjapiṇu ngayunya?, piķa pungukitjalu? Nyuntu panya wati Yitjipinya

ngurrara pungkula iluntanu.” Muutjanya kulira ngulurrira yanu ngurra kutjupakutu, kanya Yitjipinya ngurrara mayutju tiŋalu waarrkana palumpa tjuta watjaŋu, “Yankulanyurra Muutjanya ngurrira mantjintjaku, palunya ngaparrtjilu pungkunytjaku.”

*Muutjanya yanku ngurra Mitiyalakutu ngulu,
pungkupayingka Yitjipinya ngurrarangku
Yanutja 2:16-25*

Paluru yankula nyinangu kapi wiilangka yila. Wati Tjiitjarunya ngurra palula nyinapayi. Palumpa yuntaŋalpa tjuta ngalyanu kapi mantjintjaku, tjiipi tjutaŋaku nanikuŋu tjutaŋkuṭarra. Kanya wati tjiipiku mayutju tjutalu tjananya payira wantirriyantjala Muutjalu tjananya marrkuṇu. Marrkura tjananya minyma tjutaŋaku kapi yintira yungu, tjiipi tjutaŋangku nanikuŋu tjutaŋkuṭarra tjikintjaku. Minyma tjutalu yankula paapala watjaŋu, “Wati Yitjipinya ngurraralulanyatju kapi tjutira yungu. Paluru tjananya wati mayutju tjuta pikangku payira yiyanu. Palurulpilampatju tjutira yungu.” Paluru tjanampa paapangku yini Tjiitjarulu tjananya watjaŋu, “Yankulaya yaltikati!, wati palunya, paluru ngalyankula ngananaŋalawana ngalkuntjaku, mangarri.” Muutjanya kutu nyinangu tjilpi Tjiitjaruku ngurrangka. Nyinarra paluru Tjiitjaruku yuntaŋalpa mantjiŋu, yini Tjipuranya.

Ngurra Yitjipila mayutju tiŋa panyapa nyinarra wiyarringu. Kututja tjana yitjipungkula kanyiŋingi, Yipuru wangkapayi tjutaŋanya.

Paluru tjana maniwiya waarrkarringkupayi, Yitjurilaku walytja ngan̄titja tjuṭa. Kutuya Katutjanya tjapilpayi waarrka puntu wantirra palyalpi nyinakitjangku. Katutjalu kulira tjananya yaltururringu. Paluru kulinu, “Ngayulu yirriti Yipuramala, Yatjikalakamu, Tjikupangka watjaṇu tjanampa walytja ngan̄titja tjuṭa yanṭayaṇṭalkitjalu.”

*Katutjalu Muutjanya yaltiku yankula walytja
tjuṭa katinytjaku*
Yanutja 3:1—4:20

Katutjanya Muutjala yutirringku
Yanutja 3:1-6

Muutjalu tjananya yanṭayaṇṭara katiyanangi palumpa waputjuku tjiipi tjuṭa, nanikutaṭarra. Tjana yukiri tjuṭa ngalkulinangi waṇmawana, puli yini Tjaniyalakutu. Ngurra palula Katutjaku nyalpitjarra Muutjala yutirringu, waru tili nguwanpa. Waru tili paluru watiyangka kampangi. Muutjalu watiya tili ngaranyingka nyakula puṭu kulinu, “Nyaaku watiya palatja kamparra yin̄minyirrinytjawiya? Piyukuna yilarrirra nyaku.” Yilarringutjangka mayutju Katutjalu watiyanguru yaltingu, “Muutja.” Muutjalu watjaṇu, kulira yalatji, “Ngaatjana ngaranyi.” Katutjalu watjaṇu, “Yilarrinnytjawiya maa ngara! Tjinakunu palatja yirriwiltjira tjurra! Wiya tjinakuṇutjarralu palintjaku manta ngaatjanya. Ngayuluṇa Katutjanya mayutju tiṇa tjanampa nyinanyi ngaa tjuṭaku Yipuramaku, Yatjikaku, Tjikupaku.” Palunyangka Muutjanya

kulira ngulurrira yunpa tjutunu marangku,
Katutjanya yuti nyakutjipingka.

*Katutjalu Muutjanya watjara wantirriyalku
walytja tjuta yankula watjantjaku
Yanutja 3:7-12*

Katutjalu Muutjanya piyuku watjanu yalatji, “Kulinin̄a tjananya ngayuku walytja tjuta, Yitjipinya ngurrara tjutangku pungkula kanyin̄ingka. Yañkuraya nyinanyi. Kulininya yankukitja, ngurra palyangka nyinakitja. Yalatjina kulin̄i tjananya mantjira ngalya katikitja, pungkula tjananya kanyin̄ingka ngurra palula. Ngurra kutjupakutuña tjananya katikitja manta palyakutu. Manta paluru yini Kayinananya. Yañangu tjuta kuwarri nyinanyi manta palula. Palunyangka kuwarriñanta wantirriyalku Piirulakutu yankula watjara wantirriyantjaku ngayuku walytja tjuta, nyuntu ngalya katintjaku tjananya, tjana Yitjipila rawa nyinapayingka.”

Muutjalu Katutjalakutu wangkangu, “Ngayuluña mungutja mayutjuwiyaña nyinanyi. Ngayulu mungutjangkuña wiya yankula watjalku Piirunya.” Katutjalu piyuku watjanu Muutjanya, “Ngayuluñanta nintira yilta yan̄tayan̄tara katiyanamalpa. Yitjurilaku walytja ngantitja tjuta tjananya nyuntu mayutjulu ngalya katirra puli ngaangka nyinatjurra! Ngula nyuntu ngaangka nyinarra kulikku, Yilta, Katutjalu ngayunya yiyanu, yañangu tjuta puli ngaakutu ngalya katintjaku.”

Muutjalu kulikku palya nyinakitja manta Mitiyangka

Yanutja 3:13—4:16

Muutjalu Katutjanya piyuku tjapinu, “Tjinguruña Yitjurilaku waltytja ngañtitja tjuṭa yankula yalatjingku watjalku, ‘Nyurrangarrimpa tjuṭaku mayutju tiñangku Katutjalu yiyanu ngayunya.’ Yalatjina tjananya watjantjala, tjingurutjuya yalatji tjapilku, ‘Yini nganalunta iyañu? Mayutju paluru ngananya?’ Kanya ngayulu nyaña tjananya watjalku?” Katutjalu Muutjanya watjanu, “Watjala tjananya! Yini ngayunyanña yalatji. ‘Ngayunyanña kutu nyinapayinya.’” Katutjalu piyuku watjanu Muutjanya, “Yalatji tjananya watjala! ‘Mayutju Katutjaluni wantirriyanu yirriti wiyarringutja tjuṭaku mayutju tiñangku. Ngayulu tjanampa Yipuramaku, Yatjikaku Tjikupakutarra mayutju tiña nyinanyi.’ Muutja. Yankula tjananya mayutju tjuṭa yaltirra kutjungkara tjakultjurra tjanala wangka yalatji! ‘Yitjipinya ngurrara tjuṭangku nyurranya yalturuwiyangku kanyini. Yalatji kulirana nyurranya katiku manta palyakutu. Yitjipinya ngurrara tjuṭangku nyurranya pungkula kanyini, palunyangka manta Kayinanalakutuna nyurranya katirra nyinatjunku. Kuwarri manta palula kutjupa tjuṭa nyinanyi.’ Wangka palunya tjanala ngayuku waltytja tjutangka nyuntu tjakultjunkunytjala, yiltaya kulikku. Palunyangka nyuntu yarra Piirulakutu!, yankula wangkanytjaku. Piirula yalatji wangka! ‘Yipuru wangkapayi tjuṭakulampatju

mayutju tiŋalu Katutjalu watjaŋutjangka, yunytjurrinyilatju tjin̄tu tjirripala yankula kunaŋinpa pungkula yungkunytjaku Katutjaku, walkura.' Piirulu watjalku wiya nyurrangarri yanku palulawana. Yalatjikuŋa ninti nyinanyi. Palunyangka ngayuluna Katutjalu kunpu tiŋatjarrangkuŋa tjananya Yitjipinya ngurrara tjuta kutu yitjipungku. Palunyangkaya ngulu tiŋarriku. Palulanguru Piirulu Yitjipinya ngurraralu yuwanmanku nyurrangarrinya ngalya wantirriyantjaku."

Muutjalu Katutjala watjaŋu, "Tjinguru Yitjurilaku walytja ngan̄titja tjutangku ngayuku wangka kulira wantiku. Tjinguruniya yalatji panypurangku, 'Wiya Katutjanyanta yutitjarrira wangkangu. Nyuntu mungutja, ngunytjinytjunkupayi.' Yalatji nguwanpaniya tjinguru watjalku, yaalytjirrikuŋa?" Katutjalu tjapiŋu Muutjanya, "Nyaan kanyini?" Muutjalu watjaŋu, "Watiyaŋa kanyini." Watiya wana nguwanpa katiyankupayi. Mayutju Katutjalu piyuku watjaŋu, "Mantakutu waŋirriyala!" Mantangka watiya waŋingu, kanya pilkaṭirringu. Pilkaṭi nyakula Muutjanya tjalkalungu ngulu warrpulpayingka.

Katutjalu Muutjanya watjaŋu, "Pilkaṭi wipu witira kanyila!" Palunyangka Muutjalu pilkaṭi witintjala watiyarringulpi. Katutjalu piyuku watjaŋu, "Yitjurilaku walytja ngan̄titja tjutangku nyanganyingka, watiya waŋirriyala!, pilkaṭirrinytjaku, panyapa nguwanpa. Nyakulaya yulta kulikku ngayuluŋanta watjara wantirriyaŋutjangka, mirri tjutaku mayutju

tina Katutjalu.” Katutjalu Muutjala piyuku watjañu, “Maranku kuutangka tjarrpatjurra!” Muutjalu parrpañu kulira tjarrpatjunu. Palunyatjanu yurrkura mara pikatjarralpi nyangu. Mayutju Katutjalu piyuku watjañu, “Piyukunku mara tjarrpatjurra, kuutangkal!” Yalatji tjarrpatjunkula yurrkura pangki palyalpi nyangu. Mayutju Katutjalu Muutjala piyuku watjañu, “Tjinguru nyuntunya mara pikatjarra tjana nyakula tjulurrmanku, kulilkuya, ‘Yilta Katutjalu ngaatjanya mara pikantanu. Paluru ilta ngaatjanya wantirriyanu.’ Nyakulaya tjinguru wiya yalatji tjukarurrulu kulikku. Palulanguru kutjupa tjananya nintila!, kapi yintinjingka ngurrkarriku. Karru Nayilangka nyuntu kapi mantjira mantakutu yintintjala yilta ngurrkarriku.”

Muutjalu kulira watjañu, “Mayutju, ngayunya wiyanı wantirriyala! Tjalınypa wiyanı palya wangkapayi nyinanyi, purinypaña wangkapayi.” Mayutju Katutjalu watjañu, “Ngayuluña tjalınypa palyalpayi. Ngayuluña tjalınypa palyara nintilpayi tjukarurru wangkanytjaku. Nganalu pina patilpayi? Nganalu kuru palyalpayi? Nganalu kuru patira yalalpayi?, ngayulu yilta, mayutju Katutjalu watjañingka.” Muutjalu piyuku watjañu, “Ngayunya wiyanı wantirriyala!, wati kutjupa wantirriyala!”

Palunyangka mayutju Katutjanya Muutjaku mulyarrarringkula watjañu, “Yaalytjin kulinı? Tjinguru nyuntupa kaaka Yirananyañantapula wantirriyalku? Paluru tjalınypa tjukarurru wangkapayi palya. Kuwarrinta ngalya yananyi

Yirananya. Tjungurrira yarra tjananya!, palurulpi tjananya wangka palyalu nintintjaku. Nyuntu Yirananya nintilku tjukarurrungku tjananya tjakultjunkunytjaku.”

*Muutjanya parrpatsu kulira yanku
Yanutja 4:18-28*

Palunyatjanu Muutjanya yarurringu waputju palumpa nyakunytjaku. Yalatjingku tjapinu, “Yunytjurrinya ngayuku waltya tjuta nyakukitja, ngurra Yitjipila.” Kanya palumpa waputjulu Tjiitjarulu watjañu, “Yuwa, palyan yanku waltya nyuntupa tjuta nyakunytjaku.” Palunyangka Muutjalu palumpa miiṭa an pipirri tjuta tungkiyingka kalpatjunkula katingu, manta Yitjipilakutu. Katutjalu Yirananya watjara wantirriyañu Muutjalakutu. Yitjipingka yilarringkula, palumpa kaaka Yirananya nyakula yampunu tjungurrira yanu. Muutjalu Yirananya tjakultjunu Katutjalu watjara wantirriyañutjangka.

*Muutjanyakamu Yirananya yankuku Piirlakutu wangkakitja
Yanutja 4:29—6:1*

Muutjanya Yirananya mayutju tiñangka wangkaku

Yanutja 4:29-31

Muutjalukamu Yiranalupula yaltirra mayutju tjuta ruunytjañu, watjalkitjangku. Palunya tjananya kaputunkula Yiranalu watjañu, Katutjalu Muutjanya watjara wantirriyañutjangka. Palulanguru Muutjalu

tjananya Yitjurilaku walytja ngantitja tjuṭa nintinu watiyanguru pilkaṭirrinytjaku, mara pangki pikatjarrarrinytjaku. Muutjakukamu Yiranaku wangkaya ngulurrrira kulinu. Kuliraya pupakatirra Katutjanya walkunu.

Mayutju Piirukutu Muutjanyakamu Yirananya yanku

Yanutja 5:1-5

Yitjipiku mayutju tiṇakutu Piirukutu Muutjanyakamu Yirananya yanupula watjantjaku. Yalatjipula watjaṇu, “Yitjurilaku walytja ngantitja tjuṭaku mayutju tiṇalunta Katutjalu yalatji watjaṇu, ‘Ngayuku walytja tjuṭa tjananya kanyilwiyangku wanti!, taliwanaya yankuku ngayunya tjungurringkula walkuntjaku.’” Piirulu kulira mulyarrarringu watjaṇu, “Mayutju tiṇa panyapa ngananya? Ngurrpaṇa, wiyaṇa ninti palumpa. Yaṇangu palunya tjananya, wiyaṇa tjananya wantirriyalku.” Muutjalukamu Yiranalu watjaṇu, “Mayutju Katutjalulinyatju watjaṇu tjungulatju yankula ngurra kutjupawana kunatinpa pungkula kutjara mayutju Katutjaku yungkunytjaku. Kunatinpataljura yankula pungkula yungkuwiyangka Katutjalulanyatju kulira mirri pungkutjipingka. Tjinguru pikatjarralatju nyinarra wiyarriku. Tjinguru kutjupa tjutalulanyatjuya mirri pungku wiyaliku.” Piirulu pulanya watjaṇu, “Nyupali tjananya watjaṇutjangka waarrkawiyalpiya nyinaku, ngurra kutjupawana yankukitja. Watjala

tjananyapula piyuku waarrkarrinytjaku!, wiyaya ngurra kutjupakutu yanku.”

Piirulu tjananya watjalku puntura waarrkar-rinytjaku

Yanutja 5:6-14

Waarrkana tjutaku mayutju tjutangka tjananya Piirulu yalatjilu watjanu, “Yitjurilaku walytja ngantitja tjuta puntura waarrkarrinytjaku, pilkinguru kutu puli nguwanpa palyantjaku. Yirriṭi kutjupa tjutalu tjanampa tjanpi yantara katirra yungkupayi, puli nguwanpa palyantjaku. Kuwarri wiya waarrkana kutjupa tjutangku tjanampa tjanpi yantara katirra yungkunytjaku. Paluru tjanaya yantara ngalya katirra puli nguwanpa palyara tjunkunytjaku, Yipuru wangkapayi tjutangku. Nampa yirriṭiya palyalpayi, kututjaya nampa palunya nguwanpa palyantjaku. Waarrkawiyaya nyinanyi tjinguru yankukitja, ngurra kutjupakutu yankula kunatinpa pungkula kutjalkitja. Palunyangka tjananya puntura waarrkarrinytjaku, wiyaya ngurra kutjupakutu yankunytjaku.”

Palulanguru Yitjipinya ngurrara mayutju tjutangku tjananya yankula Yipuru wangkapayi tjuta tjakultjunu, mayutju tiñangku tjananya watjanutjangka. Watjanu tjananya walytjangkuya tjanpi mantjira puli nguwanpa nampa palunya nguwanpa palyantjaku. Palunyangka Yipuru wangkapayi tjutalu tjanpiku ngurriñingi paña kutjupa kutjupawana. Mayutju Yitjipinya ngurrara tjutangku tjananya

wiipatjarralu pungangi Yipuru wangkapayi tjutanya. Mayutju tiña paluru yalatji tjananya watjañu, “Nyurrangarrimpa waarrkana tjuta tjingapuwa!, punturaya waarrkarrinytjaku, puli nguwanpa nampa palyantjaku.”

Yitjurilaku walytja ngantitjalu Muutjanya kuru watjalku

Yanutja 5:15-21

Yipuru wangkapayi mayutju tjutangku puťu kulinu tjanpi mantjira nampa palyalkitjalu. Puťu kuliralpiya Piirulakutu yankula palunya, mayutju tiňangka yalatji tjapinu, “Mayutju tiña. Nyaakulanyatju watjañu nyuntu puli nampa nguwanpa palyantjaku. Kutjupa tjutangkulanyatjuya tjanpi ngalya katintjawiyangka, nampa panyapa palyantjaku, mayutju Yitjipinya ngurrara tjutangkulanya pungangi yalturuwiyangku.” Mayutju tiňangku tjananya yalatji watjañu, “Kututjanyurra kulilwiya nyinanyi waarrka palyalwiya. Waarrkawiya nyinakitjangkunyurra ngunytji tjapilpayi, ngurra kutjupakutu yankula kunaťinpa pungkula kutjalkitjangku. Kalanyurra yankula puntura waarrkarri! Wiyalatju nyurrangarrimpa tjanpi mantjira katirra yungku, kutunyurra tjanpi mantjira nampa palunya palyantjaku.”

Yipuru wangkapayi mayutju tjutangkuya kulira watjilarringkula yankula Muutjanyakamu Yirananya payinu, “Nyupalipula mayutju tiňangka watjaňutjangkalampatju yunytjuwiya nyinanyi. Yalatjiku Katutjanya ninti

nyinanyi. Katutja paluruntapula yitjipungku, nyupalipula mayutju tiṇa ngurrkurrinytjaku palyaṇu. Yitjipinya ngurrara tjuṭalampatjuya yunytjurringanyi mirri pungkukitja.”

Muutjanya Katutjangka wangkaku

Yanutja 5:22—6:1

Palulanguru Muutjalu Katutjanya yalatji watjanu, “Mayutju. Nyaaku nyuntu tjananya wantinyi?, kutuya yitjipungkunytjaku, nyuntupa walytja Yipuru wangkapayi tjutanya. Nyaakutjun ngayunya wantirriyanu Yitjipilakutu? Ngayulu mayutju tiṇakutu yankula wangkangutjangka Yipuru wangkapayi tjutanya tjananya yunytjuwiyangku tjananya kutu pungkula kanyini. Nyuntu tjananya yurrunpa ngurra kutjupakutu wantirriyanmara pungkupayi tjutangkamarra.” Katutjalu Muutjala wangkangu, “Kalalpi, kuwarrina mayutju tiṇa palunya yitjipungkula ngulutjingalku. Ngulurringanyingka nyuntu nyaku. Ngulutjingarana tjananya wantirriyalku Yipuru wangkapayi tjuṭa manta ngaangkaya nyinatjipingkamarra.”

Katutjalu Yitjipinya ngurrara tjuṭa kutu yitjipungku

Yanutja 7:8—10:29

Yiranaku watiya pilkatirringku

Yanutja 7:8-13

Mayutju Katutjalu piyuku watjanu Muutjanyakamu Yirananya yankunytjaku, mayutju Piirulakutu wangkanytjaku. Katutjalu

piyuku yalatji Muutjanya wangkangu, “Mayutju paluru tjinguru nyuntunya watjalku ngangkarijarrangku palyantjaku. Yalatji watjantjala nyuntu Yirananya watjala!, palumpa watiya mantakutu wañinytjaku, mayutju tiñangka kurungka. Watiya palunya wantirriyanutja pilkañirriku.” Ngunytiya panya watiya wana nguwanpa katiyankupayi. Katutjalu pulanya watjanutjangka Muutjanya an Yirananya yanu mayutju tiñakutu Piirulakutu. Katutjalu watjaningitjangkapula palyanu. Yiranalu palumpa watiya wañirriyanutjangka, kanya pilkañirringu, mayutju waarrkana tjuñangka, kurungka.

Mayutju palumpaku waarrkana tjuñalu yatjiki palyalpayingku watiya tjuña wañiwañingu, kanya paluru tjana pilkañirringu. Palulanguru Yiranaku pilkañilu tjananya kutjupa tjuña ngalkura wiyanu. Yalatji nyakula Piirulu wiya kuliñingi tjananya wantirriyantjaku. Yipuru wangkapayi tjutanya, militjitjingku tjananya kanyiñingu.

Yitjipingka, kapi tjuta tjanampa tjatjakar-ringku

Yanutja 7:14-25

Mayutju Katutjalu Muutjalakutu yalatji watjanu, “Mayutju tiña paluru yilta militjitji nyinanyi. Palulanguru tjintungka nyupali mayutju tinangka yankula tjungurriwa!, karru Nayilakutu paluru yanku paltjintjaku. Nyupali tjungurrirra yalatji watjala!, ‘Yipuru wangkapayi

tjuṭa tjananya nyuntu kanyilwiyangku wantintyjaku, yankulalatju mayutju Katutjanya ngurra kutjupawanalu walkuntjaku. Yalatji mayutju tiñangkulanyatju Katutjalu watjañu. Nyuntu kulintjawiyangku kutu kanyintjala, mayutju Katutjalu yatjikilu kuṇpu tiñangku palyalku, nyuntu nyakula yilta Katutjanya kulira nintirriku. Kuwarri karru ngaatjanya ngayuku watiyangku pampuntjangka tjatjakarriku. Tjatjakarrinytjala kapi ngurrara tjuta yiluku. Yilurra ngarrinyingka karru pañti kuyarriku. Kapi panyapa tjatjakarrinyingka putunyurra tjikilkitjangku kulilku, Yitjipinya ngurrara tjutangku.'"

Katutjalu piyuku watjanutjangka Yiranalu yankula palumpa watiyangka pampunu. Palulanguru kapi tjatjakarringu. Ngurra kutjupa kutjupangka Yitjipinya ngurrara tjutaku kapi tjatjakarringu. Kutu tjananya mayutju tiñangku yitjipungkula kanyinjingi. Yipuru wangkapayi tjuṭa wiyalingga wantirriyañu.

*Manta Yitjipingka nganngi tjutarringku
Yanutja 8:1-15*

Mayutju Katutjalu Muutjangka yalatji wangkangu, "Mayutju Piirulakutu yankula watjala yalatjingku!, 'Ngayuku walytja tjuṭa tjananya kanyilwiyangku wantirriyala!, yankulaya ngayunya walkuntjaku. Nyuntu kutu tjananya kanyini yitjipungkula wantirriyalwiyangku. Ngayulu nyurrangarrimpa wantirriyalku nganngi tjuṭa, Yitjipinya ngurrara tjutakuña waalawana, ngurra kutjupa kutjupawanatarra. Karruwana

waala tjutawana nyuntupa waalawana, yintjamiwana kañilpa tjutawanañtarra. Ngurra kutjupa kutjupawana ngañngi maa tjutarringku.’”

Katutjalu Muutjanya piyku watjañu Yiranalu palumpa watiya katura kanyintjaku kapi tjutangka. Yalatji kanyiningka ngañngi tjutalingkuya mantanguru ngurra Yitjipila nyinarra wañningi. Palulanguru mayutju Piirululpi pulanya Muutjanyakamu Yirananya yaltingu. Ngalya yankulapula ngaranytjala, mayutju paluru pulanya watjañu, “Nyuntupa mayutju tiñanyapula tjapila!, ngañngi tjutanya yiyanjtaku, ngurra wañmalingku katirra wiyanjtaku. Ngayuluña wantirriyalku nyupalimpa walytja tjutanya, tjana yankula kunatînpa pungkula yungkunytjaku.” Muutjalu Katutjanya tjapiñu ngañngi tjuta tjanampa wiyanjtaku. Ngañngi tjuta wiyarringgañtjanga nyakula mayutju paluru kutu tjananya kanyiningi, waarrkana waarrkarrinytjaku, Yitjurilaku walytja ngantitja tjutanya. Piirulu Muutjakukamu Yiranaku wangka wiya kulinu.

*Manta Yitjipingka kiwinyi tjutarringku
Yanutja 8:16-19*

Mayutju Katutjalu Muutjala yalatji wangkangu, “Yirananya yalatji watjala!, palumpa watiyatjarralu pungkunytjaku manta, palulanguru kiwinyi tjutarrinytjaku. Tjutalingku manta Yitjipila nyinarra wañiku.”

Yañangu tjutaku, pulukaku, nanikutakuñtarra kiwinyi tjutarringu. Piirulu wiya tjananya

wantirriyanu Yitjurilaku walytja ngan̄titja tjuṭa, yiyanjawiyangku, kanyiṇingi militjitzingku, kutu. Muutjakukamu Yiranaku wangka wiya kuliṇu.

*Manta Yitjipingka muungu tjutarringku
Yanutja 8:20-32*

Mayutju Katutjalu Muutjanya yalatji watjaṇu, “Karrukutu Piirunya paltjilkija yananyingka, tjintungka nyuntu yankula tjungurriwa! Tjungurriira yalatji wangka!, ‘Ngayuku walytja tjuṭa tjananya kanyilwiyangku wantirriyalal, tjana ngayunya yankula walkuntjaku. Nyuntu tjananya kutu kanyiṇingka ngayulu nyurrangarimpa yiylaku muungu tjutalingku. Paluru tjana tjarrpaku waalawana kutjupa kutjupawanaṭarra parra nyinaku. Ngurra waalangka yunngu tjarrparra puularriku, kanya ngayuku walytja tjuṭaku ngurrangka wiya. Tjintungka yatjikiluṇa muungu tjuṭa wantirriyalku. Manta Yitjipilawana muungu tjutarriku, nyakulanyurra kulilku ngayulu kuṇpu tiṇatjarrangku wantirriyantja. Ngayulu tjananya ngayuku walytja tjuṭa purinypalu kanyilku. Ngayuku walytja Yitjurilaku ngan̄titja tjuṭaṇa kanyiṇingka wiyaya muungutjarra nyinaku.’”

Palulanguru Muutjalu yankula Piirula Katutjaku wangka tjakultjunu. Palulanguru Katutjalu muungu tjutalingku wantirriyanu. Nyarra palula Yitjipila nyinarra ruunytjarringu. Puṭu kulira Piirulu Muutjanyakamu Yirananya yaltirra watjaṇu, “Palyanyurra

manta ngaangka yila yankula kuna^{ti}npara yungkunytjaku, nyurrangarrimpa mayutju tīna.” Muutjalukamu Yiranalupula watjañu, “Wiyalatju paña ngaangka kuna^{ti}npara pungkunytjaku, Yitjipinya ngurrallulanya nyakula ngurrira pungkupayingka. Nganañatju ngurra kutjupangka wañma yankula kuna^{ti}npara pungkunytjaku, mayutju Katutjalu watjañutjangka.”

Mayutju Piirulu watjañu, “Katutjanya tjapila!, muungu tjuta katirra wiyanjtaku. Palyanyurra ngurra kutjupakutu yankunytjaku, wañmawiya. Yilanyurra kunatinpa pungkula walkuntjaku.” Yilta Muutjalu tjapiñu Katutjanya muungu tjuta wiyanjtaku, palulanguru muungu tjutaya wiyarringu, kanya Piirulu tjananya ngunyntji watjara militjitingku kanyiñingi, Yitjurilaku ngan^{ti}tja tjuta.

Manta Yitjipila kuka tjutalingku tjanampa pungku

Yanutja 9:1-7

Mayutju Katutjalu Muutjanya watjañu, “Yitjipinya ngurraraku mayutju tiñakutu yankula yalatji tjakultjurra! Yipuru wangkapayi tjutaku mayutju tiñalulinyatju watjañu yalatji, “Ngayuku walystja tjuta tjananya wantirriyala kanyilwiyangku!, yankulaya ngayunya walkuntjaku. Nyuntu kulilwiyangku kutu kanyiñingka, ngayuluña tjananya nyurrangarrimpa kuka tjutana pungkula wiyalku. Pika tiñatjarraya ngarala wiyarriku, naanytja tjuta, tuungkiyi tjuta, kamula, puluka,

tjiipikamu nanikuta tjutaṭarra. Yalatji tjutaya yiluku, kanya kuka kutjupa tjuta Yitjurilaku nganṭitja tjutaku ngulytju tjanampa kana ngarala waṇiku, yilunytjawiya. Yalatji watjara mungawinkinä nyurrampa pungku.” ”

Muutjalukamu Yiranalupula Yitjipiku mayutju tiṇakutu yankula panyapa tjakultjunu.

Tjinṭu kutjupangka Yitjipinya ngurrara tjutaku tjanampa kuka yilurra wiyarringu, kanya Yipuru wangkapayiku tjanampa kana kutu ngarala waṇingi, yiluwiya. Piirulu tjananya mil-itjtjingku kanyiningi, Yitjurilaku nganṭitja tjuta.

Yitjipinya ngurrara tjutaku tjanampa pika katjurulpí tjanampa pakara ngaraku

Yanutja 9:8-12

Mayutju Katutjalu pulanya Muutjanyakamu Yirananya yalatji watjaṇu, “Warutjanu tjunpa mantjira Muutjalu katu waninýtjaku, mayutju tiṇanya ngaranytjala. Yalatji waṇinýtjala walpangku katiku, manta Yitjipilawana. Palulanguru pika puyila tjuta yaṇangu tjutangka pakara tałturriku, kuka tjutangkaṭarra.” Palulanguru pika katjuru paluru yaṇangu tjutangka pakara tałturringu, kuka tjutangkaṭarra. Kutu mayutju paluru kanṭilyangku kanyiningi tjananya iyalwiyangku. Piirulu wiya Muutjakukamu Yiranaku wangka kulinu.

Yitjipinya ngurrara tjuta kunatangku pungku
Yanutja 9:13-35

Mayutju Katutjalu Muutjanya yalatji watjaṇu, “Aali yankula Piirula watjalku,

ngayuku walytja tjuta kanyilwiyangku wantirriyantjaku, yankula tjana ngayunya walkuntjaku. Yalatji mayutju tiña palula watjala!, ‘Kuwarrinja nyurranya tjutalingku yitjipungku nyuntunya, nyuntupa waarrkana tjutaṭarra. Yitjipungkunytjala yalatjinyurra tjukarurru kulilkü, ngayuluṇa mayutju tiña kutju nyinanyi. Yurrunpa ngayuluṇa nyurranya wiya puntura yitjipungkupayi. Kala, kuwarrinja nyurranya puntura yitjipungku, kulira ngayunyalpinyurra walkulkü, kutjupa kutjupa ngurrara tjutaṭarra. Kutuya Yitjipingka nyinanyi, ngayuku walytja tjuta. Nyuntu tjananya wantirriyalwiyangku kanyini. Palulanguru kuwarri tjintungka kunaṭa inpurangku pungkuku nyurranya. Yurrunpa yalatji nguwanpa wiya nyurranya pungkupayi. Nyurrangarrimpa waarrkana tjutangka tjananya watjala!, puluka tjiipi, nanikutaṭarra, waalangka tjarrpatjunkunytjaku, kunaṭangku pungkula yiluntankupayingka. Yaŋangu tjutaṭarra waalangka tjarrparra kumpira ngaranytjaku.’”

Muutjalu yankula wangka palunya maa watjanu, mayutju tinangka. Palulanguru Katutjalu Muutjala piyuku watjanu palumpa watiya katura kanyintjaku ilkarikutu. Palunyangka mayutju Katutjalu kunaṭa tiña tjanampa wanīwaŋirriyanu. Maŋngirri tinangku rungkara tuutuuraṇu. Kunaṭa tinangku tjananya pungkula yiluntanangi waalangka yila ngaranyingka. Yaŋangu tjuta kuka tjutaṭarra pungkula wiyanu. Watiya,

yukiri tjutañarra kilytjuntankula wiyanu. Manta Kuutjinangka kutju tjananya wiya pungu kunañangku, Yitjurilaku ngulytju ngantitja tjuta.

Yitjipiku mayutju tiña paluru watjara wantirriyañu Muutjanyakamu Yirananyapula yaltirra ngalya katintjaku. Ngalya yankulapula ngaranytjala Piirulu pulanya yalatji watjanu, “Kalalpi, Katutjanyakapula tjapila!, kunaña wiyarrinytjaku. Mayutju Katutjanya kutju tjukarurru nyinanyi. Ngayuluña wiyawanganangku Katutjanya kulilpayi, ngayuku walytja tjutangkutarra. Watjaninqantapula waarrkana tjuta ngayulu tjananya kanyilwiyangku wantirriyalkitjalu. Palyanyurra tjuta yankunytjaku.”

Palunyangka Muutjalu yankula tawunungka yila ngarala mara katura Katutjanya tjapiñu kunañakamu kapi wiyarrinytjaku. Yitjipiku mayutju tiñalu nyakula kunaña kapi wiyarrinytjala, militjitjingku Yipuru wangkapayi tjuta kanyiningi, yiyantjawiyangku.

*Pana Yitjipingka tjintilyka tjutarringku
Yanuṭja 10:1-20*

Mayutju Katutjalu Muutjala yalatji watjanu, “Piirunyakamu mayutju tiña tjutañarra militjitjiya nyinanyi. Ngayuluña tjananya yanpiri patiñu militjitjiya kutu nyinanytjaku. Kuttuya yalatji nyinanytjala ngayuluña tjananya kunpu tinatjarrangkuña yitjipungku, nyurrangarri ngayunya kutju kulira wal kuntjaku, nyurrangarrimpa ngantitja tjutangkutarra.”

Katutjalu pulanya Yirananya wangka kutjupa wangkarra wantingu. Palulangurupula yankula Piirula yalatji watjañu, “Yipuru wangkapayi tjutaku mayutju tinalu watjañu, ‘Nyaakun nyuntu kutu puťu kulisipayi? Ngayuku walytja tjuta tjananya kanyilwiyangku wanti!, yankulatjuya walkuntjaku. Nyuntu kutu militjitji nyinanyingka mungawinkina tjintilyka tjutalingku wantirriyalku. Yukiri, watiya tjuta tjananya ngalkura kilytjuntara wiylaku, tjintilyka ruunytjangku.’”

Yitjipinya ngurrara tjutaku mayutju Piirulu kulira pulanya yarurringkula yanu. Muutjalu Yiranaluṭarra Piiruku ngurra wantikatirra yanu. Palulanguru palumpa waarrkana tjutangku wanara marrkuñu, “Nyuntu kulila! Ngurralampa manta Yitjipinya kuyarringu. Palunyatjanu Yipuru wangkapayi tjuta tjananya kanyilwiyangku wanti!, yankulaya mayutju Katutjanya walkuntjaku.” Palulanguru Piirulu tjananya watjañu Muutjanyakamu Yirananya yankula yaltirra ngalya katinytjaku. Piirulu pulanya yalatji watjañu, “Kalalpi, palyanyurra yankula nyurrangarrimpa mayutju Katutjanya walkuntjaku.”

Muutjalu watjañu, “Tjutalatju tjungu yanku, wati tjuta kungkakamu pipirri tjuta, tjiipi tjuta, nanikuta tjuta, puluka tjutatarra. Katutjanyalatju tjutangku walkulkku.” Mayutju tinalu watjañu, “Wiya tjuta, wati tjuta kutjunyurra yankunytjaku. Kungkakamu pipirri tjuta ngaangka kutu nyinanytjaku.”

Wangka palunya watjara mayutju tiŋalu pulanya wantirriyaŋu.

Palunyangka Katutjalu tjintilyka tjuta wantirriyaŋu, yukiri watiya tjuta ngalkula kilytjuntankula wiyanjtaku. Yalatji ngalkuŋingitjangka mayutju paluru pulanya Muutjanyakamu Yirananya yaltingu. Piyuku pulanya ngunytiŋyinu, Yipuru wangkapayi tjuta kanyilwiyangku wantirriyalkitjangku. Palunyangka walpa tiŋangku wilurarranguru tjintilyka tjuta tjananya rungkara katirra kapungka wiyanu, kanya Piirulu tjananya militjitungku kanyiŋingi wantirriyalwiyangku.

Manta Yitjipingka munga tjanampa rawa ngaramalpa

Yanutja 10:21-29

Mayutju Katutjalu Muutjanya yalatjilu watjaŋu, “Nyuntu mara katura yilkarikutu kanyintjala, manta Yitjipilawana munga tiŋa ngaraku.” Palunyangka pakara yankula Muutjalu mara kanyiŋingka munga tiŋa rawa ngarangu, tjintu tjirripala, Yitjipinya ngurraraku ngurrawana. Palunyangkaya rawa nyinangi ngurra walytja kutjuŋu kutjuŋungka, pakara yankunytjawiya, kanya Yitjurilaku ngulytju nganŋitja tjutaya ngurrawana palya tjanampa ngarangu.

Mungangka rawa nyinarra Yitjipiku mayutju tiŋalu waarrkana wantirriyaŋu Muutjanya yaltirra ngalya katinytjaku. Muutjanya ngalya yankula ngaranytjala, mayutju paluru watjaŋu, “Palyanyurra tjungu yankula nyurrangarrimpa mayutju tiŋa walkuntjaku, kungka tjutangku,

pipirri tjutangkuṭarra. Nyurrangarrimpa kuka tjuta kutju ngaangka wantikatintjaku, tjiipi, nanikutakamu puluka.” Muutjalu watjañu, “Wiya. Kuka tjutalatju tjananya katiku, ngurra palunyangkalatju nyakula kunatiñpa pungkukitjalu.”

Mayutju Katutjalu Yitjipiku mayutju militjitji nyinatjunutjangka, palunya yanpiri, patinu miltjitji kutu nyinanytjaku. Mayutju paluru Muutjanya payira wantirriyanu, “Wantirrañi yarra!, małaku ngalya yankula nyakunytjawiya. Nyuntu ngalya yankula ngayula piyuku yutirriku, ngayuluña tjananya watjalku nyuntunyantaya mirri pungkunytjaku.” Muutjalu watjañu, “Tjukarurrun watjañu. Wiyan piyuku ngayunya nyaku.”

Yitjurilaku ngulytju ngantitja tjutangku wantirraya yankuku

Yanutja 11:1—13:22

Katutjalu tjananya nintliku tulku Patjuwupanya

Yanutja 11:1—12:27

Mayutju Katutjalu Muutjanya piyuku watjañu, “Yitjipinya ngurrara tjuta tjananya kutjungaralpi ngayulu kuwarri yitjipungku. Palunyatjanu mayutju paluru kanyilwiyangku nyurrangarrinya wantirriyalku. Kalalpi Muutja, nyuntu tjananya Yitjurilaku ngulytju ngantitja tjutanya yankula yalatji tjakultjurra!, ‘Yitjipinya ngurrara tjuta tjananya tjapila!, ngurra kutjungka nyinapayilu nyurranya mani nguwanpa yungkunytjaku, puli tjiilpa, puli kuulta.’”

Muutjakuya kulira ngulurringu mayutju tiña nyinanytjala, Yitjipinya ngurrara tjuta mayutju tiñaku walytja tjutañarra. Mayutju Katutjalu tjananya ngulutjinganu Yitjipinya ngurrara tjuta. Ngulu nguwanpaya nyinangi Yitjurilaku ngulytju ngantitja tjutaku. Muutjalu yankula mayutju tiñangka yalatjingku tjakultjunu, “Mayutju Katutjalunta yalatji watjanu, ‘Munga ngururrkutu kuwarri pana Yitjipilawana yankuku Katutjaku nyalpitjarra. Palulanguru katja yurruntitja tjutalingku yiluku, uwankarra. Katja tjuta nyurrampa yiluku ngurra ngaangka. Mayutju tiña. Nyuntupa katjatarra waarrkana kuyakuya tjutaku katjatarra, kuka tjuta uła wiima yurruntitja tjutatarra yiluku. Palunyangkanyurra katjatjirratja kulira yulaku, kanya Yitjurilaku ngulytju ngantitja tjuta ngaangka palya nyinaku. Katja yurruntitja tjuta tjanampa kutu kana nyinaku. Palunyangka nyuntu mayutju tiña ninti nyinaku, Katutjalu palumpa ngulytju tjuta tjananya yañtayanñara palya kanyilpayi.’”

Mayutju Katutjalu pulanya Muutjanyakamu Yirananya yalatjilu watjañu, “Yalatji tjananya-pula watjala!, Yitjurilaku ngulytju ngantitja tjutakutu. Pira yalangaangka tjintu nampa tiinangka wati tjutangkunyurra kutjutu kutjutu kunañipa palya kilytjunpawiya mantjintjaku, tjiipi uła wiima tjinguru nanikuta uła wiima. Pipirri tjutatjarralu kunañipa tiñalingku mantjintjaku, kanya pipirri tjirripalatjarrangku tjukutjuku mantjintjaku ngalkura wiyanjtaku. Tjinguru miitararralu pipirri wiimatjarrangku

puṭu kulilku ngalkula wiyalkitjangku. Palumpa kutjarraku walytja kutjupa tjutangku ngalya yankula tjungurirra kunaṭinpa ngalkula wiyan-tjaku, palula kutjarrangka.

“Kunaṭinpa palunya tjutanyurra mantjira kana kanyira tjintu nampa puutinangka mungarrtji mirri pungkunytjaku, tjintu tjarrpanyingka nganṭi. Mirri pungkulanyurra kanilpangka ngurrka tjutira waala walytjangka katirra tjunkula wanantjaku. Kantly kutjarra yalangka kutjuya palyara tjurra!, yalangka katuwanaṭtarra. Kunaṭinpa tjiipi palunya pungkulanyurra patantjaku. Kuka palunya ngarrirra ngurrka paṇakutu tjutira wiyarrinytjala mantjiranyurra kutjantjaku. Mungangka kuka palunya ngalkula wiyan-tjaku. Kapingka wiyanyurra puyilamilara kutjantjaku, kulkungka kutjunyurra kutjara ngalkuntjaku. Mangarri tjaati kutjunyurra ngalkuntjaku. Tjingurunyurra kuka palunya tiṇa ngalkula puṭu kulilku wiyalkitjangku, palunyatjanungkunyurra ngalkula wantintjya warungka kutjara wiyan-tjaku.

“Nyurrangarri ngurra Yitjipinya wantirra yankukitjangku, kuka palunya parrpatu ngalkula wiyan-tjaku, yurrunpanyurra tjinakuṇungka tjarrparra yulytja pulangkititarra ruulamapintjaku. Pulangkiti yulytja tjutaṭtarra riirri kanyira yankukitjangkunyurra parrpatu ngalkula wiyan-tjaku. Ngulanyurra manta Kayinalanalakutu yankula nyinarra palunya nguwanpanyurra tulku palyara ngalkula ngayunya Katutjanyanyurra walkuntjaku.

Pira palula kutju tjintu nampa puutinangka ngalkuntjaku.”

Mayutju Katutjalu pulanya Muutjanyakamu Yirananya yalatjilu watjañu, “Manta Kayinanangkanyurra nyinarra tulku Patjuuwupanya yalatji palyala! Tjintu nampa puutinangkanyurra tjutarringku, ngayunya Katutjanya walkuntjaku. Kukanyurra pungkuku ngurrangka tjutira panyapa nguwanpa parraþu mungula! Tjintu panyapangka mangarri tjaatinyurra ngalkuntjaku. Mangarri tjaati kutju kutunyurra ngalkunma!, tjintu tjikitjipalarrinyingka. Tjintu nampa puutinangka pikinpawutku ngurrilaya waala waltyjawana!, mantjira katirra wanirriyantjaku. Tjintu palunyangka mangarri tjaati kutjunyurra kutjara munguntjaku. Yalatjinyurra tjintu tjikitjipala nyinarra mangarri tjaati ngalkuntjaku. Yalatji ngalkula piyukunyurra tjutarrirra ngayunya Katutjanya walkuntjaku.

“Tjintu palunya tjutangka tjinguru yañangulu mangarri pikinpawututjarra kutjara ngalkunytjala tjungurrinytjawiyangkunyurra wantintytjaku. Yañangu paluru ngayuku waltyja wiya nyinaku.”

Yitjipinya ngurraraku katja yurrunitja tjuta yiluku

Yanutja 12:28-30

Palunya tjakultjunkunytja kuliraya Yitjuri-laku ngulytju ngantitja tjutangkuya kunañinpa

pungkula ngurrka kañilpangka tjutiñu. Tjutiraya watiya parrkangka tJulyultjunkula tuuwawana tjunangi, kantilypa kutjarrawanañtarra tuuwangka katuwana. Palunyatjanu munga ngururrkutu Katutjalu waarrkana nyalpitjarra yiyanu mirri pungkunytjaku, Yitjipinya ngurraraku katja yurrunitjtja tjutanya. Katja yurrunitjtja tjuta tjananya mirri pungu, mayutjuku katjatarra, kuka tjutakunu ula wiima yurrunitjtja tjutatarra.

Yitjipinya ngurrara tjutaya yularra wañingi. Puturaya kulira walytjayanku yulangi, katja yurrunitjtatjirratja, mirri nyakula, kanya Yitjurilaku ngulytju ngantitja tjuta palyaya nyinangi. Kuliraya ngurrka tuuwawana tjunu, Muutjalu watjañutjangka.

Mayutju tinangku tjananya kanyilwiyangku wantirriyalku

Yanutja 12:31-36

Munga palula mayutju tina paluru watjanu, Muutjanyakamu Yirananya yaltirra ngalya katintjaku. Ngalya yankunytjala pulanya watjanu, “Tjutangkuya ngurra ngaatja wantirra yarra! Nyupali panyapa tjapinutjangka, tjutalunyurra yankula mayutju Katutjanya walkula! Katutjanyapula tjapila!, nganañanya piyukulanyatju yitjipungkupayingka. Nyurrangarrimpa tjiipi tjuta, nanikuta tjuta katintjaku tjananya, puluka tjutatarra.”

Yitjipinya ngurrara tjutalu tjananya parrpatu parrpatunangi, pakaraya tjuta yankunytjaku.

Wantirriyalkitjangku tjananya tjana yalatji watjanu, “Pakaraya tjuta, kutu yarra!, Katutjalulpilanya Yitjipinya ngurrara tjuta mirri pungkutjipingkamarra.” Palunyangka Yitjurilaku ngulytju ngantitja tjutangku kanilpa, mangarri tjaatitjarra, yulytjakamu pulangkitingka karpira tjalira katingu. Muutjalu tjananya yurrun yurrunpa watjanutjangka yalatji, “Tjapilaya Yitjipinya ngurrara tjutangka!, ‘Mani puli tjilpa, puli kuultakamu yungkunytjakulanya.’” Paluru tjana mani puli tjilpa, puli kuultaarraya katiyanu paña Yitjipinya wantikatirra.

*Katutjalu tjananya katiyinamalpa
Yanutja 13:17-22*

Paña Kayinanalakutu Katutjalu wiya tjukarurrungku katiyanangi, manangkarrawana tjananya katiyanangi. Katutjalu yalatji kuliñu, “Paña Kayinananya ngurrara tjuta tjananya pikangku mirri pungkula kutju, palyaya nyinaku ngurra palula, Yitjurilaku ngulytju nganti tjuta. Paluru tjana ngulu paña Kayinananya ngurrara tjutaku nyinangi. Tjinguruya ngulu paña Yitjipilakutu malaku yankutjipingka, ngurra wañmawanana tjananya ngayulu katiyankuku, kapi yini Tjatjakalawana.” Yalatjiya manangkarrawana rawa yulytjayinangi.

Yurrunpa Tjutjupalu watjanutjangka Muutjalu Tjutjupanya mirri tarrka katiyinangi. Yankula ngurra Tjakutjangka tjarrpangu. Palunyatjanuya ngurra Yiltjamalakutu yanu, manangkarrangka yila ngaranytjala. Mayutju

Katutjanya tjanampa tjintungka yutuwari nguwanpa yurrunpa yankulinangi. Kanya Yitjurilaku ngulytju ngantitja tjuṭa ngantiwana yankulinangi. Mungangka mayutju Katutjanya tjanampa waru tili nguwanpa yurrunpa yanangi.

*Yuru Tjatjakangka ngururrwana tjanayanku
Yanutja 14:5-31*

*Yitjipiku mayutju militjitzirringku
Yanutja 14:5-19*

Yitjipinya ngurrara tjuṭaya mayutju tinangkutarra nyinarra waarrkana tjuṭaku puṭu kulira yalatjingkuya watjanu, “Nyaakula tjananya wantirriyanu?, Yitjurilaku ngulytju ngantitja tjuṭa.” Tjana yalatji wangkangu, “Waarrkanawiyalpila nyinanyi.” Mayutju tina paluru tjananya wakina naanytjatjarra katiyankupayi tjuṭa yaltingu. Paluru tjilirratjarra kutjupa tjuṭa naanytjangka kalparra yankupayi yaltingu. Palumpa tjilirratjarra tjuṭa tjananya tjina yankupayi yaltingu. Tjilirratjarra tjuṭangkuya Yitjurilaku ngulytju ngantitja tjuṭa wanunu, pungkunytjaku.

Kapi Tjatjakangka yila Muutjalukamu yanangu tjuṭangku nyinarra nyangu, Yitjipinya ngurrara tjuṭa wañma ngalya yananyingka. Yañangu paluru tjanaya nyakula ngulurrirra mayutju Katutjanya tjapiñu mirri pungkupayingka. Paluru tjanay Muutjanya panypurangkula watjanu, “Nyaakulanyatju nyuntu ngurra ngaakutu ngalya katingu? Ngaangkalpilanya pungkula

yiluntankuku. Yitjipilalatju palya nyinamara, ngurra palulalatju nyinarra wiyarringamara. Nyaakulanya ngaakutu ngalya katingu?, palyalatju waarrkana kutu nyinamara, ngaakutu ngalya yankula yilupayingka.”

*Katutjalu tjananya kanalku pungkupayingka
Yanutja 14:13-31*

Muutjalu tjananya watjañu, “Yitjipinya ngurrara tjutaku ngulurrinytjaku wiya, raapaya ngaranytjaku. Yalatji ngaralanyurra nintiriku, Katutjalulanya kanalku. Nyarra Yitjipinya ngurrara tjuta tjananya kuwarrinyurra nyaku, mayutju Katutjalu kuwarri pungku tjananya, pikalu tjananyanyurra pungkutjipingkamarra. Pika pungkunytjawiya nyurrangarri ngaranytjaku.”

Yurrunpa nyalpitjarra kutju Katutjaku waarrkana Yitjurilaku ngulytju ngantitja tjutaku yurrunpa yankupayi. Palulanguru paluru parra yankula ngantiwanalpi tjanampa ngaralinangi, Yitjipinya ngurrara tjutangku tjananya wanara pungkupayingkamarra. Yutuwari paluru tjanampa yurrunpa ngaralinangi. Palulanguru parra yanu ngantiwanalpi ngarangi, Yitjurilaku ngulytju ngantitja tjutaku malpa. Yalatji ngarala munga tjanampa Yitjipinya ngurrara tjutaku ngarangi. Kanya Yipuru wangkapayi tjutaku tjanampa tili ngarangi. Yalatji Katutjalu tjananya Yitjurilaku ngulytju ngantitja tjutaku ngalkinpa yangatjunu, Yitjipinya ngurrara tjutangku pikalu pungkutjipingka.

Yurrunpa Katutjalu Muutjanya wangkangu watiya katura kanyintjaku kapi Tjatjakangka. Palulanguru paluru yankula yilta watiya kanyiñgingi. Palulanguru walpa kakarraranguru mungangka tiñalingku wangkarra tjintukutu wiyarringu. Yalatji walpa tiña wangkanyingka kapi wiyarringu, yiwarra tjanampa tarayi ngarangu. Kapi kutjarra ngantjarrpa kutjarra ngaranyingka Yitjurilaku ngulyju ngantitja tjutaya tjarukatirra yankula paña palyangka maa tatiñu. Palulanguru tjananya Yitjipinya ngurrara tjutangku pungkukitjangku ngantiwanangku wanañu. Tjutangku tjananya tjarukatirra wananu tjilirratjarra tjutangku, anta naanytjatjarra tjutangku, wakinangka yankupayi tjutalu. Tjin̄tu ngalya katurringanyingka Katutjalu tjananya ngulutjinganu. Tulykungku wakina tjanampa taayi tjuta witira kanyinu.

Putuya wakinatjarra tjutangku katirra yilar-ringutjangka Yitjipinya ngurrara tjutangku watjanu, “Mayutju Katutjalulampa kuyañu, Yitjurilaku ngulytju ngantitjaku walytjangku. Wakina wantirralaka yarra malaku!” Kala, yurungku tjananya Yitjipinya ngurrara tjuta mirrintanu, kutju wiya kana nyinangu, wiya.

Yankulinamalpaya puli Tjaniyalakutu yankuk-itja.

Yanutja 15:22—17:13

Kapi Maaranya pan̄tutjarra ngarrimalpa
Yanutja 15:22-26

Palulanguru tjananya Muutjalu katiyinangi mayutju tiŋangku. Kapi Tjatjakanya wantir-rayu kapiwiyawana mangarriwyawana yanu. Kapikuya puṭu ngurrira nyakulinkula tjintu tjirripala yankula kapi yini Maarangkaya tjarrpangu. Tjikiraya puṭu yarrkanu partutjarra. Yaŋangu tjutaluya puṭu yarrkara Muutjakulpiya ngurrkurringu, “Wiyawananalulanyatjun ngunytji ngalya katingu, kapiwiyakutu. Nyaaltala tjikilku?” Palunyangka Muutjalu Katutjanya tjapinu kapi tjikilkitjangku puṭu kulira.

Katutjalu Muutjanya nintiṇu watiya ngarrinyingka. Muutjalu mantjira katirra kapikutu watiya waŋirriyanyingka, kapi palyarringulpi. Palulanguru kapi tjikiraya paltjarringu.

Ngula palunyatjanu Katutjaku luwu tjuta tjananya Muutjalu nintiṇu, kuliraya tjukarurru nyinanytjaku. Yalatji tjananya Katutjalu watjanutja tjakultjunu, “Ngayuluṇa nyurranya watjanutjangka kuliranyurra tjukarurru nyinanytjaku. Tjukarurrunyurra kutu palya nyinanyingka, wiyanu nyurranya yitjipungku. Yitjipinya ngurrara tjutana tjananya yitjipungkula wiyanu, kanya ngayuluṇa nyurranya yantayanṭara kanyimnalpa.”

*Kapi Yiilimalakutuya anku
Yanutja 15:27*

Ngarrirraya mungawinki pakara anu kapi Yiilimangka. Kapi tuwalpala ngarringu watiya tjuta ngarala waŋingi. Ngurra palula ngunytjiya nyinangi.

*Katutjalu tjananya mangarrikamu kuka
yunguku*
Yanutja 16:1-31

Kapi Yiilimanyaya wantirra yanu kapiwiyawana. Ngurra palunya yini Tjiinanya. Manangkarra palula yanangu tjutaraya Katutjaku ngurrkurringu. Muutjanyakamu Yirananya pulanya tjana yalatji watjanu, “Katutjalulanyatju mirri pungamara ngurra Yitjipila, ngaakutu katiwiyangku. Nyupali nganaŋanyatju nyaaku ngaakutu ngalya katingu?, mangarriwyakutu. Mangarriwyalpilatju nyinarra wiyarriku. Palyalatju Yitjipila nyinamara, kukakamu mangarri ngalkula.”

Mayutju Katutjalu Muutjanya yalatji watjanu, “Kuwarrina nyurrampa ngayulu mangarri katunguru wantirriyalku. Paŋangka ngarrirra waŋningkanyurra nyakula yurralku, tjintukarrangu tjintungka. Tjintu kutjungkanyurra yurrara ngalkuntjaku, wiya tjintu kutjupaku kanyintjaku. Puratiyi mungawinki palyanyurra tjintu kutjarraku yurrantjaku, Puratiyikukamu Tjarrityiku. Yalatjinyurra yurrara mantjintjaku. Ngayuluna nyurrangarrinya watjani, ngayuku wangka kuliranyurra kanyintjaku.”

Wangka palunya Muutjalu tjananya kulira yanangu tjutangka tjakultjunu. Yara kutjupatarra tjananya yalatjingku watjanu, “Ngalinyatjunyurra Yirananya kuru watjara yilta Katutjanyaṭarranyurra kuru watjanu. Panyapalinyatjunyurra kuru watjanutjangka Katutjalu kuliṇu. Kulira nyurranya kuwarri

mungarrtji kuka yungkuku. Palunyatjanu tjintungka nyurranya mangarri yungkuku.”

Mungarrtji tjulpu tjuṭa Yitjurilaku ngulytju nganṭitja tjutangku, ngurrangka ngalya yankula nyinakatingutjangka, nyangu. Palunyangka yaŋangu tjutangkuya watiyangka pungkula warungka kutjara ngalkunu. Tjintungka kapi wiita nguwanpa winki ngarringi. Ngarrirra wiyarringutjangka mangarri tjulkura paŋangka ngarrirra waŋingi, nyalpi tjukutjuku nguwanpa. Yaŋangu tjutangkuya nyakula puṭu kulira tjapinu, “Nyaapa ngaatja?” Muutjalu tjananya watjaŋu, “Ngaatjanya mangarri Katutjalu wantirriyantja. Kuwarrinyurra kutjara ngalkuntjaku. Tjintu kutjupaku wiyanyurra kanyintjaku.”

Yaŋangu kutjupa tjutangkuya kulira Muutjakunu wangka wantingu. Mangarri palunya mungura kanyinu, aali tjintu kutjupangka ngalkulkitjangku. Pakara ngalkukitjangku pantinu yunarrinytja, katilykatjarra ngarrinyingka. Yalatjiya kanyinutjangka Muutjanya tjanampa ngurrkurringu, yurrunpa tjananya kanyintjawiyangku watjaŋu.

Tjintu Puratiyingka mangarri palunya yurraraya tjintu kutjarraku kanyinungi Tjarritiyikutarra, Katutjalu yurrunpa watjaŋutjangka. Muutjalu tjananya watjaŋu, “Mangarri palunya yurraraya rungkara kutjala!, kuwarri ngalkukitjalu. Tjintu aali ngalkukitjalu rungkaraya tjurra!, kaŋilpa nguwanpangka. Yalatjiya tjunkula kanyila!, aali

Tjarrityi ngalkulkitjangku. Tjarritiyingkanyurra Katutjanya waarrkawiyalu kulira walkuntjaku.”

Aali pakara Tjarritiyingka yanangu kutjupa tjutangku puṭu ngurrira nyakulinangi mangarri palunya yurralkitjalu. Katutjalu tjananya nyakula ngurrkungku yalatji payinu, “Ngayuluna nyurranya watjaṇutjangka, nyaakunyurra kutu wantintjawiyangku ngurriṇi? Tjarritiyingkanyurra ngurrilwiya ngurrangka nyinamara. Ngayuku wangka nyurrangarri kulira wantingu.”

*Ngurra Ripatimalaya pulingka tjikilku
Yanutja 17:1-7*

Yitjurilaku ngulytju ngantitja tjutaya parra yankula ngurra kutjupakutu yanu, mayutju Katutjalu watjaṇutjangka. Piyuku paluru tjananya watjaṇutjangka nyinarraya katurringkula yanu ngurra kutjupakutu. Katutjalu kutju Muutjanya watjaṇingka, yalatjiya katurringkula kutju ngurra kutjupakutu yankupayi.

Ngurra Ripatimakutuya yankula puṭu nyangu kapiku. Muutjanyaya panypurangu, “Kapiwiyangkala nyaa tjikilku? Kapilanyatju yuwa!” Muutjalu tjananya watjaṇu, “Nyaakuninyurra panypuranganyi? Ngayunya kutju wiya, mayutju Katutjanyanyurra panypuranganyi.” Yanangu tjutangkuya kapitjirratjalu Muutjanya yalatji panypurangu, “Nyaakulanyatju nyuntu ngaakutu nganaṇanya ngalya katingu? Palyalatju ngurra Yitjipila kutu nyinamara. Nyuntu pipirri tjuta

nganananya~~tarra~~ yiluntankukitjangku ngalya katingu.”

Muutjalu putu kulira Katutjanya yalatji tjaipi~~nu~~, “Yañangu tjutangku~~ni~~ya ngayunya ngurrkungku pulingka rungalkitjangku kulini. Putuña tjananya watjalpayi.” Mayutju Katutjalu Muutjanya watjañu, “Yañangu tjutaku mayutju tjirripala tjananya yaltirra kutjungkara kati! Yañangu tjutangka yurrunpaya yarra! Yankula nyuntu watiyatjarralu puli nyarratja puwa! Yalatji nyuntu pungkunytjala kapi nyurrampa pulinguru taara yintiku, tjikintjaku nyurra.” Katutjalu palunya watjanutjangka, Muutjalu puli pungu watiyatjarrangku. Pungkunytjala kapi pulinguru taara pañakutu yintingu.

Yimalikaku waarrkana tjutangku tjananya pikangku pungku

Yanutja 17:8-16

Ngurra Ripatimangkaya Yitjurilaku ngulytju ngantitja tjutaya nyinanyingka, Yimalikaku waarrkana tjutaya tjilirratjarra ngalya yanu, pika pungkukitja. Palulanguru Muutjalu wati Tjatjuwanya watjañu, “Tjilirratjarra tjuta tjananya ngurrtjara mantjila! Tjungunyurra tjintungka yankula Yimalikaku waarrkana tjuta pikalu pungku. Yankula nyurrangarri pika punganyingka, pulingkaña kalparra ngaraku. Watiya palunya marangkuna katukutu kanyilku.” Muutjalu piyuku watjañu, “Tjatjuwanyangarrinyurra pikaku yankunytjala, nganañatju Yirananyakamu Yaaranya pulingka tjungulatju kalpaku.”

Muutjalu mara katura kanyintjala, Tjatjuwalungarri palya pungkula maa wantirriyanu. Muutjanya mara purrkarringkula mara yunngurringu. Palulanguru Yimalikaku waarrkana tjutangku tjananya pungkula ngalya wantirriyanu. Muutjalu mara katura kanyira purrkarringutjangka, Yiranlukamu Yaaralu puli mantjira katirra tjunurapula, Muutjanya nyinakatintjaku. Pulingka nyinanyingka Yiranlukamu Yaaralu Muutjanya mara kutjarra witira katukutu kanyinu, tjintu maa tjarrpangutjangka. Palunyangka Tjatjuwalungarri tjananya pungkula ngulutjingara wantirriyanu, Yimalikaku waarrkana tjuṭanya. Kutjupa tjuṭa tjananya mirrintanu.

Puli Tjaniyangka Muutjalu kulilku Katutjaku luwu

Yanutja 19:1-20; 17; 24:12—31:18

Tjaatayanku paltjilku, Katutjaku tjukarurru nyinakitjangku

Yanutja 19:1-13

Ngurra Ripatimanya wantirraya puli Tjaniyalakutuya yankula nyinangu. Puli paṇṭangkaya nyinarra waṇingi. Muutjanya kutju puli palula kalpangu, Katutjanyapula wangkakitja. Katutjalu Muutjanya yaltirra watjanu, “Yaŋangu tjutangka tjananya yalatji tjarukatirra tjakultjurra! Nintilunyurra kulinī, ngayuluṇa nyurrangarrinya yanṭayantara katiyinkupayi. Yalatjikuṭarranyurra nintingku kulinī, ngayuluṇa yirriti Yitjipinya ngurrara

tjuṭa yitjipungkula kanyilpayi. Ngayuluna nyurranya kuwarri watjantjala, palya kulira nyinanytjaku, wiya wantinytjaku. Ngayuku kutjunyurra tjukarurru nyinarra yilta ngayuku waltyta tjuṭa nyinaku.”

Muutjalu wangka palunya kulira tjarukatirra yankula tjanala tjakultjunu. Yaŋangu tjutangku kulira watjaŋu, “Yuwa tjukarurrulatju nyinaku, Katutjaku wangkaku.” Yaŋangu tjutaku wangka Muutjalu Katutjanya kalparra tjakultjunu.

Katutjalu Muutjanya piyku watjaŋu, “Tjarukatirra tjananya yalatji watjala!, kiliinalpiya nyinanytjaku, ngayunyan̄iya walkulkitja. Tjintu kutjupangkaṇa puli ngaakutu ngalya yankula nyinaku. Nyurrangarri tjaata paltjira kiliinatjarra nyinanytjaku. Kuwarrinyurra ngayuku wangka kulintjatjanu miitarrarrangku pampuntjawiya ngarrinytjaku, puli ngaangka tjungurringkula ngayunya walkulkitja. Pulingka kalkuṇiya maaka tjunkula wanala! Maakangka munkarra kutjuya nyina! Maakangka kalkuṇi wiya ngalya yankunytjaku, pulingka kalpanytjawiya. Tjinguru yaŋangu tjuṭakamu puluka puli maaka palula kalkuṇi ngalya yankupayingkamarra, nyurrangarri rungkara yiluntankunytjaku, pulitjarrangku. Yiluntankunytjangka marangkunyurra wiya pampuntjaku, wantirra yarra! Waarrkanangku turampata mirratjingaṇingka, kulira yaŋangu tjuṭa puli paṇṭa ngaakutu ngalya yankunytjaku.”

Katutjanya ngalya tjarukatirra puli

*Tjaniyangka nyinaku**Yanutja 19:14-25*

Tjintu kutjupangka yutuwari maru puli palula ngarangi. Mañngirrilu rungkara tuutuuningi. Yañangu tjutangkuya turampata katuwana mirratjinganötja nguwanpa kulinu. Kuliraya ngulu tiltirrmara ngarala wañingi. Muutjalu tjananya tjutara katingu puli palulakutu Katutjanya kulintjaku. Yankulaya yañangu tjuta puli pantangka ngarakatingu. Pul Tjaniyangka puyu tiña ngarangu mayutju Katutjanya waru tili nguwanpa tjarukatirra nyinangu. Kutuya yañangu tjuta ngulurrirra tiltirrmara ngarangi. Turampata nguwanpa kutu rawa mirratjin-ganötji, tinjalpi mirratjinganötji.

Palulanguru Katutjanya ngalya tjarukatirra puli Tjaniyangka katu ngaranyingka Muutjanya yaltingu kalpanytjaku. Palunyatjanu Muutjanya tatira ngarangu. Mayutju Katutjalu Muutjanya yalatji watjañu, “Tjarukatirra tjananya yañangu tjuta tjananya yanpiritjurra!, kulira tjana maaka kalkunu wiya tatintjaku. Ngalya yankula kalpangutjangka ngayulu tjananya yitjipungku. Kala nyuntu tjarukatirra Yirananya yaltirra ngalya kati!”

Muutjalu tjarukatirra tjananya tjakultjunu Katutjalu watjañutjangka.

*Katutjalu watjalku palumpa luwu**Yanutja 20:1-17*

Katutjalu yalatji watjañu, “Ngayuluna nyurrangarrimpa mayutju tiña nyinanyi, Katutjanya. Paña Yitjipilanyurra waarrkana

nyinapayi, ngayuluña nyurranya pakaltjingara kanara ngalya katingu. Ngayunya kutjunyurra walkuntjaku. Ngayunya nguwanpa kutjupa wiyalingga palyara walkuntjaku. Katu ngurrara nguwanpa, tjinguru paña ngurrara nguwanpa wiyanjurra palyara ngaratjunkunytjaku walkulkitjangku. Kapingka nyinapayi tjuta nguwanpaṭarra wiya palyara walkuntjaku. Palunya tjuta wiyanjurra pupakatirra walkuntjaku. Ngayulu Katutjanya kutjuña nyurrangarimpa mayutju tiṇa nyinanyi. Mayutju kutjupangku wiya nyurranya kanyini.

“Ngayuku yunytjuwiya nyinapayi tjutana tjananya pungkuku. Palunya tjutaku ngantitja tjutatarrha ngayuluña tjananya pungkuku. Ngayuku yunytju nyinapayi tjutana tjananya yanṭayaṇṭalku, tjawutjuna tjuta, ngayuku wangkaku tjukarurru nyinapayi tjuta.

“Ngayunya yini ngunytji wiyanjurra wangkanytjaku. Ngayunya yini ngunytji wangkanyingkana pungkuku.

“Tjarritiyingka nyurrangarri waarrkawiya nyinanytjaku, ngayunya Katutjanya kutju kulintjaku. Palyanyurra tjintu kutjupa tjutangka waarrkarrinytjaku. Tjutanyurra waarrkawiya nyinanytjaku, nyurrangarimpa pipirri tjuta, waarrkana tjuta, yanngatja tjuta, anta naanytja, puluka tuungkiyi tjutatarrha. Tjintu tjikitjipalangkaṇa waarrkarirra paña ilkariṭarrha palyanu, palulanguru Tjarritiyingka waarrkawiyalpiṇa nyinangu. Nyinarra yunyparringuña tjintu palumpa. Palulanguru

yañangu tjuta tjintu palula ngayunya kulira kutju walkuntjaku.

“Paapaku, maamaku wangkakunyurra kaangkintji nyinanytjaku. Yalatjinyurra kulira ngurra Kayinanala nyinarra kutu palula palya nyinamalpa. Kayinanalanyurra nyinarra palyangku kanyintjaku.

“Yañangu kutjupa wiyanurra mirri pungkunytjaku.

“Wiyanyurra tjulyara kutjupaku miiṭa kanyintjaku.

“Yulytja kutjupaku wiyanurra mulyatangku mantjintjaku.

“Wiyanyurra ngunytji tjakultjunkunytjaku.

“Yañangu kutjupaku yulytja wiyanurra yunytjurringkula kanyintjaku. Palumpa waalaku, tjinguru miitaku wiyanurra yunytjurringkula nyinanytjaku. Palumpa kuka tjutakuṭarra puluka, tuungkiyi, tjiipi, wiyanurra yunytjurringkula kanyintjaku.”

Katutjalu palumpa luwu puli wirulypa kutjarangka wakalku

Yanutja 24:12—31:18

Katutjalu luwu kutjupa tjuta watjara Muutjanya yalatji watjanu, “Puli ngaangkanī kalparra nyawa! Palulanguruñanta wakara puli wirulypa kutjarra yungku, ngayuku luwu tjutatjarra.” Palulanguru Muutjanyakamu Tjatjuwanya kutjarra puli palula kalpangu. Kalparrapula ngurruppa nyinangi. Puḷingka katu tili tiṇa tilin-garangi waru tili nguwanpa.

Tjintu tjikitjipalangka yutuwari pulingka katu ngarangi. Tjintu kutjupangka Katutjalu Muutjanya kutju yaltingu katukutu kalpanytjaku. Kalparra yutuwaringka tjarrparra katu nyinangi kutu, Puratiyi tjikitjipala. Palulanguru Katutjalu Muutjanya nintinu, tjaatji kaliki nguwanpa palyantjaku. Tjaatji palula kunatinpa tjintu kutjupa tjintungka Katutjaku pungkula ngarritjunkula kutjantjaku nintinu. Tulku mayutju tjutaku tjaata palyantjaku nintinu. Tulku mayutju tjukarurru waarrkarrinytjaku nintinu.

Yalatji nintira Katutjalu Muutjanya yungu puli wirulypa kutjarra, palumpa luwutjarra, yurrunpa wakara tjunutja.

Tjana puluka wiima kuultatjanu palyalku walkuntjaku

Yanutja 32:1-35; (34:1-5, 27, 28)

Yiranalu puluka wiima kuultatjanu palyalku

Yanutja 32:1-6

Muutjanya puli palula rawa nyinanytjala yanangu tjutangku Yirananya tjingapungu yalatji, “Wati panyapa Muutjanya yaalytjirringu? Wiya, ngurrpalatju. Putula kulinji. Palulanguru Katutjanya nguwanpalampa nyuntu palyala!, yutitjangkulanya katiyankunytjaku.”

Yiranalu tjananya watjañu, “Kuultatjanu riinga, nikilitjikamu palyanutja yanangu tjutakuñu yirriwiltjila!, ngalya katirra ngayunya yuwa!” Palulanguruya kuultatjanu palyanutja pinangka waralyngarapayi tjuta, riinga tjuta, nikilitji tjuta yirriwiltjira katirra Yirananya

yungu. Yiranalu yurrara kañilpa nguwanpangka tjunu. Palunyatjanu kañilpa palunya warungka tjunu, kuulta kamparra nyurirrinytjaku, kapi nguwanpa. Puluka wiima nguwanpa pilkitjanu palyara ngaratjunu. Kuulta nyurirrinytjala mantjira puluka nguwanpa wiimangka tjutira wanañu. Puluka wiima palyara ngaratjunu.

Yañangu tjuñangku nyakula yunyparringkula yalatji watjañu, “Nyawaya puluka wiima! Ngaangkulanya paña Yitjipilanguru mantjira ngalya katingu, nganampa mayutju tiñangku.”

Puluka wiima palula yila Yiranalu tiipula pulingka palyañu, kunañinpa pungkula kutjantjaku. Palyara tjananya watjañu, “Tjin̄tungkalpila ngalkula walkulku mayutju Katutjanya.”

Tjin̄tu katuya kuka kunañinpa tjuñanya ngalya katirra pungkula ngarritjunu kutjalkitjalu. Kuka yuñmi ngarrinyingka yañangu tjuñarringkula ngalkula tjurratja tjikira tjungu yunyparringu. Kutuya tjikira tjungu ngalkula yunytjurringu miñta kutjupa kutjupangka ngarrikitja. Ngarrirraya kuya palyañu.

Katutjalu tjananya kuya palyaningka nyakuku Yanutja 32:7-10

Mayutju Katutjalu puli Tjaniyangka Muutjala yalatji watjañu, “Parrpañu tjarukatirra tjananya yankula nyawa! Yañangu panyapa tjuñangkuya kuya palyañi, panya nyuntu Yitjipilanguru ngalya katinytja tjuñangku. Panyapa ngayuluna tjananya watjañu, kuliranya wantingu. Tjanaya puluka wiima kuultatjanu palyara ngaratjunutja

walkunu. Yaŋangu tjutangkuya yalatji watjanı, ‘Puluka wiima palumpala kunatinqa pungkula ngarritjunku, kutjara walkulkitjangku. Puluka wiima ngaangkulanya Yitjipilanguru mantjira ngalya katingu.’” Katutjalu Muutjanya piyuku watjanu, “Yiltatjuya ngayuku milititji nyinanyi, tjukarurrungku kulintjawiya. Palulanguru ngayuluŋa tjananya mirri pungkula wiyalku.”

Katutjalu Muutjanya piyuku watjanu, “Nyuntu wiya ngayunya marrkuntjaku palunyu tjutatjirratjangku. Ngayuluŋa tjananya ngurrkurrirra mirri pungkula wiyalku. Nyuntupa ngulytju ngantitja tjutanya kutju ngayulu palya yantayanṭara kanyilku.”

*Muutjalu tjanampa Katutjanya tjapilku
Yanutja 32:11-16*

Muutjalu tjanampa yalatjingku marrkuŋu, “Mayutju. Nyaaku tjanampan mulyarra nyinanyi? Nyaaku tjananyan Yitjipilanguru kanara ngalya katingu? Tjuṭa tjananya mirri pungkuwiyangku wanti!, aapa kutju tjananya puwa!, Yitjipinya ngurrara tjutangku yalatji kulira watjalpayingka, ‘Yipuru wangkapayi tjuta tjananya Katutjalu Yitjipilanguru mantjira puliwana katingu, mirri pungkula wiyalkitjalu.’ Ngurrkurrirra mirri pungkuwiyangku kulira yaltururringkula wanti! Mirri tjutangka tjanala nyuntu tjakultjunu Yipuramala, Yatjikala, Tjikupala, tjanampa ngantitja tjuṭa yanṭayanṭara kanyintjaku. Nyuntu tjananya

ngurra yungkukitjangku tjangkuṇu, ngurra palunya kutuya kanyintjaku.”

Muutjalu yalatji marrkuṇutjangka mayutju Katutjalu tjananya wantingu, tjungu mirri pungkuwiyangku.

Puli wirulypa kutjarra Muutjalu wałapatara kilytjuntanku

Yanutja 32:15-29

Muutjalu puli Tjaniyangka tjarukatirra puli wirulypa kutjarra katiyinangi. Puli palunya kutjarrangka Katutjalu palumpa luwu wakara tjunu. Tjatjuwanyapula tjungurringkula ngurrakutu yankula wangkanyingka kulira Tjatjuwalu Muutjanya watjaṇu, “Tjinguruyanku pika punganyi?” Muutjalu watjaṇu, “Pikawiya, kulila!, tulkuya warraṇi.”

Yankulapula yilarirra nyangu, puluka wiima ngaranyingka, yanangu tjuṭaya yunyparringkula nyanpinytjala. Nyakula Muutjalu tjanampa ngurrkurringkula tjanampa puli wirulypa kutjarra wanirra kilytjuntanu. Maa yankula puluka wiima kuultatjanu palyanutja mantjira warukutu wanirriyanu. Warungka kamparra nyurirringutja mantjira tjunu taayitirrinytjaku. Puli kuulta palunya yulpura yatuṅangi pulawu nguwanpa ngarrinytjaku. Pulawu nguwanpa mantjira yungulpi tjananya kapiwinki tjkintjaku.

Muutjalu Yirananya yalatji tjapiṇu, “Nyaaku tjananyan tjingapungu?, kuyaya palyantjaku?” Yiranalu watjaṇu, “Ngayuku wiya pikarrinytjaku. Nyuntu ninti tjanampan nyinanyi. Tjana

kuya yirritinguru palyara nyinapayi. Watjanutjuya Katutjanya nguwanpa palyantjaku. Palulanguruña tjanampa riinga nikilitjikamu mantjira warukutu waningu. Yalatji ngayulu wantirriyantjala puluka wiima tjaalpa pakara ngarangi kuultatjanu palyanütja.”

Palulanguru Muutjalu tjananya ngaratjunkula watjañu, “Mayutju Katutjaku walytja, ngaakutuya ngalyankula ngara!” Palulanguru Lipayiku walytja tjutangku kutju yañangu tjuña wantirra Muutjalakutu yankula tjungurringu. Palunyatjanu Muutjalu tjananya watjañu, “Wati tjutangkunyurra tjuula wañawara kutjuñu kutjuñu mantjira ngalya kati!” Muutjalu piyuku watjañu, “Mayutju Katutjalutju ngayunya watjañutja tjakultjunanyi. Nyurrangarri yañangu tjuñawana yankula tjungurringkula walytja kutjupa tjuña wakara yiluntarra!, malanypa kaaka tjuñatarra, ngurra kutju ngurrara tjuña.” Lipayiku walytja tjutangkuya wantiwiyangku tjuula wañawaratjarrangku wakara mirri pungangi. Palulanguruya wati tjawutjuna tjirripala yilungu tjintu palula.

Muutjalu tjanampa Katutjanya piyuku tjapilku Yanutja 32:30-35

Tjintu kutjupangka Muutjalu tjananya tjutara watjañu, “Kuyanyurra kuwarri palyanu, walkura Katutjanya nguwanpa. Kuwarrina piyuku yankula puli panyapangka kalparra Katutjanya tjapilku, piyuku nyurrangarrinya pungkuwiyangku wantintjaku. Tjapintjala tjinguru Katutjanya nyurrangarrimpa

kalyparringkula kuya nyurrampa wañiku.” Muutjanya yarurrirra yankula puli Tjaniyangka kalparra Katutjala yalatji wangkangu, “Yañangu palunya tjuñangkuya yilta kuya puntu palyanu. Pulukaya wiima palyara wal kunu. Tjapininqanta kuya tjanampa wan!, nyuntupa kalypalpiya nyinanytjaku. Jinguru nyuntu tjananya wantiku kalyparrintjawiyangku. Jinguru nyuntu kulinî yanangu tjuta pungkukitjangku. Nyuntu yalatji kulintjala ngayuku yini tjutula piipangka!, ngayulu waltytja nyuntupa wiya.”

Mayutju Katutjalu watjanu, “Kuya palyalpayi tjuta kutjuña yini tjutulku. Kutjupa tjuta tjananya nyuntu tjarukatirra katil!, ngurra palyakatu. Yalatji kulila! Nyalpitjarra kutjungku nyurranya nintira katianamalpa. Piyukuna tjananya kulikku yitjipungkukitjangku, kuya panypa palyañutjangka.” Yilta Katutjalu tjananya kutjupa tjuta pikatjarrañu. Palulanguruya tjuta pikatjarra ngarirra wañingi.

Katutjalu luwu palumpa piyuku yungku Muutjaku

Yanutja 34:1-5,27-35

Mayutju Katutjalu Muutjanya watjanu puli katu nyinanyingka, “Puli wirulypa kutjarra kutjupa mantjila! Tjintungka katirra kalparra ngayula nintira tjurra!, ngayulu piyuku wakan-tjaku, ngayuku luwu. Nyuntu kutjungku ngalya katirra kalparra tjunkunytjaku. Watjala tjananya!, tjiipi puluka wañma kanyintjaku, tjana puli ngaangka pañławana wiya ngalkuntjaku.” Palunyatjanu Muutjanya tjarukatirra puli

wirulypa kutjarra yatura kilytjuntankula mantjiṇu. Tjin̄tungka Muutjanya puli katu kalparra puli wirulypa kutjarra tjunu, palunya mayutju Katutjalu watjaṇutjangka.

Yutuwarilu tjutunutjangka mayutju Katutjanya tjarukatirra tjungurringu. Muutjanya puli katu kutu nyinangi, Puratiyi tjikitjipala, Katutjaku luwu tiinpala palunya nyinarra wakaṇingi, puli wirulypa kutjarrangka. Mangarri ngalkura tjikilwiya puḷingka kutu nyinangi.

Nyinarra Muutjanya puli kutjarratjarra tjarukatirra palumpa walytja tjutakutu yanu, ngurrakutu. Katutjala wangkarra Muutjanya yunpa kutjupa kutjuparringu. Yunpa palumpa rantaningi. Walytjangku paluru wiya nyangu yunpa kutjuparringutja. Yiranalukamu yaṇangu tjutangku tjungurrirra yunpa rantarinangitjangka nyakula ngulurringu.

Muutjalu tjananya yaltirra yaṇangu tjuṭa watjaṇu wangka palumpa kulintjaku. Muutjalu tjananya tjakultjunu Katutjalu puḷingka wakaṇutja. Palulanguru Muutjalu tjaatjangan ka karpira yunpa tjutura yankupayi. Kaliki tjaatjikutu yankula Katutjala wangkakitjangku yirriwiltjilpayi. Wangkarra Katutjala wiyarringkula piyuku tjutura yankupayi.

Katutjalu Muutjanya nintliku yanangu tjutangku tjukarurrungku Katutjanya walkuntjaku

Yanutja 23:10-19; 29:1-30; 35:4-29; 36:1 — 38:20; Lipitikatja (Leviticus) 1:1-9; 2:1-4; 3:1-5; 4:1-12; 5:14-16

*Mani tjawirrilyiya waniku, Katutjaku kalikiya
palyantjaku*
Yanutja 35:4-29; 36:1-7

Yirriṭi Katutjalu Muutjanya puli wirulypa kutjarra yurrunitja yungkukitjangku watjanu, tjaatji kaliki palyantjaku. Puli Tjaniyangka nintinu tjaatji palunya tjukarurru palyantjaku, tjaatjiku yulytjaṭarraya. Wangka palunya Katutjalu watjanutjangka Muutjalu tjananya yaŋangu tjutangka yalatji tjakultjunu, “Katutjalulanya yalatji watjanu, tjawirrilyila yungkukitja yunytjurrirra yalatji ngalya katirra yungkunytjaku, Katutjaku kaliki tjaatji palyantjaku. Yalatji nguwanpala ngalya katinytjaku yungkukitja, puli kuulta, puli tjiilpa, puli yayina nguwanpa kutjupa. Mantarra tjutala ngalya katirra yungkunytjaku yalatji, mantarra puluwana, mantarra maru, mantarra tjiipi yinyutjanu rungkara palyaŋutja, mantarra nanikuta yinyutjanu rungkara palyaŋutja. Tjiipikuṇu pangki karrkukarrku ngalya katinytjaku, pangki kutjupa tjutaṭarra. Nyiti laampangka kampa-payila mantjira ngalya katinytjaku. Watiya tjuta, puli kilaatja nguwanpaṭarrala ngalya katirra Katutjaku yungkunytjaku.”

Palunyatjanuya walytjalungkuya kulira yunytjurringkula katingu, puli kuulta tjuta, puli tjiilpa tjuta, mantarra tjuta, pangki tjuta, watiya tjutaṭarra. Yalatji yulytja tiṇaya katirra tjungunu, Katutjaku tjaatji tiṇa palyantjaku. Yitjurilaku ngantitja tjutangkuya mungawinkikarrangu mungawinkingka kutu yulytja katirra tjunkupayi. Yulytja palunya

tjuṭarringutjangka, Muutjalu tjananya
marrkuṇu wiya ngalya katintjaku.

*Katutjaku tjaatji kalikiya palyalku
Yanutja 36:8-28*

Nintingku palyalpayi tjuṭa tjananya Muutjalu nuuwimilara yaltingu. Waarrkaku yunytjuripayi tjuṭa tjananya watjanu yulytja palunya mantjira Katutjaku tjaatji palyantjaku. Nintingku palyalpayi kutjarra yini yalatji Pitjalilanya Wulipanya nyinangu. Paluru kutjarra nintingku palyalpayi kutjupa tjuṭangkuṭarraya kaliki tiṇa palunya palyaṇingi. Kaliki tiṇa payipalaya nyiilangka wakara tjungunu. Kaliki payipala kutjupaya nyiilangka wakara tjungunu. Tjunguraya wakanutja tjuṭangka tjayıtiwana wakara wanaṇu. Paluru tjana alytjura palula tjuṭangka puturru nguwanpa tjarrpatjunangi. Palunyatjanuya puturru tjuṭangka riinga tjuṭa kuultatjanu palyaṇutjaya karrpira wanaṇu. Yalatji nguwanpaya kaliki tiṇa kutjarra ngururrwana karrpira tjungunu, riinga tjuṭangka. Palunyatjanuya kaliki nguwanpa kutjupa palyanu tjiipi pangkitjanu. Kaliki nguwanpa kutjupalpiya palyanu pangki wirulypa tjuṭatjanu.

Palunyatjanungkuya watiya tiimpa tjuṭa kuntara wanara tjawara tjayıtiwana ngaratjunkula wanaṇu. Tiimpa palunya tjuṭa ngaratjunkula wanantja tjuṭangka riila tjuṭa waṭawara yatura tjungura wanaṇu, riinga tjuṭawana, kuultatjanu palyaṇutjangka. Katuwanaya katura katirra,

kaliki nguwanpa palunya watiya tjutangka, pupatjunkula wanañu. Pangki wirulytjanu palyanütja nganqwanangkuya katura katirra kaliki pupatjunkula wanañu. Palunyatjanungku wakaraya palyanu kaliki kutjarra kutjupa unngu waralyngaranytjaku. Kutjupaya ngururrrpa waralytjunu, kutjupa tuuwa nguwanpa wakara waralytjunu.

*Kaliki tjaatji palulaya yulytja palyalku
Yanutja 37:1-29; 38:1-20*

Wati Pitjalilalu pukutju patilpayitjarra palyanu, kaatputa nguwanpa. Kuulta pangki nguwanpa palyara pukutju palula tjayitiwana nganytjatjura wanañu, unnguwanañtarra. Riila kutjarra palyara kuulta pangki nguwanpa riila palula kutjarrangka nganytjatjura wanañu. Pukutju palula tjayitingka riinga kutjarra nganytjatjunu. Tjayiti kutjupangka riinga kutjarra kutjupa nganytjatjunu. Pukutju katikitjangku riinga puupalangka riila palunya kutjarra tjarrpatjura katipayi. Pukutju palula katu kuultatjanu palyanütja yilkari ngurrara nyalpitjarra kutjarra ngarangi. Paluru kutjarra ngaparrku ngarangi nyalpi pilarrirra.

Wati paluru tiipula palyanu watiyatjanu, mayi tjawirrilyi Katutjaku ngarritjunkunytjaku. Kuulta pangki nguwanpa palyara tjayitiwana nganytjatjura wanañu. Riila kutjarratarrpa palyanu tjayitiwana tjarrpatjunkula tiipula palunya katiyankunytjaku. Tiipula palula ngarrinytjaku kañilpa panikinatarrpa kuultatjanu palyanütja.

Tjangi tilitjarra maŋkurrrpa kuultatjanu palyaŋu. Palyara ngaratjunu tilitjarra tjikitjipala.

Watiyatjanu tiipula kutjupa palyaŋu, Katutjaku kutjara puyutjunkunytjaku. Kuulta pangki nguwanpa palyara tiipula palula tjayitiwana nganytjatjura wanaŋu. Riila kutjarratarra palyaŋu, tjayitiwana tjarrpatjunkula katiyankunytjaku.

Palunyatjanu tiipula tiŋa watiyatjanu palyaŋu, kalikingka yila ngaranytjaku. Tiipula palulaya waru tilira kuka tjawirrilyi kutjalpayi Katutjaku. Tiipula palula yayina puupala tjayiti puupalangka ngarangi ngaratjunutja. Yayina kutjupa pangki nguwanpa palyara tiipula palula tjayitiwana nganytjatjura wanaŋu. Riila kutjarratarra palyaŋu tiipula palula tjayitingka tjarrpatjunkula katiyankunytjaku. Niitingi nguwanpa palyara tiipulangka katuwana nganytjatjunu, niitingingka katuwana waru kampanytjaku.

Palunyatjanu yayina nguwanpatjanu kañilpa tiŋa palyaŋu, kalikingka ila ngaranytjaku, mara paltjilpayi. Kilaatja nguwanpa tjuta kungka tjutangkuya kanyin̄ingi, yayinatjanu palyaŋutja. Katutjakuya yayina palunya tjuta katirra tjuŋu. Palunyatjanu yayina palunya tjuta warungka tjunkula kañilpa palunya palyaŋu. Kañilpa palunya kapitjarra ngarapayi, tulkuₖku mayutju tjutangkuya mara paltjintjaku.

Kalikingka ila parriki nguwanpaya palyara ngaratjunkula wanaŋu. Parriki palunya palyalk-

itjangkuya watiya tjuta ngaratjunkula wanau. Kaliki ngururrwanaya waralytjunkula wanau.

Yirananyangarriya tulku^u mayutju tjuta ngaratjunku

Yanutja 29:1-37

Katutjalu puli Tjaniyangka watjanutjatjanungka, Muutjalu Yirananya palumpa katja tjuta^utarra watjanu, tulku^u mayutju tjutaya nyinanytjaku, Katutjaku tulku^u kanyira tjaatji kalikingkaya tjawirrilyi kutjara waarrkarrinytjaku.

Muutjalu tjananya Yirananya palumpa katja maŋkurra kaliki palulakutu katirra ngaratjunu, tulku^u mayutju tjuta nyinanytjakulpiya. Watjanu tjananya kaŋilpa tiŋangka paltjintjaku. Palunyatjanu Muutjalu Yirananya tulku^u mayutjukuŋungka mantarrangka tjarrpatjunu. Tjarrpatjunkula tjira mantjira katangka yintiŋu. Palumpa katja tjuta^utarra tulku^u mayutjukuŋungka mantarrangka tjarrpatjunu. Palunyatjanuya puluka tjawirrilyi katirra kaliki alangka ngaratjunu. Yiranlungarri puluka kata marangku witira kanyiŋingka, kutjupangku puluka tjuulatjarrangku yunytju mutunu. Puluka palunya ngurrka yintirra ngarringi. Kaŋilpakutu ngurrka yintingi. Kaŋilpa mantjira Muutjalu mara tjarrpatjunkula tiipula palula yayina katu ngarapayi puupalangka nyapanu. Palunyatjanu tiipula palula tjayitjingka paŋangka yintira wiyanu.

Puluka palula wiła yalara tjira mantjiŋu. Kapurarrtji kutjarra anta yalu kuntara mantjira

tiipula palula warungka kutjañu, kampanyingka Katutjalu pañtira nyakula yunyparrinytjaku. Puluka winki kutjupaya maa katirra ngurra yurlpangka kutjara wiyanu. Yalatjiya tjawirriliyi kutjara wiyanu, Katutjalu tjanampa kuya waninytjaku, tulkuku mayutju tjutaku. Tjiipi ula tjawirriliya katirra ngaratjunu. Yiranlungarri tjiipi kata marangku witira kanyinjingka, kutjupangku tjiipi tjuulatjarrangku yunytju muñunu.

Tjiipi palunya ngurrka yintirra ngarringi. Kanilpkutu ngurrka yintingi. Muutjalu ngurrka panyapanya katirra yintirra wanaru tiipula palula tjayitingka. Palunyatjanu yitjilinkula kuka kapingka paltjira warungka ngarritjunkula winki kutjara wiyanu, tiipula palula katungka, Katutjalu pañtira yunyparrinytjaku.

Tjiipi mañti kutjupaya katirra tjawirriliyi ngaratjunu. Yiranlungarri tjiipi kata marangku witira kanyinjingka, kutjupangku tjiipi tjuulatjarrangku yunytju muñunu. Tjiipi palunya ngurrka yintirra ngarringi. Kanilpkutu ngurrka yintingi.

Muutjalu kanilpa mantjira mara tjarrparra yankula Yirananya mara mantjira mara tinanya nyapañu, ngurrkatjarrangku. Tjina tiña puntunyatarra nyapañu ngurrkatjarrangku, Yirananya. Pinañarrara ngurrkatjarrangku nyapañu. Yalatji paluru Yirananya waku tjayiti mañkurrpa nyapañu. Yalatji piyuku mara tjarrparra palumpa katja mañkurrpa nyapañu, waku tjayiti. Ngurrka kutjupa yintira wiyanu tiipula tjawirriliyi kutjalpayingka tjayitingka.

Tjiipi palunya wiła yalara tjira kuntara mantjingu. Mangarritarralpi tjungura kutjanu Katutjaku. Kuka winki palunya tjana kapingka payilimilara mantjira ngalkuṇu, tulkuṇu mayutju tjutangku. Kuka palunya maṭupurra tulkuṇu mayutjungku kutju ngalkuntjaku. Yalatjiya tjawirrilyi katirra tjapanpalangara pungu, tjintu tjapanpalangka. Yalatjiya tjawirrilyi pungkula Yirananya, palumpa katja tjutatarra tulkuṇu mayutju tjuta nyinatjunu, Katutjalu watjanutjangka.

*Yalatjiya Katutjanya kulira pułkapungku
Yanutja 23:10-19; 40:16-38*

Kaliki palunya yulytjaṭarraya palyara ngaratjunu Muutjalungarri. Yulytja palunya tjuta, tiipula tjuta, kañilpa tīnaṭarra tjukarurruya ngaratjunkula wantingu. Parriki palunyatarraya ngaratjunkula wanaṇu.

Palunyatjanu utuwari Katutjakuṇu ngalya yankula katu ngarala kaliki tjutura wangkangu, tilitjarra yirrnyaŋangi. Palunyatjanu Muutjanya wiyalpi kaliki palula kutu tjarrpangu. Utuwari palunya katurrirra yanutjangka kutju, Yitjurilaku ngantitja tjutangkuya kaliki palunya yulytja walytjaṭarra ruulamapira karrpira ngurra kutjupakutu katipayi. Utuwari palunya waru tili nguwanpa ngarapayi mungangka.

Yirriṭi puli wirulypa yurruntitja kutjarra yungkukitjangku Katutjalu Muutjanya yalatji watjanu, “Yanangu tjutangka tjananya yalatji tjakultjurra! Ngurra palyangkanyurra nyinarra yalatji tjukarurru nyinanytjaku.

Tjurrkarrangka mangarri yukiri nyurrangarri pakaltjingara wanantjaku. Katirranyurra ngurrangka kanyintjaku rawangkunyurra ngalkukitjangku. Tjurrkarra kutjupangka piyuku nyurrangarri pakaltjingantjaku mangarri. Yiiya palunya nguwanpangkanyurra piyuku mangarri pakaltjingantjaku. Yiiya tjikitjipalangka nyurrangarri mangarri yukiri pakaltjingara kanyintjaku, ngula yiiya wilkingka ngalkunytjakitjangku. Yiiya nampa wilkingka wiyanurra mangarri pakaltjingantjaku. Yiiya palula yukiri waltyaya pakara wanantjaku, maralpa tjuṭangkuya mantjira kanyintjaku, ngalkura. Palunyatjanu tjurrkarrangkanyurra piyuku mangarri pakaltjingantjaku.”

Katutjalu Muutjanya piyuku watjanu, “Tulku maṇkurrkunyurra tjungurrinytjaku. Tjungurringkulanyurra ngayunya pułkapungkunytjaku, yalatji.

“Warringka yurrun yurrunpa kutjuṇinyurra tjungurringkula mangarri rungkara ngalkuntjaku ngayunya pułkapungkunytjakitjangku, mangarri talṭuwiya. Yalatji ngalkula kuka tjawirrilyitjunyurra pungkula ngalkuntjaku.

“Tjurrkarrangka kutjuṇinyurra mangarri wiita yurruntitja muṭura rungkara kutjantjaku. Kutjanutja palunya mangarri tjawirrilyinyurra katirra tjunkula tjungurrinytjaku, ngayunya pułkapungkunytjakitjangku. Ngayuluna nyurrampa mangarri pakaltjingani, ngayunyanqinyurra pułkapungkunytjaku.

“Kulingka kutjuṇinyurra kiripitji, yarintji, mangarri palunya nguwanpa kutjupa tjuṭa yur-

rara katirra tjunkula tjungurrinytjaku, ngayunku pulkapungkukitjangku.”

Yitjurilaku ngantitja tjutangkuya tjawirrilyi yungamalpa

Lipitikatja 1:1-9,10-14; 2:1; 3:1-17; 4:1-12,27-32; 6:26

Tjaatji kaliki palulakutu yankunytjaku, mayutju Katutjalu Muutjanya altirra yalatji watjañu, “Yitjurilaku ngantitja tjutangkunyurra ngayuku tjawirrilyi katirra tjukarurrungku pungkula yitjilinkula kutjantjaku.” Paluru Katutjaku wangka kulira tjananya yalatji tjakultjunu, “Yañangungku kuya palyara puluka tjawirrilyi katinytjaku, ngayuku Katutjaku kalypa nyinakitjangku. Puluka manpaña kutjuñinyurra ngalya katirra yungkunytjaku nyurrkanyurrkawiya. Katirra kaliki yalytjurangkanyurra ngaratjunkunytjaku. Ngaratjunkulanyurra marangku kata pampura mara kutjupangku kuntala yunytju!” Muutjalu tjananya Katutjaku wangka kutjupa yalatji tjakultjunu, “Katutjalu mara tjunkunytja nyakula yunyparriku, yañangu palumpa kuyara waninytjakitja. Palunyatjanungku yañangu paluru yunytju kuntara ngurrika yintilku kanilpangka. Palunyatjanu tulukku mayutjungku ngurrka palunya mañupurra mantjira Katutjaku yintira wiyalu, tiipula tjawirrilyi kutjalpayi palula tjayitiwana. Palunyatjanu yañangu paluru tjawirrilyi palunya pangkira yitjilira kapingkalpi paltjintjaku. Tulukku mayutju tjutangkuya

tiipula palula waru kutjara tjawirrilyi yitjilinkunytjatjanu tjuta ngarritjunkula kutjara wiyalku. Katutjalu pantira yanangu palumpa yunypa nyinarra, kuya palumpara wañikulpira. Pulukawiyangka palya tjiipi, tjinguru nanikuta, tjinguru paalkara katirra Katutjaku tjawirrilyi yungkunytjaku.

“Anangungku Katutjanya pulkapungkunytjakitjangku tjawirrilyi katirra yalatjingku pungkula yungkunytjaku. Puluka man̄ti, tjinguru kungka puluka manpaṭa kutju nyurrkanyurrkawiya katintytjaku. Katirra ngaratjunkula marangku kata pampura mara kutjupangku kuntala yunytju! Katutjalu mara tjunkunytja nyakula yunyparriku, yanangu palumpa tjukarurru palyalkitja. Palunyatjanungku yanangu paluru yunytju kuntara ngurrka yintilku kañilpangka Palunyatjanu tulku mayutjungku ngurrka palunya maṭupurra mantjira Katutjaku yintira wiyalku, tiipula tjawirrilyi kutjalpayi palula tjayitiwana. Kuka palunya wiла yalara nyiti kapurarrtji kutjarra anta yalu mantjira tjunkunytjaku. Tulku mayutjungku kuka palunya mañkurrrpa mantjira warungka ngarritjunkula kutjara wiyalku, Katutjalu pantira yunyparrinytjaku, puyutjunkunytjala. Kuka yanangu winki palya tulku mayutju tjutangku ngalkuntjaku. Pulukawiyangka palya tjiipi, tjinguru nanikuta ngalya katirra yungkunytjaku, Katutjanya pulkapungkunytjakitjangku. Nyiti anta ngurrka mayutju Katutjaku maṭupurra. Yitjurilaku ngan̄titja tjutangkuya wiya nyiti

ngalkula ngurrka tjikintjaku.

“Tulkuku mayutju tiŋangku Katutjaku wangka kulilwiyangku kuya palyantjala, luwu yalatji ngaranyi. Tulkuku mayutju paluru puluka manpaṭa nyurrkanyurrkawiya katirra tjaatji kaliki yalytjurangka ngaratjunkunytjaku. Ngaratjunkula marangku kata pampura mara kutjupangku kuntala yunytju! Katutjalu mara tjunkunytja nyakula yunypariku, tulku mayutju palumpa kuyara wañinytjakitja. Palunyatjanungku yañangu paluru yunytju kuntara ngurrka yintilku kañilpangka. Paluru kalikingka maa tjarrparra ngurrka palunya katintjaku kaliki waralyngarala yangatjunkupayiktu.

“Palunyatjanu puluka ngurrkangka yañanguku mara tjarrparra marangku yintiyintira wanantjaku, kaliki tjayiñiwana. Yalatji tjanpalangara mara ngurrkatjarrangku yintiyintira wanantjaku. Palunyatjanungku tiipula wiimangka kutjara puyutjunkupayingka, mara tjarrpatjunkula ngurrkatjarrangku yintiyintira wanantjaku, tiipula tjayiñiwana. Yalatji yintiyintira wanara piyuku malaku yankula kalikinguru pakara tiipula tjawirrilyi kutjalpayingka tjayiñiwana yintiyintira wiyara wanantjaku. Tulkuku mayutju tiña paluru puluka palunya wilä alara nyiti kapurarrti kutjarra anta yalu mantjira kutjara wiyantjaku, tiipula palula. Kuka yañangu winki katirra ngurrangka ila kutjara wiyantjaku, yurilpangka, tjunpaya katirra yintilpayingka ila.

“Yañangu kutjupangku Katutjaku wangka kulintjawiyangku kuya palyantjala, luwu yalatji ngaranyi. Yañangu paluru kungka nanikuta manpaña kutju nyurrkanyurrkawiya, katirra ngaratjunkunytjaku tiipula tjawirrilyi kutjalpayingka ila. Ngaratjunkula marangku kata pampura mara kutjupangku kuntala yunytju! Katutjalu mara tjunkunytja nyakula yunyparriku, yañangu palumpa kuyara wañinytjakitja. Palunyatjanungku yañangu paluru yunytju kuntara ngurrka yintilku kañilpangka. Tulku mayutjungkulpi ngurrka mantjira mara tjarpatjunkula tjawirrilyi kutjalpayingka yayina puupala ngaranytjala mara ngurrkatjarrangku nyapantjaku. Yalatji nyapara yintira wanara wiyanjtaku tiipula tjawirrilyi kutjalpayingka tjayitiwana. Yañangu paluru wiła alara nyiti kapurarrtji kutjarra an yalu mantjira tjunkunytjaku. Tulku mayutjungkulpi kuka mañkurrrpa palunya mantjira warungka kutjara wiyanjtaku, tiipula palula Katutjalu pañtira yunyparrinytjaku. Palya kuka yañangu winki tulku mayutju tjutangkuya ngalkula wiyanjtaku. Yalatji nguwanpa tulku mayutjungku palyaningga, Katutjalu yañangu palumpa kuyara wañiku.

Mangarri pulawu yulpu an tjiratarraya kati-payi Katutjaku tjawirrilyi yungkukitjangku, mayi puriiti kutjanutjatarra. Tulku mayutjungku mayi pulawu tjinguru puriiti aapa mantjira, tiipula palula warungka Katutjaku kutjara wiyal-payi. Mangarri puriiti aapa kutjupa kanyilpayi tulku mayutju tjutangku kutju ngalkuntjaku.”

*Tulkuku mayutju, Lipayiku ngantitja tjuta
yalatjiya nyinanytjaku*
*Lipitikatja 16:, Nampatja (Numbers) 18:1-32;,
35:1-8*

Yanangu uwankarraku kuya wanimalpa
Lipitikatja 16:1-19

Mayutju Katutjalu Muutjanya watjañu, “Nyuntupa kuṭa Yirananya, tulkuku mayutju tiñanya yalatji watjala!, ‘Yirana, kulilañi! Tjurrkarrangka kutju kaliki palula maa tjarrparra maa yankula kaliki waralyngarala yangatjunkupayingka wayintara maa tjarrpanytjaku, ngayuku ngurra yunngukutu. Wiya nyuntu tjutangara tjarrpanytjaku, kutjungara kutju tjarrparra ngaranytjaku. Ngayuku ngurra palunya ngaranyi, pukutju palula katu ngayulu nyinanyi. Tjurrkarrangka kutju nyuntu palya tjarrpaku, kuli tayimi nyuntu tjarrparra mirrirritjipingkamarra. Tjawirriliyi kutjarra puluka an tjiipi ngalya katirra yunytju muṭuntjatjanu kutju nyuntu tjarrpanytjaku.’”

Katutjalu yalatji piyuku watjañu, “Yirananya, tulkuku mayutju tiñanya, kutju ngayuku ngurra yunngukutu tjarrpanytjaku, ngayuluna tjanampa yanangu tjutaku kuya waninytjaku, yalatji yuwankarraku, Yiranaku, palumpa walytja tjutakutarra, yanangu uwankarraku, Yitjurilaku ngantitja tjutaku. Ngurra palula tjarrpakitja paluru walytjangkungku paltjira tulkuku mayutju tiñakuñu mantarrangka tjarrpanytjaku. Tjarrparra puluka mantjira katirra ngaratjunkunytjaku yunytju muṭulkitjangku.

Puluka palunya yunytju muṭura ngurrka yintintjala, ngayuluṇa tjanampa Yiranaku, palumpa walytja tjutakuṭarra kuya wañiku.

“Puluka palunya yunytju muṭura Yiranalu ngurrka kanilpangka yintintjaku. Yankula paluru kanilpa kutjupa mantjintjaku, waru yaltatjarra. Tjira nguwanpaṭarra warungka puyutjunkupayi, paluru mantjintjaku. Palunyatjanu kanilpa ngurrkatjarra, kutjupa yaltatjarra, tjiratjarraṭarra kaliki palula tjarrparra maa yankula kaliki waralyngarala yangatjunkupayingka wayinta Yirananya tjarrpanytjaku. Tjarrparra tjira nguwanpa palunya paluru yaltangka yintira puyutjunkunytjaku, puyu pakara pukutju palunya tjutuntjaku, Yirana paluruṇi nyakutjipingkamarra ngayuluṇa pukutju palula katu ngaranytjala, paluruṇi nyakula mirri punkara ngarripayingka. Kanil palunya ngurrkatjarrangka mara tjarrpatjunkula ngurrkatjarrangku yintiyintira wanantjaku, pukutju palulawana. Yalatji paluru mara tjarrpatjunkula tjapanpalangara yintiyintira wanantjaku.

“Palunyatjanu Yitjurilaku nganṭitja tjutangkuya nanikuta kutjarra ngalya katirra tjawirrili kutjalpayingka ngaratjunkunytjaku. Yiranalu kaliki yunngunguru pakara mani tjiilpangka yinkarra nanikuta kutju ngurrtjara mantjintjaku, yunytju muṭuntjakitjangku. Yunytju muṭura ngurrka kanilpangka yintintjaku. Ngurrka katirra Yiranalu kalikingka malaku tjarrparra, waralyngarala yangatjunkupayingka wayinta katinytjaku. Ngurrka palunya katirra yintira wanantjaku,

pukutju palulawana. Yiranalu yalatji palyaningka kaliki palunya palyalpi nyurrangarrimpa ngaraku, yulpaṭawiya. Kuya palyaranyurra kaliki palunya yulpaṭankupayi, mungutja nguwanpa ngaraku.

“Palunyatjanu Yiranalu pakara nanikuta palunya kana ngaranytja katirra puliinangka walatjunkula wantirriyantjaku, ngurrangka waṇma. Nanikuta palunya yanangu tjutaku kuyatjarra yankula kutu kawaṇkatiku. Nanikuta paluru tjanampa kuya katintytjala, kuyawiyalpiya yanangu tjuta nyinaku. Yalatjinyurra tjukarurru palyaningka ngayulu nyurrangarrimpa kuya waṇiku.”

Tulkku mayutju tjutangku yalatjiya tulku tjukarurru palyantjaku

Nampatja 18:1-7

Mayutju Katutjalu Yirananya yalatji watjaṇu, “Ngayuku tulkungka nyinarranyurra tjukarurru kaliki ngaangka palyantjaku. Wiyawanangkunyurra palyaningka ngayulu nyurrangarrinya pungku. Nyuntu Yirana kulila!, nyuntu, nyuntupa katja tjutaṭarra Lipayiku ngulytju ngantitja tjuta nyinanyi, kutjupa tjutaṭarraraya palumpa ngulytju ngantitja nyinanyi Lipayiku. Nyuntu tjananya yalti!, kalikiwanaya ngalya yankula waarrkarrinytjaku. Kalikingka yila kutjuya waarrkarrinytjaku, unnguwiya, yurilta kutju. Tulkku mayutju tjuta kutjunyurra kalikingka yunngu waarrkarrinytjaku, yulytja palunya tjutawana. Tjawirrilyi

kutjalpayiwanatarra nyurrangarri tulkuku
 mayutju tjuta waarrkarrinytjaku, wiya
 tjanaya Lipayiku ngantitja kutjupa tjuta
 palulawana waarrkarrinytjaku. Tjinguru
 Lipayiku ngantitja kutju watawatatarringkula
 yulytja palulawana waarrkarrinyingka mirri
 pungkutjipingkana. Paluru tjana kapi, waru
 yulytja kutjupatarra mantjira katirra kalikingka
 yurilta ila tjunkula waarrkarrinytjaku. Tjinguru
 yanangu kutjupangku ilarringkula kaliki palula
 ngayuku yulytja tjuta pampuningka, mirrina
 pungkutjipingka.”

*Tulkuku mayutju tjutaku kuka an mangarri
 yungkunytjaku*

Nampatja 18:8-20

Mayutju Katutjalu Yirananya yalatji watjanu, “Tjawirrilyi ngayuku kuka an mangarri yanangu tjutangkuya katirra yungkunytjala palyanyurra tulkuku mayutju tjutangku kutjunyurra ngalkuntjaku, kutjupa tjutangkuya wiya ngalkuntjaku. Nyuntu, nyuntupa katja tjutangku kutjunyurra tjungungku ngalkuntjaku.

“Yitjurilaku walytja ngantitja tjutangku mangarri tjawirrilyi kutjupa tjuta ngayuku katirra yungkunytjaku. Tjawirrilyi palunya palya nyurrangarimpa walytja tjutangku ngalkuntjaku, katjapitingku, yuntalpitingku, tjamupitingku kapalingkutarra.

“Manti yurrunitja tjuta, ngayukutjuya Katutjaku nyinanyi. Maamangku an paapangku katja yurrunitja mantjira mani katirra tulkuku

mayutjuku yungkunytjaku. Yalatjiya mani yungkunytjaku ngayuku waarrkana tjutaku, ngaparrtjingku, katja yurruntitja mantjira.

“Puluka, tjiipi, nanikuta wiima, yurruntitja tjuta, ngayukutjuya yuwankarra nyinanyi. Wiya yanangu tjutangku palunya tjuta tjananya mantjira mani katirra yungkunytjaku tulku mayutjuku, wiya. Paluru tjana ngunytji tjananya kuka tjuta kanyira katirra tjawirriliyi pungkunytjaku, ngayuku Katutjaku. Mirri punganyingka wilä yalara tjira, kapurarrtji kutjarra, yaluutarra mantjira warungka kutjara wiyatjaku, ngayuku Katutjaku yungkula. Kuka winki kutjupa palyanyurra tulku mayutju tjutangku ngalkuntjaku.”

Katutjalu Yirananya kutu yalatji watjanu, “Paña Kayinanakutunyurra Lipayiku ngantitja tjuta ankula wiya paña waltyja kanyilku, Yitjuri-laku ngantitja kutjupa tjutangkuya paña waltyja kanyilku. Wiyanyurra paña waltyja kanyilku, mangarri pakaltjingantjaku. Ngayulu nyurrangarrinya watjanı, yilta kutjupa tjutangku yungkunytjala palya nyurrangarri ngalkuntjaku, tjawirriliyi palunya. Yalatjiña nyurrangarrinya yantayanṭara kanyilku.”

Lipayiku ngantitja tjutaku yungkula kanyintjaku

Nampatja 18:21-32

Mayutju Katutjalu Muutjanya yalatji watjanu, “Kuwarrilpi Lipayiku ngantitja tjutangku kalikingka waarrkarirra purinytju kanyilku. Palunya tjutangku kutjuya kaliki ruulamapira

karrpira katirra ngurra kutjupangka ngaratjunkula purinytju kanyilku. Kaliki palunya ngaranyingka Yitjurilaku ngan̄titja tjutangkuya kalikikutu katirra tjawirrilyi ngayuku yungkunytjaku. Paluru tjana mangarri mantjira wiimaniya tjawirrilyi yungkunytjaku ngayuku, kalikikutu katirra. Tjawirrilyi palunya tjuṭa ngayulu watjan̄utjangka, Lipayiku ngan̄titja tjutangku ngalkuntjaku. Kiripitji, yarinytji, mangarri kalkatjarra kutjupa mantjira wiimaniya tjawirrilyi yungkunytjaku ngayuku. Ngayulu watjani, Lipayiku ngan̄titja tjutangkuya tjawirrilyi palunya tjuṭa ngalkuntjaku.

“Paṇa Kayinanakutu yankula Lipayiku ngan̄titja tjutangku wiya paṇa walytja kanyilku mangarri pakaltjingantjaku. Mangarri tjawirrilyi palunya tjanampa nyurrangarri kutu yungkunytjaku. Tawunu maṇkurra kutjupa tjanampa ngaraku, palyaya ngurrangka nyinanytjaku.

“Mangarri tjawirrilyinyurra katirra ngayuku yunganyingka, Lipayiku ngan̄titja tjutangkuya mantjira wiima ngayunyanı Katutjanya yungkunytjaku, Yitjurilaku ngan̄titja kutjupa tjutangkuya tjawirrilyi ngayuku yungkunytja nguwanpa.”

*Mirri pungkupayi tjutaku tawunu maṇkurra
ngaraku*

Nampatja 35:1-8

Ngula Katutjalu Muutjanya yalatji watjan̄u, “Yitjurilaku walytja ngan̄titja tjuṭa tjananya

yalatji watjala! Ngurra Kayinanalakutu yankula mirri pungkuyinkula tjananya nyurrangarri ngurra tjanampañu kanyilku. Kanyiranyurra tawunu tjikitjipala ngurrtjara watjantjaku, tawunu palula tjanala yañangu mirri pungkupayi tjalkalungkula kumpintjaku. Tawunu palunya tjutangka yañangu mirri pungkupayi tjuta tjalkalungkula kumpira kana nyinanytjaku, ngaparrtjingku tjananya pungkutjipingkamarra. Yañangu kutjupa kulintjawiyangku yiluntankula tawunu palulakutu tjalkalungkula kumpira nyinanytjaku, mirriku walytja tjutangkuya wanara ngaparrtjingku mirri pungkutjipingkamarra. Mirriku walytja tjutaya wiya tawunu palunya tjutangka tjarrpanytjaku, ngaparrtjingku mirri pungkukitja.

“Tjinguru mirri pungkukitjangku kulintjawiyangku yañangu kutjupa punganyingka, yañangu pungutja paluru ngan̄ti mirrirriku. Palunyatjanu wati paluru palunya pungkula tawunu palulakutu tjalkalungkula kana nyinanytjaku. Tjinguru wati kutjupangku nyakunytjawiyangku tjinguru kulaṭa palunya wanirra watilpi kumpira ngarrinyingka wakara mirrintanku. Palunyatjanu wati paluru tawunu palulakutu ngululpi tjalkalungkula nyinarra kanarringkunytjaku.

“Tawunu palula nyinanyingka, kuutawutjungkaya ngaratjunkula watjalku. Wangkarraya watjalku wati palunya wiya ngaparrtjingku mirri pungkunytjaku, wiyakutjura kulaṭa palunya kulilwiyangku

wañirra wakanutjangka. Yalatji watjanutjangka wati palunya nyinanytjaku ngurra palula, ngurra walytja palulakutu piyuku yankunytjawiya, mirriku walytja tjutangku pañara pungkutjipingkamarra. Tuñkuku mayutju tiña mirrirrinyingka kutju, pakara ngurra walytjakutu ngula piyuku yankunytjaku, nyinanytjakitja.

“Tjinguru wati kutjupangku yañangu kutjupaku kuyarrirra mirri pungkula, paluru tjinguru tawunu palulakutu tjalkalungku, kana nyinanytjakitja. Palunyatjanu tawunu palula kuutawutjungkaya wangkarra watjalku, wati palunya ngaparrtjingku mirri pungkunytjaku.

“Tjinguru yanangu kutjupangku rawa mulyarrara nyinarra ngankirrikutu yuntañku, punkara mirrirrinytjaku. Palunyatjanu mirri palumpa walytja ilatjangku wanara ngaparrtjingku mirri pungkunytjaku.

“Wati kutjupa mulyarrarirra mirri punganyingka, ngurra paña palunya kuyarringku. Mirri pungkupayi palunya ngaparrtjingku mirri punganyingka, ngurra, paña kuyarrintja palyarriku. Palyanyurra nyinanytjaku mulyarrarirra yañangu kutjupa pungkunytjawiya. Ngurrañtarra kuyantjawiyangku kanyintjaku palyangku, ngayulu mayutju Katutjaluna nyurrangarrinya watjañingka.”

Pana parra nyakuyinkula katirra tjakultjunku-payi tuwalpalaya

Nampatja 13.; 14.; Tjutaranami (Deuteronomy)

1:

*Wati tuwalpalangkuya paña Kayinanalawana
nyakuyinamalpa*

Nampatja 13:1-24

Mayutju Katutjalu Muutjanya yalatji watjanu, “Yañangu tjuta mayutju tjuta yaltirra tjananya tjungula! Tjungura tjananya ngurrtjara mantjila!, mayutju tuwalpala. Mantjira tjananya iyala!, paña Kayinanalawana parra nyakuyinkunytjaku, parra nyakuyinkula ngalya yankula nyuntula tjakultjunkunytjaku. Paña palulawana nyuntupa waarrkana tjutangku parra nyakuyinku. Ngurra palunya ngayulu nyurrangarrinya yungku rawa kutu nyinanytjaku.” Wangka panyapa kulira Muutjalu tjananya ngurrtjara mantjira yalinjtjarra iyanu parra nyakuyinkunytjaku, nyakuyinkula ngalya yankula tjakultjunkunytjaku. Muutjalu kulinu, “Tjana ngalya yankula ngayunya tjakultjunanyingka, tjilirratjarra tjuta ngayuluna tjananya katiku ngurra palulawana tjananya mirri pungkula ngułutjingara iyantjaku. Ngurra palulalpi nganaña nyinaku.”

Paluru tjana ngurra Yipurunalawana yankula tjananya yañangu waławara tjuta nyangu, Yanakaku ngantitja tjuta. Puliina yini Yitjikulawana yankula nyangu, mangarri palya ngarala wañintjya, kiripitji, witjirrki, mangarri kutjupa tjutatarra. Mangarri kiripitji kalka palunya tiña puntu kuntara, riilangka karrpira waralytjunu, wati kutjarrangku katiyankunytjaku. Purayitiyi tjikitjipala paluru tjana parra

nyakula ngalya yanu Muutjala tjakultjunkukitja. Mangarri puntuya ngalya katingu, kiripitji kalka palunya, witjirrkì nguwanpa kalka, mangarri kutjupa tjutaṭarra.

Parra nyakulaya ngalya katirra Muutjala tjakultjunku
Nampatja 13:25-33

Ngurra Kititjangka Muutjanyangarriya nyinanyingka tuwalpala paluru tjana ngurra palulawana nyakuyinkulaya ngalya yanu. Ngalya yankulaya Muutjala alatji tjakultjunu, “Ngurra palyalatju parra nyakuyinangi. Kapi tjuta ngarriirra wañinyi. Yukiri, watiya, mangarri palya tjutaṭjarra ngarala wañinyi. Mangarri ngaatjanya ngurra palulalatju mantjira ngalya katingu, nyurrangarrinya nintintjakitjangku, nyuntu yurrunpa alatji watjanutjangka. Ngurra palulaya aŋangu manpaṭa tjuta nyinarra wañinyi. Waala tjuta ngarala wañinyi parriki palyara ngururrtjunutjarra. Parriki palula kiiṭa kutju yałalpayitjarra ngaranyi. Tjinguru nganana tjilirratjarra tjuta yankula tjananya puṭu mirri pungkula ngulutjingara wantirriyalku. Manpaṭa kutjupa tjutaṭarra nganañatju nyakula ngulurringu, watawara palunya tjutaku walytja tjuta.

Yamalikaku ngantitja tjutaya ila nyinarra wañinyi yalintjarra, kanya Yiitjaku ngantitja tjutaya, Tjipuyutjaku ngantitja tjutaṭarraya wirrili puliwana nyinarra wañinyi, Yamurataku ngantitja tjutaṭarra. Yamalakaku ngantitja tjutaku ngurrangka wilurarra Kayinananya

ngurrara tjuta nyinanyi, yuru tiñangka yilawana, karru Tjuutanawanañarraya nyinarra wañinyi.”

Mayutju kutjungku Kiilipalu paña Kayinanalawana nyakuyinkula tjananya watjara marrkuñu, “Kuwarri ngananya tjilirratjarra tjuta yankula pungkula wantirriyantjaku, paña palula nyinanytjakitjangku. Ngananya palya tjananya pikangku pungkula ngulutjingara iyalku.” Mayutju kutjupa tjutangkuya paña Kayinanalawana nyakuyinkula alatji watjara marrkuñu, “Ngananya wiya yankula tjananya pungkunytjaku, tjanaya ngananya pungkula wiyltjipingka, manpaña tjutangku.” Mayutju paluru tjana miitingingka wangkarra yañangu kutjupa tjutawana ngunytji tjakultjunangi, ngulutjingantjakitjangku. Yalatji tjananya parra ngunytjintjunangi, “Paña nyarratja yalintjarra kuya. Palunya ngurrara tjutangkuya mangarri puñu tjawara pakaltjingalpayi. Palunyatjanuya mangarriku putulpiya kulilpayi. Ngurra nyarra palunya ngurrara tjuta wañawara nyinanyi, manpaña tjuta. Tjana nganananya nyakula tjinguru yalatji kulikku, ‘Nyarra tjutaya pikatiwiya, nyurrkanyurrka tjutaya yañangu.’ ”

*Yanangu tjutangkuya ngulurrirra
puñu kulikku, yankula pungkula ngurra
mantjintjakitjangku*

Nampatja 14:1-25

Tjakulpa wiyawana iltakutjura kulira yañangu tjutaya ngulurrirra mungangka yularra

tjinturringu. Muutjanya Yirananyaṭarra paluru tjana palunya kutjarra yalatji payira watjanu, “Paṇa Yitjipilakutula małaku yankunytjaku. Kapi wiyawanalanyatjun ngalya katingu, mirrirringamaralatju, ngururrpa. Palyalatju paṇa Yitjipila nyinamara, pungkulalanyatju tjana wiipatjarrangku mirrintanamara. Nganana wiya yankula tjananya pikangku pungku. Tjinguru Katutjalu kulinī Kayinananya ngurrara tjutangkulanya mirri pungkunytjaku. Yalinytjarra ngurrara tjutangkulpi nganampa kungka tjuta, pipirri tjutatarra witira katirra kanyilku. Wiya, paṇa Yitjipilakutu nganana małaku piyuku yankunytjaku.”

Yanangu tjutangkuya watjara wañingu, “Mayutju kutjupa nganana ngurrtjara nyinatjunkunytjaku, paṇa Yitjipilakutulanya małaku katinytjaku.” Palunyatjanu paluru kutjarrangku Tjatjuwalu anta Kiilipalu yañangu tjuta marrkuṇu, “Paṇa palulawanaliṭju yankula nyakuyinkula tjakultjunanyilpi. Paṇa palatja iltu palya. Watiya, yukiri mangarri palyatjarra ngarala wañinyi. Katutjalulanya yunyparringkula palya katirra nyinatjunku ngurra palula. Wiya palunya ngurrara tjutakula ngulurrinytjaku. Palyala tjananya tjilirratjarra tjutangku yankula mirri pungkula wiyaliku. Katutjanya wiyanurra panypurangkunytjaku. Palurulanya purinytju kanyilku. Tjanaya wiya Katutjanya kulinī, tjanaya wiyawanalangku ngunytjingku Katutjanya nguwanpa kutjupa tjuta walkuṇi. Katutjanya kutju kaṇṭilya puntu nyinanyilampa, palurulanya purinytju kanyilku,

nganana yankula pikangku tjananya mirri pungkula wiyañingka.” Yañangu tjutangkuya kulira wantirra puli tjutalpi mantjiraya ngarala wañingi, rungkara yiluntankunytjakitja pulanya. Palunyatjanu tjaatji kalikingka katu paarrtji nguwanpangku yirrnyara kanyiningga mayutju Katutjanya ngaranyingka.

Palunyatjanu Katutjalu Muutjanya yalatji watjañu, “Yañangu ngaa tjutaya yilta militjitji nyinanyi, ngayuku wangkaya tjukarurru kulintjawiya. Ngayulu puñuna tjanampa kutjupa kutjupa palyara nintiningga, palunyatjanuya tjukarurru yurrunpa nyinamara. Kala, militjitji tjutaya pika nyunu punturringkula mirrirrikula wanalku. Kalalpi, Muutja nyuntu kulila!, nyuntupa katjapiti yuntañalpitii kutju ngayuku walytja tjutalpiya nyinaku, nyuntupa tjamupiti kapalipititarra.” Muutjalu Katutjanya yalatji tjapiñu, “Nyuntu yilta yalturunytjungku yañanguku kuya wañipaiyi. Yirriti nyuntu panyapa ngayunya watjañu. Yañangu tjutangkuntaya yilta kuwarri panypurangkula kuya palyañu. Kuya palunya tjanampa wañi!, nyunu puntuya nyinarra wiyarritjipingkamarra. Yiluntankunytjawiyangku tjananya yaltururrirra wanti!”

Katutjalu Muutjanya yalatji watjañu, “Nyuntu kutjuñin tjapiningka kuyaña tjanampa wañiku, yuwankarraaya nyunu punturirra nyinarra wiyarritjipingkamarra. Ngayuluñanta tjukarurru watjani, militjitji palunya tjutaya wiya paña Kayinanangka yankula nyinaku. Ngururrpaya maa yankula paluru tjana wiyarriku.”

*Katutjalu tjananya yitjipungku
Nampatja 14:26-45*

Katutjalu pulanya Muutjanya anta Yirananya watjañu, añañgu tjutangka yalatji tjakultjunkunytjaku, “Ngayulu tjukarurru nyurrangarrinya watjañi. Militjitji tjutangkuñinyurra panypuranganyingka yiltanyurra mirrirriku. Wulkumanu tjuta anta tjilpi tjutanyurra paña Kayinanala ngururrpa maa yankula mirrirriku, paña palulakutu yankula nyinanytjawiya. Yangupala tjuta yukarra tjuta kutjunyurra ngantitja tjutatarra yankula paña palula nyinaku. Tjatjuwanya anta Kiilipanyaтарра kana nyinarra paña palulalpipula nyinaku. Paña palunya yalintjarra nyurrangarri ngulurrrirra wantinyingka, nyurrangarrimpa pipirri ngantitja tjuta kutjuya paña palula yankula nyinamalpa. Nyurrangarrimpa pipirri tjuta ngantitja tjutatarra ngurra ngaawana kapiwiyawana rawa nyinayinamalpa yiya puutiypala. Militjitji tjutanyurra yulta ngurra palula yankula ngururrpa mirrirriku.”

Katutjalu watjantja palunyaya kulira yanangu tjutangku puñu kulira yularra watjara pungangiyanku, “Yiltala Katutjanya panypurangkula kuya palyañu. Kalalpi, ngananya kuwarri yalintjarra yankula pungkula wantirriyalku, tjilirratjarra tjutangku.” Muutjalu tjananya marrkuñu, “Wiya. Pikaku yankuwiyangkuya wanti!, Katutjaku wangka kulira kilytjuntankunytjawiya. Palyaya ngaangka nyinama! Tjingu-

runyurra pika pungkukitja yananyingka, Katutjalu nyurranya wiya yanṭara yanṭara kanyilku.”

Kulintjawiyangkuya tjilirra mantjira yalinytjarra yanu, Yamalikaku nganṭitja tjuta pikangku pungkukitja. Palunyatjanu Yamalikaku nganṭitja tjutangku Kayinananya ngurrara tjutangkuṭarra tjananya mirri pungu. Kutjupa tjuta tjananya Yitjurilaku nganṭitja tjuta pungkula ngulutjingara malaku wantirriyanu.

Mayutju palunya tjuta, paṇa Kayinanalawana nyakuyinkula nyinapayi tjuta tjananya Katutjalu yitjipungkula mirrintanu. Nyunu punturrirra tjanan nyinarra wiyarringu. Kutjarra kutjupapula palya kana nyinangi, Tjatjuwanya an Kiilipanya.

Mayutju nyinanytjakitjangkuya kulikku watimankuṭu, Kuuralu, Tiitjalu, Yaparamalu

Nampatja 16; 17:

Muutjanya an Yirananyaya panypurangkula tjutulku

Nampatja 16:1-27

Mayutju mankurpa Kuuralu, Tiitjalu, Yaparamaluya mayutju kutjupa tjutangkuṭarra Muutjaku an Yiranaku kuyarrirra panypurangu. Mayutju palunya tjuta tjungurringu tuu yantatan pipitiyi. Tjana Muutjanya an Yirananya yalatji watjara panypurangu, “Wiyalanya nyupali tjukarurru kanyilpayi. Muutja. Nyaaku nyuntu mayutju tiṇarringu nganampatju? Nganaṇatjuṭarra mayutju tjuta nyinanyi, Katutjaku walytja tjungula nyinanyi.” Muutjalu wangka palunya kulira waṭungarala Katutjanya tjaipiṇu. Tjapira pakara tjananya yalatji watjanu

Kuuranyangarri, “Katutjalu kuliŋi mayutju nyurrangarrimpa nyinanyi. Mungawinki palurulanya nintilku, palurulanya nintilku mayutju nyinatjunutja. Katutjalu nyinatjunutja palunya kutju tjawirrilyi kutjalpayikutu palya yankula Katutjanya walkulku. Mungawinki kañilpa yayinatjanu palyanutja tjuṭa mantjirala waru yal̄ta yintira ngarala kanyila!, nyiṭi puyutjunkupayitjarrangku. Palunyatjanula nyakulpi, mayutju palunya, Katutjalu mayutju ngurrtjara nyinatjunku.” Yalatji kuliraya ngurrakutu yanu.

Palunyatjanu Muutjalu wikkarru wantirriyanu Tiitjanya an Yaparamanya yal̄tirra ngalya katinytjaku. Wikarrutja paluru pulanya puṭu yal̄tirra yankula Muutjala yalatji tjakultjunu, “Wiya. Paluru kutjarra nyinanyi. Paluru kutjarra, nyuntunya yalatji panypurangu, ‘Nyuntu wiyanwanangkulanyatju ngurra ngaa kuyawana ngalya katingu, ngurra palyakutu katinytjawiyangku. Nyuntu wiyalinyatju mayutju nguwanpangku al̄tinytjaku. Nyuntu mungutja nyinanyi.’” Tjakultjunkunytja kulira Muutjalu mirrpañarrirra Katutjanya watjanu, “Paluru kutjarrangku tjawirrilyi yungkukitjangku ngalya katinytjala, wiyapulampa yunyparrinytjaku! Paluru kutjarrangkupula wiyanwanangku ngunytji wangkapayi.”

Mungawinki pakara Kuuranyangarri kañilpa waru yal̄ta kutjuṭu kutjututjarra tjaatji kalikingka yankula ngarangi, tjawirrilyi kutjalpayingka waṇma nguwanpa, parrikingka yala yi-

langka ngarangi. Muutjanya an Yirananyaṭarra tjungu ngarangi.

Palunyatjanu tjananya Kuuralu yaltingu, yañangu yuwankarra ngalya yankula tjungurrinytjaku. Palunyatjanu Katutjanya paarrtji puntutjarra ngarangi. Muutjanya an Yirananya watjañu, “Wañmapula ngara!, ngaanpa yañangu yuwankarra ngayulu tjananya yiluntankuku kuwarri.” Muutjalu an Yiranalu kulira wañungarala Katutjanya yalatji marrkuñu, “Katutja, nyuntu mayutju tiña nyinanyi. Wati kutjungku nyuntunya kuya palyañu, palunya kutju nyuntu pungkunytjaku, wiya yañangu yuwankarra nyuntu pungkunytjaku.” Palunyatjanu tjana yañangu yuwankarra ngurrakutu yanu.

Mayutju Katutjalu Muutjanya piyuku watjañu, “Yañangu tjuṭa tjananya watjala!, ngurra tjanampa wantirra wañmarrinytjaku, Kuuraku walytja tjuṭaku, Tiitjaku walytja tjuṭaku, Yaparamaku walytja tjuṭaku.” Kala Muutjanyangarriya Tiitjaku an Yaparamaku ngurrakutu yanu. Yila nyinanytja tjuṭa tjananya paluru tjana watjañu, “Ngurra nyarra tjuṭanya wantirra wañmarri!, Katutjalu tjungu nyurranya mirri pungkutjip-ingkamarra.”

*Pana yalarringutjangka Kuuranyangarri
punkara ngatìngka wiyarringku
Nampatja 16:28-35*

Palunyatjanuya yañangu tjuṭangku palunya tjuṭaku ngurra wantirra yankula wañma ngarala wañingi. Tiitjanyangarriṭarra palumpa

miīta, katjapīti yuntałpititarr̄a kaliki yałangka ngarala wañingi. Yaparamanya palumpa walytja tjułatarraya kaliki walytjangka yałangka ngarala wañingi. Muutjalu tjananya yañangu tjułangka yalatji watjañu, “Yañangu nyarra tjułaya tjinguru kana kutuya nyinaku, yalatiya kulila! ‘Katutjalu ngayunya Muutjanya nyurran-garrimpa mayutju wiyalpi nyinatjunku.’ Tjinguru Katutjalu paña yalantjala, yañangu paluru tjana tjuła ngatingka punkara wiyarringku, yalatjinyurra kulintjaku, ‘Yiltalampa Katutjalu mayutju tiña nyinatjunu, Muutjanya.’ ”

Yalatji wangkarra wiyarringutjangka paña yalarringu. Ngati yalarringutjangka tjana punkara mirrirringu Tiitjanyangarri, Yaparamanyangarri, Kuuranyangarri, Kuuraku wangka kulipayi tjułatarr̄a. Paña yałarirra piyuku małaku patirringu. Tjana ngulu punkara mirrarra wañinityjala kulira yañangu kutjupa tjułaya ngulurrirra tjalkalungu. Mirrarraya tjalkalungkula yañangu kutjupa tjuławana watjarinangi, “Tjalkałuwalaka!, paña yalarringutjangka punkara mirrirritjipingkamarra.”

Panyapa tjuła tjananya yurrunpa tjaatji kallikutu yankula kañilpa yałtatjarra ngarangut-jatjanułtarra, Katutjalu tjananya warutjarrangku mirrintara wiyanu yantała kutjarra an pipitiyi-pala.

*Yiranaku watiya yukiritjarrarringku
Nampatja 17:1-12*

Mayutju Katutjalu Muutjanya watjanu, “Yaŋangu tjutaŋaya waltyjararranpa tuwalpala nyinarra waŋinyi. Waltyjararranpa Ruupinaku ngantitja tjutaŋa nyinanyi, mayutju tiŋa tjanampa. Waltyjararranpa kutjupa Tjuutaku ngantitja tjutaku nyinanyi mayutju tiŋa kutjupa. Yalatjiya mayutju tuwalpala nyinanyi waltyjararranpa tuwalpalakuŋu. Tjana watiya katiyankupayi, kali nguwanpa. Nyuntu mayutju palunya tjutangka tjananya watjala!, tjanaya watiya palunya ngalya katirra nyuntunya yungkunytjaku. Mayutju kutjungkunta watiya yunganyingka, mantjira nyuntu watiya palula yini wakala!, mayutju palunya. Mayutju kutjupangkunta watiya yunganyingka, nyuntu mantjira watiya palula yini wakala!, mayutju palunya. Yalatji watiya tuwalpalangka mayutju yini tuwalpala wakala! Wakara watiya palunya tjutaŋa katirra tjaatji kalikingka tjarrparra pukutju palula yila paŋangka tjurra!, puli wirulypa kutjarratjarrangka, watiya kutju ngarriṛra yukiritjarrarrinytjaku. Yukiritjarrarrinytja yininyurra nyakula nintingu kulilku, mayutju ngayuluŋa nyinatjunutja.”

Palunyatjanu Muutjalu watiya tjutaŋa tjanampa mantjira yini wakaŋingi, watiya kutjuŋu kutjuŋungka, Yiranakuŋu watiyangkaṭarr. Watiya waltytjangka Muutjalu mantjira wakalwiyangku wantingu. Mayutju kutjupa tjutaku kutju tjanampa watiya tjutangka wakara katirra tjuŋu.

Mungawinki Muutjalu yankula tjaatji kalikingka tjarrpangu, watiya palunya

tjuṭa ngurrtjalkitja. Paluru nyangu watiya kutju yukiritjarrarirra ngarringitja, mayi yuŋmitjarra. Nyakula yini Yirananyalpi nyangu. Watiya tuwalpala palunya mantjira katirra Muutjalu tjananya nintinu, yaŋangu tjuṭa tjungu ngaranytjala. Watiya mangarritjarra nyakulaya yini Yirananyatjarra mayutju lipinpala paluru watiya walytjangku walytjangkuyanku mantjira kanyira waŋingi. Mayutju Katutjalu Muutjanya yalatji watjaŋu, “Yiranaku watiya mantjira małaku katirra tjaatji kalikingka tjurra!, pukutju palula, kutu ngarrinytjaku. Puṭu kulilpayi tjuṭangku watiya palunya mangarritjarra nyakula kulintjaku, ngayunya panypurangkuwiyangku.” Muutjalu watiya palunya mantjira katirra pakutju palula tjunkula wantingu.

Yayinatjanu pilkaṭiya palyalku, nyakulaya tjana kanarrinytjaku

Nampatja 20:—21:

Muutjalupula Katutjanya tungunpungku

Nampatja 20:1-21

Yitjurilaku walytja nganṭitja tjuṭa parra yankulaya ngurra kutjupawana yanu, kapiwiyawana, yini Kiititjalawana. Palulanguru Muutjaku kangkuru Miriyamanya mirrirringu. Yularraya palunya tjunu.

Ngurra palula tjana kapiwiya nyinangu. Tjungurringkulaya tjana Muutjala Yiranala piyuku panypurangu, “Nyaaku nyupali nganaŋanyatju ngurra ngaakutu ngalya katingu?, tjinguru nganaŋanyatju pungkula

tjunkukitjangku?, puluka tjiipi tjuta~~tarra~~. Pana Yitjipingkalatju nyinamara, ngurra palyangka. Ngurra ngaangka kapiwiya, mangarriwiya~~tarra~~ ngaranyi. Nyaaku nyupali ngana~~ñ~~anyatju ngaakutu ngalya katingu?” Muutjanya anta Yirananya tjaatji kaliki palulakutu yankulapula mantangka wa~~ñ~~ungarangu Katutjanya tjapilkitja. Palulanguru Katutjanya kalikingka katu paatji nguwanpa ngarangu. Paluru Muutjanya yalatji watjanu, “Nyuntu pukutju palula watiya palunya mantjira yankula yanangu tju~~ñ~~ta tjunguntjaku. Tjungura tjananyapula kati puli nyarrakutu!, tjana ngarala nyakunytjaku. Tjana ngarala nyakunytjala nyuntu pulingka wangka!, kapi ya~~ñ~~arrinytjaku, pulinguru. Palulanguru kapi nyurrampa pulinguru yalara yintiku, piiringi nguwanpa, uwankarrangkunyurra tjikintjaku, kuka tjutangku~~tarra~~.” Watiya palunya pukutju palula mantjira Muutjalu anta Yiranalupula yanangu tju~~ñ~~ta tjungura puli palulakutu katingu.

Palulanguru Muutjalu tjananya yalatji kuru watjanu, “Yaatapalipa tjutanyurra ngarala wa~~ñ~~inyi. Kapilitju nyurrangarrimpa puli ngaangka yalalku.” Palulanguru Muutjalu puli palunya kutjarrangara yatu~~ñ~~u watiyatjarrangku, wangkawiyangku. Palunyatjanu kapi tina yalara yintingu. Yanangu tjutangkuya tjikin~~ñ~~angi, anta kuka tjutangku~~tarra~~. Muutjalu puli watjantjawiyangku watiyatjarrangku yatu~~ñ~~utjala, Katutjalu pulanya yalatji kuru watjanu, “Ngayulu ngangkari puntutjarrangku kapi yalara yungkupayi. Nyupali puli

yatulwiyangku pulikutu wangkamara, ngayulu nyupalinya watjañutja. Ngayuku wangka nyupali kulinmara. Wiya nyupali tjananya paña Kayinanalakutu katiku. Nyupali tjananya katirra ngururrpa maa iyalku.” Katutjaku wangka palunya paluru kutjarrangku kuliñu.

Yiitumanya ngurrara tjutaku ngurrawana yankukitjangku Muutjalu pulanya waarrkana kutjarra wantirriyanu mayutju tjanampa tjapintjaku. “Palyalatju yanku kurutjukata nyuntupa ngurrawana?” Yankulapula tjapintjala mayutju paluru wiya watjañu. Muutjalu tjananya piyuku iyañu yankula mayutju palula tjapintjaku, tjana ruutuwana kurutjukata parrpatu yankunytjaku. Piyuku tjananya mayutju paluru wiya watjara palumpa tjilirratjarra tjuña tjananya tzungunu. Palulanguru paluru tjana yankula Yitjurilaku walytja ngantitja tjuña tjananya pikangku pungkula iyañu. Palulanguru Muutjanyangarri taañarirrira yiwarra kutjupawana yanu, pungkupayi tjuñangkamarra.

*Yirananya mirrirringku
Nampatja 20:22-29*

Muutjanyangarriya puli yini Yuurakutu yankula tjana nyinangu. Palulanguru mayutju Katutjalu pulanya watjañu, “Yirananya wiya paña Kayinanalakutu yankula nyinaku. Ngurra palula nyupali wiya wangka ngayukunu kulinu, ngurra Miripala. Muutja, nyuntu pulanya Yirananya anta palumpa katja yurrunitja Yalitjanya katirra pulanya puli Yuurangka kalpatjurra! Katirra pulanya puli palula

tulkuku mayutjukuṇu mantarra Yiranala yirriwiltjinkula Yalitjalalpi tjarrpatjurra!, tulku mayutju tiṇalpi paluru nyinanytjaku. Yirananya puli palula katu mirrirriku.” Palulanguruya Muutjanyangarri tjungu puli Yuurangka katu kalpangu. Puli palula katu Yirananya mirrirringu. Palunyatjanu Muutjalu anta Yalitjalu tjarukatirra tjananya tjakultjunu yanangu tjutangka. Kuliraya rawa yulangi tjlpi Yirananyatjirratja.

*Yayina nguwanpa pilkaṭi palyalku
Nampatja 21:4-9*

Puli Yuurangkaya nyinarra paṇa Yiitumangka yitiwana yanuya. Yankulaya kapiku putu ngurrira mayi maanaku yunytjuwiyarringu. Paluru tjana yanangu tjutangku Katutjanya anta Muutjanya piyuku panypurangu, “Nyupali nyaaku nganaṇanyatju ngalya katingu ngurra ngaakutu?, mangarriwyakutu, kapiwyakutuṭtarra. Paṇa Yitjipingkalatju palya nyinamara. Wiya nganaṇatju yunytjurrinyi mangarri maana ngaatjanya kutulingku ngalkuntjaku.” Palulanguru Katutjalu pilkaṭi tjuta wantirriyanu, patjara tjananya uwankarra mirrintankunytjaku. Pilkaṭi tjutangku yanangu maṇkurra nguwanpa tjananya patjara mirrintanu. Yanangu maṇkurra palunya mirrirringkunytjala nyakulaya kutjupa tjutangku Muutjanya yalatji watjaṇu, “Nganaṇatju Katutjanya anta nyuntunya wiyanangku panypurangu. Nganaṇatju yalatji panypurangkula yilta kuya palyanu.

Katutjanya nganampa tjapila!, pilkaṭi tjuṭa payira wantirriyantjaku." Palunyatjanu Muutjalu tjanampa tjapiṇu. Palulanguru Katutjalu Muutjanya watjaṇu, pilkaṭi nguwanpa yayinatjanu palyantjaku, palulanguru watiyangka katu waralytjunkunytjaku. Katutjalu watjaṇu yalatji, "Patjantjala yanangungku pilkaṭi palunya yayinatjanu palyaṇutja nyakula palyarriku" Palulanguru Muutjalu pilkaṭi nguwanpa palyara waralytjunu. Palunyatjanu patjaṇutja tjuṭaya nyakula yilta palyarringu, mirrirrinytjawiyalpi.

*Piilamanya nyinamalpa
Nampatja 22:—24:*

*Piilakalu Piilamanya yaltiku
Nampatja 22:1-21*

Palunyatjanu Yitjurilaku walytja ngantitja tjuṭangku tjananya yankula Yamuraku ngantitja tjuṭa mirri pungangi. Paluru tjana mirri pungkula tawunu tjuṭangka waala tjuṭa yanṭayanṭalpayi.

Palulanguru Yitjurilaku walytja ngantitja kutjupa tjuṭa yankula puliina yini Muwapala nyinangu, panya karlu Tjuutanala kakarrara. Muwapanya ngurrara tjuṭaku mayutju tiṇa yini Piilakanya nyinangi. Paluru tjakulpa kulinu, Yitjurilaku ngantitja tjuṭangku Yamuraku ngantitja tjuṭa pungutjangka. Panyapa kulira paluru ngulurringu. Ngulurringkula mayutju paluru wikarru tjirripala wantirriyanu, wati Piilamanya yaltirra ngalya katinytjaku. Wikarru paluru tjana mani tiṇa tjuṭa katingu

Piilamaku yungkunytjaku. Paluru tjana yankula Piilamanya yalatji tjakultjunu mayutjukunu wangka, “Yaŋangu mingalingkuya ngalya yanu, ngurra Yitjipilanguru. Tjana nganaŋanya mirri pungkutjipingka, ngurraṭarra nganampa kanyilpayingkamarra, nyuntu ngalya yankula ngurra ngaanguru Katutjanyalampa tjapila!, pungkunytjaku tjananya. Kanya tjana tjutalingkuya nyinarra waninyi, nganaŋatju mankurra nguwanpala nyinanyi. Nyuntu ngalya yankula ngurra ngaanguru tjapila Katutjanya!, pungkunytjaku tjananya.”

Piilamalu wangka palunya kulira Katutjanya tjapiṇu. Katutjalu palunya marrkuṇu, “Nyuntu wiya yankula ngurra palula tjapintjaku, ngayulu tjananya pungkunytjaku, Yitjurilaku nganṭitja tjutanya.” Palulanguru Piilamalu tjananya wiya watjaṇu. Piilamaku wangka kuliraya wikkarru paluru tjana piyuku yankula mayutju Piilakala tjakultjunu. Palulanguru tjananya Piilakalu mayutju tiṇa tjuṭa Piilamalakutu piyuku iyanu. Yankula Piilakaku wangka tjana tjakultjunu Piilamala yalatji, “Mani tiṇa, yulytja tiṇaṭtarraṇanta yungku, nyuntu ngalya yankula ngurra ngaanguru Katutjanya tjapintjala, paluru tjananya Yitjurilaku nganṭitja tjuṭanya mirri pungkunytjaku.” Piilamalu piyuku Katutjanya tjapiṇu. Katutjalu yalatji watjaṇu, “Piilama. Palyanu nyuntu mayutju palunya tjuṭawana yankunytjaku. Ngayuluṇanta watjantjala kutju nyuntu palulawana palyala!” Piilamanya aali tungkiyingka kałparra yanu mayutju palunya tjuṭawana.

*Yilkari ngurrarangku tuungkiyi yangatjunku
Nampatja 22:22-40*

Palunyatjanu Piilamanya maniku kulira yunytjurringkunytjala Katutjalu kulira yunytjuwiyarringura. Palulanguru yilkari ngurrara wantirriyanu, ruutungka yangara ngaranytjaku, tjula waṭawaratjarra. Tuungkiyi paluru kutju nyangu yilkari ngurrara palunya, yutiwiya ngaranytjala. Tjuulatjarrangku wakaltjipingkamarra ngulurringkula tuungkiyi ruutungka tjayitwana yanu. Palunyatjanu Piilamalu mirrpañarrirra tuungkiyi palunya pungangi. Palunyangka yilkari ngurrara paluru maa yankula parriki yutjungka ngarangi ruutu yangara. Parriki pulitjanu palyanutja palula ngarangi. Yilkari ngurrarangku tjula waṭawaratjarrangku wakaltjipingkamarra tuungkiyi paluru parrikingka yila yankula Piilamanya tjina yutjura pikantanu. Palulanguru Piilamalu wayilarirra tuungkiyi palunya piyuku pungangi. Palulanguru yilkari ngurrarangku maa yankula parriki kutjarrangka ngururrpa yutjulingkungka piyuku ngarangi. Yutju palulawana tuungkiyi wanaparri kutju yankupayi, tuungkiyi kutjarra kutjupa yankunytjawiya yutjuwana. Yutju palula ilkari ngurrara nyakula tuungkiyi paluru ngarakatingu. Palunyatjanu Piilamalu puntura wayilarirra watiyatjarrangku pungangi.

Katutjalu nintintjala tuungkiyi yaŋangu nguwanpa wangkangu Piilamala. Yalatji tuungkiyi paluru tjapiṇu, “Nyaangurutjunu tjirripalangara pungangi?, ngayuluṇa yaalytji

palyantjala?" Piilamalu watjanu, "Nyuntu wiyanangku ngayunya katingutjangka. Tjuula waṭawara katiyankula wakarananta mirrintanamara." Tuungkiyi paluru Piilamanya piyuku watjanu, "Yirriṭi wiyananta wiyanangku katiyankupayi, ngarakatirra. Yalatji tjukarurruṇanta watjanı." Palulanguru Piilamalu watjanu, "Yuwa, tjukarurruṇin katipayi." Palunyatjanu Katutjalu Piilamanya kuru yaḷanu nguwanpa. Yilkari ngurrara paluru yuti nyangu tjuula waṭawaratjarra yutjungka ngaranytjala. Nyakula Piilamanya ngulurringkula waṭungarangu.

Yilkari ngurrara paluru Piilamanya yalatji kuru watjanu, "Nyuntu tuungkiyi pungkuwiyangku wantimara, ngayuluṇanta yangatjunkunytjala. Nyuntu ngurra waltyangka nyinamara, ngalya yankunytjawiya. Nyuntupa tuungkiyingku ngayunya nyakula tjirripalangara tjayiṭiwanarringu, ngayuluṇanta mirri pungkutjipingka. Tjinguru ngayulakutu nyuntunya tuungkiyingku ngalya katinytjala, ngayuluṇanta mirri pungamara, tuungkiyi palunya wantirra pungkuwiyangku." Piilamalu watjanu, "Yiltanı ngalya yankula kuya palyanu. Ngayulu tuungkiyingka nyinayinkula, ngayulu nyuntupa ngurrrpa nyinangi. Tjinguru nyuntu watjantjala ngayuluṇa yarurriku ngurrakutu." Yilkari ngurrarangku watjanu, "Wati pala tjutawana nyuntu tjanala yanama, kutu! Ngayuluṇanta watjantjala kutju nyuntu watjala!" Piilamanyangarriya yanu Piilakaku ngurrakutu. Piilakalu nyakula Piilamaku

yunyparringu.

*Piilamalu tjanampa Katutjanya tjapilku
Nampatja 22:41; 23:1-30; 24:1-9*

Piilamalu Piilakanya yalatji watjanu, “Katutjaluni watjanutjangka kutjuŋa watjalku.” Aali pakara Piilaka paluru Piilamanya katingu puli Pamutjapalakutu. Puli palulapula kalparra nyangu tjananya Yitjurilaku ngantitja tjuta, tjutalingkuya puliinawana nyinarra waŋingu. Nyakula Piilamalu Piilakanya watjanu tiipula nguwanpa tjapanpala pulitjanu palyantjaku, tjawirrilyitarra kutjantjaku. Palulanguru piyuku watjanu tjawirrili puluka manṭi tjapanpala anta tjiipi manṭi tjapanpala mantjira ngalya katintjaku.

Tiipula palula tjuṭa ngaranytjala, Piilamalu anta Piilakalu puluka kutju anta tjiipi kutju pungkula kutjaŋupula, tiipula kutjungka. Palunyatjanu tiipula kutjupakutu puluka kutjupa anta tjiipi kutjupa tiipula palula kutjara wiyanu, Katutjaku. Yalatjiya tiipula tjapanpalangka ku-naṭinpa puluka anta tjiipi kutjara wiyanu.

Piilamalu Piilakanya yalatji watjanu, “Ngaangka paṭanma!, ngayulu pulingka kalparra Katutjanya tjapilku.” Paluru Katutjanya tjapira tjarukatirra tjananya Muwapanya ngurrara tjuṭaku mayutju tjuṭa tjananya watjanu, Piilakanyaṭarra, “Palangkuni Piilakalu nyurrangarrimpa mayutju tiŋangku wikarrutja tjuṭa iyanu, ngayunya ngalya katintjaku. Paluru tjana ngayunya ngalya katingu Katutjanya tjapintjaku,

paluru tjananya Yitjurilaku ngan̄titja tjūta pungkunytjaku. Katutjalu wiya tjananya kulin̄i pungkunytjakitjangku. Paluruni wiya watjan̄u. Palunyatjanu ngayuluña pūtu kulin̄i Yitjurilaku ngan̄titja tjūta yinkarra kuyalkitjangku. Tjana minga nguwanpa nyinanyi Katutjaku ninti tjūta, palumpa walytja tjūta.” Kulira Piilakalu Piilamanya yalatji payin̄u, “Nyarra tjūta yinkarra kuyantjakunanta watjan̄u. Yalatjiku tjana nyuntunya ngalya katingu. Wiya nyuntu tjanaya kuyalwiyangku wantinytjaku.” Piilamalu tjananya Piilakanyangarri piyuku watjan̄u, “Katutjalunu watjan̄utjangka kutjuna nyurrangarrinya watjalku.”

Piilakalu Piilamanya watjan̄u ngurra kutjupakutu yankula tjawirrilyi kutjupa tjūta pungkula kutjantjaku. Piilaka paluru watjan̄u ngurra palulanguru Piilamalu piyuku Katutjanya tjapintjaku, paluru Yitjurilaku ngan̄titja tjūta mirri pungkunytjaku. Ngurra palula Piilamalungarri tjawirrilyi pungkula kutjara Piilamalu Katutjanya yankula piyuku tjapiñu. Pūtu tjapira paluru yankula Piilakala yalatji watjan̄u, “Katutjalu tjanampa tjukarurru palyalku, kuyantjawiyangku.”

Kulira Piilaka paluru Piilamanya piyuku watjan̄u, ngurra kutjupangka yankula tjawirrilyi tjūta pungkula kutjantjaku, Katutjanya piyuku tjapintjaku. Palulanguru Piilamalu Katutjanya piyuku tjapiñu, Katutjalu tjananya mirri pungkunytjaku. Katutjalu piyuku watjan̄u Yitjurilaku ngan̄titja tjūta mirri

pungkuwiyangku. Yalatji Piilamalu Piilakanya piyku tjakultjunu.

*Piilaku Piilamanya payira wantirriyalku
Nampatja 24:1-25*

Palulanguru Yitjurilaku ngan̄titja tjūta kuyalkitjangku Piilaku wayilarriŋkula Piilamanya payira wantirriyañu, mani anta yulytja yungkuwiyangku. Yalatji Piilamanya payin̄u, Piilaku, “Wikarrutja tjūtanya tjananya ngayulu wantirriyañu, nyuntu ngalya yankula tjananya kuyantjaku. Palulanguru nyuntu tjananya kuyantjawiyangku wantingu. Wiyañanta mani, yulytjañarra yungku, ngurrakutu yarra!” Piilamalu watjañu, “Ngayulu irrīti panyapa wikarrutja tjūtangka watjañu, Katutjaku wangkawana kutjuña palyalku. Tjingurunin mani tīna, puli kuulta, puli tjiilpa yungkunytjala, ngayuluña wantirra Katutjaku kutju ngayulu tjukarurru nyinaku.”

Ngurrakutu yankukitjangku Piilama paluru Piilakanya yalatji watjañu, “Ngurra walytjakutuña piyku yananyi. Katutjalu watjañutja ngaatja wiya kutjuñanta tjakultjunanyi. Yitjurilaku ngan̄titja tjūtaku mayutju tīna ngula nyinaku. Mayutju paluru tjananya palumpa tjilirratjarra tjūta ngalya katiku, Muwapanya ngurrara tjūta mirri pungkula ngulutjingara wantirriyantjaku, Yiitumanya ngurrara tjūtjarra. Alatji nyur-rangarrinya mirri pungkula ngurratjarra nyur-rampa kanyilkku, ngurrangkaya kutu nyinakit-jangku. Ngurra kutjupa kutjupa nyinanytja tjūta tjananya Yitjurilaku ngan̄titja tjūtangku mirri

pungkula wiyalku, ngurra tjanampangkaya kutu nyinakitjangku.” Wangka palunya tjakultjunkula wantirra Piilamanya ngurra walytjakutu piyuku yanu.

*Muutjanya mirrirringku
Nampatja 27:12-23; Tjutaranami (Deuteronomy) 31:, 34:*

*Katutjalu Tjatjuwanya mayutju nyinatjunku
Nampatja 27:12-23; Tjutaranami (Deuteronomy) 31:1-8*

Mayutju Katutjalu Muutjanya watjanu, “Ngayuluna nyupalinya Yirananya ngurra Kiititjala watjanutjangka, kulintjawiyangku nyupali wantingu, kapi tjanampa mantjintjakitjangku. Ngayulu ngangkari puntutjarrangku palyalpayi kututja, wiya nyupali yalatji tjananya nintiñu. Palulanguru nyuntu pulingka kalparra paña Kayinananya nyakula mirrirriku. Paña palulakutu nyuntu wiya yankula nyinaku.” Muutja paluru Katutjanya tjapiñu, “Tjapiniñanta nyuntu mayutju kutjupalpi tjanampa ngaratjunkunytjaku, pikakutu tjananya tjukarurru katinytjaku. Wati nguluwiya nyinanytja ngurrtjara ngaratjurra!, mayutjungku tjananya kanyintjaku, mayutjuwiyalpiya nyinatjipingkamarra.” Palunyatjanu Katutjalu Muutjanya watjanu, “Yankula Tjatjuwanya tjilpi Naanaku katja yaltirra ngalya katirra ngaratjurra!, tulkuku mayutju tiñangka yila, yini Yalitjala. Yalatji Tjatjuwanya ngaranytjala tulkuku mayutjungka kurungka, yañangu tjutangka kurungkañarra,

nyuntu Tjatjuwangka mara katangka tjunkula yalatji tjanala watjala!, ‘Wati ngaatjanyalpi mayutju nyurrangarrimpa ngaranyi, ngayuluña kuwarri mirririku. Karru Tjuutanangka munkarra wiyalu tjungu yankula nyinaku. Mayutju ngaangku nyurrangarrinya katiku, karru Tjuutanangka wilurarra tjananya pikangku pungkunytjaku. Mayutju Katutjalu nyurrangarrinya aalpamilalku, ngurra palunya ngurrara tjuta mirri pungkula wiyanjtaku. Nyurrangarri nguluwiyangku tjananya yankula pungkunytjaku.’”

Palunyatjanu Muutjalu Tjatjuwanya piyku yalatji watjañu, “Rapangku tjananya katiyanama!, nguluwiyangku. Nyuntu yilta tjananya katirra nyinatjunku paña Kayinanala, panya Katutjalu yirriți nyinanytja tjuta yungkukitjangku watjañutjangka. Mayutju Katutjalunta purinypa katiyanamalpa, wantinytjawiyangku. Palulanguru nyuntu rapanytju nyinama!”

*Muutjalu tjananya Katutjaku wangka nintilku
Tjutaranami 31:9-13*

Muutjalu Katutjaku wangka piipangka wakañu. Wakara Lipayiku ngañtitja tjutaku yungu, tjaatji kalikingka tjunkula kanyintjaku, pukutju palula, puli wirulypa kutjarrangka ila.

Palunyatjanu Muutjalu tjananya yanangu tjuta ngarala Katutjaku wangka nintiñingi. Piyku tjananya paluru watjañu, “Ngayulu nyurrangarrinya wangka palunya kuwarri nintiñu, wangka ngaaku nyurrangarri

tjukarurru nyinanytjaku. Nyurrangarri tjanala wangka palunya katja tjutangka, yuntaŋpa tjutangkaṭarra nintila!, alatji kulira tjana Katutjaku wangkakulpi tjukarurru nyinanytjaku. Wangka palunya maṭupurra. Karru Tjuutanangka wilurarra nyurrangarri nyinarra wangka palulawana tjukarurru kutu nyinama! Wangka palulawana nyurrangarri tjukarurru nyinarra kana nyinamalpa ngurra palula.”

*Muutjanya pulingka kalparra mirrirringku
Tjutaranami 32:48-52; 34:*

Mayutju Katutjalu Muutjanya yalatji watjanu, “Nyuntu paṇa Muwapalawana yankula puli Ni-ipungka kalparra paṇa Kayinananya nyawa!, puli katunguru. Palulanguru nyuntu nyakula pulingka katu mirrirriku, nyupali, nyuntupa kaakangkuṭarra irriṭi ngurra Kiititjala ngayuku wangka kulira wantingu.”

Palunyatjanu Muutjanya yankula puli Ni-ipungka malpawiya kalpangu. Palulanguru kalparra katu ngarangi. Katutjalu palunya nin-tinu, paṇa Kayinananya. Paṇa tjuta palunya Muutjanya nintira Katutjalu watjanu, “Paṇa nyarratja ngayulu Yitjurilaku ngantitja tjutaku yungkukitjangku watjanu Yipuramala, Yatjikala, Tjikupala, palumpa tjanampa ngantitja tjutaku, kutu tjana nyinanytjaku. Paṇa nyarrangka wiya nyuntu yankula nyinaku.”

Palunyanguru mayutju Katutjaku waarrkana Muutjanya mirrirringu. Katutjalu Muutjanya mirri katirra paṇa Muwapangka puliinangka

tjunutjunu. Tjunutjunkunytjala yaŋangu tjutangku wiya nyakupayi, yaŋangu tjutaya ngurrpa nyinangi. Muutjanya yiya yantat n tuuntiyipala nyinarra alatji paluru mirrirringu. Yitjurilaku ngant tja tjutaya rawa yulangi Muutjaku, Puratiyi puupala.

Tjatjuwalu tjananya manta Kayinanalakutu katiku
Tjatjuwa 1:—5:12

Katutjanya Tjatjuwanyapula wangkamalpa
Tjatjuwa 1:1-18

Mayutju Katutjalu Tjatjuwanya watjanu, “Kuwarrinyurra yulytja kaliki tarra mantjira kamulangka tjunkula kati! Karru Tjuutanangka tjarukatirra maa kalparra maa yankula yila nyina! Karru palula munkarra parra nyakulanyurra ngurra palula nyinanytjaku. Ngurra palunya nyurrangarimpa ngaraku. Palyanyurra yankula pikalu pungkula ngurra mantjilku, tjilirratjarra tjutangku. Tjilirratjarra kutjupa tjutangku nyurranya pu tu pungkula ngulutjingara wantirriyalku. Ngayulu nanta Tjatjuwanya yan tayant ara kanyilku, tjilpi Muutjanya n a yan tayant ara kanyinutja nguwanpa. Ngayuku wangkaku nyuntu palya kutu nyinanytjaku. Wiyan nta wantikatiku, rawangku n a yan tayant ara kanyilku. Ngayuku wangka piipangka ngarrinytjala kutu tjananya riitarirra nintintjaku, yaŋangu tjutangka. Wangka palunya rawangku nyuntu riitarirra nintirringkunytjaku. Yalatjiku nintirringkula nyuntu palya kulira tjananya

nintingku kanyilku, mayutju palyangku. Ngulurringkunytjawiya nyuntu rapa nyinama!, ngayuluŋanta Katutjalu kutu yanṭayanṭara katiyanku.”

Palulanguru Tjatjuwalu tjananya watjanu waarrkana kutjupa tjuta yaŋangu tjutawana tjananya yankula tjakultjurinkunytjaku. Yalatjiya tjakultjunu, “Mayi kutjara yulytja tjutatarra mantjira yutitjurra! Tjintu tjirripalangkala karru Tjuutanangka tjarukatirra maa kalparra munkarra nyinanytjaku, manta palyangka, manta palunya Katutjalu tjananya yirriti watjaŋutjangka.”

Palulanguru Tjatjuwalu tjananya yaŋangu tjutangka watjanu, “Muutjalu nyurranya yirriti watjanu, kutjupa tjutanyurra palya Tjuutanangka kakarrara nyinanytjaku. Ngayuluna kulinji palya. Nyurrangarrimpa kungka tjuta, pipirri tjuta, Tjuutanangka kakarrarawana nyinaku. Kungka palunya tjutangkuya nyurrangarrimpa puluka tjuta, tjiipi tjuta palya kanyinmalpa, nanikuta tjutatarra. Kanya wati tjutanyurra kakarrara ngurrara karru Tjuutanangka munkarra tjungula!, yankunytjaku wilurarra, pungkula tjananya manta mantjin-tjaku. Ngula nyurrangarri palulanguru wilurarra manta mantjira ngalya yankula nyinanytjaku, ngaangka karru Tjuutanangka kakarrara.” Kakarrara ngurrara tjutangku kulira watjanu, “Yuwa, palyala tjungu yankuku, kala palyalatju ngalya yankula ngaangka nyinaku.”

Waarrkana kutjarra wantirriyalku parra

ngurrintjaku
Tjatjuwa 2:1,2

Palulanguru Tjatjuwalu waarrkana kutjarra wilurarra wantirriyalkitjalu watjañu, “Mantarra Tjirikunya ngurrarangka tjarrparrapula parra ngurrilapula tjanampa ngurra!, waala yunngutarra tawunu Tjirikungka tjarrparra parra nyakula ngalya yankulanipula tjakultjurra, ngayula!” Kuliralpipula yankula parra ngurrira Tjirikukuturringu. Tjarrparrapula kungkaku waalangka kumpira nyinangi. Kungka paluru yini Rayapanya. Watingku kurra palyara mani yungkunytjaku paluru pañara nyinapayi.

Tawunu Tjirikuku mayutjulu tjakulpa kulinu, Tjatjuwaku waarrkana kutjarra kumpintjatjanungka, Rayapaku ngurrangka. Mayutju paluru kulinu, “Paluru kutjarra ngalya yanu ngurra nyakulinkunytjaku, nyakulinkula malakupula yankula mayutjungka tjakultjunkukitja.”

Rayapalu pulanya kumpitjunku
Tjatjuwa 2:3-24

Mayutju palulamarra Rayapalu pulanya Tjatjuwaku waarrkana kutjarra yurrunpa katirra waalangka kalpatjunu, kumpirapula nyinanytjaku. Palulanguru yukiri piltirringutjangka katirra pulanya yarrkatjunu.

Kala, mayutju paluru waarrkana tjuta wantirriyañu, Rayapaku ngurrakutu. Rayapanya yalatji tjana tjapiñu, “Wati paluru kutjarra yaalytji? Mayutjululanyatju watjañutjangka, katinytjakulatju palunya

kutjarra. Nintingkulatju kulin̄i nyangutjangku. Paluru kutjarra ngalya yanu ngurra nyakuyinkula piyuku yankukitja.” Kulira Rayapalu tjananya nguntilyinu, “Paluru kutjarra ngaangka nyinarra yanu. Tjin̄tu tjarrpanytjalapula pakara wampa yanu. Tjingurupula yanu ngurrakutu. Parriki puntu ngaranyi waala tjutangka yila. Parriki palunya ngantiya kiita patin̄u. Waala ngaangurupula pakara yurrunpa yanu. Wanaranyurra parrpatu witilku.” Palulanguru Rayapaku wangka yiltakutjura kuliraya putu ngurririnkula kala karru Tjuutanakuturringuya, Tjatjuwaku waarrkana kutjarra witilkitja.

Paluru tjana yanutjangka nganti Rayapalu pulanya yankula tjakultjunu. Watjañu pulanya, “Katutjalu nyurranya yilta manta ngaatja yungkuku Yitjurilaku ngantitja tjuṭaku. Ngaa ngurrara tjutalatju ngulu nguwanpa nyinanyi nyurrangarrilamarra. Ngurra tjutawanatalju ngulu nyinanyi.” Rayapalu pulanya piyuku watjañu, “Tjakulpalatju kulilpayi yuru Tjatjakawana nyurrangarrinya katingutjangka. Kutjupa tjuṭa, Muwapanya ngurrara tjuṭa pungutja nganañatju kulin̄u. Yilta nyurrangarrimpa mayutju tina Katutjanya kutju nyinanyi. Katutja palula mirangka tjukarurrupula wangka!, nganañanyatju pungkuwiyangku wantintjaku, ngayuku walytja tjuṭa, ngayulu nyupalinya kumpitjunkula yantayantanutjangka. Yalatjipula wangka!, pungkuwiyangkulanyatju wantintjaku.” Wati kutjarrangkupula

watjañu, “Yiltalinyatjun yarrkatjunkula kananu. Ngalitju yankunytjala nganti wangkawiya nyinama! Nyuntu tjakultjunkunytjawiya nyinanytjala, yilta nganañatju nyurrangarrinya kanara yan̄tayantara kanyilku, mirri pungkuwiyangku.”

Wati paluru kutjarra Rayapanya piyuku watjañu, “Ruupa tjatjaka ngaatja nyuntupa waala yalangka yuti taayitinkula ngaratjurra!, ngalya yankulalatju nyakula nuuwimilantjaku. Nyakula nyurrangarrinya pungkuwiyangku wantiku, waala ngaangka nyinanytja tjuta.”

Waala tjuta ngarangi parrikingka yunngu. Rayapaku waala parriki tiñangka yila ngarangi. Rayapalu waala yalawana ruupa kutjupa tjarpatjunu, wati kutjarralupula ruupa witira tjarukatinjtjaku, parriki tiñangka yaatjayiti. Walatjunkula pulanya iyanu, pu lingka yankula kumpintjaku. Yankulapula nyinangi tjintu mañkurra.

Palulanguru Rayapalu ruupa tjatjaka palunya katu mantjira yalangka yila tjunkula Wantingu, ngulaya ngalya yankula nyakunytjaku, Tjatjuwalungarri. Tjirikunya ngurrara tjutangkuya palumpa kutjarrakuya putu ngurrira małakuya yanu.

Karru Tjuutananyaya yitipirriku Tjatjuwa 3:1-17

Mungawinki pakara Yitjurilaku ngantitja tjutaya pakara yinytjami kalikitarra mantjira wilurarra yanu, karru Tjuutanalakutu. Kapi tiñangku pungkula wantintjala karru palula

kapi pulkarringkula ngankirringka katu ngarripayi. Tjiñtu mankurrpaya rawa karrungka yila nyinapayi. Palulanguru mayutju tjutangku tjananya parra tjakultjurinangi, “Tulkuku mayutju tjutaluya pukutju palunya puli wirulypa kutjarratjarra mantjira katintjala, nyakula pakara wañmawanangku wanantjaku, wiya yilawanangku.”

Palulanguru mayutju Katutjalu Tjatjuwanya watjañu, “Kuwarrinya nyurrampa yatjikingku kutjupa kutjupa palyalku. Palulanguru yanangu tjutangkuya yalatji kuliklu, ‘Yitta Tjatjuwanyalampa mayutju tiña nyinanyi, Muutjanya nguwanpa nintinu.’” Tjatjuwalu wangka palunya kulira yankula yanangu tjutangka tjanala watjañu, “Ngalya yankulaya kulila!, Katutjakunu wangka. Yalatji nyurrangarrinya watjañu, ‘Katutjaluna nyurrampa manta Kayinananya yungkuku palula nyinanytjaku. Palulanguru Kayinananya ngurrara ngayuluña tjananya pungkula wantirriyalku, wiyanawaya nyinanytjala. Yalatji yinitjarra tjutaku nganitjia tjutana tjananya pungkula iyalku, Yitatuku nganitjia tjuta, Yipataku nganitjia tjuta, Piritjaku nganitjia tjuta, Kakatjaku nganitjia tjuta, Yamuraku nganitjia tjuta, Tjiiputjaku nganitjia tjuta. Yalatji tjananya ngayulu pungkula wantirriyalku. Tulkuku mayutju tjutangkuya ngayuku pukutju yurrunpa katintjala nyurrangarri nyakula kuliklu, “Katutjala tjungu yananyi.” Pukutju palunaya katirra kapinkga tjinangku palira kanyilku.

Palulanguru kapi wiyarringkuku, karrungka raanarringkunytjawiya. Kapi yalintjarratjayiti pulaparringkula ngarakatinytjala kapi mantangka wiyarringkuku. Palulanguru mantawananyurra yankuku.” Palulanguru Tjatjuwanya piyku watjanu Katutjalu, “Tułkuku mayutju tjuṭa tjananya wangka!, pukutju palunya katintjaku. Katirraya ngara!, kapi palira ngaranytjaku.”

Palulanguruya tjana yankula kapi palira ngarangi. Palulanguru kapi raanarringkunytja wiyarringu. Kapi yalintjarratjayiti pulaparringkula ngarringi, Katutjalu marrkuṇutja. Palulanguru tułkuku mayutju tjutaluya ngururrpa maa katirra ngarangi tjinangku palira. Palunyangka yañangu tjutalingkuya maa tjarukatirra maa kalpangu. Rawaya kalpangi tjutalingku.

Puli tjutaya katirra karru Tjuutanangka tjunku

Tjatjuwa 4:1-24

Yankula kalparra nyinangiya karrungka katu. Katutjalu Tjatjuwanyalpi watjanu, “Wati tuwalpala nyuntu ngurrtjara mantjila!, yalatji. Ruupinaku ngantitja tjutanguru kutju mantjila! Tjuutaku ngantitja tjutanguru kutju mantjila! Lipayiku ngantitja tjutanguru kutju mantjila! Nayinpala mantjila ngantitja kutjupa tjutanguru! Palulanguru tjananya watjala!, yankulaya puli kutjuṭu kutjuṭu mantjintjaku, karrungka ngururrpa. Mantjiraya ngalya katirra ngankirringkaya katu kapuṭu

tjunkunytjaku, puli tuwalpala. Ngankirringka ngarrinytjala puli tuwalpala kutjupa tjuta mantjiraya katirra karrungka ngururrpa kaputu tjunkunytjaku.” Rawalingkuya ngarangi pukutjutjarra karrungka ngururrpa, puli tuwalpala mantjira tjunkula wantintytjala, palulanguru pukutjutjarra pakaraya yanu, yanangu tjutangku nyakunytjala.

Pukutjutjarra katu kalparraya katiyanangi katuwana. Tjana yalatji katiyananyingka kapilpi raanarringangi karru tiñangka. Katutjalulpi kapi iyanu karruwana yankunytjaku.

Tjatjuwalu tjananya watjañu yanangu tjutangka piyuku, “Ngula nyurrangarrimpa katjapitingku yuntałpitjingku puli tuwalpala ngaatjanya nyakula nyurranya tjana tjapintjala, watjala tjananya yalatji!, ‘Katutjalu ngangkari puntutjarrangku karru ngaatjanya yangatjunu, tjarukatirralatju mantawana yankulalatju ngalya kalpangu.’”

Palulanguruya Tjatjuwanyangarri ngurra Kilkalalakutu yankula kaliki palyaraya wilytjangka nyinangi, Tjirikungka yila. Yanangu tjutalingkuya nyinangi, wulkumanu tjuta, tjilpi tjuta, yangupala tjuta, yukarra tjuta, pipirri wiima tjutañarra, tjilirratjarra tjutañarra.

*Mangarri maana tjanampa wiyarriku
Tjatjuwa 5:1-12*

Kayinananya ngurrara tjutangkuya tjakulpa kulinu Katutjalu tjanampa kapi marrkuñu Yitjurilaku nganñitja tjuta karruwana ngalya tjarukatirra ngalya kalpanytjaku. Yalatjiya

kulira ngulurringu, “Katutjalu tjananya yanṭayaṇṭaṇi. Tjinguruya ngaakutu ngalya yananyi nganaṇanya pungkula iyantjaku.”

Palulanguru Tjatjuwanya Katutjalu yalatji watjaṇu, “Tjungura tjananya watjala tjana watirringkunytjaku!” Manta Yitjipilanguruya ngalya yankula paapa tjuta rawa nyinarra tjilpirringkula wiyarringu. Paluru tjana wiya katjapiti tjamupiti watimanangi. Palulanguru Katutjalu Tjatjuwanya watjaṇu, “Watjala tjananya!, katjapiti tjamupitilpi watirringkunytjaku.”

Palulanguru Tjatjuwalungarri tjananya katirra watiṇu. Katjapiti tjamupiti tjana pira kutjungka nyinarra palyarringu.

Ngurra palulaya nyinarra tulku Patjuwupangkaya tjiipi pungkula kunaṭinpa ngalkunu Katutjanya walkulkitjangku. Mayi tjaatiṭarraya ngalkura warrara walkulpayi. Palunyatjanu mayi maana tjanampa wiyarringu, puutjikaratja. Piyuku wiyalpi tjananya Katutjalu yungkupayi. Yankulaya parra mantjirinkupayi mangarri wiita runkaraya ngalkupayi, Kayinananya ngurraralu pakaltjingaṇutjangka. Yalatji rawaluya mayi wiitaya ngalkula nyinapayi.

Tjirikunya ngurrara tjuta tjananya tjanaya pungku

Tjatjuwa 5:13—6:27

Katutjaku waarrkana Tjatjuwangka yutirriku
Tjatjuwa 5:13-15

Palulanguru Tjatjuwanya yanu tawunu Tjirikungka ila parra ngaranytjaku. Parra ngaralinkula paluru tjukurrrpa nguwanpa nyangu, wati kutju tjuula waṭawara kanyintjala. Tjatjuwalu tjapinu, “Nyuntu yaalytjinguru ngalya yanu? Tjinguru nyuntu ngalya yanu nganañanya pungkunytjakitja? Tjinguru nyuntu tjanampa waltytja?” Wati paluru wangkangu, “Nyurrangarri Katutjaku waltytja tjuta nyinanytjala ngayuluña ngalya yanu mayutju nyurrangarrimpa tina, nyurrangarrinya watjantjakitja. Ilkari ngurrara tjuta tjuulytji nguwanpa nyinanyi. Ngayulu tjanampa mayutju tina nyinanyi.” Tjatjuwalu ngulurringkula waṭungarala walkunu, “Ngayuluña nyuntupa waarrkana. Nyaampañanta palyantjaku nyuntu yunytjurringanyi?”

Wati paluru watjanu Tjatjuwanya, “Puutatjarralu wiya manta miilmiilpa palintjaku. Nyuntu puuta yarrara tjurra!, Katutjaku manta ngaangka.” Palulanguru Tjatjuwalu kulira puuta yarrara tjunu.

*Katutjalu watjalku Tjatjuwanyangarri
Tjirikula yaatjayiti parra yankunytjaku
Tjatjuwa 6:1-6*

Palunyangka parrikiya pulitjanu palyara wantingutja ngarangi. Tawunu Tjirikunya waala tjuta parrikingka yunngu ngarangi. Parriki parra ngaratjunkula wantingu, waalangka yaatjayiti. Parriki palunyangka kiita tiñaya patira wantingu, Yitjurilaku ngan̄titja tjutaya ngalya yankula tjarrpatjipingkamarra,

tjarrparraya tjananya pungkutjipingkamarra. Palunya ngurrara yunngu kutuya rawa nyinangi, yaatjayiți wiya yankupayi kaanakutu, kiitä puntuya patira wantingutjangka.

Palulanguru Tjatjuwalu tjananya tjilirratjarra tjuta katingu Tjirikungka yila nyinanytjaku. Tjatjuwanya Katutjalu watjanu, “Tjirikunya ngurrara tjuta nyurrangarri yankula tjananya pikangku pungkunytjaku. Ngayulu nyurran-garrinya aalpamilalku nyurrangarri tjananya pikalu mirri pungkula wiyanjtaku. Nyurran-garri mungawinki yankula parrikingka yaat-jayiți kutjungara parra yankula ngalya yankula piyuku ngurrangka nyinanytjaku. Mungawinki tjungunyurra tulku mayutju tjapanpala yur-runpa yankunytjaku, turampatatjarra. Palulanguru nganti tulku mayutju kutjupa tjutangku katinytjaku, pukutju palunya puli wirulypa kutjarratjarra. Palulanguru tjungu nyurran-garri tjilirratjarra yankunytjaku. Palulanguru tjintu tjikitjingka nyurrangarri kutjungara parra yankula ngalya yankulaya nyina!

“Palulanguru tjintu nampa tjapanangka tjapanpalangaralpinyurra parra rawunur-ringkula ngarakatinytjaku. Palulanguru turampata tjapanpalatjarrangku wangkatjingala! Wangkatjingantja kulira nyurrangarri katu puntura mirra! Yalatjinyurra mirranytjala kilytjukatirra parriki palunya yulpurringkula ngarrimalpa. Palulangurunyurra tjilirratjarra tjutalulpi kalparra tjananya mirri pungkula wiyal!, yanangu yuwankarra wati, minyma,

pipirri tjutatarra.” Yalatji Katutjalu Tjatjuwanya watjañu.

*Tjirikunya ngurrara tjutaya mirri pungku
Tjatjuwa 6:6-25*

Tjatjuwalu wangka palunya kulira yaltirra tjananya watjañu tulkuku mayutju tjutangka, “Katutjaku pukutju palunya puli wirulypa kutjarratjarranyurra tawunu Tjirikungka purintju yantayantara parra katintjaku. Tjapanpala tjanampanyurra turampatatjarra yurrunpa yankunytjaku, pukutjutjarra tjutaku.”

Tjatjuwalu tjananya yalatji watjañu, tjilirratjarra tjutangka, “Kutjupa tjutanyurra tulkuku mayutju tjutangka yurrunpa yankunytjaku, kanya kutjupa tjutanyurra ngantiwana yankunytjaku.”

Yalatjiya tawunu Tjirikungka parra yankukitja nyinangu. Parra yankulaya tulkuku mayutju tjutangku turampatatjarrangkuya mirratjingarnangi. Kutjungaraya parra yankula yarurringu ngurrakutu.

Ngarrirraya pakara mungawinki yanu. Tawunu Tjirikungka kutjungara parra yankula piyuku yarurringu, tjilirratjarra tjuta, tulkuku mayutju tjutatarra. Yalatji nguwanpaya tjintu tjikitjipalangara mungawinki pakara tjunguya parra yankula ngalya yanu.

Ngarrirraya mungawinki pakañu, Tjatjuwalu tjananya piyuku watjañu, tjilirratjarra tjutangka, “Kala, kuwarri Katutjalulpilanya aalpamilalku Tjirikunya ngurrara tjuta, nganaña tjananya pungkula wiyantjaku,

kutju tjalkalungkunytjawiya. Kungka Rayapanyangarri ruupa tjetjakatjarra nyinanytjala nyurrangarri wiya nyakula tjananya pungkunytjaku, wanti tjananya!, walytjararranpa palya nyinanytjaku. Tjirikunya ngurrara kutjupa tjutaku waala tjanampa nyurrangarri kilytjuntankula wiyalal, yulytja tarra tjanampa wiyalal! Puli tjiilpa puli kuulta yayina tjutatarra mantjira ngalya katirra tjurral, mayutju Katutjaku yulytja ngarrinytjaku. Yalatjinyurra tjuta mirri pungkula kilytjuntankula wiyanjtaku. Walytjalunku mulyatangku mantjintjawiyangku wanti!, mulyatangku katinytjala Katutjalulanya pungkutjipingkamarra.”

Tawunu Tjirikulakutuya piyuku yankula tjanpalangara parra yankula turampatatjarrangkuya katungku mirratjingaňu. Palulanguru tjilirratjarra tjuta katuya mirrangu. Mirranytjala parriki palunya pulitjanu palyantja patangarala yulpurringkula ngarringi. Palulanguru waarrkana kutjarra Tjatjuwalu wantirriyanu, yankula tjananya mantjira ngalya katinytjaku, Rayapanyangarri. Palulanguruya tjana kalparra tjananya tawunuwana yankula tjuula watawaratjarrangku wakara yiluntanangi, wati tjuta, kungka tjuta, pipirri tjuta, tjiipi tjuta, wulkumanu tjutatarra. Tjuta tjananya tjanaya wakara yiluntanu. Puluka tjuta, tjiipi tjuta, tuungkiyi tjutatarra yiluntanu tjananya. Rayapanyangarri kutjuya kanarringu, palumpa paapa, maama, kaaka tjuta, malanypa tjuta, tjanampa waarrkana tjutatarra. Waarrkana

kutjarrangku tjananya katingu Yitjurilaku ngantitja tjutaŋku ngurrakutu.

Tjilirratjarra tjutangku pungkula tjananya wiyaŋu, ngurraṭarra tjanampa kutjara wiyaŋu. Kala tjunpa kutjulpi ngarringi, kamparra tjunparringu. Puli kuulta, puli tjiipa yayinaṭarra ngarringi, yurrunpaya katirra tjunutja. Tjana mantjira katirra tjaatji kalikingka tjunu.

*Wati Yikanalu mulyaṭangku katiku
Tjatjuwa 7:—8:*

*Tawunu Tjirikungka Yikanalu yulytja
mulyaṭangku katiku
Tjatjuwa 7:1*

Panyapa Katutjalu watjaŋu, tawunu Tjirikungka wiya mulyaṭalu mantjintjaku. Wati kutjungku yulytjanguru Katutjaku ngurrkurringkula wangka palunya kulira wantingu. Wati paluru yini Yikanalu puli kuulta yulytjaṭarra mulyaṭangku mantjira yarrkatjunu. Palulanguru tjanampa Katutjanya ngurrku nyinangi.

*Tjatjuwaku tjilirratjarra tjutangku Yayiyinya
ngurrara tjuta puṭu pungku
Tjatjuwa 7:2-6*

Palulanguru Tjirikunya ngurrara tjuta tjananya pungkula Tjatjuwalu wati maŋkurra wantirriyaŋu, yankula tawunu Yayiyinya parra nyakula ngalya katirra tjakultjunkunytjaku. Parra yankula nyakulinkula ngalya yankulaya yalatji tjakultjunu, “Tawunu Yayiyinya paluru

wiima. Palyala tjananya yankula pungkuku. Wiyala tjutangku yankula pungkuku, tjawutjuna tjirripalangku kutju yankula pungkunytjaku. Tjawutjuna kutjupa tjutanyurra palya ngurrangka nyinanytjaku.” Kulira Tjatjuwanya wangkangu, “Yuwa, palyala yankula tjananya pungkuku, tjawutjuna tjirripalangku.”

Palulanguru tjawutjuna tjirripala yanuya tawunu wiima palulakutu, pungkunytjaku. Yankulaya yilarringkula nyangu tjana pika tjanampa ngalya pakaṇu, pika pungkunytjaku. Ngalya pakara pikalu tjananya kutjupa tjuta mirri pungkula tjananya wantirriyanu, tjilirratjarra tjuta Tjatjuwaku walytja tjuta. Palulanguru tjanaya ngulu tjalkalungu Tjatjuwalakutu.

Tjatjuwalu tjananya nyakula mayutju kutjupa tjuta yaltingu. Tjunguya yanu Katutjaku pukutjunguru pupakatirra tjapintjaku. Palulan-guruya watjilpa puntu Katutjaku pukutjungka ngarirraya mungarrtjirringu.

*Tjatjuwalu Katutjanya tjapilku
Tjatjuwa 7:7-15*

Mungarrtjirringkula Tjatjuwalu Katut-janya puntura tjapiṇu, “Nyaaku nyuntu ngananaŋanyatju ngaakutu ngalya katingu?, pikangkulanyatju ngaa ngurrarangku pungkula wantirriyantjaku? Karru Tjuutanangka parraritjayiṭi palyalatju nyinamara. Ngayuku walytja tjuta tjananya mirri pungutjangka, kutjupa tjuta tjananya pikangku ngulura wantirriyanutjangka kutjupa tjutangku kulira

ngalya yankula pungkupayingkamarra latju ngulurringanyi. Nyuntu nganañanyatju palya yanṭayanṭara kanyila!, kutjupa tjuṭangku pungkula wiyalpayingkamarra.”

Mayutju Katutjalu Tjatjuwala watjañu, “Pakalaya mantangka ngarrinytjawiya! Yitjurilaku nganṭitja kutjungku ngayuku wangka kilytjuntanu, Tjirikula mulyaṭangku mantjira katingutjangka. Palulanguru tjananya nyurrangarri kuwarri puṭu pungu, Yayiyinya ngurrara tjuṭa. Kuya palyalpayi palunya mantjira warungka nyinatjunkula tilira wantirriyala!, palumpa walytja tjuṭatarra. Yañangu tjuṭa tjananya watjala!, walytjararranca walytjararranca ngalya yankulantaya nyuntula ngaranytjaku. Walytjararranca ngaranytjala, ngayuluñanta nintliku yalatji, ‘Walytjararranca ngaa tjuṭangka mulyaṭanytjunya kumpini.’ Walytjararranca palunya yañangu kutjuṭu kutjuṭuya yankulantaya ngaranytjaku nyuntula. Palulanguru mulyaṭangku mantjilpayiñanta nintliku.”

*Yikananyangarriya warungka kutjara wiyaliku
Tjatjuwa 7:16-26*

Mungawinki pakaraya Yitjurilaku nganṭitja tjuṭa kutjungkerringkula ngaranginya, Tjatjuwala. Katutjalu nintintjala, Tjatjuwala tjananya ngurrtjara mantjiñu Tjuutaku nganṭitja tjuṭa, walytjararranca tjuṭalingkuya ngaranytjala. Tjatjuwala tjananya watjañu, “Pamuli, pamuliya ngalya yankula ngara!, ngaangka, Katutjaluní

nintilku.” Pamuli an pamuli ngalya yankula ngarala yanu. Palulanguru Tjiraku pamuli tjutalpi ngalya yankula ngarangitjangka, Katutjalu Tjatjuwanya nintinu. Tjatjuwalu tjananya watjañu, “Ngalya yankulaya yañangu kutjuñu kutjuñu ngara!, ngayula yila.” Yañangu kutjuñu kutjuñu ngalya yankula ngarala yanu. Palulanguru Yikananya ngalya yankula ngarangi. Palunya Katutjalu nintintjala Tjatjuwalu watjañu, “Nyawanî! Watjalani tjukarurru! Nyuntu mantjinu? Nyuntu nyaalytjinu Tjirikula?”

Yikanalu Tjatjuwalara watjañu, “Yiltana mulyatalu mantjira Katutjanya yulpañanu. Palumpa wangkaña kulira kilytjuntanu. Tjirikula puli kuulta tjilpañarralatju mantjira rawangkulatju katirra tjunkula wantingu, mayutju Katutjaku, ngulaku. Yulytja paluna tjutawanangka ngayulu nyangu yulytja palya ngarrinytjala. Palulanguru tjanala nganti ngayulu mulyatangku mantjinu, kuuta, puli kuulta tiña, puli tjilpañarra. Katirranा yarrkatjunu ngulaku. Ngayuku kalikingka ngarrinyi mantangka yunngutjayiti, tjawara tjutura wantingutjangka.”

Palulanguru Tjatjuwalu tjananya wati mankurra iyanu, yankula tjawara mantjira ngalya katintjaku. Mantjiraya katirra tjunu, yañangu tjutangka mirangka. Palulanguru Tjatjuwalu Yikananya witira watjañu walytja palumpa tjutatarra witira katintjaku yurilkutu, palumpa miña, palumpa katja tjuta, yuntañalpa tjutatarra. Kutjupa tjuta tjananya watjañu,

“Puli kuulta, puli tjiilpa panyapa tjutaṭarraya mantjira ngalya kati, yurilkutu! Palulanguru palumpa kaliki, yulytja tjuṭa, puluka tjuṭa, tjiipi tjuṭa, tuungkiyi tjuṭa mantjiraya katirra yurilpangka ngaratjunkulaya paṭala!”

Yankulaya yurilpanguru ngaralaya yilangku nyangangi, Tjatjuwalu Yikananya yalatji wat-jantjala, “Nyaakun nyuntu mulyaṭangku ramar-ringkula mantjinu? Nyuntu mulyatalu mantjinutjangka wiyalanya Katutjalu yanṭayaṇṭanu, wantingulanya palunya tjuṭangku pungkun-ytjaku. Kalalpi nyurrangarri turapulatjarra ngaangkalpiya ngara!, pulitjarrangku nyurrangarrinya nganaṇatju rungkara yiluntankuku, nyurrangarrinya.”

Palulanguru yanangu tjuṭangku tjananya rungkaralpi tjananya yiluntankula warungkalpi tjananya kutjara wiyanu, tjiipi tjuṭa, puluka tjuṭa, puli kuulta tjiilpaṭarra. Yuwankarra kamparra wiyanu. Palulanguru tjuṇpa kutjulpi ngarringi. Palula nganṭi kamparra wiyanutjangka Katutjanya ngurrkuwiyalpi nyinangi. Palulanguru ya watjalpayi, ngurra palatja, “Turaapulatjarranya.”

*Yayiyinya ngurrara tjuṭaya mirri pungku
Tjatjuwa 8:1-29*

Mayutju Katutjalu Tjatjuwanya yalatji watjanu, “Tjilirratjarra tjuṭa tjananya katirra tawunu Yayiyila pungkunytjaku. Wiya tjanampanyurra ngulurringkunytjaku, ngayuluṇa nyurranya aalpamilalku panyapa tjuṭanyurra pungkula yiluntara wiyanjtjaku.

Panyapa tjuta tjananya pungkula tjungu yiluntarra! Puluka tjuta, tjiipi tjuta, palyangkuya kanyila!, yulytja tjuta tarra tjungura kanyila! Tawunu Yayiyila wilurarra kumpira tjananya ngalya yankulaya puwa!"

Palulanguru Tjatjuwalu tjilirratjarra tjuta wantirriyanu, kumpilpa yankula tawunu Yayiyila wilurarra kumpira nyinanytjaku. Palulanguru Tjatjuwanyangarriya tjilirratjarra kutjupa tjuta Yayiyilakutu yalinytjarranguru yuti maa yanu. Yayiyinya ngurrara tjutangku tjananya nyakula yirriti nguwanpa tawununguru pakara ngalya yanu, Tjatjuwanyangarri pungkula wantirriyalkitja. Ngalya yananyingka Tjatjuwanyangarriya malaku yalinytjarra ngulu nguwanpaya tjalkalungu. Yayiyinya ngurraralu tjananya wanañu, pungkukitjangku. Palulanguru Tjatjuwanyangarriya ngarakatingu, kutjupa tjuta nintiñu, pakantjaku. Ngurra Yayiyila wilurarra kumpira nyinangutja tjutangkuya pakara tawunu Yayiyila kiiñangka tjarrparra wakara tjananya yiluntanu, yutu nyinangutja tjuta, malpa tjanampa tjilirratjarra nyinanytjawiyangka. Mirri pungkula waala tjuta tilira wantingu.

Palulanguru Yayiyinya ngurrara tjutalu tjilirratjarralu nguntiñlangarala nyangu ngurra kampanyingka. Nyakulaya puñu kulinu, palulanguruya ngulurringu. Palunyatjanu Yitjurilaku ngañtitja tjutangku wilurarranguru yalinytjarranguru ngururrtjunkula mirri pungkula wiyanu tjananya. Yayiyinya ngurrara mayutju Tjatjuwalungarriya witira

ruupangka nguntiwana tayimapinu, watiyangka katura yutitjunkula yiluntanu. Yalatji Yayiyinya ngurrara tjuta yiluntara wiyanu, Tjatjuwalungarri.

Katutjalu tjanampa pana Kayinananya yungkuku

Tjatjuwa 9:—21: Tjutaranami (Deuteronomy) 9:1-6

Kipiyananya ngurrara tjutangku Tjatjuwanya ngunytjintjunku

Tjatjuwa 9:1-27

Tjatjuwalungarri tjilirratjarra tjutangku Tjirikunya ngurrara tjuta, Yayiyinya ngurrara tjuta mirri pungkula wiyanutjangka, pana Kayinananya ngurrara tjutangkuya kulira ngulurringu. Kipiyananya ngurrara tjuta pana Kayinanangka nyinapayingku kulira Kipiyananya ngurrara mankurra Tjatjuwalakutu iyanu. Tjatjuwakungarri ngurrangka yila Kipiyanya ngurrara tjuta nyinapayi. Yankukitjangkuya wati mankurra paluru tjana mangarri puriti rawa ngarirra yuñarringutja mantjira parilykangka tjarrpatjunu. Parilyka paluru yalatjarra yutunypangku ngalkuñutja. Mantjiraya tuungkiyingka kalpatjunu. Pangki yirrititja tjutangkaya kapi yintira kalpatjunu. Tjaata yirrititjangkaya tjarrparra tuungkiyi tjutangkaya kalpakatirra yanu Tjatjuwanyangarri ngunytjintjunkukitja.

Tuungkiyitjarraya Kipiyanya ngurrara tjuta Yitjurilaku ngantitja tjutaku ngurrakutuya

yanu, ngurra Kilkalalakutu. Tuungkiyi tjuṭaya katirra ngaratjunkula Tjatjuwalangarri, mayutju tjutangka yalatji wangkangu, “Nganaŋatju nyurrangarrimpa waarrkana ngaranyi.” Tjatjuwalungarriya tjapinu, “Ngurra yaalytjingurunyurra ngalya yanu?” Paluru mankurrpangku tjananya ngunytjinytjunu, “Waŋmangurulatju ngalya yanu. Paŋa walytjangka waŋma nyinarralatju nganampa mayutju tjutangku yirriti kulinu, nyurrangarrimpa paapa tjuta maama tjuta paŋa Yitjipila nyinapayi. Palulanguru tjana kulinu Katutjalu tjananya yaŋtayantaŋalpayi. Yalatjilatju kulinu karru Tjuutanangka kakarrara ngurrara tjuta tjananya nyurrangarri mirri pungkula wiyanu. Yalatjilatju kulira ngulurringu. Palunyatjanu mayutju tjutangkulanyatju iyanu, nyurrangarrila tjakultjunkunytjaku, ‘Nyurrangarrimpa waarrkana tjutalatju nyinaku, nganampatju walytja tjutaŋawarra. Pungkuwiyangkulanyatju wanti!, waŋma ngurrara tjuta.’ Nganaŋanyatju ngalyanu nyurrangarrila wangkanytjaku. Yaalytjinyurra kulinu?, nganaŋanyatju pungkuwiyangku wantinytjaku? Yilta waŋmalatju nyinapayi. Nyawayal!, mangarri ngaatja rawa ngarrirra yuŋarringu. Yirritilatju warungka kutjara mantjira tjarrpatjunu. Rawangkulatju ngalya ngalkura yuŋanu. Pangki ngaa tjutalatju nyuwana waralytjunu, ngalya yankukitjalu. Nganampatju tjaataya nyawa!, waŋmatjanu yalarringu.” Yalatji tjananya tuungkiyitjarrangku ngunytjinytjunu, yila

ngurrara maŋkurrpangku.

Yara panyapa yilta kulira Tjatjuwalungarri tjananya parrpaṭu watjañu pungkuwiyangku wantikitjangku. Katutjanya yurruntu tjapilwiyangku ngulytju nyinakitjangku Tjatjuwalungarri watjañu, “Katutjalu nyanganyingka tjukarurrulatju nyurrangarrila watjani wantintytjaku pungkuwiyangku.” Palunyatjanu Kipiyanya ngurrara maŋkurra kalparra malaku yanu.

Tjintu maŋkurrparrirra Tjatjuwalungarri kulinu panyapa tjutangku ngunytjinytjunutjangka, yila ngurrara tjutangku. Palunyatjanu Tjatjuwanyangarri tjilirratjarra tjuta tjintu maŋkurra yankula tawunu Kipiyala tjarrpangu. Tawunu tjuta kutjupa tjanampa yila ngarangi. Yitjurilaku ngantitja tjuta tjilirratjarrangku wiya tjananya pungu, yurrunpa watjañutja.

Tjatjuwalu tjananya Kipiyanya ngurrara tjuta yaltirra ngaratjunkula tjapiñu, “Nyaangurulanyatju nyurrangarri ngunytjinytjunu? Wañma wiyanurra nyinanyi, yilanyurra nyinanyi. Nyurrangarri ngunytjinytjunutjangka waarrkanalampatju nyurrangarri waarrkarimalpa. Kutjupa tjutangkunyurra waru yatura Katutjaku tjaatji kalikikutu katimalpa. Kutjupa tjutangkunyurra yulytja tjuta katimalpa tjaatji kaliki panyapakutu. Kutjupa tjutangkunyurra kapi mantjira katimalpa, tjaatji kaliki panyapakutu.”

*Tjanaya pana Kayinanawana tjananya mirri
pungkuyinamalpa*
Tjatjuwa 10; 11:

Tawunu Tjarutjalumanya ngurrara mayutjulu tjakulpa kuliñu, Tjatjuwalungarri tjananya Tjirikunya ngurrara tjuta, Yayiyinya ngurrara tjuta mirri pungutjangka, Kipiyanya ngurrara tjuta tjanampa walytjarringutjangka. Mayutju paluru tjananya tawunu kutjupa ngurrara mayutju tiña tjutanya yaltingu, tjungurringkula wangkanytjaku. Yalatjiya tawunu tjutanguru mayutju tiña tjuta tjungurringu. Wangkanguya Tjatjuwanyangarri mirri pungkukitjangku.

Palunyatjanuya malaku yanu yaltirra tjilirratjarra tjuta ngalya katintytjaku. Palulan-guru tawunu tjutanguru tjilirratjarra tjuta ngalya yankula tjungurringu, tawunu Yipurananya ngurrara, tawunu Tjamutjanya ngurrara, tawunu Likitjanya ngurrara, tawunu Yikulunanya ngurrara. Tjungurringkulaya yanu tawunu Kipiyalakutu, palunya ngurrara tjuta tjananya pungkunytjaku. Tawunu paluru parrikii tiñangka ngururrpa ngarangi, pulitjanu pal-yara ngaratjunutja. Tawunu palunyaya ngururtjunkulaya ngarangi.

Palunyatjanu tawunu Kipiyanya ngurrara mayutjungku wati mankurrrpa wantirriyanu Tjatjuwanyangarri yaltintytjaku, panyapa tjuta tjananya pikangku pungkunytjaku. Palulanguru Tjatjuwanyangarri ngalya yankula tjananya mirri pungkula ngulutjingara wantirriyanu. Tjilirratjarra tjutaya ngulu tjalkalungu.

Katutjalu tjananya kapi ayitjitjarralu yanangu tjuta mirri pungkula wiyanu.

Tjatjuwaku tjilirratjarra tjutangku tjananya wanara mirri pungkula wiyanjaku, Tjatjuwalu Katutjanya marrkuunu tjintu tjarrpawiya ngaranytjaku, piratarra tjarrpawiya ngaranytjaku. Palunyatjanu tjintu rawa ngarangu tjarrpanytjawiya. Yalatji tjanampa Katutjalu tjintu marrkura ngaratjunu. Tjintu ngaranyingka Tjatjuwalungarri tjananya mirri pungkula wiyanu. Mayutju tawunu payipala palunya ngurrara tjutaya kulpingka kumpiningi. Tjatjuwalungarri tjananya ngurrira witiñu. Witira tjananyaya wakara iluntanu. Ruupangka tjananya yunytjuwana tayimapira waralytjunu watiyangka. Tjintu tjarrpanytjala tjana yirriwiltjira tjananya kuipi palula wañingu.

Palulanguru Tjatjuwanyangarriya tjilirratjarra tjuta tawunu Makitalakutu yankula mirri tjananya pungkula wiyanu. Palulanguru tawunu Lipinalakutu yankula kutjupa tjuta tjananya mirri pungu. Palulanguruya piyuku tawunu Likitjalakutu yankulaya mirri kutjupa tjutanya pungkula wiyanu. Ngurra palulakutuya kutjupa tjuta Kitiyanya ngurrara tjuta ngalya yankula yurrunpa tjungurringu. Palunya tjutatarra tjananya Tjatjuwalungarri pungkula yiluntanu.

Palulanguru tawunu Yikulunalakutu yankulaya pungkula kutjupa tjutanya wiyanu. Palulanguru tawunu Yipurunalakutuya yankula pungkula tjananya wiyanu. Palulanguru

piyukuya yanu tawunu Tipirrpalakutu palulanguru tjananya kutjupa tjuta pungkula wiyanu. Paña palunya ngurrara tjutaṭarra tjananya Tjatjuwalungarri mirri pungkula wiyanu, puli katu nyinapayi tjutanyaṭarra, Katutjalu tjananya watjanutjangka. Yalatji tjananya pungkula wiyanu, palulanguruya yanu ngurra Kilkalala nyinakitja. Ngurra palulaya yirriti rawa nyinapayi.

Yalinytjarra ngurra tjutangkuya tjakulpa kulira ngulurringu, Tjatjuwalungarri mirri pungkula wiyanutjangka. Tawunu Yitjuraku mayutjungku tjananya tawunu kutjupa kutjupa ngurrara tjuta yaltirra tjungura wangkangu, Tjatjuwanyangarri mirri pungkula wiyantjaku. Palunya ngurrara tjutaṭarraya tjilirratjarra tjungurringu, naanytjatjarra paakitjarraṭarra, ngurra yini Mirimpurukala. Palulanguru mayutju Katutjalu Tjatjuwanya wangkangu, “Ngulurriwyangku tjananya mirri pungkula wiyal!, mungarrtjirrinjtala tjana mirri ngarrimalpa. Ngayuluṇa nyurranya Katutjalu aalpamilalku yankula tjananyanyurra mirri pungkunytjaku. Nyurrangarri palumpa tjanampatarra naanytja tarrka kilytjuntara wiyal! Paaki tjutaṭarra kutjara wiyal!”

Yalinytjarra ngurrara Mirimpurukalaya kulilwiya nyinangi, Tjatjuwalungarriya kumpilpa yankula tjananya mirri pungkula wiyanu. Naanytja tjutaṭarra tarrka kilytjuntara wiyanu. Paaki tjutanyaṭarra kutjara wiyanu. Palulanguru tawunu palunya ngurrara tjutaṭarra tjananya pungkula wiyanu. Yalatji

tjananya Katutjalu yurrunpa wangkangu mirri pungkula wiyanjtaku. Palunya ngurrara tjuta tjanampa puluka, tjiipi, yulytja tjuta mantjira kanyin̄ingi.

Ngulyjurarrarpa tuwalpalaya ngurra walyt-jangkalpi nyinaku

Tjatjuwa 13; 14; 15; 16; 17; 18; 19; 21:

Tjatjuwalu tjananya tjilirratjarra tjutanya katiyankula rawangku, palulanguru paluru nyinarra tjilpirringu. Palulanguru mayutju Katutjalu Tjatjuwanya wangkangu, “Nyuntu rawangku tjananyan, pungkula tjilpirringu, waarrka kutjupalpiñanta palyantjaku wangkanyi. Nyuntu tjananya wangka!, yankulaya maakamilantjaku, yaata nguwanpa tiña tjuta ngaranytjaku. Kutjupa tjutaya yaata tiña kutjungka nyinanytjaku, kutjupa tjutaya yaata tiña kutjupangka nyinanytjaku. Yalatjiya yuwankarra yaata tiña tjutangka nyinaku.

“Yitjurilaku ngantitja tjutangku tjilirratjarra tjutangku ngula tjananya yankula mirri puwa!, Pilitjiyanya ngurrara tjuta, ngurra tjanampañungka nyinakitjangku. Ngurra palula yulparirra nyinapayi tjutanya tjana pungkula tjananya wiyal!, ngurra Yitjipila kalkun̄i nyinapayi tjutanyatarra. Kapi Kaliliyila yalintjarra nyinapayi tjutanyatarra tjananya pungkula wiyal!, ngurra tjulyalkitjangku. Ngurra palulakutunyurra tjungu yanku ngurra tjanampa tjulyalkitja. Ngurra palulakutunyurra yankunytjala, ngayuluña tjananya ngulutjingara wantirriyalku.”

Tjatjuwalu tjananya piyuku wangkangu, “Ngayulu nyurrangarrinya watjañingka yankulanyurra parriki nguwanpa maakamilantjaku. Ngulytjurarranpa kutjuya ngurra walytjangka nyinanytjaku. Ngulytjurarranpa kutjupa ngurra kutjupangka nyinanytjaku. Yalatjiya ngulytjurarranpa tuwalpala ngurra walytjangka nyinanytjaku.”

Tjatjuwalu tjananya wangkangu ngurra kutjupa kutjupangka yankula nyinanytjaku. Yalatjiya paña Kayinanalawana nyinapayi Yitjurilaku ngantitja tjuta, ngurra kutjupa tjutawana. Ngurra tawunu Tjirikulawana, tawunu Kipiyalawana Pintjiminakuŋu ngantitja tjuta nyinapayi. Ngurra palula wilurarra Taanaku ngantitja tjutaya nyinangi. Palulanguru paluru tjana kapi Kaliliyila yalinytjarralpi yankula nyinangi.

Pintjiminaku ngantitja tjutaku ngurrangka yulparirra Tjuutaku ngantitja tjutaya nyinapayi, tawunu Yipurunalawana. Tjilpi Kiilipanya tawunu palula rawa nyinanytjaku Tjatjuwalu watjañu. Ngurra palula yulparirra Tjimiyanaku ngantitja tjutaya nyinangi.

Pintjiminaku ngantitja tjutaku ngurrangka kakarraraya Ruupinaku ngantitja tjuta nyinangi, karru Tjuutanala kakarrara. Ngurra palula yalinytjarra Kaataku ngantitja tjutaya nyinangi, karru Tjuutanala kakarrara. Ngurra palula yalinytjarra kapi Kaliliyila kakarrara Manatjaku ngantitja tjutaya nyinangi.

Pintjiminaku ngantitja tjutaku ngurrangka yalinytjarra Yipurimaku ngantitja tjuta nyi-

nangi. Ngurra palula yalinytjarra Manatjaku ngan̄titja tjutaku ngurra kutjupa ngarangi. Ngurra palula yalinytjarra Yitjikaku ngan̄titja tjuta nyinangi. Ngurra palula yalinytjarra Tjipulanaku ngan̄titja tjutaya nyinangi. Ngurra palula yalinytjarra Napataliku ngan̄titja tjutaya nyinangi. Ngurra palula wilurarra Yaatjaku ngan̄titja tjutaya nyinangi.

Mayutju kutjupa tjutangku wangkangu Tjatjuwalu tawunu Timintjiranya walytjalu kanyintjaku, Katutjalu watjanutjangka. Tawunu palunya ngarangi Yipuramaku ngan̄titja tjutaku ngurrangka.

Lipayiku ngan̄titja tjutaku tawunu tjuta tjana watjanu ngurrangka nyinanytjaku. Wiya tjanampa paña tiñangka nyinanytjaku watjanu, ngurra tina tjana wiya kanyinu. Tawunu tjuta kutju tjana kanyintjaku mayutju tjutangku watjanu. Katutjalu yurrunpa yalatji watjanu, “Lipayiku ngan̄titja tjutangku waarrka palyara tjaatji kalikingka mangarri kuka mantjintjaku, wiyyaya kaanangka waarrkarriba mangarri kuka mantjintjaku.”

*Mirri pungkupayinya tawunu kutjupakutu
yankula kana nyinanytjaku*

Tjatjuwa 20:

Mayutju Katutjalu Tjatjuwanya wangkangu. Wangka panyapa tjananya paluru tjakultjunu, “Katutjalu watjanu mirri pungkupayinya tawunu kutjupakutu yankula kana nyinanytjaku. Tawunu palula kuutawutjungka paluru wangkanytjaku. Watjalaya tawunu

tjikitjipala!, palula mirri pungkupayinya nyinanytjaku. Panyapa Muutjalulanya yirriṭi watjaṇu. Tjinguru yaŋangungku kulintjawiyangku mirri pungkula ngulu tjalkalungku tawunu kutjupakutu, walytja tjutangku mirri pungkutjipingkamarra, tawunu palula kana nyinanytjaku. Yalatji tawunu tjikitjipala nyurrampa palya ngaraku.”

Palulanguru wangkanguya tawunu tjirripala karru Tjuutanala wilurarra ngarangi. Tawunu yini Kiitjanya, Napataliku nganṭitja tjutaku ngurra. Tawunu kutjupa yini Tjikimanya Yipurimaku nganṭitja tjutaku ngurra. Tawunu kutjupa Yipurananya ngarangi, Tjuutaku ngantitja tjutaku. Palulanguruya wangkangu tawunu tjirripala kutjupa ngarangi, karru Tjuutanala kakarrara. Tawunu yini Pitjanya, Ruupinaku nganṭitja tjutaku ngurra tjanampa ngarangi. Tawunu kutjupa yini Ramutjanya, Kaataku nganṭitja tjutaku ngurra ngarangi. Tawunu kutjupa Kulananya, Manatjaku nganṭitja tjutaku ngurra ngarangi, kapi yini Kaliliyila kakarrara.

*Katutjalu tjananya ngurra walytja yungku
Tjutaranami 9:1-6*

Yirriṭi Muutjalu Yitjurilaku nganṭitja tjuta yalatji watjaṇu, “Mayutju Katutjalu nyurrampa Kayinananya ngurrara tjuta mirri pungkula wiyalku, ngurra palulalpinyurra nyinanytjaku. Kulilaya! Yulta nyurrampa ngurra ngaatja Katutjalu yunguku, tjingurunyurra palumpa

tjukarurru nyinangutjangka. Wiya. Nyurrangarri palumpa wiya tjukarurru nyinangu. Katutjalu nyurrampa yungkuku yirriṭi watjanutja. Katutjalu tjananya Kayinananya ngurrara tjuta mirri pungkula wiyalku, tjana kuya kutu palyalpayi. Pungkula tjananya wiyalku nyurrangarrinya ngurra yungkukitjangku, yirriṭi tjanampa watjanutjangka, Yipuramaku, Yatjikaku, Tjikupakungarri, ngurra palunya. Tjukarurru wiyanurra nyinangu Katutjaku, mil-itjityurra nyinapayi.”

Tjatjuwanya tjilpirringkula mirrirriku
Tjatjuwa 23:; 24:

Tjilpi Tjatjuwalu tjananya nintilku
Tjatjuwa 23:; 24:1-13

Katutjalu tjananya yantayanṭara kanyilpayi, Yitjurilaku nganṭitja tjutanya pikarringkunytjawiyaya nyinanytjaku. Palyaya ngurra waltyangka rawa nyinangi, wiyaya ngurra kutjupangka waṇma yankula pika pungkupayi.

Tjatjuwalu waarrkana kutju wantirriyanu, yankula tjananya yaltintytjaku, mayutju tjutanya. Ngalya yankulaya tjungurringkunytjala Tjatjuwalu tjananya yalatji watjanu, “Ngayuluna tjilpirringu tjinguru kuwarrina yiluku. Katutjanyaala walkuni, pana ngaatjalampa yungutjangka, palyala nyinanytjaku. Paluru kulinī nyurrangarri yankula waṇma ngurrara tjuta pungkula yiluntankunytjaku, ngurra tjanampaṇḍulpinyurra mantjira nyinanytjaku. Yalatjinyurra yankunytjala, Katutjalu nyurranya

aalpamilalku nyurrangarri yankula mirri pungkunytjala.

“Muutjalu yirriṭi Katutjaku wangka piipangka wakara wantingu, wangka palunyakunyurra tjukarurru nyinanytjaku. Katutjanya nguwanpa kutjupa wiyanurra walkuntjaku, Katutjanya kutjunyurra walkuntjaku. “Kungka waṇma ngurrara wiyanurra yaltirra kanyintjaku, Yitjurilaku nganṭitja tjuṭa kutjunyurra yaltirra kanyintjaku.

“Kungka waṇma ngurrara tjutanyurra yaltirra kanyinjingka, Katutjalu nyurranya wiya ngurra waṇma yungkuku nyinanytjaku. Nyurrangarri tjananya waṇma ngurrara tjuta puṭu pungkula wiyaliku. Katutjaku wangkanyurra kulira wantinyingka, paluru nyurranya pungkula wiyaliku, nyurrangarri wiya palumpa tjukarurru nyinangutjangka. Ngurra ngaangka wiyanurra kutu nyinaku.”

Palulanguru Tjatjuwalu tjananya watjanu yanangu tjuṭa tjungurrinytjaku tawunu Tjikimala. Ngurra palula tjananya Tjatjuwalu kutu nintiningi, Katutjalu tjananya mirri tjuṭanya Yipuramanyangarri kutu yantayantaṇutjangka. Paluru tjananya piyuku wangkangu, “Nyurrangarri nyinanyi ngurra ngaangka mangarri tinatjarrangka, Katutjalu nyurranya ngurra ngaatja yungutjangka. Palulanguru kutunyurra Katutjaku tjukarurru nyinanytjaku, paluru nganampa mayutju tiṇa nyinanyingka.”

*Katutjanya kutju walkulkitjangkuya watjalku
Tjatjuwa 24:14-28*

Tjatjuwalu tjananya piyku watjanu, “Nganampa mirri tjutangku Katutjanya nguwanpa tjuta walkulpayi. Palunya nguwanpa wiyanjurra walkuntjaku. Kuwarrinyurra kulintjaku Katutjanya walkuntjakitjangku. Tjingurunyurra kutjupa tjutangku Katutjanya nguwanpa kutjupa walkulkitjangku kulini. Nganañatju ngayuku walytja tjutangku tarra mayutju Katutjanya kutju walkura nyinaku.”

Tjatjuwalu tjananya wangkangutjangka yanangu tjutangku kuliraya wangkangu Katutjanya kutju walkuntjaku. Palulanguru Tjatjuwalu tjananya wangkangu, “Nyurrangarri wangkangu Katutjaku tjukarurru nyinakitjangku, palulangurunyurra Katutjanya nguwanpa kutjupa walkulwiyangku wantinytjaku. Mantjiraya Katutjanya nguwanpa kutjupa wanî!” Yalatjiya piyku wangkangu Katutjanya kutju walkura nyinakitjangku. Palulanguru Tjatjuwalu tjananya nintinîngi Katutjaku luwu tjuta, kuliraya tjukarurru nyinanytjaku. Palulanguru Tjatjuwalu piipangka luwu palunya wakanu. Palulanguru piyku tjananya nintinîngi luwu palulawana. Palulanguru yiyanu tjananya ngurrakutuya yankula nyinanytjaku.

*Tjatjuwanya anta Yalitjanya mirrirriku
Tjatjuwa 24:29-33*

Tjatjuwa paluru rawa nyinangu yantatan tiin yiya. Palulanguru paluru yilungu. Yullarraya yañangu tjutangku katirra ngatingka tjarrpatjunu, ngurra palumpangka, tawunu Timanatjirangka yila.

Tjatjuwaku ngalungku tjutaya mayutju tjuta rawa nyinapayi. Paluru tjana nyinanytjala, yañangu kutjupa tjutaya Yitjurilaku ngantitja tjuta tjukarurru Katutjaku nyinangi.

Palulanguru tulku mayutju Yalitjanya, Yiranaku katja yilungu. Katirraya ngatingka tjarrpatjunu ngurra Kipiyangka, Yipurimaku ngantitja tjutaku ngurrangka.

Yirriṭi Muutjalungarri Tjutjupanya tarrka Yitjiplanguru katirraya, piñkingka tjarrpatjunu, ngurra Tjikimala.

*Kulaṭatjarra tjutaku mayutju tjuta nyinaku
Tjutaranami 2:6-19*

Tjatjuwaku ngalungku tjuta yilungutjangka, katja tjutangku yuntalpa tjutangku Katutjanya wantirra ramarringkula wiyawana nyinangi. Yalatjiya nyinarra Katutjanya nguwanpa tjuta, Paalanyangarri walkura nyinangi. Palulanguru Katutjalu tjananya ngurrkurirra wantingu. Ngurra kutjupa ngurrara tjutangku ngalya yankula pungkula tjananya wantirriyañu. Mani tjuta, yulytja tjuta tjanampa mantjira katingu, kungka tjutatarra tjulyara katingu. Yitjurilaku ngantitja tjutangku tjilirratjarrangku yankula putu pungkupayi yañangu palunya tjuta, Katutjalu wiya tjananya aalpamilanu. Kutjupa tjutalpi tjananya

Katutjalu aalpamilañu Yitjurilaku ngantitja tjuta pungkula wantirriyantjaku. Palulanguruya Yitjurilaku ngantitja tjuta ngulurrirra puþu kulinu.

Palulanguru Katutjalu tjanampa Yitjurilaku ngantitja tjutaku mayutju tjuta nyinatjunu. Mayutju paluru tjananya tjilirratjarrangku pikaku katipayi. Yalatji tjanampa mayutju kutju nyinarra wiyarringu, tjilirratjarra tjutaku. Palulanguru Katutjalu tjanampa mayutju kutjupa nyinatjunu. Mayutju paluru nyinarra yilungu, palulanguru mayutju kutjupalpi tjanampa nyinatjunu. Yalatji tjanampa Katutjalu tjilirratjarra tjutaku mayutju tjuta nyinatjunu. Mayutju yilungutjangka yañangu tjuta wiya tjukarurru nyinapayi. Katutjaku wangkaþarraya kulira wantipayi. Tjana kuya palyalpayi, Katutjanya nguwanpa tjutaya walikura nyinapayi, Katutjanya yulta tjana wantirra nyinapayi.

Mayutju kutjungku tjananya palya kanyilpayi. Palulanguru kutjupa tjuta katirra pungkula ngulutjingalpayi. Palulanguru Yitjurilaku nganti tjuta tjukarurru nyinapayi mayutju palumpa. Palulanguruya Katutjaku tjukarurru nyinangu. Mayutju paluru yilungutjangka ngunytjiwanaya Katutjaku nyinapayi. Yalatjiya rawa Yitjurilaku ngantitja tjuta palya nyinarra kuyarringu, Katutjaku tjukarurru nyinanytjawiya.

Kulaþatjarra tjutaku mayutju Kitiananya nyinamalpa

Tjutanami 6:—8:

*Katutjanyaya piyuku wantirra kuya palyalku
Tjutaranami 6:1-10*

Palulanguruya Yitjurilaku nganṭitja tjutangku Katutjanya wantirra kuya palyaningga. Palulanguru Katutjalu tjananya wantingu, Mitiyanya ngurrara tjuta tjanampa mayutjulpi nyinanytjaku. Mayutju tjikipaka tjutangku tjananya kanyiningga, Mitiyanya ngurrara tjutangku. Panypa tjutangkamarra Yitjurilaku nganṭitja tjuta kulpi tjutangka tjarrparra kumpiningga.

Yitjurilaku nganṭitja tjutangkuya mangarri pakaltjingalkitjangku yuninypa tjunkula wantipayi, mangarri waltyta tjanampa pakara yunmirringkunytjaku. Palulanguru Mitiyanya ngurrara tjutangkuya yankula mangarri yunmirrikita kilytjuntara wanipayi. Tjiipi tjuta, puluka tjuta, tuungkiyi tjutaṭarra tjungura tjanampa mulyaṭangku katipayi. Tjutalingkungkuya minga nguwanpangku ngalya yankula mangarriṭarra kilytjuntara kuyalpayi. Palulanguruya Yitjurilaku nganṭitja tjutangku mangarritjirratjangku puṭu kulira nyinapayi. Yalatji puṭu kulira tjana Katutjanyalpiya tjapiṇu, Mitiyanya ngurrara tjuta pungkula wantirriyantjaku.

Katutjalu wantirriyanu, palumpa wangka watjalpayi tjanalakutu. Paluru tjananya tjakultjunu Yitjurilaku nganṭitja tjutangka yalatji, "Mayutju Katutjalu nyurranya yalatji watjanı, 'Ngayuluṇa tjananya paṇa Yitjipitjanu ngalya katingu waarrkarringkula kutuya nyinapayingkamarra. Nyurrangarrimpa waltyta yirrititja tjuta nyinangi ngaangka. Tjanaya

ngaangka nyinanytjaku ngayuluña ngaa ngurrara kutjupa tjuta pungkula wiyalpayi. Ngayulu ngurra ngaatja yungu nyurrangarri kutu nyinanytjaku. Ngayulu nyurrangarrinya ngurra ngaatja yungu ngaangkanyurra nyinarra ngayunya walkuntjaku. Nyurrangarri ngayunya kulira wantingu.’”

Katutjalu wati Kitiyananya tjilirratjarra tjutaku mayutju nyinatjunku

Tjatjatja 6:11-24

Wati Kitiyanalu mangarri wiita yarrkayarrkangku rungkaŋangi, kalka tjuta mantjilkitjangku, Mitiyanya ngurrara tjutangku nyakula katipayingkamarra. Palulanguru Katutjaku yilkari ngurrarangku watjanu, “Nyuntu nguluwiyangku tjilirratjarrangku tjananya yirriṭi pungkula ngulutjingalpayi. Mayutju Katutjalunta nyakula kanyini.” Kitiyanalu watjanu, “Tjapilkitjaŋanta yunytjurringanyi, putuña kulinì. Tjingurulanya Katutjalu nyakula kanyini, tjinguru wiya. Nyaakuya Mitiyanya ngurrara tjutangkulanya ngalya yankula pungkupayi? Yirrititja tjutaku tjanampa yulta Katutjalu paawu puntungku palyalpayi. Katutjalu tjanampa kuya tjuta pungkula wantirriyalpayi. Kuwarri palurulampatju wiya Mitiyanya ngurrara tjuta pungkula iyanì. Paluru tjana nganananya pungkupayi, kutu.”

Mayutju Katutjaluppi Kitiyananya yalatji watjanu, “Nyurrangarri yankula Mitiyanya ngurrara tjuta pungkunytjaku, Yitjurilaku ngantitja

tjuṭa kanalkitjangku. Ngayuluṇanta Katutjalu iyanı.” Kitiyanalu watjaṇu, “Puṭuna kulinı. Ngayulu mungutja, ngayulu tjananya puṭu kanalku. Walytja tjuṭa ngayuku wiya, maŋkurra kutjulatju nyinanyi.” Katutjalu watjaṇu, “Nyurrangarri palya yankula tjananya pungkula wantirriyalku, ngayulu nyurrangarinya aalpamilalku.”

Palulanguru Kitiyanalu kuka anta mangarri kunaṭinpa mantjira pulingka tjunu, ilkari ngurrara palumpa. Ilkari ngurraralu watiya mantjira watiya palunyatjarrangku kuka anta mangarri pampuntjala, kuka anta mangarri pulitarra kamparra wiyarringu. Palunyangka yilkari ngurrara paluru nyinarra wiyarringu. Palulanguru Kitiyanalu ngurra palula yini Wuupangka tiipula nguwanpa palyaṇu pulitjanu, Katutjaku ngaranytjaku.

*Kitiyanalungarri Paalanya yulpulku
Tjatjatja 6:25-32*

Munga palula mayutju Katutjalu Kitiyananya yalatji watjaṇu, “Maa yankula nyuntupa paapaku tiipula nguwanpa yulpura wanı! Tiipula palulaya ngayunya nguwanpa Paalanya walkulpayi. Tiipula palula tjayitjingka ngayunya nguwanpa kutjupa watiya ngaranyi yini Yatjaranya. Palunyatarra nyuntu yulpura wanı! Tiipula palunya yulpura tiipula kutjupa pulitjanu palyala!, ngayuku. Palulanguru watiya Yatjaranya yulpura ngayuku tiipulangka mantjira tjurra!, kamparra wiyarrinytjaku. Nyuntupa paapaku puluka mirri pungkula

yitjilinkula Yatjarangka katu tjunkula kutjala! Yalatji tjawirrilyi ngayuku, kamparra wiyarriku, tiipula ngayukunungka.” Palumpa walytja tjutangkuya nyakula yunytjuwiyangku ngaparrtjingku pungkupayingkamarra, Kitiyanalungarri waarrkana tjutangku mungangka yankula tiipula palunya yulpunu. Watiya Yatjaranyaṭarra tjanaya yulpura tiipula Katutjakuṇungka tjunkula tjawirriliyi katuwana kutjanu. Aaliya pakara tawunu ngurrara tjutangku Kitiyanaku walytja tjutangkutarra nyakulaya pikarringu yulpuṇutjangka. Nganṭiya kuliṇu Kitiyanalungarri yulpuṇutjangka. Paluru tjana Kitiyanaku paapangka Tjuwatjala yalatji watjanu, “Ngalya katirraya ngaangka ngaratjurra!, Kitiyananyalatju mirri pungkunytjaku. Maṭupurralampa Paalakuṇu tiipula anta Yatjaranyaṭarra yulpura wiyanu.” Tjuwatjalu tjananya palumpa katjaku patjurirringkula tjapiṇu, “Nyaaku nyurrangarri Paalaku Yatjaraku pikarringkula kuliṇi? Nyurrangarri kuliṇi Paalanya ngangkari puntutjarra nyinanyi. Palurulanyatju mirri pungkunytjaku Kitiyananyatarra, wiya nyurrangarrilanyatju ngaparrtjingku pungkunytjaku.”

*Mitiyanya ngurrara tjutaya piyuku yanku
Yitjurilaku nganṭitja tjutakutu
Tjatjatja 6:33-35*

Palulanguruya Mitiyanya ngurrara tjutaya Yamalikaku nganṭitja tjutatarra, kutjupa tjutatarra

tjungurringu. Palulanguru tjanaya yankula pulina yini Tjitjirilangka nyinangu. Palulanguru Katutjaku kurrunpangku Kitiyananya nintira aalpamilañu. Paluru turampata mirratjinganu palumpa walytja, panya Yapitjitzaku ngantitja tjuta yaltinytjaku. Yalatji tjananya Yapitjitzaku ngantitja tjuta yaltingu tjungurrinytjaku. Palulanguru Kitiyanalu wikarrutja tjuta maa wantirriyanu, yankula Yitjurilaku ngantitja tjuta yaltirra ngalya katinytjaku, ngurra tjutawana nyinanytja tjuta. Palulanguruya tjutalingku ngalya yankula Kitiyanala tjungurringu.

*Kitiyanalu Katutjanya tjapilku nintintjaku
Tjatjatja 6:36-40*

Kitiyanalu Katutjanya watjanu yalatji, “Tjinggauru nyuntu ngayunya yaltingu, ngayulu Yitjurilaku ngantitja tjuta pikakutu katinytjaku, Mitiyanya ngurrara tjutalatju mirri pungkunytjaku. Tjinguru nyuntu ngayunya wiya yaltingu, ngayulu wiyanwanangku kulinì. Putuna kulinì. Yalatji ngayulu tjananya mayutjungku katinytjaku nintilanì! Tjiipitjanu pangki yinyu ngaatjanya pilara tjunu pañangka. Aaliña pakara ngalya yanku wiita nyakunytjaku tjiipikunu yinyuwana. Yinyuwana kutju wiita nyakunytjaku, pañawana wiya. Ngayuluña yalatji nyakula kulikku, ‘Katutjalu yinyungka wiitanu, yiltanì mayutju nyinatjunu, ngayulu tjananya pikakutu katinytjaku.’ Tjinguru ngayuluña aali nyakula pañawana yinyuwanatarra wiita ngarriyingka, ngayulu yalatji kulikku, ‘Katutjalunu

wiya nyinatjunu ngayulu tjananya pikakutu katinytjaku.’”

Aali pakara Kitiyanalu yankula nyangu yinyu palula wiita ngarringi, paŋawana wiya. Nyakula ngulurringu. Piyuku Kitiyanalu Katutjanya yalatji tjapiṇu, “Katutja. Ngayukutjunu pikar-rinytjawiya. Yara yalatji wiya kutjuŋanta tjapilku, ttipikuṇu yinyu palula wiitawiya ngar-rinytjaku, paŋawana kutju wiita ngarrinytjaku. Aaliṇa yankula paṇa nyaku wiita ngarrinytjala. Nyakulaṇa kulilku, ‘Yilta Katutjalunı mayutju nyinatjunu, ngayulu tjananya pikakutu katinyt-jaku.’”

Yalatji Katutjalu palyaṇu. Aali Kitiyanalu nyangu panawana kutju wiita ngarringu. Yalatji nyakula palurulpi tjananya yaltingu tjilirratjarra tjuṭa pikakutu katinytjaku.

Kitiyanaku tjilirratjarra tjuṭa nampa maŋkurra nguwanpa katinytjaku watjalku, Katutjalu

Tjatjatja 7:1-8

Kitiyananya palumpa walytja tjilirratjarra tjuṭa aaliya yanu kapi yini Yaratatalakutu, rakula tĩnakutu. Kapi palula ila Kitiyananya Katutjalu watjaṇu, “Tjilirratjarra tjuṭalingku tjananya nyuntu katiananyi. Yalatjiwiya, nampa maŋkurra nguwanpa nyuntu tjananya pikakutu katinytjaku. Ngayulu nyurrangarrinya tjilirratjarra maŋkurra nguwanpa aalpamilalku palunya tjuṭa pungkula iyantjaku. Palulanguru ngayunya nyurrangarri yiltangku walkuntjaku. Tjinguru

tjuṭalingkunyurra yankula tjananya pungkula iyalku, wiyanangkunyurra kulilku yalatji, ‘Nganana tjilirratjarra tjuṭalingkungku tjananya pungkula iyānu.’ Wiya, maŋkurra nguwanpangkunyurra yankula tjananya pungkula iyantjaku. Palulangurunyurra tjukarurrulpi kulilku yalatji, ‘Katutjalulanya aalpamilantjala, nganana tjananya pungkula iyānu.’ Katutjalu Kitiyananya yalatji piyuku watjañu, “Tjilirratjarra tjuṭaya nampa maŋkurra nguwanpa nyinanytjaku. Nyuntu watjala tjananya!, ngulunytju tjuta ngurrakutu rayitpayiki yankunytjaku.” Yalatji Kitiyanalu tjananya watjantjala, tjilirratjarra tjawutjuna tuwintituupala ngurrakutu rayitpayiki yanu. Tjilirratjarra tjawutjuna tiinpala nyinangu, Kitiyanalawana pikakutu yankula pungkunytjaku.

Palulanguru Katutjalu Kitiyananya piyuku watjañu, “Tjilirratjarra tjuṭalingkuya kutu nyinanyi, nampa maŋkurra nguwanpa kutju nyuntu tjananya katinytjaku. Kapi nyarrakutu nyuntu tjananya ila kati!, tjikintjaku. Nyuntu nyangama! Marangku mantjira tjikintjala palunya tjuta kutju nyuntu marrkula!, pikakutu katinytjaku. Palulanguru nyuntu kutjupa tjuta nyawa!, pupakatirra marangku mantjira tjikintjawiya tjikintjala. Kala, nyuntu tjananya watjala!, malaku yankunytjaku ngurrakutu.” Tjilirratjarra yantaṭa tjirripalangkuya pupakatirra marangku tjikinu. Nyakula tjananya watjañu tjungurrinytjaku, kanya kutjupa tjuta tjananya watjañu ngurrakutu yankunytjaku.

*Kitiyananyapula yarrka yanku Mitiyanya
 ngurrara tjutakutu
 Tjatjatja 7:9-15*

Tjilirratjarra yantaṭa tjirripalaya ngurra kutjungka nyinangu. Mungangka Kitiyananya anta palumpa waarrkanapula yanu Mitiyanya ngurrara tjuta parra nyakunytjaku. Yankulapula nyangu tjutalingku nyinarra wañinytjala, tjilirratjarra minga nguwanpa nyinanytjala. Kamula tjuta tjanampa ngarala wañingu, tjutalingku. Yilarringkula tjananya paluru kutjarrangku kulinu yutupula wangkanytjala. Wati kutjungku tjukurrpa nyakula wati kutjupangka yalatji tjakultjunu, “Tjukurrpana nyangu mangarri puriiti kutju nganampa ngurrakutu patangarala ruularringu, kaliki kutju pungkula patatjingaṇu.” Wati kutjupangku kulira watjaṇu, “Puriiti panyapanu nyangu Kitiyananya nguwanpa. Kitiyanalungarri tjuula tawarratjarrangku ngalya yankula nganaṇanya pungkula ngulutjingara wantirriyalku, Katutjalu tjananya aalpamilaṇutjangka.” Tjukurrpa palunyatjanu wati paluru kutjarra wangkanytjala Kitiyanalupula kulinu. Kulira Kitiyanalu yunyparringkula Katutjanya yalatji kulinu, “Katutjalulanya iltangku aalpamilalku.” Palulangurupula paluru kutjarra rayitpayiki yanu tjilirratjarra walytja tjutakutu.

*Katutjalu tjanampa Mitiyanya ngurrara tjuta
 pungkuku
 Tjatjatja 7:16-25*

Kitiyanalu tjananya watjañu, “Waṭalpi pakalaya! Nyarra tjuta tjananya Katutjalu kuwarri pungku, palurulanya aalpamilalku.” Turaama nguwanpa pilkitjanu palyanuṭja tjuta paluru mantjira tjananya kutjuṭu kutjuṭu yungu. Tjangiya mantjira tilira turaama palula tjarrpatjunu tili yutiya nyakutjipingkamarra, Mitiyanya ngurrara tjutangku. Turampatatarra tjananya Kitiyanalu yungu kutjuṭu kutjuṭu. Mitiyanya ngurrara tjutaya mungangka yanku ngarrinytjala, Kitiyanaku waarrkana yantata kutjungku turaama tjangi tilitjarra katirra yalintjarra tjayiti yankulaya kumpira ngarangu. Wanañu yantaṭa tjilirratjarra kutjupa tjutangku turaama tjangi tilitjarra katirra. Yankula yulparirra tjayiti kumpiraya ngarangu. Kitiyanalu wanañu yantata tjilirratjarra kutjupa tjuta katingu. Paluru tjana turaama tjangi tilitjarra katirra, yankula wilurarra tjayiti kumpiraya ngarangu. Kitiyanaku tjilirratjarra tjutangku tjananya yalatji ngururrtjunkula turampata tjutaya mirratjingara wanañu. Turaama palunya tjutaya yulpunu tjangi tilitjarralpiya rayitrawunu ngarangu. Raapangkuya yalatji watjañu, “Mayutju Katutjalulanyatju iyanu. Nganaña Kitiyanaku tjilirratjarra tjuta ngalya yanu pungkunytjaku nyurrangarrinya, pikangku.”

Kitiyanalungarriya ngarala panyapa yuny-pangku watjara turampata mirratjingaṇingi. Palulanguru Mitiyanya ngurrara tjutaya kulira ngulurringu. Walytja tjutangkuyanku

tjuuła waṭawaratjarrangku wakaṇingiyanku Yalatjiyanku wakaṇingi mungangka. Kutjupa tjutaya ngulu tjalkaḷungu. Kitiyanalungarri tjananya wanara wakaṇu, kanya kutjupa tjuta tjananya wantirriyaṇu. Palulanguru Kitiyanalu wikarrutja tjuta tjananya iyanu tawunu tjutakutu. Palunya ngurrara tjuta tjananya tjana watjaṇu Kitiyanalu watjaṇutja yalatji, “Pakalaya, tjilirra mantjira Mitiyanya ngurrara nguḷunytju tjuta wanara wakala!” Palunya ngurrara tjutangkuya kulira yankula tjananya Mitiyanya ngurrara tjuta wakarinangi, tjutalingku.

Tjilirratjarra tjutaku mayutju Tjamtjananya nyinamalpa

Tjatjatja 13:—16:

Yilkari ngurrarangku watjalku katja mantjintjaku

Tjatjatja 13:1-25

Palulanguruya Yitjurilaku nganṭitja tjutangku Katutjanya wantirra kutu kuya palyara nyinapayi. Palulanguru tjananya Katutjalu yanṭayanṭantjawiyangku wantingu, Pilitjiyanya ngurrara tjuta tjanampa mayutjurrinytjaku. Paluru tjana mayutju kuyangku rawangku kanyilpayi. Palunyangkapula wati Manuwanya miiṭararra nyinangu tawunu Tjirangka, pipirri mantjintjawiya. Kungka palula Katutjaku yilkari ngurrara yutirringu. Yutirrirra yalatji watjaṇu, “Nyuntu pipirri mantjintjawiya nyinarra, kuwarrilpinu katjalpi mantjilku. Nyuntupa katja yutirringkula tinarringkula

nyinanytjala palunya kata muṭulwiyangku wanti! Paluru Katutjaku tjukarurru nyinaku. Paluru watirringkula Yitjurilaku nganṭitja tjuṭa kanalku, Pilitjiyanya ngurrara tjutangku pungkutjipingkamarra.”

Wati Manuwalu Katutjanya tjapintjala, yilkari ngurrara paluru ngalya yankula palula kutjarrangka piyuku wangkangu. Palulanguru Manuwalu nanikuta wiima pungkula tjawirriliyi Katutjaku ngarritjunkula kutjanu. Kampanytjala yilkari ngurrara paluru tjawirrilyitjanu tilingka wiyarringu.

Palulanguru kungka palurulpı katja mantjira yini Tjamtjananya watjaṇu. Pipirri tinarringkula Katutjalu kantilyankula kanyilpayi.

*Tjamtjanalu layina tjikipaka tjuyintamilara
mirrintanku
Tjatjatja 14:5-6*

Tjamtjananya watirringkula manpaṭa tiṇa nyinangi. Palumpa paapa anta maama tjunguya yanu tawunu Timinalakutu. Ngururipa yankula Tjamtjanalu kuliṇu layina yila nguunmankunytjala. Kulira pulanya wantirra layina palulakutu yankula witira marangku ngunṭi tjuyintamilara mirrintanu. Yalatji mirrintankunytjaku Katutjalu palunya kantilyanu. Palumpa paapangku maamangkutarra nyakunytjawiya nyinangi, paluru layina palunya mirrintankunytjala. Tjamtjanalu layina mirrintara tjakultjunkunytjawiya paluru kutjarrala tjungurringkula yankula tawunu Timinala tjarrparra

nyinapayi. Yurrunpa tawunu palula Tjamjananya kungka Pilitjiyanya ngurraraku yunytjurringu. Paluru palumpa paapangka watjañu, “Kungkaku pamilingka nyuntu yankula tjapila!, ngayulu marriṭi mantjintjaku.” Paluru yankula tjananya tjapinu, Tjamjanalu kungka palunya kanyintjaku. Paluru tjana watjañu yuntałpa yungkukitjangku. Yalatji watjara tjanaya wati kutjupakulpi yungu.

*Pilitjiyanya ngurrara tjutaku tjanampa Tjamjanalu tilira wiyalku
Tjatjatja 15:1-8*

Kungka palunya wati kutjupaku yungutjangka, Tjamjananya pikarringkula yankula tingkuwu tjuta wanara witinangi, yantaṭa tjirripala. Tingkuwu kutjarra wipu witira tayimapinu waru tjangi tilitjarra. Tayimapira pulanya wantirriyanu Pilitjiyanya ngurrara tjutaku kaanawana. Kaana palunya tjutangka mangarri wiita yuŋmi ngarala waŋingi. Tingkuwu paluru kutjarrangku tjangi katirra wiita tilirkupayi. Tingkuwu kutjarra kutjupa wipu witira tayimapinu waru tjangi tilitjarra. Paluru pulanya wantirriyanu wiita tilirkunytjaku. Palunya nguwanpa tingkuwu yantaṭa tjirripala kutjarranguru kutjarranguru tayimapira wantirriyanu, mangarri tjanampa wiita tilira wiyan-tjaku. Yalatji tjananya wantirriyara Tjamjananya yankula kulpingkalpi nyinangu.

*Tjamjanalu tjananya tarrka katititjarrangku
wakara mirrintarinamalpa
Tjatjatja 15:9-20*

Tjamtjananya kulpingka nyinanytjala, Pilitjiyanya ngurrara tjutaya yanu tawunu Liyingka tjananya pikangku pungkukitja, Tjuutaku ngantitja tjuta. Pilitjiyanya ngurrara tjutangku tjananya watjañu, "Yankulanyurra Tjamtjananya kulpingka witira ruupangka tayimapira ngalya kat!" Paluru tjana Tjuutaku ngantitja tjuta kulpikutu yankula Tjamtjananya ruupangka tayimapira katingu yungkukitja. Pilitjiyanya ngurrara tjutangku Tjamtjananya ruupatjarra nyakula yunyparringkula maa tjalkalungu Tjamtjananya mirri pungkukitja. Katutjalu Tjamtjananya kan̄tilyankunyntjala ruupa paluru kilytjuntanu. Palulanguru parra ngurrira paluru tuungkiyikuñu tarrka katititjarra mantjiñu. Mantjira tarrka palunyatjarrangku Pilitjiyanya ngurrara tjuta tjananya wakaningi, tjilirratjarra tjutalingku, tjawutjuna kutju tjananya. Palulanguru Tjamtjananya Yitjurilaku ngantitja tjutaku tjilirratjarra tjutaku mayutju rawa nyinangi.

*Kungka Tilalalu Tjamtjananya ngunytjilyinku
Tjatjatja 16:4-22*

Palulanguru Tjamtjananya paña Pilitjiyakutu yankula kungka palunya ngurraraku kutjupaku yunytjurringkula nyinangi. Kungka paluru yini Tilalanya.

Pilitjiyanya ngurrara tjutaku mayutju payipala nyinangi. Paluru tjana kungka palulakutu yankula yalatji tjingapungu, "Tjamtjananya ngunytji tjapila!, 'Nyaatjanu nyuntu manpaña nyinanyi? Yañangu

kutjupangkunta nyaalytjinku?, nyuntu manpaṭawiya nyinanytjaku.' Tjamтjanalunta tjakultjunkunytjala nganananyalpilanyatju tjakultjurra! Palulangurulatjunta mani puntu yungku, mani tjiilpa waan tjawutjuna." Palulanguru Tilalalu Tjamтjananya yalatji tjapiñu, "Nyaatjanu nyuntu manpaṭa nyinanyi? Yañangu kutjupangkunta nyaalytjinku?, nyuntu manpaṭawiya nyinanytjaku." Tjamтjanalu yalatji ngunytjilyinu, "Puwanarratjanu puturru marrkangkaṇiya tjapanpalangara tayimapira nyinatjunkunytjala, putuña kilytjuntanku, manpaṭawiyaña nyinaku."

Tilalalu puwanarratjanu puturru tjapanpala mantjira Tjamтjananya tayimapiru, yanku ngarrinytjala. Palula yurrunpa Pilitjiyanya ngurrara maṅkurrpa palumpa waalangka kumpiru, Tjamтjananya manpaṭawiya nyinanytja witiraya katikitja. Tilalalu Tjamтjananya tayimapira kanara watjañu, "Tjamтjana. Pilitjiyanya ngurrara tjutangkuntaya witintjaku ngalya yananyi." Paluru kanarringkula pakara puturru tjuta kilytjuntanu. Palunya tjutaya yarrka Tilalaku ngurrangka nyinarra ngurra walytjakutu rayitpayiki yanu.

Palulanguru Tilalalu piyuku palunya tjapiñu, "Nyaatjanu nyuntu manpaṭawiya nyinaku?" Tjamтjanalu piyuku yalatji ngunytjilyinu, "Ruupa nyuwanangkaniya tayimapira wantintjala, putuña yarralytjanku, manpaṭawiyaña nyinaku." Palulanguru Tjamтjananya yanku ngarrinytjala Tilalalu ruupa nyuwanangka tayimapiru. Paluru Tjamтjananya kanantjala

paluru pakara kilytjuntanu.

Palulanguru Tilalalu piyuku tjapiñu, “Nyaatjanu nyuntu manpaṭawiya nyinaku?” Tjamtnanalu piyuku yalatji ngunytjilyinu, “Mangka waṭawaraṇi ruupa nguwanpa watiya tiṇangka tayimapintjala ngayuluṇa wiya manpaṭa nyinaku.” Palunyangka Tjamtnananya yanku ngarrinytjala Tilalalu mangka waṭawara tayimapinu watiya palula. Tayimapira Tjamtnananya kanantjala, paluru parra taanarringkula yarralytjanu manpaṭangku.

Palulanguru Tilalalu pikarringkula payinu, “Nyuntu ngayunya tjutangara ngunytjilyinu, nyuntu wiya ngayuku yunytjurringanyi.” Yalatji tjintu kutjupangka tjintungka Tilalalu rawangku tjapintjala Tjamtnananya tjikipitarringu tjukarurrulpi paluru tjakultjunu, “Mangka waṭawara wiyan̄iya muṭulpayi. Ngayuku paapangku anta maamangkupula ngayunya pipirri yungu Katutjaku, ngayuluṇara tjukarurru nyinanytjaku. Tjinguru kutjupangkuni mangka muṭuntjala wiyaṇa manpaṭa nyinaku, wati kutjupa tjuṭa nguwanpaṇa nyinaku.”

Tjamtnanalu tjukarurru watjantjala Tilalalu tjananya mayutju palunya tjuṭa yankula watjaṇu palumpa waalangka kumpintjaku. Tjamtnananya yanku ngarrinytjala Tilalalu wati kutjupa watjaṇu Tjamtnananya mangka muṭuntjaku. Paluru mutuṇu. Palulanguru Tilalalu watjaṇu kanalkitjangku, “Tjamtnana. Pilitjiyanya ngurrara tjuṭaya ngalya yananyi nyuntunyantaya witlikitja.” Katutjalu wiya

palunya kantilyanu, paluru manpaṭawiyalpi nyinangi. Palulanguruya Pilitjiyanya ngurrara tjutangku witira katingu tawunu Kaatjalakutu. Tjamtnanya tjana yayinatjarrangku kuru wakara paanganu. Paangaraya tjiilangka katirra tjarrpatjunu. Puli tinangka paluru kutu waarrkarringkula mangarri yulpulpayi. Yalatji Tjamtnanya rawa waarrkarringkula mangka tinarringulpi.

*Tjamtnanya mirrirringkula yanangu
tjutatarra mirririku
Tjatjatja 16:23-31*

Pilitjiyanya ngurrara tjutaya waala tinangka tjungurringu, mayutju tjanampa payipalaṭarra. Yanangu tjawutjuna tjirripalaya waala palula ngalkura tjikira yunyparringangi, Tiikunanya walkulkitja. Tiikunanya tjana walkulpayi Katutjanya nguwanpa.

Tjungu yunyparringkulaya ula wiima iyanu Tjamtnanya yankula yaltirra ngalya katintjakku. Paluru tjana kulinu Tjamtnanya tiitjimi-lalkitjangku. Ula paluru yankula yaltirra katirra Tjamtnanya waalangka ngururipa ngaratjunu. Ula palula Tjamtnanalu yalatji watjanu, “Ula. Watiya palunya tiña kutjarrakutuṇi kati!, waala katuwana watiya witilpayi kutjarrakutu.” Ula paluru katirra watiya palunya kutjarrangka ngaratjunu.

Tjamtnanalu Katutjanya tjapiṇu, “Kutjungaralpiṇi kantilyarra!”. Palulanguru watiya palunya kutjarra yuntaura waala winki piluntanu. Palulanguru waala tinangku

katunguru punkara tjananya Pilitjiyanya ngurrara tjutalingku palira mirrintanu, Tjamtjananyatarra. Yalatji Tjamtjananya mirrirringu, Yitjurilaku ngantitja tjutaku mayutju nyinarra.

*Kungka Ruutjanya Katutjaku nyinamalpa
Ruutja 1:—4:*

*Yilimalikanyapula pana Muwapalakutu yanku
Ruutja 1:1,2*

Paña Kayinanalawana wiya tjananya kapingku pungangi. Palulanguru mangarri tjanampa wiyarringu. Mangarriwiyangkapula wati Yilimalikalupula miitalu Niyumilupula kulinu paña Muwapalakutu yankulapula ngunytji nyinanytjaku. Palulanguru Yilimalikanyangarriya paña Muwapalakutu yanu, palumpa katja kutjarratarra, Malunanya anta Tjiliyunanya.

*Yilimalikanya anta katja kutjarratarra mirrir-
riku
Ruutja 1:3-5*

Paña Muwapalaya rawa nyinarra Yilimalikanya mirrirringu. Palulanguru palumpa katja kutjarrangku kungka Muwapanya ngurrara kutjarra yaltirra kanyinangi. Manunalu kungka Ruutjanya kanyinangi, Tjiliyunalu tarra kungka Wupanya kanyinangi. Yiiya tiinpalapula nyinarrwa wati paluru kutjarra mirrirringu.

*Niyuminyapula Ruutjanya ngunyarrira pana
Kayinanalakutu piyuku yanku
Ruutja 1:6-22*

Kungka tjirripalalpiya nyinarra Niyumilu kuliñu paña Kayinanangka mangarri puntu ngarrinytjala. Palulanguru paluru kuliñulpi ngurra walytjakutu Pitjiliyamalakutu piyuku yankunytjaku. Niyumilu pulanya Wupanya Ruutjanya marrkuñu, walytja tjutawana, paña Muwapala nyinanytjaku. Niyuminya kutju yankunytjala paluru kutjarrangku yularra watjanu, “Wiya. Tjungula yanku ngurra Pitjiliyamalakutu.” Piyuku pulanya Niyumilu marrkuñu ngurra walytjangka kutu nyinanytjaku. Palulanguru Wupalu Niyuminya nyunytjura palumpa ngulytjukutu yanu, rawa nyinanytjaku, kanya Ruutjalu watjanu, “Wiyananta wantikatiku, tjunguli yankula nyinaku ngurra kutjungka. Nyuntupa walytja tjutakuña walytjarringkula yulta tjana ngayuku walytja tjuta nyinaku. Nyuntupa mayutjuku Katutjakuña ngayulu yunytjurrinyi, palumpa tjukarurru nyinanytjaku. Yulta paluru ngayuku mayutjulpi nyinaku. Ngayulu kutu nyuntulawana nyinamalpa, nyuntu wiyarringkunytjala. Ngayuluña ngurra palula nyinarra wiyarringkunytjala tjunkuňiya nyuntulawana.” Palulanguru Niyumilu wiya watjanu ngurra walytjangka nyinanytjaku.

Paluru kutjarrapula tjungu yanu tawunu Pitjiliyamalakutu. Tjana tawunu palunya ngurrara tjutaya nyakula yunyparringu. Niyumilu tjananya watjanu walukutangku yultungku.

Wati Puwatjaku kaanangka Ruutjalu mangarri mantjirinamalpa.

Ruutja 2:1-23

Ngurrangka nyinarra Ruutjalu Niyuminya watjañu, “Kuwarriña yanku, kaanangka mangarri mutura wantingutja tjuta mantjintjaku. Mungarrtjiñanta ngalya katirra yungku.” Yitjuri-laku ngan̄titja tjutaku luwu ngaranytjala mar-alpa tjutangku mangarri mutura wantipayi tjuta mantjilpayi.

Yankula Ruutjalu kaana tinqangka nyangu waarrkana tjutangku mantjirinkupayi. Paluru yankula tjanampa mayutju tjapinu, waarrkana tjutangka ngan̄tiwana mantjirinkunytjaku. Mayutju paluru yuwa watjañu Ruutjalu mantjintjaku mangarri tjuta. Ruutjalu rawa mantjirinkula mangarri tjuta, paluru katirra tjunkupayi, mungarrtji ngurrakutu katikitjangku.

Palulanguru kaanaku mayutju yini Puwatjalu yankula tjananya kaanaku waarrkana tjutangka kuutayi watjañu. Puwatjalu Ruutjanya nyakula muṭulpayi tjutaku mayutjungka yalatji tjapinu, “Kungka nyarratja ngananya?” Mayutju paluru watjañu, “Paluru yañangu kutjupa, Muwapanya ngurrara. Niyuminyapula tjungu nyinanyi.”

Palulanguru Puwatjalu yankula Ruutjanya watjañu, “Kaana ngaawana kutju nyuntu mantjirinkunytjaku, ngayuku kungka waarrkarripayi tjutangka. Waarrkana wati nyarra tjutangka ngayulu watjalku nyuntunyantaya wantintjaku. Nyuntu kapiku paarritjirrirra turaama nyarra

tjuŋangka yankula tjikintjaku.” Ruutjalu kuliŋu, “Wati ngaatjanya walytjawiyatju, ngayukutju ngurrpa. Nyaaku paluru ngayunya kulira yanʈaya yanʈalkitjangku watjaŋu?” Ruutjalu Puwatjanya yalatji watjaŋu, “Ngayuluna yanangu kutjupa, Muwapanya ngurrara. Nyaakutjunu nyuntu ngayunya palya kuliŋu?” Puwatjalu watjaŋu, “Ngayuluna kuliŋu nyuntu ngunyarri yanʈaya yanʈalpayi, wantintjawi yangku. Ngurra walytja nyuntu wantirra ngalya yanu ngaakutu, ngunyarri katiyankula kanyilkija. Yunytjurringanyiña Katutjalunta tjukarurru palyara yanʈaya yanʈantjaku.” Ruutjalu kutu mantjirinkula mungarrtji mangarri tjuʈa yulpura tjunkupayi tiitjingka. Mantjira katingu ngurrakutu, Niyumilupula ngalkuntjaku.

Ruutjanya yankula ngurrangka tjarrpangu. Niyumiluppi tjapiŋu, “Kaana nyaalytjingkanu mangarri ngaa tjuʈa mantjinu?” Ruutjalu watjaŋu, “Wati yini Puwatjaku kaanangka.” Kulira Niyumi paluru yunyparringkula watjaŋu, “Puwatjanya ngalimpa walytja. Ngayuluna yunytjurringanyi panya Katutjalu palunya yanʈaya yanʈantjaku, nyuntunya paluru watjaŋu mangarri mantjirinkunytjaku. Puwatja paluru ngalinya yanʈaya yanʈantjaku, yalatji luwulampa ngaranyi.” Palulanguru Ruutjalu rawangku mangarri kaana palula mantjirinkupayi.

*Puwatjalu Ruutjanya yaltiku
Ruutja 3.; 4:*

Wulkumanu Niyumilu Ruutjaku miṭa mantjilkitjangku Ruutjanya yalatji watjañu, “Mungangka kuwarri nyuntu Puwatja palulakutu yankula tjapila!, palurunta ngula palumpańu ngurrangka nyuntunya marriṭi kanyintjaku. Paluru kuwarri mungangka waarrkarriku waala panyapangka.”

Puwatjanya paluru waarrkarringkulalpi yankurringu. Ngarirra kanarringkula kungka nyangu. Paluru tjapiṇu, “Ngananya nyuntu?” Ruutjalu watjañu, “Ngayulu Ruutjanya. Nyuntu ngayuku walytja ilatja nyinanyi. Nyuntu ngayunya ngurrangka yaṇṭayantara kanyintjaku, yalatji luwulampa ngaranyi. Tjapiniṇanta tjinguru nyuntu kulinī ngayunya kanyintjaku marriṭi mantjira?” Puwatjalu kulira watjañu, “Nyuntu kungka palyalingku, walytja tjuṭaku kulilpayi. Ngayulu tjlpi nguwanpa nyuntuni tjapiṇu, yangupala kutjupa tjuṭaku kulintjawiyangku. Kungka kutjupa tjuṭangkuya yangupalaku kutju kulilpayi. Panyapan tjukarurru watjañu, iltana walytja nyuntupa ilatja nyinanyi. Wati kutjupatarra ilatja nyinanyi, paluru yurrunpa nyuntunya yaltinytjaku, luwulampa yalatji ngaranyi. Aali ngayulu yankula wati palunya tjapilku, palurulpi nyuntunya yaltirra kanyintjaku. Tjinguru paluru wiya watjantjala, ngayuluṇanta yaltirra kanyilku. Tjukarurrunanta watjañi Katutjala kurungka.”

Tjaalpa yiitjipula ngarringu tayilayitirringu. Puwatjalu pakara watjañu, “Mangarri ngaatjanya katirra Niyumiku yuwa!” Ruutjalu man-

garri palunya kahirra Niyumikura yungkula tjakultjunu, Puwatjalu watjañutjangka.

Ruutjanya mangarri yungkula Puwatjanya yanu tawunu Pitjiliyamalakutu purikutu. Puri palula wati tjuta tjungurringkula wangkapayi. Walytja ilatja palunya Puwatjalu nyakula yaltingu, mayutju kutjupa tjutañarra, nyinarraya kulintjaku. Tjunguya nyinarra Puwatjalu walytja ilatja palula yalatji watjañu, “Niyuminya walukuta paluru ngurra walytja tjalamilalkitja yunytjurringanyi. Ngurra an waala palumpa nyuntu payimilara palumpa ngunyarri Ruutjanyañarra nyuntulpi yaltirra kanyintjaku, wati kutjupangku pulanya yantayantantjawiyangka. Yalatji luwulampa ngaranyi.” Wati paluru Puwatjaku wangka kulira wiya watjañu yalatji, “Wiya. Nyuntulpi ngurra palumpa payimilala!, ngayulu wantinyi.” Wati kutjupa tjutangka kurungka wati paluru puuta yarralytjankula yungu Puwatjaku. Yirritiya yalatji puuta yungkupayi mayutju tjutangka kurungka, ngurra payimilalkitjangku.

Palulanguru Puwatjalu Niyumiku ngurra, waala payimilara yankula Ruutjanya yaltingu, palumpa miitalpi nyinanytjaku. Nyinarrapula katjalpi yini Yuupitanya mantjiñu. Kapali tjutaya Niyuminyañarra yunyparringu tjamu Yuupitaku. Yuupitalu watirringkula katja Tjiitjiyinya mantjiñu. Tjiitjiyilupi watirringkula katja Tapitanya mantjiñu.

Tjilpi

Yilayili

Tjamiyulanya

yantayanțanmalpa
1 Tjamiyula 1:—4:

Yanalu Katutjanya tjapilku, katja mantjintjak-itjangku

1 Tjamiyula 1:1-18

Yipurimaku walytja ngantitja ini paluru nyinangu Ilkananya. Wati paluru kanyiñingi kungka kutjarra, kungka kutju ini Pininanya, kutjupa ini Yananya. Pininalu pipirri mankurrrpa kanyiñingi. Paluru watjalpayi, “Ngayulu pipirri mankurrtjarra, kanya nyuntu pipirriwiyakampa.” Yananya pipirri wiyapilkungku kulira ulapayı, mayitarra ngalkuwiyangku wantipayi, tjilurungku. Ngurra Tjaluwakutuya tjungu anu tjaatji kalikingka Katutjanya walkuntjakitja. Yanalu tjaatji palula pupakatirra Katutjanya tjapilpayi.

Pakara ularra Katutjanya wangka unnguwanangku alatji tjapilpayi, “Mayutju tina Katutja, kulilatju!, kuunyingkuñanta tjapiñingga. Nyuntutjunu katja yunganingka, ngaparrtjiñanta katja palunya yungku, tjukarurru nyuntupa nyinanytjaku. Mangka muñuntjawiya nyinaku, nyuntupa waarrkana ilta.” Alatjingkuya mangka muñuntjawiya wantipayi, Katutjaku waarrkana nyinakitjangku. Kutu Yanalu Katutjanya tjapilpayi wangka unnguwanangku. Ingkaña Yilayilu Yananya watjanu, nyakula waamatjanu ramakutjura kulira payinu, kanya Yanalu watjanu, “Waamatjanu wiyanā, tjilurungkumpaña Katutjanya tjapiñingi.” Yilayilu watjanu,

“Palya, unytjurringanyinanta Katutjalunta ungkunytjaku, nyuntu tjapiñutjangka.”

Yananya pakara anu. Mayi ngalkuñingi watjil-pawiyalpi nyinarra.

Katutjalu Yanaku katja yungku

1 Tjamiyula 1:19-28

Ngurra ini Ramakutuya malaku yankula nyinangi. Ilkananya Yananya tjungulpi ngarirra, Yananyalpi mukalatjarrarringkula nyinangi, Katutjalura ungutjangka. Kala, Yanalu katja mantjira ini tjunu Tjamiyulanya.

Tjamiyulanya pipirri tinjarringkula ipi tjikilwiyalpi nyinangi. Palunyatjanu Yanalupula Ilkanalu Tjamiyulanya katingu Katutjaku tjaatjikutu. Ingkaña Yilayinya Yanalu tjapinu, “Kulinimpatjun? Ngaangka pupakatirraña Katutjanya yurrunpa tjapilpayi. Palunyatjanu katja ngaatjatju ungu, tinjarringkula Katutjaku waarrka palyantjaku.”

Yalatji tjaatji kalikingkapula Tjamiyulanya ungkula wantirra ngurrakutulpi anu. Tjamiyulanya pipirri kutu tjaatjingka waarrkarirra nyinangi, ingkaña Yilayilu purinytju kanyiningka.

Yilayiku katja kutjarrangku kuya palyanmalpa

1 Tjamiyula 2:12-25

Yilayiku katja kutjarra watipula nyinangi, ini Wupuninyakamu Piniyatjanya. Paluru kutjarrapula tjaatji kalikingka tjananya nintilpayi. Paluru kutjarra ingkaña nyinangi. Paluru kutjarra Katutjaku wangkawanalu wiya tjukarurru palyalpayi. Mayutju paluru kutjarrangkupula waarrkana iyalpayi,

ankula kuka kana kuntara mantjintjaku tjawirrilyingka, tuluku mayutjungku lirri muṭuṇingka. Ngunytjinytjungkupula yalatji palyalpayi, tjawirrilyikuṇu luwu kaṭantara. Ngantipula kuka yuṇmi mantjinmara, Katutjalu watjaningka. Kala, paluru kutjarrangku tjananya tjaatjingka waarrkarripayi tjuṭa kungka waarrkana waṇgira katipayi.

Tjilpi Yilayilu pulanya yalatjilupi payinu, “Nyaakupulan wiwayanalu kuya palyaṇi? Tjuṭangkukunyuniya tjakultjura nyinapayi, kuyapulan kutu palyaṇingka. Kuya palyalwiyapula wanti!, Katutjaluntapula yitjipungkuyankupayingka.” Kuya palyalpayipula tjukarurrurrinytjawiya, putu pulanya pinangkatjunu. Kala, pulanya Katutjalu mirri pungkukitjalu kuliṇu.

Katutjalu Tjamiyulanya yaltiku wangkakitjalu 1 Tjamiyula 3:1-18

Yilayinyakamu pipirri Tjamiyulanya waṇmapula ngarringi mungangka. Tjamiyulanya laampa kampanyingka anku ngarripayi, Katutjaku pukutjungka ila, puli wirulypa kutjarratjarrangka. Tjamiyulanya ngururrkuturringkula anku ngarrinyingka, mayutju Katutjalu kanara altipayi, “Tjamiyula.” Tjamiyulalu kulira kanarrirra watjanu, “Ngaatjana ngarrinyi.” Yilayilu altinytjalakutjura kulira Tjamiyulalu pakara ankula tjilpingka watjanu, “Nyuntutjunu altinyingkaṇa ngalya anuṇa.” Yilayilu watjanu, “Wiyananta altingu, inytjamingka ankula

ngarrikati!” Kala, Tjamiyulanya ankula piyuku inytjammingka ngarrikatingu. Mayutju Katutjalu piyuku kanara altingu, “Tjamiyula.”

Palunyatjanu Tjamiyulalu kulira kanarrirra pakara ankula Yilayingka putu tjapinu. Putu tjapira piyuku ankula ngarrikatingu. Mayutju Katutjalu piyuku Tjamiyulanya kanara altingu. Tjamiyulanya pakara ankula Yilayinya watjanu, “Nyuntutjun altingingka ngaatja ngalyanunanta.” Yilayinya pina alarringkulalpi kulinu, mayutju Katutjalumpa Tjamiyulanya altingi. Palunyatjanu watjanu, “Ankula ngarrikati! Piyukunta kanara altingingka, alatji watjala!, ‘Mayutju. Watjalani waarrkanalunanta kulini.’” Palunyatjanu Tjamiyulanya piyuku ankula ngarrikatingu. Mayutju Katutjalu ngalyankula Tjamiyulanya ngururrpa nguwanpa altingu, “Tjamiyula.” Tjamiyulalu kulira watjanu, “Mayutju, watjalani! Waarrkanalunanta kulini.” Mayutju Katutjalu Tjamiyulanya watjanu, “Ngulana tjananya pulkara yitjipungku, Yitjurilaku ngantitja tjuta. Yilayiku katja kutjarrana mirri pungku, palumpa walytja tjutatarra. Panyapania tjlpi Yilayingka yurrunpa watjanu, palumpa walytja tjuta yitjipungkukitjangku. Palumpa katja kutjarrangku kuya palyaningka, Yilayinya ninti nyinangi. Yurrunpa pulanya marrkulmara tjukarurrulkitjangku. Yurrunpa marrkuntjawiyangka Yitjurilaku ngantitja tjutangkutjuya tjawirrili ngalya katirra putu yungku. Kuyana tjanampa wiya waniku.”

Aalilingku pakara Tjamiyulalu rawa ngar-

rirra nganti pakara tjaatji alanu. Yilayinya tjakultjunkutjipingkamarra ngulu nyinangi. Yilayiluppi altingu, "Ula, ngalya yarra!" Tjamiyulalu maa ankula ngarala watjanu, "Ngaatjanha ngaranyi." Yilayilu tjapiyu, "Mayutju Katutjalunta mungangka nyaat watjanu? Wangka tjutatju watjala!, wangka wantiwiyangku, Katutjalunta ngaparrtji yitjipungkupayingka."

Palunyatjanu Tjamiyulalu wangka tjuta Katutjalu watjantja tjakultjunu. Yilayilu kulira watjanu, "Palya mayutju Katutjalu tjukarurru kulira palyalpayi."

*Tjamiyulalu Katutjaku wangka watjalpayi,
yanangu tjutangkuya kuliklu*

1 Tjamiyula 3:19-21

Tjamiyulanya watirringkula Katutjaku tjukarurru nyinapayi Yalatji nintiningga wangka iltarripayi. Palunyatjanu anangu tjutaya ninti nyinangi, Tjamiyulalu Katutjaku wangka tjukarurru watjalpayingka.

*Katutjalu tjananya Yilayinyaarra yitjipungku
1 Tjamiyula 4:1-18*

Pilitjiyanya ngurrara tjutaya tjungurringu Yitjurilaku ngulytju ngantitja tjutanya tjananya pikangku pungkukitja. Yitjurilaku ngantitja tjuta tjilirratjarra tjutalingku ankula nyinangu ngurra Yipinitjangka, Pilitjiyanya ngurrara tjuta tjananya pikangku pungkukitja. Ngurra Yipinitjangkaya nyinanyingka, Pilitjiyanya ngurrara tjutangku tjananya kulaatatjarrangku ngalya ankula mirri pungkuyinangi, tjawutjuna puupala.

Palunyatjanu Yitjurilaku ngantitja tjuṭangku ngulurringkula watjanu Katutjaku pukutju puli wirulypa kutjarratjarra, ankulaya ngurra Tjaluwangka mantjira ngalya katikitjangku. Kulinuya yalatjingku, “Pukutju palunya kanyiralatju palya pikangku pungkula wantirriyalku.” Pukutju palunyaya ankula mantjira ngalya katinyingka Yitjurilaku ngantitja tjutaya kulaṭatjarra tjutaya yunyparringu. Palunyatjanungkuya Pilitjiyanya ngurrara tjuṭangku piyuku ngalyankula, tjutalingku mirri pungkula wiyanu tjawutjuna tjaatiyipala. Kanya Pilitjiyanya ngurrara tjuṭangku tjananya Yilayiku katja kutjarraṭarra, mirri pungkula Katutjaku pukutju paļunya mantjira katirra kanyin̄ingi.

Kulaṭatjarra kutju tjalkalungu kanarirra ngurra Tjaluwakutu. Ankula tjananya tjakultjunu, kuliraya ngulurrirra ularra wañingi. Yilayilu kulira tjiyingka nyinarra tjułurrwangkarra punkara mirrirringu. Paluru tulkuku mayutju tjanampa kuļi puutiyipala nyinarra yalatji mirrirringu. Kanya Piniyatjaku miiṭa muti purrka nyinangi. Piniyatjanya mirrirrinytjala kulira wiyarringu, Katutjaku pukutju katingutjangkaṭarra kulira. Mirririrra katjalpi mantjiṇu.

Tjamiyulanyalpi tjanampa mayutju nyinamalpa

1 Tjamiyula 5:—7:

Katutjaku pukutjuya kanyira pikatjarrar-ringku

1 Tjamiyula 5:—6:

Pilitjiyanya ngurrara tjutangkuya Katutjaku pukutju mantjira katingu, tawunu Yatjatataku. Katirraya tjaatji nguwanpa palulaya Katutjanya nguwanpa Tiikunanya pulkapungkupai. Tjaatji palula Tiikunanya pulitjanu palyaṇutja, ngururrpa aŋangu nguwanpa ngarangi. Puli palulaya ila Katutjaku pukutju ngarritjunkula wantingu. Mungawinki pakara tjaatji palulakutuya ankula nyakula karrawurringu, Tiikunanya punkara Katutjaku pukutjungka waṭungaranyingka. Aŋangu mayutju tiṇa pulkapungkukitja nguwanpa waṭungarangi. Nyakulaya ampura katura ngaratjunu, Tiikunanya pulitjanu palyaṇutja.

Mungawinki kutjupaya ngalya ankula piyuku nyangu, Tiikunanya punkara pukutju palula waṭungarayananyingka. Punkara kilytjukatirra ngarrirra waṇingi, miṇa kutjarra, kataṭarra.

Palunya tjanampa palunya ngurrara tjutangka puyila talṭu pakara ngarala waṇingi. Katutjalu tjananya mirri pungkutjipingka, ngulurrirraya yalatjilu watjanu, “Yitjurilaku mayutju tiṇangkulanya Katutjalu yitjipunganyi, nganampa mayutju Tiikunanyaṭarra punkatjinganingi. Katutjaku pukutju palatja waṇma katintjaku, ngaangka ngarrinytjawiya.”

Puṭu kuliraya maa katirra Katutjaku pukutju palunya ngarritjunu tawunu Kaatjangka. Kaatjanya ngurrara tjutatarra tjananya mayutju Katutjalu yitjipungu. Palunyatjanu

tjanampa puyila tjuta pakara ngarala wañingi. Palulanguruya ngurra palula nyinapayi tjutangkuya ngulurrirra Katutjaku pukutju palunya tawunu kutjupakutu wantirriyanu, Yikuranakutu. Palunya ngurrara tjutangkuya nyakula ngulurrirra watjanu, “Yitjurilaku ngantitja tjutaku pukutju palatjaya ngalya katingu, mayutju Katutjaku pukutju, nganañanyalpilanya mirrintankukitjangku. Pukutju palatjaya maa wantirriyalala walytja tjutakutu!, Yitjurilaku ngantitja tjutakutu.”

Palunyatjanu Pilitjiyanya ngurrara tjutangku pukutju palunya wakinangka kalpatjunkula maa wantirriyanu tawunu Piitjimitjikutu, Yitjurilaku ngantitja tjutakutu. Tjawirrilya puli kuultatjanu palyanütja, tjunginpa nguwanpa payipala tjunkula wantirriyanu, puyila taltu nguwanpa palyanütja payipalaṭarra.

Puluka kutjarrangkupula wakina palunya ruutuwana katirra ngurra Piitjimitjikutu tjukarurru katingu, Pilitjiyanya ngurrara mayutju payipalaluya maa nyakula wanantjangka. Katutjaku pukutju pulukalupula ngalya katingitjangka Yitjurilaku ngantitja tjutangku nyakula yunyparringu. Wiita muṭuranarraya pakara nyangu. Nyakulaya ankula puluka palunya kutjarra mirri pungu, tjawirriliyi kutjalkitjangku.

Pukutjuya mantjira tjunkula wakinaya kilytjuntankula warulpi kutjañu. Puluka kutjarra ngarritjunkula Katutjaku tjawirriliyi kutjañu.

Wati tjutangkuya Katutjaku pukutju alara nyangu puli kuultatjanu palyanütja tjuta.

Alalwiyangkuya wantimara, tul_kuku mayutjulu kutju alara nyakunytjaku. Ngurrpangku nguwanpaya ala_nutjangka Katutjalu tjananya mirri pungu, Piitjimitjinya ngurrara wati tjuta tjapantiyipala. Yitjurilaku ngan_titja kutjupa tjutakutuya wikarru wantirriyanu. Tjana tjananya altingu Yitjurilaku ngan_titja kutjupa ngurrara tjutangku ngalyankula, Katutjaku pukutju mantjira maa katintjaku.

Tjamiyulalu tjananya marrkulku, Katutjaku tjukarurru nyinanytjaku

1 Tjamiyula 7:1-6

Katutjaku pukutju palunyaya yitjurilaku ngan_titja tjutangku ngurra Kiriyatjimalakutu kahirra kanyin_ingi, kuli tuuntiyipala. Wati Yapinatapaku waalangka ngarringu. Palumpa katja Yalitjanyaya nyinatjunu, tul_kuku mayutjulu pukutju palunya antantara kanyintjaku.

Palunyangka ngurra tjutawanaluya Yitjurilaku ngan_titja tjutangku Katutjanya tjapi_ingi, Pilitjiyanya ngurrara tjutangku tjananya yitjipungkuwiyalu wantintjaku. Tjamiyulalu tjananya yalatjingku watjanu, “Tjukarurru nyinarranyurra mayutju Katutjanya kutju pulkapungkunytjaku, Katutjanya nguwanpa kutjupa tjuta pulkapungkuwiyalu. Katutjaku kutjunyurra tjukarurru nyinanytjaku. Paluru nyurrampa, Pilitjiyanya ngurrara tjuta pungkula wantirriyalku.”

Palunyatjanuya Yitjurilaku ngan_titja tjutangkutarraya Katutjanya nguwanpa

tjuṭa Paalanyaṭarra waṇirralpi wiyyara, Katutjanyalpi kutju tjukarurrungku walkuṇingi. Tjamiyulalu tjananya Yitjurilaku nganṭitja tjuṭa altingu, ngalya ankulaya ngurra Mitjipangka tjungurrinytjaku. Tjungurringkulaya mayi ngalkuwiyangku wantirra kuya palyanuṭjangku tjakultjunkula Katutjanyalpi pulkapungu.

*Pilitjiyanya ngurrara tjuṭangkaṭarra Katutjalu tjananya kanalku
1 Tjamiyula 7:7-11*

Yitjurilaku nganṭitja tjuṭaluya ngurra Mitjipangka tjungurrirra tjakulpa kulinu, Pilitjiyanya ngurrara tjuṭaya tjungurringanyingka. Pikaṭi tjuṭangku tjananya ngalyankula pungkukitja, kanya Yitjurilaku nganṭitja tjuṭangku ngulurringkula Tjamiyulalyalpi tjapiṇu yalatjingku, “Katutjanyalampa kutu tjapinma!, Pilitjiyanya ngurrara tjuṭangkulanya ngalya ankula mirri pungkupayingkamarra.” Tjamiyulalu tjiipi wiima pungkula tjawirrilyi kutjaṇu, mayutju Katutjaku. Yalatji kutjara tjanampa Katutjanya tjapiṇu. Kanya yalatji tjawirrilyi kutjara tjapirananyingka, Pilitjiyanya ngurrara tjuṭa pikati yila ngalya anangi, pungkukitja. Kanya Katutjalu puntura wangkatjingaṇu. Kapi tuutuurinangi nguwanpa kulira nguļu pulkarirra nganṭikutu tjalkatjalkalungu. Ngulunytju tjuṭa tjananya Yitjurilaku nganṭitja tjuṭangkuya pikati tjuṭa tjananya wanara mirri punguyinangi.

Puli ngaratjunku nyakulaya Katutjanya kulin-tjaku

1 Tjamiyula 7:12-17

Yalatji tjananya Pilitjiyanya ngurrara tjuta mirri pungkula ngulutjingara wantirriyanu, Yitjurilaku ngantitja tjutangku. Palunyatjanu Pilitjiyanya ngurrara tjutangku tjananya yitjipungkuwiyangku wantingu, Tjamiyulanya kana nyinanyingka.

Tjamiyulalu puli tiña mantjira ngaratjunkula tjananya watjanu, ‘Puli ngaatjanya ini alatji, ‘Pungkunytjatjanunya ngaatja ngaranyi.’ Ngulala nyakula alatjingku kulintjaku, ‘Ylta Katutjalulampa Pilitjiyanya ngurrara tjuta yitjipungu, ngurra ngaangka.’ ”

Tjamiyulanya mayutju nguwanpa tjanampa nyinangu, Yitjurilaku ngantitja tjutaku. Ngurra puupalakutu rawa ankupayi, kuutawutjuku mayutjulu tjananya kulira watjantjaku. Ngurra Ramangka tiipula nguwanpa pulitjanu palyanu, Katutjaku tjawirrilyi kutjara pulkapungkunytjaku.

Tjuulanya mayutju tiña tjanampa nyinaku

1 Tjamiyula 8:—15:

Katutjanyaya tjapilku mayutju tiñaku

1 Tjamiyula 8:1-21

Tjamiyulanya tjukarurru nyinarra tjilpirringu. Palumpa katja kutjarra pulanya Tjamiyulalu mayutju nyinatjunu. Mayutju tjukarurruwiyapula wiyawanalu palyalpayi. Palunyatjanu Yitjurilaku ngantitja tjutaku mayutju tjutaya tawunu Ramangka

tjungurringu. Tjungurringkulaya Tjamiyulanya tjapiñu, “Nyuntu mayutju palyalampatjunu nyinarra tjilpirringu. Nyuntupa katja kutjarrapula tjukarurruwiya nyinanyi. Palunyatjanulatju unytjurringanyi, mayutju kutjupa tiñalampatju nyinatjurra! Mayutju tiñatjarralpilatju nyinanytjaku, kutjupa ngurrara tjuṭaya mayutju tiñatjarraya nyinanytja nguwanpa.”

Tjamiyulalu wangka palunya kulira kuyarringu, mayutju tiñakuya unytjurringkula tjapintjala. Mayutju Katutjaku kutjuya unytjurringkula nyinamara, mayutju tiña kutjuku. Palunyatjanu puṭu kulira Tjamiyulalu Katutjanya tjapiñutjangka, Katutjalu alatji watjañu, “Wangka tjanampa kulila! Kulira tjananya watjala! Mayutju manta ngurrarangku kuyangku kanyilpayi.” Katutjalu Tjamiyulanya kutu watjañu, “Nyuntunya kutju wiyya kulilwiyyangku wantingu, ngayunya Katutjanyaṭarraya mayutju tiña kulilwiyyangku wantingu. Katutjanya nguwanpa kutjupa tjuṭaya unytjurringkula pulkapungkukitjangku. Kutuṇiya wantipayi.”

Mayutju Katutjalu watjañutjangka, Tjamiyulalu alatji tjananya tjakultjunu, “Ngayulu nyurrangarrimpa mayutju tiña nyinatjunanyingka, paluru nyurrangarrinya kuyangku kanyilkku. Nyurrangarrimpa katjapiṭi tjananya watjalku, kuļaṭatjarrangku ankula kutjupa tjuṭa pungkunyjtjaku. Watjalku tjananya waarrka tiña kutjupatarra palyara nyinanytjaku. Waarrka tiñatjarraya yilta

nyinaku. Nyurrangarrimpa yuntaarpa tjuṭatarra tjananya mayutju paluru watjalku, puntura waarrkarrinytjaku. Nyurrangarriṭtarra mayutju tiṇa palumpa waarrkana tjuta nyinarra waarrkarrirra nyinamalpa. Mayutju tiṇa paluru nyurranya watjalku, mayi pakaltjingara ngurrtjara mayutju tiṇa palunyanyurra ungkunytjaku.

“Mayutju paluru nyurranya kuyangku kanyiṇingka, Katutjanyanyurra puṭu tjapilku, wapalpa nyinakitjangku. Kulira nyurranya wantiku, mayutju tiṇakunyurra unytjurringkula tjapiṇingitjangka.” Yaṇangu paluru tjanaya Tjamiyulaku wangka kulira wantirra kutu watjaṇingi, “Mayutju tiṇatjarralatju nyinakitjalatju unytjurringanyi, kutjupa ngurrara tjuṭaya mayutju tiṇatjarra nyinanytja nguwanpa. Mayutju tiṇalampatju yaltirra nyinatjurra!”

Tjamiyulalu kututja piyuku tjapiṇingka, Katutjalu watjaṇu, “Pala tjuṭangkuntaya tjapiṇingka mayutju tiṇa tjanampa ngurrtjara nyinatjurra!” Miitingi alatjiya wangkarra ngurrakutuya ankula waṇingu.

Katutjalu watjalku Tjuulanya mayutju tiṇa tjanampa nyinatjunkunytjaku

1 Tjamiyula 9:1-27; 10:1-27

Pintjiminaku walytja nganṭitja wati Kiitjanya nyinangi. Kiitjalu katja Tjuulanya kanyiṇu, wati waṭawara palyalingku. Palumpa paapangku pulanya Tjuulanyakamu waarrkana kutjupa wantirriyanu, ankulapula Kiitjaku tuungkiyi tjuta

ngurrira mantjira ngalya katinytjaku. Ankulapula puṭu ngurririnkula kuliṇu, tawunukutu ankula Katutjaku wangka watjalpayinya tjapilkitjangku. Tawunu palulakutu Tjuulalupula ankula kungka tjuta nyangu, ngalya ankuyinanyingka. Nyakula tjananyapula tjapiṇu, “Katutjaku wangka nintilpayi palunya tawunu palangka nyinanyi?” Kungka tjutangku pulanya watjaṇu, “Yuwa, yilaya ngalya ananyi, Tjamiyulanya kutjupa tjutatarra, Katutjaku tjawirrili Kutjara pułkapungkukitja.”

Ankulapula Tjamiyulanya nyangu, yila ngalya ananyingka. Kanya yurrunpa Katutjalu Tjamiyulanya alatji watjaṇu, “Tjintungkaṇanta wati kutju maa wantirriyalku, tjintu alangaangka, Pintjiminaku waltya nganṭitja. Wati palula nyuntu tjira intila yurrunpa!, mayutju tiṇa nyurrampa ngula nyinanytjaku, Yitjurilaku nganṭitja tjutāku. Wati paluru nyurranya kanyira kanalku, Pilitjiyanya ngurrara tjutangku nyurranya pungkutjipingkamarra.”

Palunyangka Tjamiyulalu Tjuulanya ngalya ananyingka nyangu. Katutjalu Tjamiyulala watjaṇu, “Alapalatja, wati palunyananta watjaṇu. Paluru nyurranya mayutju tiṇangku purinytju kanyilku.” Tjuulalu Tjamiyulanya kutjupakutjura tjapiṇutjangka, Tjamiyulalu alatji watjaṇu, “Yuwa, ngayuluṇa Katutjaku wangka watjalpayi. Yurrunpapula maa yarra!, tjawirrili Kutjalpayi nyarrakutu! Tjungungkula kuwarri Katutjanya pułkapungkuku miyikamu kuka ngalkula, ngayuku ngurrangkapulan ngarrirra tjintungka anku. Tuungkiyi palunya

tjułaku kulilwiyangkupula wanti! Nyuntupa paapalu kala ngurrira mantjiñu.”

Tjawirrilyi palunya kutjarra tjungungkuya anangu tjułangku Katutjanya pulkapungkula Tjuulalutarra kuka ngalkunu. Palunyatjanungku pulanya Tjamiyulalu palumpa ngurrakutu katirra ngarritjunu Tjuulanya pulanya malpararra. Tjinłtungka pakara Tjamiyulanya Tjuulanya palumpa malpa tjungu anu, waala tjuławana. Ankula kalkunu ngarala Tjamiyulalu watjañu, Tjuulalu palumpa malpa yurrunpa wantirriyantjaku, pałantjaku. Tjuulanya kutju ngaranyingka, Tjamiyulalu katangka tjira intira watjañu, “Tjirañanta intiñu yurrunpa, mayutju Katutjalunta mayutju tiñalampatju nyinatjunutjangka, Yitjurilaku walytja ngantitja tjułaku.” Palunyatjanupula Tjuulanya malpararra tawunu Kipiyakutu ankula tjananya nyangu Katutjaku wangka watjalpayi tjuła. Palunyangka Katutjaku kurrunpangku Tjuulanya pukulmananyingka, Tjuulanya Katutjaku yunyparrirra nyañpinyañpingu, Katutjaku wangka watjalpayi kutjupa tjutaya nyañpinyingka nguwanpa. Alati nyañpinytjaku Tjamiyulalu yurrunpa watjañu, yiltarringkulalpi Tjuulanya nyañpingu.

Anangu Tjułangkuya Tjuulanya nyakula watjañu, “Tjuulanyalpi Katutjaku wangka watjalpayi nyinanyi.” Kala Tjamiyulalu tjananya nyakula altingu, ngurra Mitjipangka Katutjaku tulkuku tjungurrinytjaku. Tjungurringkulalaya nyinanyingka Katutjalu watjantja alatji

tjananya Tjamiyulalu tjakultjunu, “Ngayuluna nyurrampa Katutjanya mayutju tiṇa nyinanyi. Paṇa Yitjipitjanu ngayulu tjananya nyurragarrimpa mirrinYTjanirri tjuta pakaltjingara, ngaakutu ngalya katirra nyinatjunu. Kuwarriṇinyurra wantingu nyurrangarrimpa mayutju tiṇa Katutjanya, aṇangu mayutju tiṇaku tjapintjatjanulu. Kalalpi, ngayulu Katutjalu mayutju tiṇalpi nyinatjunku.” Tjamiyulalu tjananya kutu watjaṇu, “Walytjararranpa tjutanyurra waṇmaṭu waṇmaṭu ngaranytjaku, Katutjala kurungka.” Alatji Tjamiyulalu mayutju tiṇa mantjilkitjalu walytjararranpa kutjuṭu kutjuṭu altingu, ngalya ankula Tjamiyulangkaya ngarala waṇinytjaku. Alatjiya walytjararranpa kutjuṭu kutjuṭu ngalya ankula ngaranyingka, Tjamiyulalu wati Kiitjaku walytja ngurrkantankula mantjinu. Palunyatjanu Tjamiyulalu watjaṇu wati Tjuulanya ngalya ankula ngaranyingka, mayutju tiṇa nyinatjunkukitjalu. Palunyatjanuya Tjuulaku puṭu nyakula ngurrira nyangulpi yulytja tiṇangka ngulurringkula kumpiananyingka. Ngalya katirraya ngaratjunnanyingka Tjamiyulalu tjananya watjaṇu, “Alan-gaatjanyalampa mayutju tiṇa, mayutju Katutjalu ngurrkantankula nyinatjunutja.” Kuliraya yunyparrirra aṇangu tjutangkuya katungkuya watjaṇu, “Ngaatjanya mayutju tiṇalampa, rawa kutu nyinanytjaku.”

*Kutjupa ngurrara tjutangku tjananya Tjuulanyangarri pungku
1 Tjamiyula 13:*

Palunyatjanuya Pilitjiyanya ngurrara tjuta tjananya pungkukitja, Tjuulanyatarra tjilirratjarra kutu tjungurringu, ngurra Kilkalangka. Pilitjiyanya ngurrara tjutalingku tjananya tjana nyakula Yitjurilaku walytja ngantitja tjutaya ngulurringu. Tjamiyulalu tulku mayutjungku, yurruntu Tjuulanya marrkuṇu Kilkalangka tjungurringkula tjintu tjanpanpala patantjaku. Tjuulaluṭarraya tjintu tjanpanpala paṭara Tjamiyulaku puṭu nyangu. Palunyangkaya Tjuulaku waarrkana tjilirratjarra kutjupa tjuta tjanampa Pilitjiyanya ngurrara tjuta tiṇaku, ngulurrirra małaku anu.

Palunyangka Tjuulaku waarrkana kutjupa tjuta kutu nyinangi. Tjuulalu tjananya watjaṇu kuka tjawirrilyi ngalya katintjaku, Tjamiyulaku kutu patantjawiyangku. Lirri muṭura Tjuulalulpi tjawirrilyi Katutjaku kutjaṇu, tulku mayutju nguwanpangku. Tjawirrilyi paluru kutu kampayananyingka, Tjamiyulanyalpi ngalya ankula Tjuulanya payinu, tulku mayutju nguwanpangku tjawirrilyi kutjantjatjanungka. Tjuulanya alatji watjaṇu, “Nyuntu Katutjaku tjukarurru nyinanytjawiya, mayutjuwiyalpinu nyinaku.” Alatji watjara Tjamiyulanya pinkulukatirra Tjuulanya wantirra anu.

*Katutjalu Tjuulanya wantiku mayutjuwiyalpi
1 Tjamiyula 15:1-35*

Palunyatjanu ngurra kutjupangka nyinarra yankula Tjamiyulalu Tjuulanya alatji watjaṇu, “Mayutju Katutjalunta watjaṇu, nyurrangarri

ankula tjananya Yamalikaku walytja ngantitja tjuṭa pikangku mirri pungkula wiyanṭjaku. Mirri pungkula tjananya puluka tjuṭa, tjiipi tjuṭa, kamula tjuṭa, tuungkiyi tjuṭa tjanampa nyurran-garri mirri pungkula wiyanṭjaku.”

Palunyangkaya Tjuulaluṭarra tjilirratjarra tjuṭa ankula aŋangu tjuṭa tjananya mirri pungkuyinangi. Mayutju tiṇa tjanampa wati Yikakanya mirri pungkuwiyangku wantingu. Puluka kutjupa tjuṭa, tjiipi kutjupa tjuṭaṭarra mirri pungkuwiyangku wantingu.

Palunyatjanu Tjamiyulalu Katutjaku wangka kulira Tjuulakutu ankula payiṇu puluka tjiipitarra mirri pungkuwiyangku kanyintjatjanungka. Tjamiyulalu Tjuulanya kutu tjaipiṇingi payilkitjangku, “Nyaaku Katutjaku wangka kulilwiyangku tjiipitarra nyuntu mantjira ngalya katirra kanyiṇi?” Tjuulalu watjaṇu, “Nganaŋatju mirri pungkuwiyangku tjiipitarra ngalya katingu, tjawirrilyi Katutjaku ungkukitjangku.” Tjamiyulalu Tjuulanya watjaṇu, “Yaalytjin kulinī? Katutjanya nyaaku unytjurringanyi?, tjinguru tjawirrilyiku kutju?, tjinguru aŋangulura tjukarurrungku palyantjaku? Yulta, nyuntura tjukarurru palyanmara. Mirri tjutan pungamaran, aŋangutarra tjiipi, kamula, puluka, nanikutaṭarra. Nyuntu tjukarurru palyantjawiyangka, Katutjalunta marrkura mungutja nyinatjunku. Nyuntu mayutjuwiyalpi nyinaku, Katutjalu mayutju tiṇa kutjupalpi nyinatjunku.” Tjamiyulalu

watjara pinkulukatirra Tjuulanya wantirra anu, pinkulukatirra nyakula kutu wangkanytjawiya.

Kata tjirangka intira Tapitanyalpi mayutju tina nyinatjunku

1 Tjamiyula 16:

Katutjalu kulikku Tapitanya mayutju tina nyinanytjaku.

1 Tjamiyula 16:1-13

Mayutju Katutjalu Tjamiyulanya alatji watjañu, “Tjuula palumpa ngalturrinytjawiya. Yitjurilaku walytja ngantitjaku nyurrrampa mayutjuwiyalpi nyinaku. Tjira intilpayi mantjira tawunu Pitjiliyamakutu ankula Tjiitjiyiku katjangka intila!, mayutju nyinatjunkukitjangku. Palumpa katja tjuta nyinanyi. Kulinina, kutju mayutju tina nyurrrampa nyinanytjaku.” Tjamiyulalu Katutjanya watjañu, “Puñuna kulinu, Tjiitjiyiku katjana mayutju nyinatjunnanyingka, Tjuulalu kulira ngalya ankulanî mirri pungkupayingka.” Mayutju Katutjalu Tjamiyulanya watjañu, “Puluka tjukutjuku mantjira maa kati!, ngayuku tjawirrilyi pungkula kutjalkitjangku. Anangu tjuta tjananya alti!, tjungurringkulaniñyurra Katutjanya tjungungku pulkapungkunytjaku. Tjiitjiyiku walytja tjutatarra alti! Tjungurringkulaniñyurra pulkapungkukitjangku, kalañanta nintilku palumpa katjangka intintjaku.”

Palunyangka Tjamiyulalu tawunu Pitjiliyamakutu tjina ankula altingu tjananya, tjungurirra Katutjanya pulkapungkunytjaku. Palunya ngurrara tjutaya tjungurrinytjala, Tjamiyulalu

nyakula Tjiitjiyiku katja yurruntitja Yilayapanya kuliñu, mayutju nyinatjunkukitjangku. Alatji paluru kuliñu, “Alapalatja mayutju Katutjalu ngurrkantankula ngaratjunku, tjinguru wati palya waṭawara.” Mayutju Katutjalu alatji marrkuṇu, “Wiya wati palatjaya waṭawara yunpa palya ngaranytjaku kutju kulintjaku. Añangungku alatji kulilpayi mayutju tiña nyinakitjangku. Kanya ngayuluna kurrunpa nyakupayi, añangutju tjukarurru nyinanytja, yunpa palyaku kulintjawiyalu.” Tjamiyulalu wati Tjiitjiyinya watjanu palumpa katja kutjupa tjuta tjananya ngalya katirra kutjuṭu kutjuṭu ngaratjunkunytjaku. Tjiitjiyilu katja tiña kutjupa ngalya katirra ngaratjunu, yini Yapinatapanya. Tjamiyulalu nyakula watjanu, “Wiya ngaatjanya mayutju nyinanytjaku watjanu.”

Palunyangka Tjiitjiyilu katja ini Tjamanya ngalya katirra ngaratjunu. “Ngaatjanya wiya mayutju nyinanytjaku watjanu.” Tjiitjiyilu alatji palumpa katja tjanapala ngalya katirra ngaratjunkunytjala Tjamiyulalu wiya watjanu. Tjamiyulalu puṭu nyakula tjapintjala, Tjiitjiyilu watjanu, “Katja nganṭitja wañma waarrkarrinyi, tjiipi tjuta tjananya purinytju kanyini.” Tjamiyulalu watjanu, “Wikarru wantirriyala!, palunya ngalyananyingka kutjula tjungulu tjawirriliyi kutjalku.” Ngalya ankula Tapitanya ngaranyingka, Tjamiyulalu muṭilya palya nyakula yunyparringu. Katutjalu Tjamiyulanya alatji nintiñu, “Yalangaangka tjira yintila!, mayutju tiña nyinatjunkukitjangku.”

Palunyangka Tjamiyulalu Tapitangka

katangka yintinu, Yitjurilaku walytja ngantitja tjutaku mayutju tiña nyinatjunkukitjangku, yanangu tjutangka mirangka. Palunyangka Katutjaku kurrunpa Tapitangka tjarrparra nyinangi.

Tjuulanya ngulurrinytja Tapitalu mutjika wangkatjingara atanmanamalpa

1 Tjamiyula 16:14-23

Katutjaku kurruntu Tjuulanya wantintytjala, mayutju Katutjalu mamu wantirriyanu Tjuulanya ngulutjingantjaku. Tjuulaku waarrkana tjutangkuya Tjuulanya marrkuñu, “Katutjalunta mamu nguwanpa wantirriyanu ngulutjingantjaku. Palunyangkamarra watjalalanyatju wati mutjika yatjikilu wangkatjingalpayi ngurrira mantjira ngalya katintytjaku! Nyuntu ngulurringanyingka palurunta kiitawu nguwanpa wangkatjingaranta palyarungulku.” Palunyatjanu Tjuululu watjanu, “Mutjika yatjikingku wangkatjingalpayi ngurrira yaltirra ngalya katintytjaku.”

Yalatji watjantja kulira palumpa waarrkana kutjupalu Tjuulanya watjanu, “Wati Tjiitjiyiku tawunu Pitjiliyamanya ngurraraku katja palya nyinanyi, yatjikingku mutjika wangkatjingalpayi. Katja paluru tjilirratjarrangku pungkupayi, wati ngulunytjuwiyalu. Yunpa palya nyinarra palya wangkapayi, mayutju Katutjanya-pula tjungu nyinanyi.” Kulira Tjuululu waarrkana wantirriyanu Tjiitjiyingka alatji watjantjaku, “Nyuntupa katja Tapitanya tjiipi kanyilpayi, ngayulakututju ngalya wantirriyala!, ngayuku

ngurrangkalpi waarrkarrinytjaku.” Palunyatjanu Tjiitjiyilu Tapitanya Tjuulakutu wantirriyalkitjangku tuungkiyi ngaratjunkula parilyka mayi puriitjarra waralytjunu, parilyka kutjupa pulakina tjutatjarraṭarra. Tuungkiyi luutu palunyatjarra Tapitalu ngalya katingu nanikutatarra, Tjuulaku yintyanungku ungkukitjangku.

Alatji Tapitanya ankula Tjuulaku ngurrangka waarrkarringu. Muṭilya Tapitaku yunyparrirra Tjuulalu watjaṇu, Tapitalu palumpa tjilirra katiyankunytjaku. Mayutju tinangku wiya tjilirra katiyankula kanyilpayi, waarrkanangku palumpangku katiyankula kanyilpayi. Palunyatjanu Tapitaku yunyparrirra Tjuulalu waarrkana wantirriyara Tjiitjiyinya tjapiṇu, Tapitanya palumpa waarrkana rawa waarrkarrinytjaku. Tjiitjiyilu yuwa watjantjala, Tapitanya rawa Tjuulaku ngurrangka waarrkarriipayi.

Tjuulanya ngułurringkula nyinanyingka, Tapitalu kiitawu nguwanpa wangkatjingara atanmankupayi. Wangkatjinganingga mamu paluru wantirra ankupayi. Palunyatjanu Tjuulanya ngułuwiya nyinapayi.

Tapitalu wati watawara Kulayitjanya mirrintanku

1 Tjamiyula 17:

*Wati Kulayitjalu tjananya tjapinmalpa,
pikalungkupula pungkunytjaku*

1 Tjamiyula 17:1-11

Yitjurilaku wal̄ytja ngan̄titja Tjuulanyaṭarra ngurrawana nyinapayi. Tjuulaku waarrkana

tjuṭa tjananya Pilitjiyanya ngurrara tjuṭa pikangku pungkukitja, ngalya yankula Tjuukungka ilaya nyinapayi. Yitjurilaku walyja ngantitja tjilirratjarra tjuṭa tjananya Tjuulalu altingu, puliina ini Yilayangka tjungurrinytjakuya. Puli murrpuwanaya ngarala wañingu. Tjana ngarala tjananya nyangu puliinangka munkarra puli murrpu kutjupawana, Pilitjiyanya ngurrara tjuṭa ngalya ngarala wañingitjangka, tjilirratjarra tjuṭa, tiṇa. Tjarukatirra puliinangka ngururrpa ngalya ankula ngarapayi Pilitjiyanya ngurrara watı waṭawara, ini Kulayitjanya.

Tjilirratjarrangku ngarala altipayi, Yitjurilaku walyja ngantitja kutjungku tjilirratjarrangku ngalya ankula pikangku pungkunytjaku. Kulayitjanya paluru manpaṭa ngarangi, yayina ngalkilpayi mantarra nguwanpa tjarrparra ngarangi. Mukati yayinatjarraṭarra ngarangi. Yayinatjanu rungkara yirintja mangulpa yiri tiṇatjarra marangku kanyiñingi. Tjilirratjarra kutjupangku yurrunpangku palumpa kutitji ngalkilpayi katiyankula kanyilpayi.

Yalatji ngarala Kulayitjalu tjananya Yitjurilaku walyja ngantitja yaltirra watjanu, “Wiyalanku tjuṭangku pikangku pungku, kutjarralu kutjulingku pikalu pungku, wiinarrikitjangku. Nyurrangarrimpa tjilirratjarrangkuṇi pikangku pungkula mirrintankunytjala, nganañatju nyurrangarrimpa waarrkana tjuṭa nyinaku. Ngayuluṇa tjinguru nyurrangarrimpa tjilirratjarra yiluntananyingka, nyurrangarrilampatju waarrkana nyinaku. Kalalpi, ngalya arra!,

ngayunyatjun pungkula iluntankukitja.” Tjuulalutarraya Kulayitjaku wangka kulira ngulungulurringkula nyinangi, pikakitja Kulayitjakutu ngalya ankunytjawiya.

Tapitalu kulira Kulayitjanya pungkukitja yun-ytjurringu

1 Tjamiyula 17:12-40

Alatji Kulayitjalu tjananya rawangku altipayi, tjilirratjarra kutju ngalya wantirriyantjaku. Puratiyi tjikitjipalangka alatjingku putu altingu. Kanya wati Tjiitjiyilu ngurra Pitjiliyamangka nyinarra Tapitanya tjanampa wantirriyanu tjilirratjarra tjutakutu. Wantirriyalkitjangku alatji watjanu, “Mayi ngaatjanya katirra tjanampa tjilirratjarra tjutakutu yuwa! Yungkula nyuntupa kaaka mankurrpa palya nyinanyingka, nyakulani ngalya yankulani tjakultjurra!”

Kala aalilingku Tapitalutarra ankula tjananya nyangu, Yitjurilaku walytja ngantitja tjuta puli murrpuwana ngarala waninytjala, Pilitjiyanya ngurrara tjutatarru puli murrpu kutjupawana ngalya ngarala waninyintjala. Mayikamu kuka panyapa ungkula wayintarringu tjilirratjarra tjuta ngarala waninytja nyakukitja, palumpa kaaka mankurrpatarra. Palunyatjanu Kulayitjalu ngalya ankula altingu Yitjurilaku walytja ngantitja kutjungku maa ankula pikangku pungkunytjaku.

Alatji altinyingka tjilirratjarra tjuta ngulu tinarringkula malaku ngalya tjalkalungkula nyinarra waningi. Tjilirratjarra tjuta tjananya

Tapitalu tjapiṇu, “Nyaaku Pilitjiyanya ngurrara waṭawara paluru nyurranya puṭu altinyi? Kutjulu palya ankula pikangku pungkunytjaku. Paluru mungutja, Katutjaku ngurrpa, wiyalampa mayutju nyinaku Katutjaku tjilirratjarra tjutaku.”

Tjilirratjarra mankurrpangku Tapitaku wangka kulira katirra Tjuulanya tjakultjunu. Tjuulalu kulira Tapitanya altingu. Tapitalu Tjuulakutu ankula watjaṇu, “Pilitjiyanya ngurrara palumpa wiyalala ngulu nyinanytjaku. Ngayululpina ankula mirri pungku.”

Tjuulalu yangupala Tapitanya nyakula wiya watjaṇu. Palunyangka Tapitalu Tjuulanya marrkuṇu, wati palunya ankula pungkukitjangku. Alatjingku marrkuṇu, “Tjiipi purinytju kanyilkitjangkuṇa layina kutjupa tjutaṭarra mirri pungkupayi. Pikaṭi paluru tjananinya patjara iluntankupayingka, mayutju Katutjaluni kanalpayi. Palunyatjanuluṇi kuwarri kanalku, Pilijija ngurrarangkuṇi mirri pungkupayingkamarra.”

Palunyatjanu Tjuulalulpi yuwa wangkangu. Paluru watjaṇu Tapitanya palumpa yayina ngalkilpayi tjutangka tjarrpanytjaku. Tapitalu tjarrparra puṭu yarrkara watjaṇu, “Wiya, palipayingkatju tiṇangku. Wiyatju yayina palunya walytja.” Yirriwiltjira tjangari nguwanpa mantjira palumpa kuturuṭarra katiyanu. Murraṇilu tjiipiku mayutjungku tjangari nguwanpa katiyankupayi layinaṭarra rungkalkitjangku. Tapitalu puli wirulypa payipala mantjira, tjangari nguwanpa mantjira

tjarukatirra maa anu, Kulayitjanya rungkara iluntankukitja.

*Tapitalu Kulayitjanya rungkara iluntanku
1 Tjamiyula 17:41-51*

Tapitanya maa ankunytja nyakula Kulayitjanyatarra palumpa kutitji katiyankupaiṭarrapula tjungu ngalya anu, pikangku pungkukitja. Ilarringkula Kulayitjalu Tapitanya yangupala wiima nyakula kuṭuru nguwanpatjarra nyakula alatji panypurangu, “Nyaakun wiimapatu watiya kanyini?, papa nguwanpatjun pungkukitjangku?” Tapitanya warrkira alatji watjanu, “Ngalya arra!, pungkulanta mirri wañinytjaku, papa tjkipaka tjutangkuntaya ngalkuntjaku, tjułpu tjutangkuṭarra.”

Tapitalu watjanu, “Ngayunyatju wakara iluntankukitja ngalya yananyinu, kulaṭa tjuuła waṭawaratjarrangku. Kanya ngayuluṇanta Katutjakunu kunpu tiñatjarrangku rungkara iluntara unytju kuntara kilytjuntanku, mayutju tiñatju Katutjalu rapanytju. Ngayuluṇanta iluntananyingka, nganti nyurrangarrimpa waarrkana tjutalpilatju pungkula iluntanamalpa. Palunyatjanu tjananya mirri tjuta layina tjutangku tjułpu tjutangkuṭarra ngalkula wiyanmalpa. Mayutju Katutjalulanyatju ngalkintu rapanytju palya nganañatju nyurrangarrinya mirri pungkuyinamalpa.”

Kulayitjanya piyuku ngalya ankunytjala, Tapitalu nanpangka puli kutju mantjira tjangaringka

tjarrpatjunkula maa tjalkalungkula ilarringkula ngalya rungkaṇu. Alatji rungkaṇingka punkara mirrilpi ngarringi. Paluru maa tjalkalungkula Kulayitjaku tjuula waṭawara yurrkura yunytju kuntara kilytjuntanu. Alatji Tapitalu Kulayitjanya rungkara pulitjarrangku iluntanu.

*Pilitjiyanya ngurrara tjutaya tjalkalungku
1 Tjamiyula 17:52-54*

Pilitjiyanya ngurrara tjutaya Kulayitjanya mirri ngarrinytja nyakula tjalkatjalkalungu ngulu pungkupayingka. Yitjurilaku walytja ngantitja tjutangku tjananya wanara mirrintarinangi tawunu Yikurunalakutu, tawunu Kaatjakututarra. Alatji tjanaya tjananya mirrintarinarra małakuya ngalya ankula tjilirratjarra tjutaku kaliki tjutangka tjarrparra mani, yulytja tjanampa tjanaya mantjira kanyiṇingi, Yitjurilaku walytja ngantitja tjutangku.

Tapitalu kata Kulayitjanya kuntara kilytjuntankula katingu Tjarutjalumakutu, nintilkitjangku. Kulayitjaku tjuula waṭawaratarra Tapitalu katirra kanyiṇingi.

*Tjuulanya Tapitaku mingarrtju nyinamalpa
1 Tjamiyula 18:—2 Tjamiyula (2 Samuel) 1:*

*Tapitanya anta Tjaanatjanya małpararra nyinamalpa
1 Tjamiyula 18:1-5*

Tjuulalu Tapitanya altirra watjaṇu, “Nyuntu ngayuku ngurrangka waarrkarringkula nyinanytjaku, ngurra walytjakutu yankunytjawiya.”

Palunyangka Tjuulaku katja Tjaanatjanya Tapitaku yunyparringkula nyinangi. Alatji yunyparringkula yulykarra nyinanytjatjanungku Tapitanya alatji watjañu, “Kutuñanta malpa nyinamalpa, purintjtutju malpa nyinamalpa. Ngayulunanta kuyarringkula watjara wantintjawiya.” Palunyatjanupula malpararra nyinangi.

*Tjuulalu Tapitanya wakanutjangka tjirrkalku
1 Tjamiyula 18:6-30; 19:; 21:; 23:; 24:; 26:*

Tjuulalungarriya kuļatjarra tjuña Pilitjiyanya ngurrara tjuta mirri pungutjatjanu Tjarutjalumakutu malaku anangi. Yitjurilaku walytja kungka ngantitja tjutangku tawunu tjutatjanulu tjakulpa kulira pukularrirra wanañu tjananya walkuntjakitjangku. Tjilirratjarra tjutangka ilawana taanytjirrirra inkayinangi. Alatji tjana inkayinangi, “Tjuulalungarri tjananya tjilirratjarra tjawutjuna kutju iluntanangi, kanya Tapitalungarri tjananya tjilirratjarra tjawutjuna tjuña iluntanangi. Tapitanya palyalingku.”

Alatjiya ngunytji watjañu Tapitanya pułkapungkunyingka kulira, Tjuulalu Tapitaku kuyarringkula alatji kulinu, “Tapitakuya puntura yunyparringanyi. Tjinguru Tapitanyalpiya mayutju tina nyinatjunku ngayunyaniya wantirra, anangu tjutangku.” Palunyatjanu Tjuulanya Tapitaku kutu kuyarringkupayira.

Palunyatjanu Tjuulaku ngurrangka Tapitalu kiitawu nguwanpa wangkatjingalpayi, Tjuulanya atanmankukitjangku. Palunyangka

Tjuulalu Tapitaku mirrpantjungku mangulta wakara iluntankukitjangku puŋaŋu. Tapitalu nyakula tjirrkaŋu. Piyuku Tjuulalu mangulpa palunya mantjira Tapitanya wakalkitjangku puŋaŋu, piyuku tjirrkantjala. Palunyatjanu Tjuulalu Tapitanya ngurra kutjupakutu wantirriyaŋu. Wantirriyara tjuŋaku mayutju nyinatjunu tjawutjuna kutjuku, ngurra waŋma Tapitanya kutu nyinanytjaku.

Tapitalu tjananya pika tjuŋakutu katipayi. Tapitaku waarrkana tjuŋangku tjananya pikangku pungkula ngulutjingara wantirriyalpayi, kutjupa ngurrara tjuŋa. Mayutju palya nyinanytjala, aŋangu minga Tapitaku yunypa nyinangi, Yitjurilaku waltyja ngantitja tjuŋa, kanya Tjuulanya unytjuwiya nyinangi kutu.

Tjuulalu yurrunpa watjaŋu palumpa yuntaŋpa yurruntitja Tapitaku ungukukitjangku miiṭararrapula nyinanytjaku, Kulayitjanya Tapitalu iluntanutjangka. Tapitaku ungukukitjangku ngunytji tjangkura wati kutjupalpi ungu.

Palunyatjanu Tjuulaku yuntaŋpa kutjupa ini Maakulanya Tapitaku yunytjura nyinangi. Palunyatjanu Tjuulalu Tapitanya Pilitjiyanya ngurrara tjuŋangku iluntankunytjaku kulinu. Kulira waarrkanangka watjanu Tapitangka ankula alatji tjakultjunkunytjaku, “Nyuntu ngayuku waputju nyinaku yuntaŋpa Maakulanyaŋanta unganyingka. Nyuntu Pilitjiyanya ngurrara antaṭa kutju mirri wakara ilytjanpa kuntara ngalya katinytjaku.

Ngalya katirrañin ungzunyangka unntalpananta ungu.” Tjuulalu kuliñu, “Tapitalu kutjungku tjananya mirri punganyingka, Pilitjiyanya ngurrara tjutangkuya ngururrtjura ngaparrtjingku mirri pungunytiaku.” Tjuulaku wangka unntalpa ungzukitjalu watjantja waarrkanalu tjakultjunanyingka, Tapitalu kulira yunyparringu.

Palunyatjanu Tapitalu tjananya palumpa kulañatjarra tjuta katingu Pilitjiyanya ngurrara tjuta pikangku pungunytiaku. Paluru tjana tuu antata tjuta tjananya wakara iluntara ilytjanpa kuntara mantjiñangi. Ilytjanpa palunya tjuta ngalya katirra Tjuulala kurungka kaantamilara ungu. Palunyangka Tapitanya piyuku uti nyakula putu kuliñu. Yalatji palurulpi kuliñingi, “Katutjalukampa Tapitanya yanñayantara kanañingi.” Palulanguru Tjuulalulpi palumpa unntalpa Maakulanya Tapitanya ungu.

Tjuulalu tjananya watjañu palumpa waarrkana tjutangka, Tjaanatjangkatarra, Tapitanya mirri pungkukitjangku. Tjaanatjalu Tjuulanya marrkuñu wantinytjaku, palunyangka Tjuulan-yara yaltururrirrira pungkuwiyangku wantikit-jangku watjañu.

Tapitanya piyuku yankula Tjuulaku waalangka waarrkarriyankupayi. Mamu panyapangku Tjuulanya ngulutjingañingka, Tapitalu atanmankukitjangku mutjika wangkatjingañingi. Panyapa Tjuulalu marangku mangulpa kanyira Tapitanya añangu yuti wakalkitjangku putañu. Tapitanya ngulu tjirkara pakara tjalkalungu. Tjuulalu

piyuku aŋangu uti wakalpayingkamarra,
Tapitanyaŋarraya palumpa waarrkanaŋarra
tjuŋa tjalkalungu tawunu Naapakutu.

Ngurra ngaa palula tjaatji ngarangi. Tjaatjiku mayutju tiŋangku ini Yayimalikalu kanyilpayi. Tapitalu Yayimalikangka ngatjiŋu mangarriku, kanya Yayimalikalu watjaŋu, “Mangarri ngayukunu walytjawiyana kanyini. Mangarri tjaati kutju ngarrinyi tjaatjingka ngarripayi. Luwu alatji ngaranyingka, miiŋangkanyurra kuwarri ngarrintjawiyalu palya ngalkunytjaku.”

Tapitalu watjaŋu, “Wiyalatju kuwarri miitawana ngarringi.” Palunyatjanu Yayimalikalu palumpa ngurrangka tjarrparra puriiti tjaati tjaatjingka tjunkula wantintjtjanu mantjirara Tapitaku yungu. Tapitanya maralpa ngulu ngalyankula tjaatji palulakutu yanu, Tjuulalamarra. Paluru Yayimalikanya tjapiŋu, “Kulata, tjuulan kanyini?” Yayimalikalu Kulayitjaku tjuula waṭawara tjaatjingka ngaratjunkula wantingutja mantjira Tapitaku yungu. Palunyatjanu Tapitanyaŋarraya tawunu Kaatjakutu ankula nyinangi. Tapitanya ngunyti rama nguwanpa nyinangi, Pilitjiyanya ngurrara tjuṭangku mirri pungkupayingkamarra.

Palunyatjanu Tapitanyaŋarraya tawunu Kaatja wantirra ankula kulpingka nyinangi. Palumpa kaaka tjuṭaya Tjuulakutarra ngulurrirra Tapitakutu tjungurringu. Tjutarringkulaya nyinangi. Palunyatjanuya manta Muwapakutu ankula nyinayinu.

Palunyatjanuya tawunu Kiilakutu ankula tjananya pikalu pungu, Pilitjiyanya ngurrara tjuta. Alatji tjananya pikangku pungkulaya wantirriyara Kiilanya ngurrara tjuta kananu. Palunyatjanu Tapitanyaṭarraya Kiilangka nyinangi. Palunyangka Tjuulalu palumpa tjilirratjarra tjuta altingu, Tapitanyaṭarra tjananya wanaraya pungkukitjangku.

Tjuulanyaṭarraya ngalya yananyingka, Tapi-talungarriya tjakulpa kulira kurranu anu puḷi murrpuwana nyinakitja. Palunyatjanu Tjuulaluṭarra tjanampa puṭu ngurriraya małaku anu ngurrakutu. Alatji Tjuulalungarriya Tapitanyaṭarra mirri pungkukitjangku tjutangara wanapayi. Tjuulalutarra tjananya pungkukitjangkuya wanarankula ngurrrpa ngarripayi, puliinangka ngurrrpa, yurilta. Kutjarrangara Tapitalu Tjuulanya urilta, kulpingkaṭarra ngarriyananyingka wantingu, mirri pungkuwiyalu. Katutjalu mayutju nyinatjunkunytja kulira wantipayi mirri pungkuwiyangku. Tjuulalamarraya Tapitanyangarriya ngurra kutjupawana nyinayi-nangi.

*Tjuulalu kungka mamukutu wangkapayingka
tjapilku*

1 Tjamiyula 25:1—28:25

Tjilpi Tjamiyulanya tulku mayutju rawa nyinarra wiyarringu. Anangu tjutaya ularra palumpa ngurrangka tawunu Ramangka tjunutjunu. Palunyatjanu Pilitjiyanya ngurrara tjuta tjilirratjarra tjuta ngalya anu, Yitjurilaku waltyta ngaṇtiṭja pikangku pungkukitja.

Tawunu Tjunimangkaya ngalyankula nyinarra wañingi, Pilitjiyanya ngurrara tjuta.

Palunyatjanu Tjuulalu Yitjurilaku waltyja ngan̄titja tjūta al̄tingu, pika pungkukitja tjungurrinytjaku. Tjungurringkulaya nyinarra wañingi, puli ini Kilpuwangka. Pilitjiyanya ngurrara tjilirratjarra tjūta tjutarrinytjala tjananya nyakula Tjuulalu ngulungulurringkula pūtu kulira Katutjanya tjapiñu. Katutjalu kulira wantingu. Mungangka ngarirra tjukurrrpa nyakunytjala Katutjalu nintilwiyangku wantingu. Katutjaku wangka nintilpayi kutjupalu wiya ngalyankula Tjuulanya nintiñu. Yulta Tjuulalu Katutjanya pūtu tjapira wantingu.

Yurrunpa tjananya Tjuulalu añangu kuya tjūta mamukutu wangkapayi tjūta, payira wantirriyanu ngurra kutjupangkalpiya wañma nyinanytjaku. Pilitjiyanya ngurrara tjutangku tjananya pungkutjipingka, Tjuulalu Katutjanya pūtu tjapira waarrkana tjutangka watjañu, ankula kungka mamukutu wangkapayiku ngurriira mantjintjaku. Ngurrira nyakula ngalya yankulaya Tjuulangka alatji watjañu, “Tawunu Yintungka kungka mamukutu wangkapayi nyinanyi.”

Tjuulanya mantarra kutjupangka tjarrparra mungangka anu wati kuyakuya nguwanpa kungka palulakutu. Tjunguya anu waarrkana kutjarra. Yini watjantjawiyangku Tjuulalu kungka palula tjapiñu, mamungka al̄tirra tjapilkitjangku. Tjuulalu kutu tjapiñu alatji, “Wati mirringka wangkakitjanä unytjurringanyi. Yiniñanta tjapilku?” Kungka

paluru wati kutjupa wiyawananangku kulira Tjuulanya alatji marrkuṇu, “Kulila alatji! Mayutju tiṇangku Tjuulalu watjaṇu, aṇangu mamungka wangkapayi tjutalanyatju mirri pungkukitjangku, ngurra waṇmalatju ankula nyinanytjawiyangka. Nyaakuṇin tjapini, mirrikutu wangkakitjangku? Wangkanyingkana Tjuulalutarraṇiya mirri pungkutjipingka.” Tjuulalu tjukarurru alatji watjaṇu, “Katutjangka mirangka tjukarurruṇanta watjaṇi, wiyaṇanta tjakultjunku mayutju Tjuulangka. Wiyantaya ngalya ankula mirri pungku.” Kungka paluru kulira tjapiṇu, “Mirri nganakuṇangku tjapilku?” Tjuulalu watjaṇu, “Tjamiyulaku.”

Kungka paluru tjukurrpa nguwanpa nyakula mirrangu Tjamiyulanya nyakula. Tjuulangkalpira watjaṇu, “Nyaakuṇin ngunytji watjaṇu? Nyuntu yilta mayutju tiṇa Tjuulanya nyinanyi.” Tjuulalu watjaṇu, “Ngulurriwyangkuṇi tjukarurru watjala! Nyaa nguwanpan nyangu?” Kungkalu watjaṇu, “Tjilpiṇa nyanganyi ngalya ananyingka, kuuta tiṇatjarra.” Palunyatjanu Tjamiyulalu Tjuulangka alatji tjapiṇu, “Nyaakuṇin altingu?, ngayunya wantiwyangku.” Tjuulalu watjaṇu, “Putuṇa kulinji, Katutjaluni wantinytjala. Pilitjiyanya ngurrara tjutaya ngarala waṇinyi nganananya pungkukitja. Yaalytjinkulatju? Nyuntulpiṇi nintila!, tjukarurrulatju tjananya pungkula wantirriyantjaku.”

Tjamiyulalu Tjuulangka watjaṇu, “Nyuntu wiyawana nyinangutjangkanta Katutjalu wantingu. Palunyangka wiyanin altirra

tjapintjaku, nintirrikitjangku. Waṭalpi, Tapitanyalpi mayutju tiṇa tjanampa nyinaku. Tjintungka nyurrangarrinya Pilitjiyanya ngurrara tjutangku mirri pungku, nyuntunya, nyuntupa katja tjutatarra. Paluru tjana nyuntunya, tjilirratjarra tjutatarra tjananya mirri pungkuyinkula ngulutjingara wantirriyalku, Yitjurilaku walytja ngantitja tjutanya.” Wangka alatji kulira Tjuulanya punkara ngarringi ngulungulurringkula. Ngurra palula mangarri ngalkura Tjuulanyaṭarraya małaku anu mungangka, palumpa tjilirratjarra tjutakutu.

Tjuulanya katjararranpaya pika pungkula wi-yarringku

1 Tjamiyula 31:1-13; 2 Tjamiyula (2 Samuel) 1:1-18

Tjintungkaya Pilitjiyanya ngurrara tjuta ngalya ankula, Tjuulanyaṭarra tjananya Yitjurilaku walytja ngantitja tjutatarra pikangku mirri pungkuyinangi. Tjuulaku katja mankurra kutju tjananya wanaraya pungkula iluntanu, Tjaanatjanya, Yapinatapanya, Malkitjuwanya. Tjuulalutarra waarrkana kutjupa tjutangku tjananya Pilitjiyanya ngurrara tjuta pungkuyinangitjangka, Pilitjiyanya ngurrarangku puwanarratjarrangku Tjuulanya kultu wakanu. Palumpa tjilirra katiyankupayingka Tjuulalu watjaṇu, “Pilitjiyanya ngurraralunī kutu wakara tjunkupayingka, tjuuḷa waṭawaratjarrangkuṇi parrpaṭu wakara iluntarra!”

Yangupala paluru kulira ngulurringkula wakalwiyangku wantingu. Palunyangka Tjuulalu tjuula waṭawara walytja ngaratjunkula yiri kuṭutukutu ngalya ngaratjunu. Alatji ngaratjunkula ngalya punkaṇu, tjuula yirikutu. Palunyangkara kuṭutungka ngalya tjarrparra witjurrulypa pakanu murrpungka. Alatjiya mirrirrinytjala angupala kutju tjalkalungkula Tapitangkatarra tjananya tjakultjunu. Kuliraya Tapitanyaṭarra palumpa kuļatjarra tjuṭa ularra yurrukulira ulangi. Yurrukuliraya mangarri ngalkuwiyangku wantingu. Mungarrinytjala Yitjurilaku walytja ngantitja tjuta puntu pika pungkula mirrirringutjangka, alatjiya yurrukulira ulangi. Tapitanya pulampa rawa yurrukulira ulangi Tjuulaku, anta Tjaanatjaku.

*Yitjurilaku ngantitja tjutaku Tapitanyalpi
mayutju tinarringku*
2 Tjamiyula 2:—8:

Tapitanyaya mayutju tiṇa nyinatjunku
2 Tjamiyula 2:1-10

Tapitalu Katutjanya alatji tjapiṇu, “Yaalytjinkuṇa? Tjinguru Tjarutjalumangkana wiya nyinaku? Tawunu kutjupakutu ngayulu ankula mayutju tjanampa palunya ngurrara tjutaku nyinaku?” Mayutju Katutjalu watjanu, “Yuwa, tawunu Yipurunakutu ankula nyinama!” Palunyangkaya Tapitanyaṭarra palumpa miṭa kutjarra Yayinumanyakamu Yapikalanya tjungu anu ngurra Yipurunakutu, palumpa kuļatjarra tjuṭatarra. Tapitaku kuļatjarra tjuṭa

ngalyankula tawunu Yipuranangka ila nyinangi, tawunu kutjupa tjutangkaṭarra. Palunyangkaya Tjuutaku walytja nganṭitja tjutangku ngalya ankula Tapitaku yunyparringkula mayutju tiṇa nyinatjunu, tjira katangka intira.

Yurrunpa Tjuulaku kulatatjarra tjutaku mayutju ini Yapinalu Tjuulaku katja Yitjiputjitjanya katingu, karru Tjuutanangka munkarra tawunu Mayanamiktu. Tawunu palula Yapinaluṭarra Yitjiputjitjanya mayutju tiṇa nyinatjunu, Yitjurilaku walytja nganṭitja tjutaku. Tjuutaku walytja nganṭitja tjutaku tjanampa wiya paluru mayutju tiṇa nyinangi, Tapitanya tjanampa mayutju tiṇa nyinangi. Yitjiputjitjanya tjanampa mayutju tiṇa nyinangi, kuḷi kutjarra.

*Tapitalungarriya mingarrtju tjuta pungku
2 Tjamiyula 2:12-23; 3:22-39; 4:1-12; 5:1-10*

Yitjiputjitjaku waarrkana tjutangkuya kulatatjarra tjutangku, Tapitaku waarrkana tjutangkuṭarrayanku pikangkuyanku pungkupayi. Pikaya punganyingka yutuyuṭu wati Yapinalu yangupala Yatjayilanya wakara mirrintanu. Palunyangka Yatjayilaku kaakangku ini Tjuwapalu Tapitaku waarrkanangku, Yapinanya ngaparrtjingku tjuulangku wakara mirrintanu, Tapitanya wapalpa nyinanyingka. Yalatji mirrintankunyangka Tapitanya Tjuwapaku kuyarringu. Yapinaku Tapitanyaṭarraya ularra tjunutjunu.

Tapitalu Katutjanya tjapiñu, Tjuwapanya ngaparrtji pungkunytjaku, mayutju Yapinatjirratjangku. Yapinanya wiyarrinytjala ngan̄ti, Yitjiputjtjaku waarrkana kutjarrangkupula mingarrtjurrirra kuliñu Yitjiputjtjanya mirri pungkukitjangku, Paanalukamu Rikapalu. Ankulapula waalangka yarrka tjarrparra Yitjiputjtjanya kutunpa ngarrinyingka mirri pungu. Lirripula kuntara kata kilytjuntankula katingu tawunu Yipuranakutu, mayutju Tapitalakutu, palumpa ngulytjurrikitjangku. Tapitalu yunyparrinytjawiyangku nyakula mirrpañarrirra payinu pulanya, mirri pungkupayi kutjarra. Palumpa kulañatjarrangka Tapitalu Yitjiputjtjatjirratjangku watjanu, ngaparrtjingku pulanya wakara mirrintankunytjaku.

Palunyatjanu Yitjurilaku walytja ngan̄titja, mayutju tjuña Tapitakutu ngalya ankula yunyparringkula watjanu, “Walytjararrala nyinanyi. Tjuulanyalampa mayutju tiña nyinanyingka, nyuntulanyatju mayutju palyangku kulañatjarra tjuña pikakutu katipayi. Mayutju Katutjalunta yurrunpa watjanu, mayutju tiñalampatjun nyinanytjaku.” Yalatji tjuñangku pulkapungkula Tapitanya mayutju tiña nyinatjunu. Palunyatjanu Tapitanya tjanampa Yitjurilaku walytja ngan̄titja tjuñaku mayutju tiña nyinangi. Ngurra Yipuranangka kuli tjapanpala nyinarra Tapitalu tjananya palumpa kulañatjarra tjuña katingu, Tjarutjalumanya ngurrara tjuña mirri pungkukitjangku, Tapitakuya kutu rawa mingarrtju nyinanyingka. Paluru tjana pungkula tjananya

militjiti tjuṭa mirrintara, Tapitanyalpi Tjarutjalumangkalpi nyinangi.

Katutjaku tjaatji palyalkitja Tapitanya yunytjurriku.

2 Tjamiyula 6:1-15; 7:1-12

Katutjaku pukutjungka puli wirulypa kutjarra ngarringi. Pukutjuya kulira Tapitanyaṭarra anu mantjira ngalya katikitja. Yapinatapaku ngurrangka mantjiraya wakinangka kalpatjunkula Tjarutjalumakutu katingu. Wakina katirra ngaratjunkula tjawirrilya pungkula kutjalpayi. Tjawirrilyi kutjupa piyku pungkula kutjalpayi Katutjanya pulkapungkukitjangku. Wakina Katutjaku pukutjutjarra katiyankunytjala ilawanaya taanytjirririnkupayi, Tapitanyaṭarra. Yalatjiya taanytjirrirra tjawirrilyi kutjarinu, Katutjanya pulkapungkula puukutju palunya katiyankula, puukutju palunya tjukarurruwiyangku, katintjtala, Katutjalu tjanampa mirrpañarrirra pungkutjipingkamarra.

Yalatjiya Katutjaku puukutju Tjarutjalumakutu katirra tjunu. Mayutju tiñaku waalangka Tapitalu nyinarra Katutjaku tjaatji palyalkitjangku wati Natjananya yalatji watjanu, “Ngayunyana waala palyangka nyinanyi, Katutjaku puukutju puli wirulypa kutjarratjarra kalikingka ngarrinyi. Waala palyangka ngarrimara.” Katutjaku wangka watjalpayingku Natjanalu watjanu, “Panyapan kulintjatjanungku palyala!, mayutju Katutjalunta tjukarurru nintilku.”

Mungangka Natjananya anku ngarrinyingka Katutjalu yalatji watjañu, “Tapitalakutu ankulara alatji tjakultjurra!, Tapita, nyuntu wiya tjaatji ngayuku palyara ngaratjunkunytjaku, nyuntu mirirringanyingka ngan̄tingku nyuntupa katjangkulpi tjaatji ngayuku palyalku. Ngayuluña tjananya mayutju Katutjalu an̄angu ngurra tjuṭawana nyinanytja tjuṭa tjakultjunku, nyuntu mayutju tiña ngayuku palya nyinanyingka. Ngayuluña nyurranya manta ngaangka purinypa kanyilku, kuya tjutangku nyurranya ngalya ankula mirri pungkutjipingkamarra. Nyuntu mayutju tiña nyinanyingka, kutjupa tjuṭangku nyurranya wiyaya ngalya ankula pungkula wantirriyalku.”

*Katutjalu watjalku Tapitaku walytja ngantitja
tjuṭa nyinatjunkukitjangku*

2 Tjamiyula 7:13-17

Katutjaku wangka Natjanalu Tapitangka kutu alatji tjakultjunu, “Nyuntupa katjalutju ngayuku tjaatji palyara ngaratjunku. Katja paluru mayutju tiña nyinarra wiyarrinyingka, palumpa katjaña tjanampa mayutju tiña nyinatjunku. Palunya nyinarra wiyarrinyingka palumpa katjaña tjanampa mayutju tiña nyinatjunku. Alatji nguwanpaña tjananya nyinatjunku nyuntupa walytja ngantitja tjuṭa kutuya mayutju tjuṭa nyinamalpa. Tapita. Nyuntupa katja mayutju tiña nyinarra wiyawanganngku palyantjangka ngayulu paapa an̄angu nguwanpangku itjipungku, tjukarurrulkitjangku. Wiyanña wantikatiku

Tjuulanya nguwanpa, kutuña purinypa kanyilku.”

*Tapitalu kuya palyalku
2 Tjamiyula 11:*

*Tapitalu Patjipanya tjulyara kanyilku
2 Tjamiyula 11:1-13*

Tapitaluṭarra tjananya palumpa tjilirratjarra tjuta ankula, tjutangara tjananya kutjupa kutjupa tjuta mirri pungkula ngulutjingara wantirriyalpayi. Palunyatjanungku tjananya ngurrangka nyinarra Tjuwapanyatarra palumpa tjilirratjarra tjuta wantirriyanu pikangku tjananya pungkuyinkunytjaku. Ngurrangka nyinarra Tapitalu waala katunguru nyangu kungka palya, kapi yurungka walytjalungku paltjilkitja ngaranyingka. Nyakula palumpa waarrkana wantirriyanu, kungka palunya yalṭirra ngalya katintjaku.

Kala waarrkanangku kungka Patjipanya ngalya katingu, wati Yurayaku miita. Tapitanyara yunytjurringkula kanyira piyuku iyanu ngurra walytjakutu. Ngula Patjipalu waarrkana piipatjarra wantirriyanu, Tapitalu riitarirra kulintjaku, Tapitaku pipirri ngula yutirrinyingka.

Wati Yurayalu Patjipaku miitangku tjananya ngurra wañma pikangkuya punganyingka, Tapitalu waarrkana wantirriyanu, Yurayanya alṭirra ngalya katintjaku. Yurayanya ngalya ankunyingka Tapitalu watjanu, ngurrakutu ankula palumpa miiṭangka antantantjaku, Patjipanya kanyintjatjanungku

tjakultjunkunytjawayangku. Yurayanya ngurrakutu ankula ngarrinytjawiya ngururipa ngarringu. Tjilirratjarra kutjupa tjutangka tjananya Tapitaku ngurrangka, mungawinkiya tjungu pikakutu malaku ankukitja.

Tapitalu watjalku Yurayanya mirri pungkunyt-jaku

2 Tjamiyula 11:14-27

Palumpa miitangka ngarrinytjaku Tapitalu wati Yurayanya putu witunu. Putu witura piipa wakara mungawinki Yurayaku yungu, malaku katirra yungkulyantjaku Tjuwapaku, tjilirratjarra tjutaku mayutjuku. Piipangka yara alatji Tapitalu wakanu, kungka Patjipanya kutu kanyilkitjangku, “Tjuwapa. Wati Yurayanya watjala!, yurrunpa ngaranytjaku pikangku pungkukitjangku. Paluru tjananya punganyingka ngan**ṭ**irrirraya kumpila!, wantirra nyakunytjaku, kutjulpi ngarala tjitjanytjaku, pungkunytjaku warrmala kutjupa tjutangkuya.”

Kala palunyatjanu Tjuwapalutarraya Yurayalu pikangku maa ngarala pungkuyananyingka yurrunpa wantirra malaku anu. Palunyatjanu kutjulpiya warrmala kutjupa tjutangku Yurayanya ngururrtjura mirri pungu. Yurayanya ilungutjangka Patjipalu kulira yurrukulira ulangi palumpa miitajirratja. Ngula Tapitalu yaltingu palumpa miitälpi Patjipanya nyinanytjaku. Tapitaku ngurrangka nyinarra Patjipalu katja mantjinu. Yalatji Tapitalu

wiyawanangku palyanuŋtjangka, Katutjanyara mirrpaŋpa nyinangu.

*Natjanalu Tapitanya marrkulku
2 Tjamiyula 12:—24:*

*Natjanalu Tapitanya kuru watjalku
2 Tjamiyula 12:1-12*

Katutjaku wangka watjalpayi yini Natjananya Katutjalu Tapitalakutu wantirriyanu. Natjanalu yalatji watjaŋu, “Yaraŋanta watjalku. Wati kutjarra tawunu kutjungka nyinaku. Kutju yulytja tiŋatjarra, kutjupa wiyakampa maralpa. Yulytja tiŋatjarrangku tjiipi tjuta, puluka tjutaṭarra kanyilku, kanya maraltu tjiipi kutju kanyilku. Tjiipi kutju palunya purintju kanyira yampura yititjunkupayi. Yulytja tiŋatjarraku waalakutu wati yanngatja ngalya anku. Palunyatjanu yulytja tiŋatjarrangku palumpa tjiipi tjuta wantirra ankula maral palumpa tjiipi ngulytju tjulyara katiku, kuka pungkula kutjalkitjangku. Pungkula kutjara yungku yanngatja palumpa.”

Tapitalu yara palunya kulira mirrpaŋarringu maralpa palunyatjirratjangku watjaŋu, “Yulytja puntutjarrangku maralpa palumpa tjiipi ngulytju tjulyanuŋtjangka mirri pungkunytjaku. Maralpa palumpa tjiipi puupala ngaparrtjingku yungkunytjaku.” Natjanalu Tapitanya yalatji kuru watjaŋu, “Nyuntu yulytja puntutjarrangku mulyaṭangku tjulyalpayi nguwanpa. Katutjalunta yalatji watjaŋu, ‘Katutjalunanta mayutju tiŋa nyinatjunu. Ngayuluŋanta miṭa tjuta, mani yulytjaṭarra yungu. Nyaatjanulun ngayuku wangka wantirra

kuya palunya palyaṇu? Nyuntu watjaṇu Yurayanyaya wantinyingka kutjupa tjutangkuya mirri pungkunytjaku. Palunyatjanun palumpa miiṭa mulyaṭangku mantjira kanyini. Palunyangka nyuntupa walytja tjuṭaya pikangka mirrirriku ngayuku wangka nyuntu wantirra Yurayaku miiṭa tjulyara kanyinutjangka. Wati kutjupangku nyuntupa miiṭa tjuṭa tjulyara kanyilku.”

Tapitalu kunṭarirra tjapintjangka kuya waniku
2 Tjamiyula 12:13-23

Tapitalu wangka palunya kulira watjaṇu, “Yilta mayutju Katutjangkaṇa kuya palyaṇu.” Natjanalulpi watjaṇu, “Kuya palunya Katutjalunta waṇiku, palunyatjanun wiyan iluku. Katutjanyan kuya palunya palyara yulpaṭankunytjatjanungka, nyuntupa katja Patjipakuṇu iluku.” Yalatji tjakultjunkula wati Natjananya ngurrankutu anu.

Patjipaku katja palunya pikatjarrarringkula pika puntutjarra ngarringi. Tapitalu mayi ngalkunytjawiyangku Katutjanya tjapiṇu, pipirri palunya palyarrinytjaku. Katjatjirratja waṭungarala yurrukulira yulangi. Katutjaku wangkawana katja palunya yilungu, palyarrinytjawiya.

Tjalumunanya pipirri yutirriku
2 Tjamiyula 12:24-25

Katja wiimapaṭu palunya wiyarringutjangka, Patjipanya yurrukulira yulangu. Palunyatjanu Tapitalu Patjipanya kutu kanyinjingitjangka

katja kutjupalpira yutirringu. Tapitalu katja palunya ini Tjalamunanya watjañu. Mayutju Katutjanya pipirri palumpa yulykarra nyinangi.

*Tapitaku katja kutjarrangku kuya palyalku
2 Tjamiyula 13:1-21; 13:23-29,37-39; 14:21-24;
15:1-15; 16:15-23; 18:1,2,14-15,33; 21:15-22*

Tapitaku katja Yamananya palumpa nyarrumpaku, kungka Tamaku yunytjuringkulara nyinangi. Yaltikitjangku puṭu kulira pikatjarra nguwanparringu. Palumpa paapangka Tapitangkara tjapiṇu, palumpa nyarrumpa Tamalu ngalya yankula Yamanaku mangarri kutjara yungkunytjaku. Palunyatjanu Tamalura palumpa kaaka Yamanaku mangarri kutjara piitakutu katirra yungu. Yamanalu palumpa nyarrumpa małanypa tjapiṇu, tjungu ngarrikitjangku. Tamalu ngulurrirra wiya watjañu. Palunyatjanu Yamanalu witira ngarritjunkula kanyinu. Kanyira mirrpañarriirra payira wantirriyanu. Watu kutjupaku nyinakitjangku puṭu kulira yularra yanu, kaaka kutjupangka tjakultjunkukitja, Yapatjalumala. Tjakultjunkunytja kulira Yapatjalumanya palumpa kaakaku Yamanaku mirrpañpa, pika nyinangi.

Yiiya kutjarrarirra Yapatjalumalu Tapitanya tjapiṇu, tjunguya Tapitaku katja tjuta kutjungkarirra ngalkula pukularrinytjaku. Tapitalu wiya watjañingka Yapatjalumalu kutu tjapiṇu kaaka Yamananya kutju yankula tzungungku ngalkula pukularrinytjaku. Tapitalulpi watjañu katjararranpa Yamananyaṭarraya

palya yankunytjaku. Yankulaya tjungungku ngalkula pulakina tjikira Yamananya rarrirarrirrinytjala, Yapatjalumaku waarrkana tjutangkuya mirri pungu, nyarrumpa Tamalara kuya palyanütjangka. Yapatjalumalu tjananya tjingapungutjangkaya mirri pungu. Yapatjalumaku malanypa kutjupa tjuta pakara ngulurrirra tuungkiyi tjutangka kalparra ngurra Tjarutjalumakutu malakuya yanu. Yamananyaya mirri pungkunytjaku yalatji tjananya tjingapungkula Yapatjalumanya ngurra wanmakutu ankula nyinangi. Tapitanya yulturrirra tjulurrmankula rawa yulangi.

Tjuwapanya nyinangu tjilirratjarra tjutaku mayutju. Paluru Tapitanya tjapiñu, yankula Yapatjalumanya altirra ngalya katinytjaku. Tapitalu yuwa watjañu. Palunyatjanu Yapatjalumanya malaku ngalya yankula Tjarutjalumangkalpi nyinanytjala Tapitalu Tjuwapanya watjañu, “Yapatjalumanya ngurra kutjupangka nyinanytjaku, ngayukunungka wiya. Ngayulu wiya yuntjurringanyi palunya nyakunytjaku.” Yapatjalumanya kutu nyinangu Tapitanya nyakunytjawiya.

Yiiya kutjarra paluru ngurra kutjupangka nyinangi. Palunyatjanu Tapitanya Yapatjalumaku kalyparringu.

Yiiya puupala Tjarutjalumangka nyinarra Yapatjalumalu kuliñu mayutju tiña nyinakitjangku, anangu tjutaku. Paluru tjananya yaltirra tjingapungkupayi mayutju nyinatjunkukitjangku, Tapitanya panypurangkula. Kutjupa tjutaya

Tjarutjalumakutu ngalya yankunytjala, Yapatjalumanya tjanala tjungurrirra tjingapungku-pai mayutju nyinatjunkukitjangku.

Yalatji yañangu tjuṭalingkura ngulytjurringu. Palunyatjanu yulparirra yankula nyinangi tawunu Yipuranangka. Yipuranangkaya Yapatjalumanyaṭarra waarrkana yantaṭa kutjarra tjungu nyinangi. Tawunu kutjupa tjuṭakutu Yapatjalumalu waarrkana tjuṭa wantirriyañu, yara yalatji tjananya tjakultjunkuny tjaku, “Yapatjalumanya alpilampa mayutju tiña kuwarri nyinaku.”

Tapitaluṭarraya Tjarutjalumangka nyinarra kuliñu, Yapatjalumakuya mayutju tiña añangu tjuṭa yunyparringutjatjanungka. Palunyatjanungka Tapitalu tjananya palumpa waarrkana tjuṭangka watjanu, tjunguya pakara tjalkalungkukitjangku. Tapitalu palumpa miiṭa tjuṭaṭarra Tjarutjalumangka wantirra anu. Paluru miiṭa kutjupa tjuṭa tjananya wantikatingu ngurra yanṭayantara kanyintjaku.

Yapatjalumanyaṭarraya palumpa waarrkana tjuṭa Tjarutjalumakutu ngalya ankula Tapitaku ngurrangka nyinangi. Yapatjalumaku waarrkana Yatjiyupalalu Yapatjalumanya alatji tjingapungu, “Tapitaku miiṭa tjuṭangka nyuntulpi tjananya ngarri!, ngaangka wantikatinytja tjuṭawana.” Palunyatjanu Yapatjalumalu tjananya kanyiñu, palumpa paapaku miiṭa tjuṭa, Tapitanya mirrpanpara nyinanytjaku.

Palunyatjanu Yapatjalumalu tjananya Yitjurilaku walytja tjuṭa tjilirratjarra tjuṭa

yaltingu tjungurrinytjaku. Tjungurirraya Tapitanyaṭarra pungkukitja anu. Palunyatjanu Tapitalu tjananya palumpa tjilirratjarra tjuta wantirriyanu, Yapatjalumanyaṭarra pikangku pungkunytjaku. Watjanu tjananya wantirriyalkitjangku, “Yapatjalumanya wiyanurra mirri pungkunytjaku, witira kutjuya ngalya kati!” Tapitaku waarrkana tjutangku tjananya ngalya ankula pungkula ngulutjingara wantirriyanu. Yapatjalumanya tjalkalungkukitja watiyangka yunnguwana miyulatjarra tjalkalungu. Palunyatjanu watiyangku mangka witira waralytjunkula kanyin̄ingi. Waarrkana kutjupangku nyakula Tjuwapangka tjakultjunu. Tjuwapalu Tapitaku wangka kulira wantirra yankula waralyngarayananyingka kultu wakanu. Paluru yalatji wakanutjangka Tapitalu kulira yulangi.

Tapitanyaṭarraya malaku ankula Tjarutjalumangka mayutju tiṇa nyinangi. Ngula Pilitjiyanya ngurrara tjuṭaya tjilirratjarra pikaku tjungurringu. Palunyatjanu tjananya Tapitaluṭarra palumpa tjilirratjarra tjutangkuya, pikangku pungkula ngulutjingara wantirriyanu.

*Tapitanya tjilpirringkula mirrirriku
1 Kiunga 1:5-10,15-18,32-40; 2:10,11*

Tapitanya tjilpirrirra kunpu nyinanyingka, palumpa katja yurruntitja Ŷatunitjanya yunypa nyinangi, mayutju tiṇa nyinakitja, kanya Patjipalu kulinu, palumpa katja Tjalamunanya mayutju tiṇalpi nyinanytjaku. Tapitalakutu

ankula marrkuṇu, “Nyuntukunyuṇin yurrunpa watjaṇutjatjanungku Tjalamunanya mayutju tiṇa nyinatjurra!, Yatunitjanya mayutju tiṇa nyinatjipingkamarra.”

Tapitalu pulanya watjaṇu, tulkuṇu mayutju kutjarrangku Natjanalu anta Tjatakalu tjira Tjalamunangka katangka intira mayutju tiṇalpi nyinatjunkunytjaku. Tjatakalu Tjalamunanya mayutju tiṇalpi nyinatjunu. Tjilpi Tapitalu Tjalamunanya wangkarra nintiṇu, mayutju palya tjukarurru nyinanytjaku.

Palunyatjanu Tapitanya multunyarrirra ilungu. Tapitanya mayutju tiṇa tjanampa rawa nyinangi, yiya puutiyipala.

*Tjalamunanya mayutju tiṇa nyinamalpa
1 Kiinga 3; 4; 10:*

*Tjalamunalu ninti nyinakitjangku tjapilku
1 Kiinga 3:1-15*

Tjalamunanya Katutjaku yunytjurrirra nyinangi. Palumpa paapangku watjanutjatjanungka kulira tjukarurru nyinangi.

Tjalamunanya anu tawunu Kipiyanalakutu, mungawinki Katutjaku tjawirrilyi pungkula tjunkukitjangku. Mungangka anku ngarrirra tjukurrmananyingka Katutjalu alatji tjapiṇu, “Nyaakupan yunytjurringanyi?, ngayuluṇanta ungkunytjaku?” Tjalamunalu watjaṇu, “Nyuntu ngayuku paapaku puntura yulykarra nyinangi, palunyatjanunta tjukarurru nyinangi. Nyuntu Tapitaku tjukarurru palyara ngayunyanin Tapitaku katja ungu. Palunyatjanuṇa palumpa katja mayutju tiṇalpi nyinanyi. Ngayuluṇa

yangupala ngurrpa nguwanpa mayutju tiŋalpiŋa tjanampa nyinanyi. Tjukarurru kanyilkitjaŋa tjananya puŋu kuliltji pingka nintilaŋi! Nyuntuluŋin nintintjatjanungka kutjuŋa tjananya nyuntupa walytja yaŋangu tjuta, tjukarurru kanyilku. Wiyangka, puŋuna tjananya tjukarurru kanyilpayingkamarra.”

Alatji tjapintjala Katutjalu kulira Tjalamunuŋaku yunyparringu. Alatji watjanu, “Yunyparringanyiŋanta nyuntu manikamu yulytja tinaku tjapintjawiyangka, rawa kana nyinakitjangku tjapintjawiyangka. Panyapanin tjapintjala ngayuluŋanta puntura nintilku, ninti tiŋalpi nyuntu nyinanytjaku. Aŋangu kutjupa tjutaya nintiwiya nguwanpa nyinarra waŋinyi. Alatjītarraŋanta ungku mani anta yulytja tiŋa. Mayutju tiŋalpi nyuntu nyinamalpa, mayutju kutjupa tjutangka munkarra. Nyuntutjun ngayuku wangkaku yunytju kutu nyinanytjala, ngayuluŋanta kana kutu kanyilku. Rawa nyuntu nyinarra ngula kutju iluku.”

Katutjalu iltu panyapa watjanutjatjanungka yunyparringkula Tjarutjalumakutu ngantikutu anu. Ankula Katutjaku pukutju palula puɍi wirulypa kutjarra ngarrinyingka paluru ngarala walkunŋingi. Walkura tjawirrilyi pungkula Katutjaku tjunu.

*Tjalamunalu tjukarurru watjanmalpa
1 Kiinga 3:16-28*

Waalā kutjungka kungka kutjarra nyinangu. Ngurra palulakutu wati tjutaya ankula mani ungkula ngarrirra kuya palyalpayi kungka

palunya kutjarrangka. Palunyatjanupula tjintu palunya kutjungka muti pakurringu. Palunyatjanupula tjintu palunya kutjungka iti, katja kutjarrapula utirringu, maama kutjarraku. Mungangka kungka kutjulu katja pulangkitingka karrpira ititjunkula palira iluntanu, kulintjawiyangku.

Mungangka kanarrirra ilungutja nyakula mantjira katirra kungka kutjupangka ngarritjunu, kungka paluru anku kutu ngarriyananyingka. Ngarritjunkula pipirri kutjupa kana ngarringitja mantjira, malaku katirra piita walytjangka ngarritjunkula kanyira tjinturringu. Tjinturringutjangka kungka kutjupangku pipirri mirri nyakula putu kulira ulangi. Putu ngurrkantankula kulinu, "Wiya pipirri mirri ngaatja ngayuku katja, kungka palaku." Ankula pipirri kutjupa nyakula kungka kutjupangka watjañu, "Mirri ngaatjanya nyuntupa katja, palatja ngayuku katja." Katja kana kanyilkitjapula pikarringu. Pikarrirrapula katingu mayutju tiña Tjalamunalakutu.

Tjalamunalu kuliningitjangka pipirri mulyatangku mantjinutjatjanu watjañu ara palunya. Palunyatjanu kungka paluru ngunytjilyinu, "Pipirri kana ngaatjanya ngayukutju, mulyatangkutjun mantjinu." Kanya kungka kutjupangku watjañu, "Wiya, pipirri kana ngaatjanya ngayuku, nyuntupa ilungu." Tjalamunala kurungka pipirritjirratjangku alatjingkupula ngaparrku watjara pungu. Palunyatjanu Tjalamunalu waarrkana wantirriyañu tjuula watawara mantjira ngalya

katintjaku. Tjuula waṭawara ngalya katirra ngarala kanyiñgingitjangka Tjalamunalu alatji watjañu, “Pipirri kana palunya nguruwanan̄a kuntara kilytjuntanku. Ngururrpa kilytjuntara kuntara yangkirrpa kutjupara yuwa!, kungka kutjupaku. Yangkirrpa kutjupa kungka kutjupaku yuwa!” Kuntara kilytjuntankukitjalu watjañutjangka kungka paluru katjatjirratjalu marrkuñu, pipirriku maamalu, “Mayutju. Kuntara kilytjuntankunytjawiyalu kungka palakura yuwa!” Paluru kungka kutjupangku watjañu, “Ngayunya kutjuni kana yungkunytjawiya, kuntara kilytjuntankula ngaparrtji kutjarralinyatju yuwa!”

Paluru Tjalamunalu watjañu, “Kuntara kilytjuntankunytjawiyangku, kungka palakura yuwa!, maama palumpa walytjaku.” Tjalamunaku waarrkana tjutangku wangka palunya kulira yunyparrirra yañangu tjutangka tjakultjurinangi. Añangu tjutaya kulira yunyparringu. Tjalamunanya alatji pulkapungu, “Yilta mayutju tiñalampa ninti tiña nyinanyi. Tjukarurrungku kulira ngurrkantankula małaku mantjira yungkupayi, yungu kungka maama walytjaku.”

*Tjalamunanya ninti punturirra yulytja
tinatjarra nyinamalpa*

1 Kiinga 4:20-34; 10:1-13

Tjalamunaku waarrkana tjutalingku nyinangu. Waarrkana kutjupa tuwalpala tjananya Tjalamunalu mayutju tjuṭa nyinatjunu, ngurra kutjupa kutjupangkaya nyinanytjaku.

Mayikamu kuka tjananya yanangu tjutangka mantjira katipayi, mayutju Tjalamunaku, ngurra Tjarutjalumalakutu.

Tjalamunalu tjananya tjukarurru kanyinjingitjangka, Yitjurilaku walytja ngantitja tjuta yunypa nyinarra waningi mayikukamu kukaku puu kulintjawiya. Tjalamunaku waarrkana mingaya nyinarra waningi. Kutjupa ngurrara tjutatarra tjanampa Tjalamunanya mayutju tiña nyinangi, karru Yupurititjalakutu maa nyinarra wanintja tjutaku, Pilitjiyanya ngurrara tjutakutarra, paña Yitjipilakutu maa nyinarra wanintja tjutakuтарра. Tjutangkuya mayutju Tjalamunaku mani yulytjaтарра ngurrtjara yungkula nyinapayi.

Palunyatjanu Tjalamunanya manikamu yulytja tiñatjarra nyinangi, mayikamu kuka tiñatjarra. Ninti tiñangku piipangka yara wakalpayi, tulku tjuta nintilkitjangku, warrantjakuya. Yukiri yuwankarraku Tjalamunanya nintilingku nyinapayi. Kuka pañangka nyinanytja tjutaku, tjulpu tjutaku, kuka yuru ngurrara tjutaku, yuwankarraku Tjalamunanya ninti nyinapayi. Kutjupa kutjupa ngurrara tjutangku Tjalamunanya nintilingku nyinanytjala tjakulpa kulira ngalyankula yunypangku kulilpayi.

Tjiipanya ngurrara tjutaku mayutju tina kungka nyinapayi. Paluru tjakulpa kulira ngalyanu Tjarutjalumalakutu Tjalamunanya nyakula kulilkija. Tjalamunangka ngarala wangka marrka puntu kulintjatjanungku tjiapiñu. Tjalamunalu wangka palunya tjuta

kulira tjukarurrungku nintiñingi. Kungka Tjiipanya ngurrarangku kulira yunyparringu. Waala tiña Tjalamunaku ngurra ngarangu palumpa mani puntu ngarripayi. Pulì kuulta tiña, pulì tjiilpa tiña ngarripayi. Palumpa mayi tiña ngarringi, palumpa yulytja tiñaṭarra. Yalatji kungka paluru nyakula yunyparringu Tjalamunala alatji watjañu, “Nyuntu ninti tiñangku tjananya tjukarurru watjara kanyini. Iltaya nyuntupa walytja tjuṭa nyuntupa waarrkana tjuṭaṭarra yunypaya palya nyinanyi. Ilta nyuntupa mayutju tiñangku Katutjalunta yunypa nyinarra mayutju tiña nyinatjunu, Yitjurilaku walytja ngantitja tjuṭaku.” Kungka mayutju paluru Tjalamunanya inytjanungku yungu, pulì kuulta, pulì tiilyka tjuṭa, ngurutja tjuṭa. Tjalamunalu ngaparrtjilu yulytja tiñara yungu, kungka paluru tjapiñingitjangka. Kungka paluru, palumpa waarrkana tjuṭangkutarra yulytja tjuṭa kamula tjuṭangka yutitjunkula ngurra walytjakutu malaku katingu.

*Tjalamunalu Katutjaku tjaatji tiña palyalku
1 Kiinga 5:—8:*

Pulikamu watiya tjana mantjilku palyalkit-jangku

1 Kiinga 5:1-18

Tjalamunalu tjananya waarrkana mañkurra iyañu tawunu Taayalakutu. Palunya ngurrara tjuṭaku mayutju yini Yaramanya nyinangi. Tjalamunalu tjananya iyañu mayutju palula yalatji tjakultjunkunyjtaku, “Ngayuku paapa Tapitanya

yunytjurringu mayutju Katutjaku tjaatji tiña palyalkitja. Yalatjikun ninti nyinanyi. Tapitalu tjananya tjilirratjarra tjuta tjutangara pikakutu katipayi. Rawangkuya pikangku pungkupayi, kutjupa tjuta. Kuwarriya ngurra kutjupa ngurrara tjutangkuya wiya pikangkulanyatjuya pungkukitja unytjurringanyi. Pikawiyatalatju nyinanyi. Mayutju Katutjalu tjananya kuwarri pikawiyaku marrkuṇu. Palunyatjanuṇa unytjurringanyi Katutjaku tjaatji tiña palyalkitja. Nyuntupa waarrkana tjuta tjananya wantirriyala!, ngurra Lipananalakutu, watiya tiimpa luutuya atura ngalya katintjaku, Tjarutjalumalakutu. Tjungungkuya ngayuku waarrkana tjutangku watiya tiimpa atura ngalya katimalpa. Nyuntupa waarrkana tjuta ngayuluṇa tjananya wayitjimaningka payimilalku. Watjalan! Wayitjimani yaalytjirri ngayulu tjananya yungku?" Yaramalu yara palunya kulira yunyparringu. Palunyatjanu Tjalamunaku waarrkana tjutangku Yaramaku waarrkana tjutangkutarra tjananya watiya tiimpa atura luutu ngalya katipayi, Tjarutjalumakutu tjaatji palyalkitjangku.

Tjalamunaku waarrkana kutjupa tjutangkuya puli walutjanu kilytjukatingutja ngalya katipayi, tjaatji tiña palyalkitjangku.

*Tjaatji tinaya palyanmalpa Katutjaku
1 Kiinga 6:1—7:51*

Yitjurilaku walytja nganṭitja tjuta paṇa Yitjipingka nyinanytjatjanu rawa nyinangi paṇa Kayinanangka, yiya yantaṭa puupalakamu yiya yiityipala. Palunyatjanu Tjalamunaku

waarrkana tjutangkuya Katutjaku tjaatji tiña palyalkitjangku puli walu tjuta ngalya katirra ngarritjunkupayi. Kutjupa tjutangkuya puli panyapa tjuta mantjira rawangkuya tjaatji palyaningi, yiya tjapanpalangka. Tjaatji tiña katuya palyaningi. Tjaatji palula yila wiyyaya yilipitjarrangku watiya atulpayi. Palunya nguwanpa wiyyaya yamatjarrangku puli atura wirulymankupayi, wanma kutjuya atura wirulymara ngalya katipayi. Watiya tjutatarraya wanma yilipitjarrangku atura ngalya katipayi tjaatji palyalkitjangku.

Tjaatji waalangka ilatu ilatuya tjunkula wananingi puli tjuta, kalparra tuuwa mankurrawana tjarrpanytjaku.

Waala tiña unnguwanaya ruuma kutjarra palyanu, Katutjaku ngurra ngaranytjaku, ruuma kutju palula Katutjaku pukutju puli wirulypa kutjarratjarra ngaranytjaku.

Tjaatji tiña palunyangkaya unnguya kuulta pangki nguwanpaya palyara nganytjatjura wanunu.

Yayina nguwanpa warungka tjunkula kanilpangka kapi kapirringutja piitungka tjutangara tjutira yatjikingku palyaningi tayingka tiña, tjaatjingka yurilpangka kapitjarra ngaranytjaku.

Palunyatjanuya tayingka wiima tjiilpangkaya palyanu, wakinangka ngarayinkupayi tiinpala. Kuka tjawirriliyi paltjintjakuya wakina ngaratjunkupayi, tjaatjingka ila yurilta. Yulytja kutjupa tjutatarraya yatjikingku palyara tjaatji tinangka ngaratjunu.

*Tjaatji tiṇa ngaranyingka Katutjanyaya tjapira
pułkapungku*

1 Kiinga 8:1-66

Yitjurilaku walytja ngantitja tjuṭaku mayutju tjuta tjananya Tjalamunalu yaltingu tjaatji tiṇangka tjungurrinytjaku. Altingu tjananya ngalyankula tjungulu nyakula wanantjaku, Katutjaku pukutjuya tjaatji tiṇakutu maa katinyingka. Tułkuku mayutju tjutangkuya katirra katura tjarrpatjunkula tjunu. Tuulparrangka ngantiya Tjarutjalumangka yalatji tjungurringu. Tulkuku mayutju tjutangkuya alatji Katutjaku pukutju riilatjarrangku katirra, kalparra tjaatji tiṇangka tjunu, Katutjaku ngurrangka.

Lipayiku walytja ngantitja tjutangku tjaatji tiṇa palula yulytja tjuta tjunkula wantingu. Alatjiya Katutjaku pukutjutarra katirra kalparra tjaatji tiṇangka tjunu, kutjupa tjutangkuya kuka tjawirrilyi tjutalingku pungkula kutjalpayi. Pukutju palunyaya tjunkula malaku ankula wirrkanutjangka Katutjakuṇu ngangkali unngu ngarala yirrnyaningga, Katutjanya ngalyankula tjaatji yunngu nyinanyingka. Palunyatjanuya tulkuku mayutju tjutangku waarrka palyalkitja puṭu tjarrpangu, ngangkalingku anganitingjangka.

Anangu tjuṭaya tjaatji tinangka kalkuni ngarala waṇinyingka, Tjalamunalu anangu tjuta tjananya tjakultjunu tjaatji pułka palyantjaku Katutjalu Tapitanya watjaṇutjangka. Palunyatjanu tjanala Tjalamunalu watjanu,

“Kuwarri nganana yunyparringanyi, tjaatji ngaatja ngaranyingka.”

Tjawirriliyi kutjalpayikutu yankula ngarala Tjalamunalu Katutjanya pułkapungkula rawangku tjapiningga paluru tjanala nintira yanṭayanṭantjaku.

Palunyatjanuya Tjalamunalungarri kuka tjawirriliyi tjutalingku ngalya katingu, waan yantaṭan puutiyi tuu tjawutjuna Katutjaku pungkula kutjantjaku, kutjalpayi palula.

Palunyatjanuya Katutjaku tulku tjintu tjapanpalangara nyinarra warralpayi. Palunyatjanuya yunypalpiya yankula wañingu ngurrakutu.

Yitjurilaku waltyja ngantitja tjutaya kapuṭu kutjarra nyinamalpa

1 Kiinga 11:—14:

Tjalamunalu kuya palyara wiyarrikulpi

1 Kiinga 11:1-13,29-33,41-43

Tjalamunanya miiṭa tjutaku yunytjuringkupayi. Kungka kutjupa kutjupa ngurrara tjuta tjananya yaltirra kanyiningga. Kungka yalatji ngurrara tjuta tjananya yaltirra kanyiningga, Yitjipinya ngurrara tjuta, Yitatunya ngurrara tjuta, Muwapanya ngurrara tjuta, Yamananya ngurrara tjuta, Yiitumanya ngurrara tjuta, Tjayitananya ngurrara tjuta. Kungka yalatji ngurrara tjutalingku waan tjawutjuna Tjalamunalu yaltirra kanyiningga, Katutjaku wangka wantirra. Katutjalu yurrunpa watjanu Yitjurilaku waltyja kutju alṭirra kanyintjaku, kungka kutjupa kutjupa ngurrara wiya. Palumpa wangka

kulintjawiyangku Tjalamunalu paluru tjananya ngurra kutjupa kutjupa ngurrara yaltirra kanyiñingi. Kungka tjutangkuya Tjalamunanya tjingapungkupayi Katutjanya nguwanpa kutjupa tjuta pulkapungkunytjaku. Palunyatjanu Tjalamunalupi tjananya Katutjanya nguwanpa kutjupa tjutalpi pulkapungkula nyinangi. Yalatji tjuta pulkapungkuyananyingka Katutjalu kutjarrangara Tjalamunanya putu marrkuñu. Palunyatjanu Katutjalu Tjalamunanya alatjingku watjanu, "Nyuntu tjananya kutu wiyananangku pulkapungkuyananyingka nyuntupa waarrkanalpiña mayutju tiña nyinatjunku, nyuntupa katja wiya. Nyuntupa waarrkanalpi tjanampa Yitjurilaku walytja ngantitja tjutaku mayutju tiña nyinaku, nyuntu wiyarringanyingka."

Tjalamunaku waarrkana yini Tjiripumanya waarrka parrpatu parrpatu palyalpayi nyinangi. Palunyangka Tjalamunalu kulira Tjiripumanya mayutju tjanampa nyinatjunu waarrkana kutjupa tjutaku. Tjiripumanya Tjarutjalumalanguru yiwarrawana yananyingka, Katutjaku wangka watjalpayi Yayatjanya tjungurringu. Tjungurrirra Yayatjalu kuuta waṭawara walytja yirriwiltjiñu palunyatjanu paluru dintarrpungkula kilytjunpa tuwalpala palyañu. Tuwalpala palunya marangku kanyira watjanu, Tjiripumalu kilytjunpa tiinpala mantjira kanyintjaku. Tjiripumalakutu alatji Katutjaku wangka tjakultjunu, "Tjalamunaluñi Katutjanya wantingutjangka palumpa katja wiya Yitjurilaku walytja ngantitja tjutaku mayutju

tiṇa nyinaku, maṇkurr maṇkurrrpaku mayutju nyinaku. Nyuntulpi mayutju tiṇa tjanampa Yitjurilaku walytja nganṭitja tjutaku nyinaku, walytjararranpa tiinpalaku. Ngayuluṇanta nyinatjunku, nyuntu mayutju tiṇa tjanampa nyinanytjaku.”

Palunyatjanu Tjalamunanya nyinarra wiyarringu mayutju tiṇa tjanampa rawa nyinarra, yiya puutiypala. Palumpa katja Riyapumanya mayutju tinalpi nyinangu Yitjurilaku walytja nganṭitja tjutaku, maṇkurr maṇkurrrpaku.

Ngalytja kutjarrarirraya mayutju kutjarrat-jarra nyinamalpa

1 Kiinga 12:1-20

Tjalamunanya wiyarringutjangka tjakulpa kulira Tjiripumanya paṇa Yitjipingka nyinarra malaku yanu. Tjiripumanya altirra Yitjurilaku walytja nganṭitja tjuta, yalintjarra ngurrara tjuta ngurra Tjikimangka tjungurringuya, Tjalamunaku katja Riyapumaku mirrpaṇarrirra. Palunyatjanuya Riyapumanya yalatji watjanu, “Nyuntupa paapa Tjalamunanyalampatju mayutju ngurrkunytju nyinangi, punturalanyatju tjingapungkupayi waarrkarrinytjaku. Putulatju nyinarra kulilpayi waarrka tiṇangka. Wiyalatju yunytjurringanyi palunya nguwanpa waarrkarrinytjaku. Tjapinilatjunta nyuntu tjukarurrulanyatju kanyintjaku waarrka wiima nguwanpa yungkunytjaku.”

Tapitaku ngalungku tjutangkuya, tjilpi tjutangku Riyapumanya tjingapungu, “Palyantaya panyapa tjapiñu, kuyarrinytjawiyangku tjananya mayutjungku kanyinma!” Ka Riyapumaku malpa tjutangkuya yangupala tjutangku alatji tjingapungu, “Wiya. Nyuntu tjanampa mayutju mulyarranytju tjananya kanyintjaku, punturaya waarrkarrinytjaku.” Palunyangka tjananya Riyapumalu aŋangu tjuta tjingapungu puntura waarrkarrinytjaku. Palunyatjanuraya Riyapumaku ngurrkurriirra yalatjiyanku wangkangi, “Riyapumanya wiya mayutjulampa nyinaku. Wantirralaka yalinytjarra yarra!, paluru mayutju kuya, waarrka tiña yungkupayi. Wiyalanya tjukarurrungku kanyini.”

Alatjiya Yitjurilaku walytja ngan̄titja tjutangku yalinytjarra ngurrara tjutangku mayutju Riyapumanya panypurangkula wantikatingu. Palunyatjanu tjanampa Tjuutaku ngan̄titja tjutaku kutju yulparirra ngurrara tjutaku Riyapumanya mayutju tiña nyinangi, ngurra Tjarutjalumala. Yalatjiya Yitjurilaku walytja ngan̄titja tjuta, yalinytjarra ngurrara tjuta tjanampa yulparirra ngurrara tjutaku kuyarrirra nyinangi. Riyapumanya wantirraya mayutju tiña kutjupa Tjiripumanyalpi nyinatjunu.

Tjiripumalu Katutjanya nguwanpa palyara pulkapungamalpa

1 Kiunga 12:25-33; 13:33,34

Tjiripumanya, palumpa waarrkana tjutaarraya tawunu Tjikimangka nyinangi. Palunyatjanuya tawunu Pinulangka ankula nyinangi. Nyinarra Tjiripumalu kulinu, “Ngayuku waarrkana tjuta mayutju Katutjanya tjawirrilyi yungkukitja, wiya Tjarutjalumalakutu ankunytjaku. Tjinguruya Katutjanya walkulkitja tjaatji tiŋakutu ankula mayutju Riyapumaku ngulytjurriku, ngulytjurrirraniya ngalya yankula mirri pungkutjipingka. Yalatjingkamarra Katutjanya nguwanpa ngaangkalpi kutjarrana palyara ngaratjunku, ngurra Tjarutjalumalakutu tjaatji tiŋakutu yanangu tjuta ankupayingkamarra.” Panyapa kulira Tjiripumalu puluka wiima kutjarra nguwanpa palyara ngaratjunu. Kutjupa, ngurra Pitjilta ngaratjunu, kutjupa ngurra Taanangka katirra ngaratjunu. Yanangu tjuta tjananya Tjiripumalu alatji tjingapungu, “Rawala Tjarutjalumalakutu ankula pulkapungkupayi. Alatjingkamarra ngaangkalpila puluka wiima kutjarra pulkapungkunytjaku. Puluka paluru tjananya yirriti nyinapayi tjuta Yitjipingka pakaltjingara ngalya katingu, mayutju tiŋangku.”

Palunyatjanuya Yitjurilaku walytja ngantitja tjutangku alinytjarra ngurrara tjutangku Katutjanya nguwanpa puluka wiima kutjarra pulkapungkula nyinangi. Yiwarra kutjupawanangku tjananya paluru tjingapungkula kuyanu. Puluka palula kutjarrawana waarrkarrinytjaku tjananya ngaratjunu tulku mayutju kutjupa tjuta, Tjiripumalu. Paluru

tjanaya kuka tjawirrilyi pungkula kutjara puluka pulkapungkupayi. Tjiripumalutarra tulkuku mayutju nguwanpangku tjawirrilyi pungkula kutjalpayi, puluka pulkapungkukitjangku.

Lipayiku walytja ngantitja kulintjawiyangku Tjiripumalu kutjupa tjuta tulkuku mayutju tjuta nyinatjunu. Yanangu Lipayiku walytjawiyangku tulkuku mayutju nyinakitja yunytjurirra tjapiningka, Tjiripumalu nyinatjunkupayi. Lipayiku walytja ngantitja tjuta wati tjuta kutju tjananya tulkuku mayutju paluru nyinatjunamara, Muutjalu irriti watjantjangka.

*Katutjanya Tjiripumaku mulyarrarrikura
1 Kiinga 14:1-20*

Palunyangka Tjiripumaku katja wiima pika tinatjarra ngarringi. Tjiripumalu palumpa milangka watjanu, katja palunya Yayatjalakutu katinytjaku, Katutjaku wangka watjalpayilakutu. Tjiripumaku milangku katja katingu yulparirra, tawunu Tjaluwakutu. Tawunu palula Yayatjanya tjilpirrirra kuru pampa nyinangi. Palumpa waalangka tjarrpaketja Tjiripumaku milita yini watjantjawiya wangkarra tjarrpangu. Katutjalu Yayatjala yurrun yurrunpa tjakultjunu kungka paluru ngalya yananyingka. Yayatjalu alatji watjanu, “Ngalya tjarrpa, Tjiripumakun milita! Nyaakun yiningkun tjukarurrungku watjantjawiya tjarrpangu? Kutjupa nguwanpan wangkarra tjarrpangu. Yara kuyantanta watjalku Tjiripumanya ankula alatji tjakultjunkunytjaku, Katutjakunu wangka, ‘Mulyarrarringuntanta nyuntupa, nyuntuin ngayunya Katutjanya

wantirra ngayunya nguwanpa kutjarra kutjupa ngaratjunutjangka. Nyuntutarra tjananya tjingapungu palunya kutjarra pulkapungkunytjaku. Yalatji nyuntun palyara ngaratjunkula kuya puntu palyanu, yañangu mirrinytjanirri tjutangkuya kuya palyantja nguwanpangka wirrili. Palunyangka ngayulu tjananya nyuntupa katjapiṭi tjamupiṭi mirrintara wiyaliku. Nyuntupa walytja tjuta mirrirrirra wiyarriku.” Tjilpi Yayatjalu Tjiripumaku miitälakutu alatji piyuku watjanu, “Waṭalpi, ngurrakutu malaku arra! Yankulan tawunu walytjangka maa tjarrpanyingka, nyuntupa katja pipirri ngaatjanya wiyarrikuku. Yilta katja ngaatjanya wiyarriku, yulakulpircanyurra.” Tjilpi Yayatjalu Tjiripumaku miitälakutu alatji piyuku watjanu, “Tjiripumanya ankula tjakultjunkunytjaku. Yitjurilaku walytja ngantitja tjutangkuya Katutjanya nguwanpa yini Yatjaranya pulkapungkupayi. Palunyatjanu yitjipungkukitjangku ngayulu Katutjalu tjananya pana kutjupakutu wantirriyalku, karru Yupurititjala munkarra, wiwaya ngaangka ngurra walytjangka kutu nyinanytjaku, wiya. Tjiripumaku wangkaya kulira ngayunya wantirra kuya palyaraya nyinanyi.”

Tjiripumaku miitangku wangka palunya kulira malaku katirra tawunungka tjarrpanyingka katja iṭi palunya wiyarringu, Yayatjalu watjanutjangka.

Tjiripumalu tjananya Yitjurilaku walytja ngantitja tjuta kanyiñgingi tuuntiyi tuu yiya. Yalatji tjananya kanyira wiyarringu. Palumpa

katjalpi tjanampa mayutju nyinangi, yini Nitapanya.

Mayutju tiña tjuta tjanampa yalatji nyinamalpa

1 Kiunga 15:1-8,25-34; 16:6-28

Riyapumanya Tjuutaku walytja ngantitja tjutaku mayutju tiña nyinarra wiarringu. Palunyatjanu palumpa katja Yapayitjanya mayutju tiña tjanampa nyinangi. Katutjaku tjukarurruwiya nyinarra wierringu. Palumpa katjalpi Yiitjanya tjanampa mayutju tiña nyinangi, Tjuutaku walytja ngantitja tjutaku.

Tjiripumanya nyinarra wierringutjangka, Nitapanya mayutju tina tjanampa nyinangi, Yitjurilaku walytja ngantitja tjutaku. Katutjaku tjukarurruwiya nyinangi. Palunyatjanu wati Paatjalu mirri pungkula mayutju tinalpi tjanampa nyinangi. Paatjalu mayutju tinarirra Tjiripumaku walytja tjutaku ngurrira mirri pungkuyinangi. Palunyatjanuya yuwankarra Tjiripumaku walytja tjuta wierringu. Paatjanya Katutjaku tjukarurruwiya nyinarra wierringu. Palumpa katja Yilayanya mayutju tinalpi nyinangi, Yitjurilaku walytja ngantitja tjutaku. Wati Tjimirilu Yilayanya mirri pungkula mayutju tinalpi tjanampa nyinangi. Mayutju tinarirra Tjimirilu tjananya Paatjaku walytja tjuta pungkuyinangi, yalatjiya uwankarra wierringu. Tjimirinya mayutju tiña nyinanyingka wati Wumirinyangarri tjilirratjarra tjuta ngalya yanu Tjimirinya mirri pungkukitja. Palunyatjanu Tjimirilu waalangka

tjarrparra walytjalunku tilira wiyarringu, kutjupa tjutangku mirrintankupayingka. Wumurinya tjanampa mayutju tiŋalpi nyinangi Yitjurilaku walytja ngan̄titja tjutaku. Wumurilu tawunu Tjamiriyanya palyara palula nyinangi. Katutjaku tjukarurruwiya nyinarra Wumurinya wiyarringu. Palumpa katja Yiyapanya mayutju tiŋa tjanampa nyinangi Yitjurilaku walytja ngan̄titja tjutaku.

*Yilaatjanya nyinamalpa, Katutjaku wangka watjanmalpa
1 Kiinga 16:; 17:*

*Kapi wiyalpi tjanampa ngaraku
1 Kiingga 17:1*

Katutjaku wangka watjalpayi yini Yilaatjanya nyinangi. Yitjurilaku walytja ngan̄titja tjutaku Yiyapanya mayutju tiŋa nyinanyingka, Yilaatjalu Yiyapanya watjaŋu, “Mayutju Katutjangka mirangka tjukarurruŋanta watjaŋi. Kuwarri kapilampa wiya punkalku rawalingku. Kul-yarrpalampa wiya ngarriku rawalingku, yiya maŋkurrpala. Katutjalu panyapa watjaŋu.”

*Kapiwiyangka Katutjalu Yilaatjanya kanalku
1 Kiingga 17:2-16*

Palunyatjanu mayutju Katutjalu Yilaatjanya yalatji watjaŋu, “Ngurra ngaatjanya wantirra kakarrara yarra! Yankula karlu yini Tjiritjala kumpira nyinama!, karlu Tjuutanangka kakarrara. Karlu Tjiritjanya palyan tjikinmalpa ngurra nyarra palula. Tjulpu tjutangkuntaya

miyi katirra yungamalpa, ngayulu tjananya iyañingka.”

Palunyatjanu Yilaatjanya ankula karru Tjiritjangka palya nyinangi. Mungawinkikarrangu mungawinkingka tjulpu tjutangku miyi an kuka ngalya katirra ungkupayi, mungarrtjikarrangu mungarrtjitarra. Rawa nyinarra kapi wi-yarringu.

Palunyatjanu Katutjalu Yilaatjala alatji watjañu, “Tawunu Tjiyapatjakutu maa yarra!, tawunu Tjayitanangka yila ngaranyi. Palunya ngurrarangkunta paltjanmalpa, minyma walukutangku, ngayuluña minyma panyapa nintiñingka.” Palunyatjanu Yilaatjanya pakara yanu ngurra Tjirapatjalakutu. Yankula tawunu palula yila nguwanpa nyinangi. Paluru nyangu minyma walukuta, waru kutjalkitjangku kurralpa mantjiyinanyingka. Nyakula watjañu, “Kapitjirratjaña ngalya yanutjangka, ankula mantjira ngalya kat!” Maa yananyingka, kutu watjañu, “Mangarriṭarratju ngalya kat!” Minyma paluru watjañu, “Mayutju Katutjangka mirangka tjukarurrungkuñanta watjañi puriitiwiyaña nyinanyi. Pulawu yulpu kutju wiima ngarrinyi, tjira wiimapatuṭarra. Pulawu palunya kutjalkitjangku waru ngayulu mantjinì. Mayi palunya kutjilitju rungkara ngalkula paltjarringkula wiyarriku, katjararralitju.”

Yilaatjalu watjañu, “Mangarriwiyangka wi-yarrikitjangku puṭu kulintjawiya, ngayuku kutju mangarri wiima rungkara kutjara ngalya kat! Palunyatjanu nganṭingku rungkara kutjala!, nyupali ngalkukitjangku. Mayutju Katutjaku

wangkañanta yalatji tjakultjunanyi. Turaama palula pulawu palunya kutu ngarrimalpa, wi-yarrinytjawiya. Paatula palula tjira kutu ngarrimalpa, wi-yarrinytjawiya. Ngula kutju pulawu an tjira wiyarriku. Ngayulu Katutjanya kapiku tjapintjala nganti, palunyatjanu pulawu an tjira wiyarriku.”

Wałukuta paluru parrpaṭu yankula kutjara mantjira ngalya katingu, Yilaatjalu watjañutjangka. Wangka palunya Yilaatjalu watjañutja iltarringu. Pulawu yulpu an tjira palunya kutu ngarringi, wiyarrikunytjawiya. Katutjalura rawangku pulawu an tjiratjarrangku yanṭayañtañgingi wałukuta palunya.

*Wałukutaku katja kanarriku
1 Kiinga 17:17-24*

Ngula, minyma wałukuta palumpa katja pikapuntutjarra ngarirra wiyarringu. Minyma paluru yularra Yilaatjalakutu yankula watjañu, “Nyaakun ngaangka ngalya yankula nyinanyi? Nyuntu nyinanyingka Katutjalunu tjinguru kulinikuyaña palyañutjangka. Palunyatjanu ngayunyanı yitjipungamara palunyatjanu katjalpitjusiwiyañu.”

Yilaatjalu watjañu, “Nyuntupa katja palatjanı yuwa!, yampura kanyintjanya.” Yilaatjalu mantjira katirra waalangka katu katurrirra palumpa ngurra yinytjamingga ngarritjunu. Ngarritjunkula Katutjanya yalatjijapiñu, “Mayutju Katutja, nyaakun pipirringaatjanya yiluntanu? Wałukutaku katja

kutjupilkura nyinanyi ngaatjanya. Paluruṇi kutu yanṭayaṇṭalpayi, kanaranu kanyinmara.”

Ula palula Yilaatjanya waṭungarakatirra Katutjanya yalatjingku tjapiṇu, “Mayutju Katutja, ula ngaatjanyara kanala!” Yalatji tjirripalangara waṭungarakatirra Katutjanya tjapiṇingka, Katutjalu Yilaatjaku wangka kulira ula palunya kanaṇu. Kanarringanyingka yampura tjarukatirra yungu palumpa maama. Wałukuta palunya watjanu, “Nyawa!, kanalpinku katja nyinanyi.” Minyma paluru pukularirra Yilaatjalakutu watjanu, “Yilta nyuntu Katutjakunu, palumpa wangka yilta nyuntu watjalpayi.”

*Yilaatjalu Paalaku waarrkana tjananya
kunṭalyanku*
1 Kiinga 18:

Paalalu waru tilintjakuya puṭu tjapinmalpa
1 Kiinga 18:1-35

Ngurra tjuṭawana kapiwiya ngarangi yiya tjirripala. Palunyangka mayutju Katutjalu Yilaatjala yalatji watjanu, “Yankula mayutju tiṇa Yiyapala ngarala wangka!, ngayulu kapi nyurrampa kuwarri wantirriyaningka.” Palunyangka Yilaatjanya yulparirrawana yanu. Yankula ngururrpa mayutju Yiyapaku waarrkana Wupatayanya tjungurringu. Wangkarrapula Wupatayalu yankula mayutju Yiyapanya alṭingu, Yilaatjanya ngalyankula wangkanytjaku.

Mayutju Yiyapalu ngalya yankula Yilaatjanya alatji watjanu, “Nyuntulanyatjun yurrnyunu,

kapiwiya nyinanytjaku.” Yilaatjalu watjanu, “Wiya, mungutjana. Nyupalipulan paapararrangku kuya palyaningitjangka. Katutjaku wangkapulan wantirra Katutjanya nguwanpa, Paalanyalpipulan pulkapungangitjangka. Palunyatjanu nyurranya Katutjalu kapi wiya yunganyi, tjukarurrunyurra nyinanytjawiyangka.” Yilaatjalu Yiyapala alatji kutu watjañingi, “Yanangu tjuta tjananya Yitjurilaku waltyja ngantitja tjuta watjala!, yankula tjungurrinytjaku puli yini Kamilangka. Paalaku tulku kanyilpayi tjutatarra tjananya altirra kati!, yankulaya palula tjungurrinytjaku. Tjanaya tjuta nyinanyi, puu yantañan pipitiyipala. Yaltirra tjananya kati puli palulakutu! Nyuntupa miita Tjiitjapilanya tjanampa yunyparringanyi palumpa waltyja tjutaku. Paluru tjananya yantayanttalpayi.”

Mayutju Yiyapalu tjananya altinyingka ankulaya puli Kamilala tjungurringu, Yitjurilaku waltyja ngantitja tjuta, Paalaku waarrkana tjutatarra. Palunyatjanu tjananya ankula Yilaatjalu alatji tjapiñu, “Ngananyanyurra mayutju tiña pulkapungkukitjangku putu kulin? Ngananyalampa mayutju tiña nyinanyi?, tjinguru Paalanya?, tjinguru Katutjanya? Katutjanya mayutju tinjalampa nyinanyingka, Katutjanyalpinyurra pulkapungkunytjaku. Tjinguru Paalanya mayutju tinjalampa nyinanyingka, Paalanyanyurra pulkapungkunytjaku. Ngananyalampa mayutju tiña nyinanyi?, Paalanya tjinguru Katutjanya.” Yalatji tjananya tjapiñingitjangka wangkanytjawiyaya

ngarala wañingi. Yilaatjalu tjananya kutu watjañu, “Katutjaku wangka watjalpayi ngayulu kutju ngaranyi, kanya Paalaku wangka watjalpayi tjutalingkunyurra ngarala wañinyi. Palunyangka Paalaku waarrkana tjutangkunyurra puluka tjawirrilyi kutju mirri pungkula yitjilinkula waru kurralpangka tjunkunytjaku, tilintjawiyangku. Palunya nguwanpa ngayulu puluka kutju mirri pungkula yitjilinkula waru kurralpangka tjunku. Yalatjiya Paalaku waarrkana tjutangku tjunkula tjapila, waru tilintjaku! Ngayuluñarrana tjawirrilyi tjunkula mayutju Katutjanya tjapilku, waru tilintjaku. Tjinguru Paalalu nyurrampa waru tililku, nganana kuliku paluru yilta mayutju tiña nyinanyi. Tjinguru Katutjalu waru ngayuku tililku, nganana kuliku paluru yilta mayutju tiñalampa nyinanyi.”

Yañangu tjutangkuya Yilaatjaku wangka kulira yunyparringu. Palunyatjanu tjananya Yilaatjalu watjañu, “Paalaku waarrkana tjutangkunyurra tjawirrilyi tjunkula yurrunpangku tjapintjaku Paalalu waru tilintjaku.” Tjawirrilyi pungkulaya yitjilinkula waru kurralpangka tjunkula putuya tjutangara tjapiñu tilintjaku. Kaalaña tjanampa tilirrinytjawiyancka Yilaatjalu tjananya ngunytji alatji watjañu, “Kutuya tjapila! Tjinguru Paalanya tii pulkara tjikintjatjanu yanu. Tjinguru kunpu ngarrinyi kulintjawiya. Mirrarraya kanala! Tjinguru yanku ngarrinyi, kulintjawiya.” Putuya tjapira tjuulangkalpiyanku kuntanu walytjangku

yalipiri tjuntaṭarra. Yalatjiya ngurrka yintirra tjutangara tjpira mungarrtjirringu.

Palunyatjanu tjananya Yilaatjalu watjanu, yanangu tjuṭa yilarirra nyakunytjaku. Katutjaku uulta nguwanpaya yanangu tjutangku yirriṭi palyara wantingu. Palulanguru uulta palunya ngarala kuyakuyarringu. Tjanaya nyanganyingka Yilaatjalu puli tjuṭa mantjira tjunangi. Uulta palyalpi ngarangi. Yalatji palyara wiyara tjawara wanañingilpi kapi ngatiwana ngarrinytjaku. Waru palunya kurrkalpa mantjira uultangka katuwana tjunkula wananu. Kuka tjawirriliyi yitjilinkula kurrkalpangka tjunu. Watjanu tjananya turama tjutangka tjutira ngalya katinytjaku, ngalya katirraya tjutintjaku kurrkalpangka kukangka. Yalatjiya turama tjuṭangka tjirripalangara katira kapi tiṇa ngalya katirra yintiñgingi. Kuka an kurrkalpa wiita ngarangi. Nganti palunya yurrunpaya tjawara wantingutjangka, kapi palunya yintirra katurringu.

*Katutjalura waru tililku
1 Kiinga 18:36-39*

Palunyangka uulta palula ila ngarala Yilaatjalu Katutjanya alatji tjapiṇu, “Mayutju Katutja. Nyuntu tjanampa mayutju tiṇa nyinangi Yipuramakungarriku tjanampa, Yatjikaku walytja tjuṭaku, Tjikupaku walytja tjuṭakuṭarra. Tjanampaṇu walytja nganṭitja tjuṭala kuwarri nyinanyi. Kutjupa tjuṭaya ngaangka nyinanyi nyuntupa wiya tjukarurru nyinanyi, kanya ngayulu nyuntunya kulinji. Yipuramaku

ngantitja tjuṭa tjananya kuwarri nintila! Waru ngaatja tilila!, tjanaya tjukarurrungku nyakula kulintjaku, nyuntu yilta mayutju tiṇalampa nyinanyi. Nintila tjananya!, ngayulu nyuntupa wangkawana yaltirra tjananya ngaratjunkunytjaku, tjana nyakunytjaku, nyuntu warutjarrangku tiliṇingka. Tjanaya kulintjaku nyuntunin alatji watjaṇutjangka, ‘Yilaatja. Waru an kuka tililwiyangku nyuntu tjunkula ngayunya tjapila tilintjaku!’”

Yilaatjalu yalatji Katutjanya piyuku tjapinu, “Yanangu ngaa tjuṭa tjananya nintilkitjangku nyuntu kurralpa tilila!, nyakulaya tjukarurrungku kulintjaku, nyuntu mayutju tiṇalampatju nyinanyi. Yalatji tjananya nintila!, yaltururringkula kanyintjakitjangku yanangu tjuṭa.”

Palunyangka Katutjalu waru katunguru waningu. Waru paluru uulta pulinguru palyanütja winki kamparra wiyanu, kuka tjawirrilyitarra. Ngati palula kapi an panä kamparra tjunparringu. Yanangu tjuṭaya nyakula ngulurrirra waṭungarala alatjingku Katutjanya pułkapungu, “Katutjanya mularrrpa mayutju tiṇa kutjlampa nyinanyi.”

*Paalaku waarrkanaya mirri pungkuyinamalpa
1 Kiingga 18:40*

Palunyangka tjananya Yilaatjalu watjanu, “Paalaku wangka watjalpayi tjuṭa tjananya uwankarra witira kanyila!, palumpa waarrkana tjuṭa.” Palunyatjanu tjananya Yilaatjalungarri katingu karru yini Kitjunakutu. Paluru tjana

katirra tjananya Paalaku waarrkana uwankarra
mirri pungkuyinangi.

*Kapi tjanampa Katutjalu wantirriyalku
1 Kiinga 18:41-46*

Palunyangka Yilaatjalu mayutju tiṇa Yiyapangka alatji watjaṇu, “Pakara yankula ngalkula! Kuwarri kapi tiṇangkulanya pungamalpa. Kulinīna kapungku kutu punganyi.” Wangka palunya watjaṇu yutuwari ngaranytjawi yangka. Mayutju Yiyapanya yankula ilangku mayi ngalkuṇingka, Yilaatjanya pulpa palumpa waarrkana puli Kamilangka kalparra nyinangi. Yilaatjanya pupakatirra kata muṭi kutjarrangka ngururrpa tjunkula Katutjanya kapiku tjapiṇingi. Palumpa waarrkana witulkitjangku paluru alatji watjaṇu, “Pulingka katu kalparra wilurarra nyawa!, utuwari.” Waarrkana paluru kalparra puṭu nyakula piyuku ngalya tjarukatirra Yilaatjala alatji tjakultjunu, “Wiya, puṭuna nyangu.” Tjikitjipalangara paluru kalparra puṭu nyangu, Yilaatjalu iyanutjangka. Palunyatjanu piyuku iyanu. Waarrkana paluru kalparra nyakula ngalya tjarukatirra tjakultjunu, “Nyanguṇa utuwari, tjukutjuku, yurunguru mara kapuṭu nguwanpa pakaṇingka.” Palunyatjanu Yilaatjalu waarrkana palunya alatji iyanu, “Mayutju tiṇanya Yiyapanya ankula tjakultjurra!, paakingka kalparra ngurrakutu wala ankunytjaku, kalyu tiṇangku angatjunkupayingkamarra.”

Utuwari tiñarringu tjanampa walpa tina wangkangi. Palunyatjanu kapi tiñangku tjananya pungkula wanañu. Yiyapanya paakingka kalparra ngurra Tjitjirilakutu yananyingka, Yilaatjanya paakingka yurrunpa tjina tjalkalungkuyinangi ngurra Tjitjirilakutu, Katutalu palunya katiyanangitjangka.

Yilaatjanya puli Tjaniyakutu ankula nyinamalpa

1 Kiinga 19:

Mirri pungkutjipingkamarra Yilaatjanya tjalkalungku

1 Kiinga 19:1-8

Ngurrakutu ankula mayutju Yiyapalu palumpa miiñangka Tjiitjapilala tjakultjunu, Yilaatjalungarri Paalaku waarrkana tjuta mirri pungutjangka, Paalaku wangka watjalpayi tjuta. Palunyatjanu Tjiitjapilalu mirrpañarrirra waarrkana iyanu Yilaatjangka alatji tjakultjunkunytjaku, “Nyurrangarri tjananya Paalaku waarrkana tjuta mirri pungutjangka, ngayululpinänta palunya nguwanpa ngaparrtjilu mirri pungku. Pungkukitjangkunanta tjukarurru watjani, tjintu kutjupangkan mirri ngarriku. Mirri pungkuwiyangkunanta wantintytjala palyaniya mayutju ilkari ngurrara tjutangku mirri pungkunytjaku. Yuwa, yiltalatjunta mirri pungku, wantiwiyangku.”

Kulira Yilaatjalu ngulurringkula palumpa waarrkana altirra malpararrapula anu tawunu Piitjipakutu. Ngurra palula waarrkana

nyinatjunkula wantirra Yilaatjanya kutjulpi wayinta anu ngurra kapi yukiri kukawiyawana yulparirralku. Yankula wilytjangka watjilpa nyinarra alatji Katutjangka tjapiṇu, “Mayutju Katutja. Kutjupa tjuṭangkuṇiya mirri pungkutjipingka ngayulu puṭu kulinī.” Palunyatjanu paluru Katutjanya alatji watjanu, “Ngayunyalpiṇi mirrintarra! Watjilpana nyinarra yunytjurringanyi mirrirrikitja.” Wilytja palula paluru ngarrikatirra ankurringu.

Palunyangka ilkari ngurrarangku kanara yalatji watjanu, “Pakara ngalkula!” Kanarrirra nyangu puriūti kutjukamu paatula kapitjarra ngarangi. Pakara ngalkura tjikira ngarrikatirra yankurringu.

Katutjaku waarrkana paluru ilkari ngurrarangku piyuku kanara watjanu, “Pakara ngalkula!, ngururrpa mayitjirratja punkara wi-yarritjipingka.” Palunyangka Yilaatjalu pakara piyuku ngalkunu. Ngalkula tjikira yulparirra waṇma yanu puli Tjaniyalakutu, ngururrpa piyuku ngalkula tjikintjawiya. Paluru rawa yanangi ngurra palulakutu, Purayitiyi tjikitjpala.

*Puli Tjaniyalala Yilaatjanya nyinamalpa
1 Kiinga 19:9-18*

Puli Tjaniyalala Yilaatjanya kulpingka tjarrparra ngarrirra yankurringu, mungangka. Ngurra palula mayutju Katutjalu Yilaatjanya yalatji tjapiṇu, “Yilaatja. Nyaakitjan ngaangka nyinanyi?” Yilaatjalu alatji watjanu, “Katutja. Nyuntu mayutju tiṇatjun nyinanyi. Nyuntupa

kutjuŋangku waarrkana tjukarurru nyinapayi. Kutjupa tjuta Yitjurilaku walytja ngantitja tjuta wiyawana nyinanyi. Nyuntupa wangka wantirraya nyuntupa uulta tjutangka wiyaya nyuntunya pulkapunganyi. Nyuntupa uulta tjutaya kilytjunktankula wiyalpayi. Nyuntupa wangka watjalpayi kutjupa tjuta tjananya tjana pungkula wiyaŋu. Ngayunya kutjulpiŋa kana nyinanyi. Kuwarriya yunytjurringanyi ngayunyalpiŋiya mirri pungkunytjakitja.”

Katutjalu kulira Yilaatjala watjaŋu, “Kulpinguru pakara maa yarra! Pulingka kalparra ngara!, ngayulu nyuntula tjungurrinytjaku.” Pakara yankukitjangka Katutjalu walpa tiŋa wantirriyaŋu. Walpa paluru puli tjuta rungkara kilytjukilytjuntanu. Yalatji walpa tiŋa rungkaŋingitjangka Yilaatjalu puṭu kuliŋu Katutjala tjungurrikitjangku. Yilaatjalu yalatji puṭu kuliŋu, “Tjinguru Katutjanya walpa tiŋawana tjungu ilarringanyi, tjinguru wiya.” Walpa wiyarringutjangka paṇa pirrtjipirrtjingi. Pirrtjipirrtjinyingka Yilaatjalu puṭu kuliŋu Katutjala tjungurrikitjangku. “Tjinguru paṇa pirrtjinyingka Katutjanyani ilarringanyi, tjinguru wiya.”

Paṇa pirrtjipirrtjirra wiyarringutjangka waru tiŋalpi kamparra wanaŋingi. Kamparra wanangingitjangka Yilaatjalu putu kulinu Katutjala tjungurrikitjangku. “Tjinguru waru wanaŋingitjawana Katutjanyani ilarringanyi, tjinguru wiya.”

Waru kamparra wiyarringutjangka Yilaatjalu kuliŋu Katutjanya wangkanyingka. Wangka

palunya kulira Yilaatjalu kuutangka yunpa tjutura kułpi yalakutu ankula ngarangi. Ngarala wangka alatji kulinu, "Yilaatja. Nyaakitjan ngaangka nyinanyi?" Yilaatjalu watjanu, "Katutja. Nyuntu mayutju tìnätjun nyinanyi. Nyuntupa kutjuñanku tjukarurru waarrkana nyinapayi. Kutjupa tjutaya Yitjurilaku walytja ngan̄titja tjuta wiyawana nyinanyi. Nyuntupa wangka wantirraya nyuntupa uulta tjutangka wiwaya nyuntunya pulkapunganyi. Nyuntupa uulta tjutaya kilytjuntankula wiyalpayi. Nyuntupa wangka watjalpayi kutjupa tjuta tjananya tjana pungkula wiyanu. Ngayunya kutjulpiña kana nyinanyi. Kuwarriya yunytjurringanyi ngayunyalpiña mirri pungkunyitjakitja."

Katutjalu Yilaatjala piyuku alatji watjanu, "Tawunu Tamatjakatjangka ila ngurra kuya kapiwiya ngaranyi. Ngurra palulakutu ankula nyinama! Palulanguru yarra tawunu Tamatjakatjalakutu! Tjarrparra ankula wati Yatjiyilanya tjira intira mayutju tìna tjanampa nyinatjurma!, Tjiriyanya ngurrara tjutaku. Palunyatjanu ankula Tjiyuwanya nyawa, tjilpi Nimitjiku katja! Wati palula tjira intira mayutju nyinatjurma!, Yitjurilaku walytja ngan̄titja tjutaku mayutju tìnalpi nyinanytjaku. Wati kutjupatarru Yilatjanya yankula tjira intila!, ngayuku wangka watjalpayi nyinanytjaku. Paluru wati Tjapataku katja nyinanyi. Paluru nyinaku wangka watjalpayi nyuntu wiyarringanyingka ngan̄ti. Mayutju palunya tjutangku kuyarringkupayi tjuta tjananya iluntanku. Kutjupa tjuta

tjananya mirri pungkuwiyangku wantiku. Ngayulu Katutjalu tjananya Yitjurilaku walytja ngantitja tjuta yanṭayantara kanyilku ngayuku tjana tjukarurru nyinanyingka. Kanalpiya nyinamalpa tjutalingku tjapan tjawutjuna. Tjanaya Paalaku ngurrrpa nyinanyi, ngayukuya tjukarurru nyinanyi.”

Yilatjangka tjira intilku Katutjaku wangka watjalpayilpi nyinanytjaku

1 Kiinga 19:19-21

Palunyatjanu Yilaatjalu ankula wati Yilatjanya nyangu, puluka kutjarrangku yayina katiananyingka, paṇa kaanaku yulpurinkupayitjarra. Yalatji waarrkarryingka Yilaatjalu palumpa kuuta waṭawara irrilytjunkula wanara Yilatjaku yalipiringkalpi tjunu, palumpa waarrkana nyinanytjaku. Kututja, Katutjaku wangka watjalpayingku mayutju kutjupa Katutjaku nyinatjunkukitjangku kuuta walytja irrilytjunkula alipiringka tjunkupayi, Katutjaku wangka watjalpayi kuuta palunyatjarralpi Katutjakunu ngangkaritjarra nyinanytjaku. Palunyatjanu Yilatjalu Katutjaku wangka watjalpayi nyinakitjangku kulira puluka palunya kutjarra wantirra Yilaatjangka alatji watjanu, “Wanyuna ankula paapakamu maamangka tjakultjunku, ngayulu pulanya nyunytjura tjunguli wantirra yankukitjangku.” Yilaatjalu wati Yilatjangka alatji watjanu, “Palya, yankula pulanya maa watjara wantikati!, nyuntupa paapa an nyuntupa maama yankukitjangku kulira.” Palunyatjanu Yilatjalu palumpa puluka

kutjarra mirri pungkula kutjara tjanampa yungu, palumpa walytja tjutaku. Palunyatjanu Yilatjaku waarrkana nintirrikitja tjungupula yanangi.

*Niputjaku kaana mantjilku
1 Kiunga 21:; 22:; 2 Kings 9:*

*Yiyapanya yunytjurriku Niputjaku kaanaku
1 Kiunga 21:1-7*

Mayutju Yiyapaku ngurrangka ila wati Niputjaku kaana palya kiripitjitarra ngarangi. Yiyapalu kaana kutjupa tjuta kanyilpayi. Kaana palunya rawangku nyakula yunytjurripayi mantjilkitja. Yunytjurringkula Niputjanya ankula alatjingku tjapinu, “Nyuntupa kaana payimilalkitjanya ngalyanu. Palya payimilalku? Ngayuku ngurrangka ila ngaranyi. Kanyira yukiri kutjupa kutjupa pakaltjingalkitjangkuṇa kuliṇi. Tjingurun kaana kutjupaku nyakula unytjurringanyi, kaana palunyananta payimilara yungku, kaana ngaatjanya kanyilkitjangku.” Niputjalu watjanu, “Kaana ngaatjanya ngayuku paapangku an tjamungku kanyilpayi. Palunyatjanuṇa kanyini. Katutjakuṇu luwulampa yalatji ngaranyingka ngayuluna kutu kanyintjaku, Katutjanyatju kuyarringkupayingkatju. Palunyangka wiyananta tjalamilalku kaana ngaatjanya ngayuku tjamukunu. Kaana kutjupa kanyilkitja wiyanā yunytjurringanyi.”

Yiyapalu kulira watjilarirra ngurrakutu yanu malaku, Niputjaku kuyarringkula. Mayi ngalkuntjawiya piitangka kutu ngarringi, kaana palunyatjirratja. Yiyapalu kaanaku

pu̯tu tjaipiñgingitjangka Tjiitjapilalu palumpa mii̯angku kulira Yiyapalakutu ankula watjanu, “Watjilpa ngarrinytjawiya pakala!, yunypa nyina!, ngayuluñanku Niputjaku kaana mantjilku.”

*Niputjanya mungutjaya mirri pungku
1 Kiinga 21:8-16*

Tjitjirilanya ngurrara mayutju tjutakutu Tjiitjapilalu piipa tjuta wakara wantirriyanu, yara alatjitjarra. “Yañangu tjuta nyurrangarri watjala!, ngula tjungurringkula ngalkura tjikira yunyparrinytjaku. Ngalkuranyurra tjikira Niputjanya yankula mantjira katintjaku, ngunytji mayutju nguwanpa nyinatjunkukitjangku. Yurrunpangku pulanya nyurrangarri wati kutjarra tjingapuwa!, Niputjanyapula ngunytjilyinkunytjaku, yañangu kutjupa tjutangka mirangka. Alatjipula Niputjanya watjalku, ‘Katutjanyatarra mayutju Yiyapanya nyuntu Niputjalu kulira wantipayi.’ Palunyangka tjutangkunyurra Niputjanya witira katirra pulitjarrangku rungkara mirrintankunytjaku.” Yitjurilaku walytja ngantitja tjutangku yañangu Katutjanya panypurangkupayinya kututja rungkara mirrintankupayi.

Tjiitjapilalu piipa palunya tjuta wakara tjanampa wantirriyanutjangka mayutju palunya ngurrara tjutangku Niputjanya yañangu kutjupa tjutatarra yaltirra tjungunu tjananya. Yalatjiya yañangu tjuta tjungurrirra ngalkula tjikira nyinanyingka, paluru

kutjarrangku ngunytjilyira Niputjanya ngunytji watjañu. Yalatjipula ngunytjilyinutjangkaya yanangu tjutangkuya Niputjanya witira katirra pulitjarrangku rungkara mirrintanu. Palunyatjanu mayutju palunya tjutangku Tjiitjapilakutu waarrkana wantirriyanu yara yalatji tjakultjunkunytjaku, “Wati Niputjanyaya pulingka rungkara yiluntanu.” Kungka Tjiitjapilalu tjakultjunkunytja kulira yunyparringu. Paluru mayutju Yiyapalakutu ankula tjakultjunu, “Niputjanyaya yiluntanu. Palunyatjanu kaana palunya nyuntu yankula kanyinma!” Palunyangka Yiyapalu tjananya ankula waarrkana tjuta, ila nyinanytja tjuta watjañu kanyintjaku, Niputjakuñu kaana.

*Yilaatjalu Yiyapanya watjalku mirrirrinytjaku
1 Kiinga 21:17-27*

Mayutju Katutjalu Yilaatjanya palumpa wangka watjalpayinya alatji watjañu, “Yankula mayutju Yiyapanya nyawa!, Niputjaku kaana mulyatangku kanyiningka. Yankula kaana palula nyakula alatjira tjakultjurra! ‘Wati nga ngurrara tjana mirri pungutjangka palumpa kaana wiyan mulyatangku kanyintjaku. Ngayulu Katutjaluñanta Yiyapanya alatji tjukarurru watjañi. Ngurra panyapangka Niputjanya wiyarringu, ngurrka papa tjutangku anytjuñu, nyuntunyataarralpi anytjulku.’” Yilaatjalu ankula wangka palunya mayutju Yiyapangka tjakultjunu. Wangka kutjupaṭarra palulakutura alatji watjañu Katutjakunu wangka, “Nyuntu kutu Katutjaku wangka

wantirra kuya palyalpayi. Palunyatjanu nyuntupa waltyjapitarrha tjananya Katutjalu mirri pungkula wiyalku. Nyuntupa miita Tjiitjapilanyaṭarraṇa mirri pungku. Tawunu Tjitjirilangka palunya mirri ngarrinyingka papa tjutangkulpiya ngalku. Nyuntupa waltyja kutjupa tjuṭa ngurra wañma mirri ngarrierra wañinityjala tjudpu tjutangku ngalku.” Mayutju Yiyapalu wangka palunya kulira ngulurrrirra mantarra waltyja palumpaṇu wintarrpungangi. Mayi an kuka ngalkuwiyangku wantirra watjilpa nyinangi. Yitjurilaku waltyja ngantitja tjutangku kututja mantarra waltyja watjilarringkula wintarrpungkupayi.

*Pika wakañutjatjanu Yiyapanya mirrirrirra
wiyarringku*

1 Kiinga 22:1-40

Mayutju tiña Yiitjanya tjanampa Tjuutaku waltyja ngantitja tjutaku nyinarra mirrirringu. Palunyatjanu palumpa katja Tjiyutjapatanya mayutju tinalpi tjanampa nyinangi.

Mayutju Yiyapa paluru ankula mayutju Tjiyutjapatanya tjapiṇu, “Palyala tjungu yankuku tawunu Ramutjalakutu pikangku pungkukitja?” Tjiyutjapatalu kulira yunyparrirra watjanu, “Katutjaku wangka watjalpayi tjutanya ngali tjananya tjapilkwarri.” Katutjaku wangkapayi tjanaya tjutalingku nyinapayi, puu yantaṭa. Yiyapalu tjananya tjungura tjapiṇu, “Palyalatju tjananya ankula Tjiriyanja ngurrara tjuṭa mirri pungkula, kutjupa tjuṭa ngulutjingaralatju wantirriyalku?, tawunu

Ramutjanya kanyilkitjangku.” Watjañuya, “Yuwa. Yankula tjananya nyurrangarri palya pungku, mayutju Katutjalu nyurranya kañtilyanku.” Tjiyutjapatalu Yiyapanya tjapiñu Katutjaku wangka watjalpayi kutjupa yaltirra ngalya katintjaku kutu tjapintjakitjangku.

Yiyapalu watjañu, “Katutjaku wangka watjalpayi yini Makayanya nyinanyi. Wiyaña palunya tjapilku, yara kuyakuya kutjuni tjakultjunkupayi.” Tjiyutjapatalu watjañu Makayanya altirra ngalya katintjaku. Paluru ngalya yankula ngaranytjala, wangka panyapapula tjapinu, yurrunnitja tjuta tjapiñutja nguwanpa. Kanya wati Yiyapaku waarrkanangku Makayanya tjin-gapungu, “Nyuntu wangka yurrunnitja tjutangku watjañingitja nguwanpa Yiyapalara watjala!” Palunyatjanu Makayalu pulanya nguntilyira alatji watjañu, “Palyanyurra ankula tjananya mirri pungku.” Yiyapalu kulira alatji marrkuñu, “Wiya nyuntu ngalinya nguntilyinkunytjaku.” Palunyatjanu Makayalu yalatji tjukarurru watjañu, “Tjukurrmankulana nyurranya nyangu Yitjurilaku waltyja ngantitja tjuta tjilirratjarra tjuta. Tjanaya parra ngarala yulangi mayutju wiyarringutjangka.” Makayalu pulanya yara watjañu yalatji, “Katutjaku wangka watjalpayi tjutangku nyupalinya ngunytji watjañu.” Paluru kutjarra yara kulira Makayaku ngurrkurringu.

Wangka palunya kulintjawiyaya Yiyapanya Tjiyutjapatanya tjilirratjarra tjutatarra, tawunu Ramutjakutu tjungu yanu pika pungkula tawunu palunya tjulyantjakitja. Yiyapanya mantarra kuyakuyangka tjarrparra paakingka yanu pika

pungkukitja. Palunyatjanuya Tjiriyanya ngurrara tjutangku Yiyapanya kutju yiluntankukitjangku puṭu nuuwimilaraya wantingu. Watu Tjiriyanya ngurrarangku puwanarratjarrangku Yiyapanya kutjupakutjura kulira kultu wakanu.

Yiyapaku paaki waarrkanangku katiyanangi. Paluru katirra ngaratjunu wañma nguwanpa kutjupa tjutangkuyanku pika pungkunytjala. Paakingka Yiyapanya pika yawarratjarra witira ngarala mungarrtjilpi ilungu. Pikangkuyanku kutu pungkupayi. Palunyatjanu Yiyapanya ngurra walytjakutu mirri katirra tjunutjunu tawunu Tjamiriyangka. Yiyapaku paaki Yiyapanya ngurrkatjarraya katirra ngaratjunu Tjamiriyangka kapingka. Palunyatjanuya papa tjutangkulpi Yiyapanya ngurrka yanytjuningi, mayutju Katutjalu panyapa watjañutjangka.

Yilaatjanya ilkarikutu yanku. Yilatjanyalpi nyinamalpa

2 Kiinga 2:1-12

Mayutju Katutjalu Yilaatjanya nintiñu ilkarikutu katikitjangku. Palulanguru tawunu Kilkalangka Yilaatjalu palumpa waarrkana Yilatjanya yalatji marrkuñu, “Ngurra ngaangka nyinama! Mayutju Katutjaluni watjañu Piitjulakutu yankunytjaku.” Yilatjalu tjungu yankukitjangku tjilpi Yilaatjanya marrkuñu. Palunyatjanu yiltapula tjungu yanu Piitjulakutu. Piitjulanya ngurrara tjutangkuya Katutjaku wangka watjalpayingku Yilaatjanya yalatji watjañu, “Nyuntu kulinì? Nyuntupa mayutju Katutjalu kuwarri

katiku, kutjulpinu nyinaku.” Yilatjalu watjañu, “Yuwa kulinña.” Palunyatjanu tjilpi Yilaatjalu Yilatjanya piyuku marrkuñu, “Ngurra ngaangka nyinama! Mayutju Katutjalunu watjañu tawunu Tjirikulakutu ankunytjaku.” Yilatjalu watjañu, “Wiyañanta wantikatiku tjunguli ngurra palulakutu ankuku.” Yankulapula tjarrpangu. Tjirikunya ngurrara tjutangkuya Katutjaku wangka watjalpayi tjutangku Yilatjanya piyuku watjañu, Katutjalu tjilpi Yilaatjanya katinyingka.

Tjilpi Yilaatjalu Yilatjanya kutu marrkuñu, “Ngurra ngaangka nyinama! Mayutju Katutjalunu watjañu karru Tjuutanangka munkarra yankunytjaku.” Puñu marrkuralpipula Yilatjanya pula tjungu yanu. Paluru tjana Katutjaku wangka watjalpayi tjuña tjungu yanu karru Tjuutananalakutu. Karru ilangka ngarala Yilaatjalu palumpa kuuta irriwiltjira karpira kapi pungu kuutatjarrangku. Kapi tiña ukalingkuntyawiyangka paña kutju ngaranyingkapula itipirringu. Karrungka tjarukatirrapula maa ankula kalpangutjangka, nganñti kapi tiña ukalingangi.

Ngarala tjilpi Yilaatjalu Yilatjanya yalatji tjapinu, “Katutjalunu kutu katinyingka yaalytjinkuñangku?” Yilatjalu watjañu, “Yunytjurringanyinanta nyuntupañu kantilyatjarra nyinanytjakitja. Katutjaku wangka watjalpayi nyuntunya nguwanpa nyinanytjakitjaña yunytjurringanyi.” Tjilpi Yilaatjalu watjañu yalatji, “Ngayukunu kantilya puntuñanta yungkukitjangku puñu kulinña. Nyuntu ngayunya irra nyakunytjatjanu kutju Katutjalunu katinyingka

palurunta yungku ngayukuṇu kāntilya puntu, palunyatjarra nyinaku. Ngayunya nyuntu wiya irra nyakula kāntilyawiyān nyinaku, maralpa nguwanpa.”

Kutupula ankula wangkayinangi. Palunyatjanu paaki naanytja tjutatjarra nguwanpa ngalya tjarukatirra palula kutjarrangka ngarangi waru tilitjarra. Palunyatjanu walpa tiŋangku Yilaatjanya katingu ilkarikutu paaki palula. Maa katinyingka nyakula Yilatjalu watjanu, “Tjilpi, nyuntu ilkarikutu ananyi. Nyuntu mayutju palyalampatju nyinanyi Yitjurilaku waltytja ngantitja tjutaku. Nyuntulanya palya yaɳtayaɳtalpayi.” Katutjalu tjilpi Yilaatjanya alatji katukutu maa katirra wiya piyuku paɳakutulpi ngalya katingu. Yilatjalu wiya palunya piyuku nyangu. Tjilpi Yilaatjanya katukutu nyakula palurulpi kāntilya puntutjarra nyinangi.

*Minyma Tjunimanya ngurraraku katja kanalku
2 Kiinga 4:8-37*

Palunyatjanu Yilatjanya tawunu Tjumnimalakutu ankula nyinangi. Palunya ngurrarangkupula miitarrarrangku yulytja tinatjarrangku yaltingu, paltjalkitjangku. Palunyatjanu Yilatjanya tawunu palulawana tjutangara ankunytjala, minyma paluru paltjara wantirriyalpayi. Minyma paluru palumpa miitangka yalatji watjanu, “Wati palatja yulta Katutjaku wangka watjalpayi nyinanyi. Palumpara ruuma ngali palyantjaku, paluru

yaatjayi^ti ngarripayingka, paluru ngalya yankula ngarrirra wayintarrinytjaku. Ruuma ngalira waala ngaangka katu tjayi^ti palyalku, palumpa.” Palunyatjanupula Yilatjaku ruuma palyaⁿu.

Palunyatjanu Yilatjalu ruuma palunya nyakula yunyparringu. Ruumangka ngarala palumpa waarrkana yini Kiyatjanya wantirriyanu, minyma palunya yaltirra ngalya katinytjaku. Ngalya yankula ngaranyingka, Yilatjalu putu tjapiⁿu ngaparrtjingkura yungkukitjangku, ruuma palyaⁿutjatjanungka. Minymangku alatji watjaⁿu, “Yulytja tiⁿa kanyini, wiya kutjupakuⁿa yunytjurringanyi.” Minyma paluru yankula nyinanyingka Kiyatjalu Yilatjanya watjaⁿu, “Minyma paluru katjawiya nyinanyi, palumpa mii^ta tjilpi nyinanyingka.” Kiyatjalu minyma yankula piyku yaltirra ngalya katirra ngaratjunu. Yilatjalu minyma palunya yalatji watjaⁿu, “Nyuntu ngula katja mantjilku, yiya kutjungka.” Minyma paluru kulira watjaⁿu, “Nyuntu Katutjakuⁿ, wiyanin ngunytjilyinkunytjaku.” Palunyatjanu ngula minyma paluru yulta katja mantjinu, yiya kutjungka.

Ngula katja palunya tiⁿarringkula nyinarra kaanakutu yanu paapa palumpawana nyinakitja. Nyinarra mikin tiⁿarrirra paapangka yalatji watjaⁿu, “Katan^t mikinarringanyi.” Paapangku watjaⁿutjangka waarrkanangku waalakutu tjupura katirra maama palumpakura yungu. Yampungka kanyiⁿingitjangka ula wiima palurupilk^u kalala mirrirringu. Minyma paluru maa

kalparra katukutu ruuma Yilatjakuñukutu katirra yinytjammingka ngarritjunu.

Palumpa miitangka katja mirrirringutjangka tjakultjunkunytjawiya tuungkiyingka kalparra wala yanu puli Kamilalakutu, Yilatjanya tjakultjunkukitja. Tuungkiyitjarra wirrkanutjangka nyakula Yilatjalu waarrkana Kiyatjanya iyanu, yankula tjungurrinytjaku. Iyalkitjangku alatji watjanu, “Minyma Tjunimanya ngurrara ngalyananyingka yiwarrawana, yankula nyawa!” Kiyatjalu yankula puṭu tjapinu. Minyma paluru palya wangkarra kutu ngalyankula tuungkiyi ngaratjunu Yilatjala. Paluru tjarukatirra pupakatirra yulangi. Yalatji watjanu, “Ngayuluna kuwarri yulturringu, puṭuna kulinī.” Kulira Yilatjalu Kiyatjanya watjanu, “Ngayuku watiya mantjira wala yankula uła palula katu kanyila!, kanarrinytjaku.” Kiyatjanya yurrunpa yanu uła kanantjaku, kanya paluru kutjarrapula nganṭiwana purrkalingku yanangi Yilatjaku waalakutu. Yilatjanyapula ngururipa yananyingka Kiyatjalu uła puṭu kanara małaku Yilatjalakutu yankula tjakultjunu.

Waala palulakutuya tjungu ankula Yilatjalu kutju kalparra tjarrparra yinytjammingka uła palunya mirri ngarrinyingka nyangu. Tuuwa patira Katutjanya tjapira uła palula katuwana watungarangu. Yalatji Yilatjanya uła palula katuwana watungaranyingka wuumpirringu. Yilatjanya pakara waalawana unngu yankula piyuku uła palula watungarangu. Palunyatjanu

kanarrirra tjapanpalangara nyurrtjipungkula kuru yalarringu. Yalatji kanarringanyingka Yilatjalu mantjira katirra yungu palumpa maama.

*Nayamananya pangki pikatjarra nyinamalpa
2 Kiunga 5:*

*Nayamananya Yilatjalakutu anku
2 Kiunga 5:1-14*

Tjilirratjarra tjuṭaku mayutju yini Nayamananya nyinangi manta Tjiriyala. Mayutju paluru pangki pikatjarra nyinarra puṭu kulilpayi, pika wiyanṭjakitjangku. Pangki pikatjarra palunya ngangkaritjarra tjuṭangkuya puṭu palyalpayi. Nayamanalungarri tjananyaya tjilirratjarra tjuṭangku ankula pikangku pungu Yitjurilaku walytja nganṭitja tjuṭa. Kungka wiima kutjuya witira katingu ngurra Tamatjakatjalakutu. Kungka wiima paluru Nayamanaku ngurrangka waarrkarringkupayi, palumpa miitaku waarrkana. Nayamanalu pangki pikatjarrangku puṭu kulira watjilpa nyinangi. Kungka wiima paluru nyakula Nayamanaku miitangka alatji watjanu, “Nayamananya Katutjaku wangka watjalpayilakutu ankunytjaku, Tjamiriyanya ngurraralakutu. Paluru pangki pikatjarra palyalpayi.” Nayamanaku miitangkulpi wangka panyapa kulira Nayamananya tjakultjunu. Tjakulpa kulira Nayamanalu yankula Tamatjakatjanya ngurrara tjuṭaku mayutju tiṇangka tjakultjunu. Palunyatjanu mayutju pulka paluru Nayamananya alatji

watjañu, “Yitjurilaku walytja ngantitja tjutaku mayutju tiña nyinanyi. Ngayuluña piipa wakalku, nyuntu mayutju palulakutu katirra yungkunytjaku, palunya ngurrarangkunta palyantjaku. Piipa ngaatjanya yara alatjinanta wakalku, ‘Piipa ngaatjanyanta ngayuku waarrkanangku Nayamanalunta katirra yungku. Paluru pangki pikatjarra nyinayananyingka unytjurringanyina ngangkaritjarrangku palyantjaku.’” Nayamanalungarri palumpa waarrkana tjutangku piipa palunya mantjira katingu tawunu Tjamiriyalakutu. Pulì kuulta, pulì tjilpa mantarraṭarraya katingu yintyanungku yungkukitjangku, palyarringanyingka. Piipa palunyaya katirra yungu Tjamiriyanya ngurrara tjutaku mayutju. Paluru riitarringkula puṭu kuliñu, “Nyaakuṇi mayutju Tjiriyanya ngurrarangku tjapini, pangki pikatjarra palyantjaku? Wiya Katutjanya nguwanpangkuña pika palyalpayi. Ngangkaritjarrangku pika pangkitarra puṭu palyalpayi. Ngangkaritjarrangku puṭu palyaningka palurungarri mirrpañarringkula ngalya yankula pikangkulanya pungku. Pika pungkukitjangku piipa ngaatjanyatju ngalya wantirriyanu.”

Mayutju Tjamiriyanya ngurrara paluru piipa panyapa riitarringkula puṭu kuliñingka, Yilatjalu tjakulpa kuliñu. Palunyatjanu Yilatjalu palumpa waarrkana wantirriyanu mayutju Tjamiriyanya ngurraralakutu, yalatji tjakultjunkunytjaku, “Puṭu kulintjawiya, Nayamananya ngayulakutu ngalya wantir-

riyal!, ngalilitju wangkanytjaku. Paluru ngayuku wangka kulira yalatji kulilku, ‘Ngaatja yilta Katutjaku wangka watjalpayi, kaṇṭilya puntutjarra nyinanyi.’” Palunyatjanu Nayamananyangarri Yilatjaku waalakutu ankula ngarangi. Yilatjalu palumpa waarrkana wantirriyañu Nayamananya alatji watjantjaku, “Karru Tjuutanakutu arra!, tjapanpalangara tjurrpinytjaku. Yalatji nyuntu tjurrpirra pangki palyarriku.” Nayamanalu kulira mirrpañarrirra alatji watjañu, palumpa waarrkana tjutala, “Ngayulu mayutju tiña nyinanyi. Palangku ngalya yankula mara katura Mama Katutjanya tjapilmara ngayunya palyantjaku. Ngaa ngurrara tjutaku tjanampa karru Tjuutananya kuya. Nganampa karru walytja kutjarra palya ngarrinyi manta Tamatjakatjalawana. Karru palulakutuni iyanmara.” Mirrpañarrirra panyapa wangkarinangi kulira Nayamanaku waarrkanangku alatji marrkuñu, “Katutjaku wangka watjalpayingkunta watjanutjangka nyuntun palya ankula tjurrpinytjaku, palya nyinakitja.” Palunyatjanu Nayamananya karru Tjuutanalakutu ankula tjapanpalangara tjurrpirra pangki palyarringu, pikatjarrarrinytjawiyalpi.

*Nayamanalu putu yinytjanungku yungku
2 Kiinga 5:15-19*

Nayamananyangarriya yunyparrirra małaku yanu Yilatjaku waalakutu. Nayamanalu Yilatjala alatji watjañu, “Ngayulu palyantjatjanungkuña tjukarurrulpi kuliñi. Katutjanya kutjulampa

mayutju tiṇa nyinanyi. Paluru Yitjurilaku walytja nganṭitja tjuta yanṭayanṭalpayi. Palyarringutjatjanungkuṇanta mani yulytjaṭarra yinytjanungku yungku.” Yilatjalu marrkuṇu, “Wiya, kanyilangku! Wiyanin yinytjanungku yungkunytjaku.” Nayamanalu puṭu yungkula alatji watjaṇu, “Ngayulu ngurrakutu yankula mayutju Katutjanya kutju pulkapungkukitjangku kulinı. Katutjaku kutjuṇara tjawirrilyi pungkula kutjalku. Ngaatjanya kutjuṇanta kuwarri tjapiṇi. Palyaṇa pana ngaatjanu payikingka tjunkula tuungkiyi kutjarrangka katiku? Kulinıṇa Katutjaku pana walytja ngaa ngurraraṇa mantjira katirra ngurra walytjangka yintilku. Yintira tjinangku pana kantura ngaraku Mama Katutjanya pulkapungkukitjangku.” Yilatjalu watjaṇu, “Palya, ngurrakutu tjawara mantjira kati!”

Mani an yulytjaku walytjarringkula Kiyatjalu ngunytjilyinku

2 Kiṅga 5:20-27

Yilatjalu mani an yulytja palunya mantjintjawiyangku wantirriyanṭutjangka, palumpa waarrkana Kiyatjalu alatji kulinı, “Ngayuku mayutjungku mani yulytjaṭarra ngaparrtji mantjinmara. Nayamanalu ngaparrtji mani an yulytja tjukarurrungku yungamara. Watalpi, ngayululpıṇa wanara mantjilku.” Kiyatjalu wanara tjungurrirra Nayamanalara alatji ngunytjilyinu, “Yilatjaluni iyaṇu ankulanṭanta alatji watjantjaku, ‘Katutjaku wangka watjalpayi kutjarrapula ngayulakutu kuwarri ngalyankula nyi-

nanyi. Ngayulu yunytjurringanyi panyapa kutjarranya yulytja an mani yungkukitja. Palulanguru yuwara ngayuku waarrkana Kiyatjanya yalatji, puli tjiilpa tjawutjuna tjirripala, mantarra yalatjitarra kuuta kutjarra, turawutju kutjarra, tjaata kutjarra.’”

Nayamanalu kulira yunyparrirra watjanu, “Ngaparrtjingkunanta yulytja an mani yungku. Pulì tjiilpa tjawutjuna tjirripala wiya, munkarra nguwanpa tjawutjuna tjikitjipalananta yungku.” Palunyatjanu tjungungkuya Nayamanaku waarrkana kutjarrangku mani palunyaṭarra mantarra katingu, Yilatjaku waalakutu. Kiyatjalu pulanya Yilatjaku waalangka ila nguwanpa marrkuṇu tjunkula wantinytjaku ngulaku, Yilatjalu nyakutjipingkamarra. Palunya kutjarra pulanya Kiyatjalu piyuku wantirriyanu. Kiyatjalu kutjungku katirra yarrkatjunu, waalangka ngantitjayiti.

Waala palula Kiyatjanya tjarrpangutjangka, Yilatjalu yalatji tjapiṇu, “Nyaalytjikutun yanu?” Kiyatjalu ngunyṭji watjanu, “Ngunytjina yanu, ngamu yulytjayinkukitja.” Yilatjalu watjanu, “Kurrunpangkunanta nyangu Nayamananya paakitjarra wanaranu marrkuṇutjangka. Tjarukatirranta yungu yulytja an mani. Maniku kutju wiiali kulira mantjintjaku. Nyuntu panyapa tjuṭa mantjinutjangka Nayamananya yirriti pangki pikatjarra nyinanytja nguwanpa, nyuntulpi pikatjarra nyinaku, nyuntupa katjapiti tjamupiṭtarra.” Palunyangka Kiyatjanyalpi pangki pikatjarra nyinangi.

*Katutjaku wangka watjalpayi wati Tjuunanya
nyinamalpa*
Jonah 1:—4:

Tjuunalu Katutjanya kulira wantiku
Jonah 1:1-16

Wati Yamitayiku katja Tjuunanya nyinangi, Katutjaku wangka watjalpayi. Mayutju Katutjalu Tjuunangka alatji watjañu, “Yalinytjarra yarra!, tawunu Ninapalakutu. Tawunu tiña palulakutu ankula tjananya marrkula!, kuyaya palyayinanyingka, ngayuku wangka kulira tjukarurrulpiya tjana nyinanytjaku. Kuliñiña tjananya kuyaya palyara nyinanyingka.” Tjuunalu wangka palunya kulira wantirra kumpiralpi yanu wilurarralpi, tawunu Ninapalakutu ankula nintilpayingkamarra.

Wilurarra ankula tawunu Tjuupangka tjarrpangu yuru tiñangka ila. Paña Piinalakutu yankukitjangku maningka payimilara puutangka kalpangu. Ngurra Ninapalakutu yankuwiyangku paluru kuliñu wilurarra wañma ankula nyinakitjangku. Puutangkaya tjungu puuta ngurrara tjuta ankula ngururipa ananyingka, Katutjalu walpa tiña wantirriyanu. Walpa tiñangkulpi wangkarra yuru tiñangku puuta pungkula kilytjuntankula nguwanpa tjarrpatjunu. Palunyatjanu puutangka waarrkarripayi tjutaya ngulu ngulurringu. Katutjanya nguwanpa kutjupa tjutangka tjanayanku tjapiñigi kanarrikitjangku, yurungka tjarrparra ilutjipingkamarra.

Puutangka yunngu tjarrparra puutaku mayutjulu nyangu Tjuunanya kunkunpa ngarrinyingka. Kanara paluru watjañu, “Kunkunpa ngarrinytjawiya pakala! Nyuntupa mayutju tiña, ilkari ngurrarangka tjapila!, althururringkulalanya kanantjaku, yurungkala tjarrparra mirrirripayingka.”

Walpa tiña paluru kutu wangkangi. Puutaku waarrkana tjutangku alatji kulinu, “Wati kutjungku kuya palyantjala palumpa mayutjungku Katutjalu kuyarringkula walpa tiña wantirriyanu. Mani tjiilpaya wanipayi yinkanytjakitjangku alatji nguwanpaya kulin-tjikitjangku wati kuyatjarra kalpangutjangka puutangka.” Yalatjiya yinkarra wati Tjuunanya kulinu. Tjuunalu tjananya tjakultjunu Katutjaku wangka kulira wantingutjanungku. Tjanaya Tjuunanya tjapiñu, “Yaalytjinkumpala walpakamu yuru yatañarrinytjaku?” Tjuunalu tjananya watjañu, “Yurukutuñiya waní! Yiltaña Katutjangka kuya palyanütjangka walpa tiña wangkanyi. Ngayunyakunyuñiya wanirriyalá! Palunyatjanulpi walpa yatañarrikulpi.” Walpa yuru tiña puntu kulira Tjuunanyalpiya kapikutu wañingu. Palunyatjanu walpa palunya yuru yatañarringu. Katutjakulpiya puuta ngurrara tjutangkulpi kuka tjawirrilyi kutjañu.

Piitji tinangku Tjuunanya kuultjura kanyin-malpa

Jonah 1:17; 2:1-10

Tjuunanya yurukutu wañingutjangka piitji tinangku kuultjura kanyiningi, mayutju

Katutjalu iyanṭutjangka. Palunyatjanu wilangka yunngulpi Tjuunanya ngarringi. Wilangka ngarrirra Tjuunalu Katutjanya yalatji tjapiṇu, “Mayutju Katutja. Tjapiṇiṇanta kanantjakunin. Yurungka yunnguwanangkunanta mirrirrikitjangku tjapiṇi. Yaṇangu kutjupa tjutangkuya Katutjanya nguwanpa tjuṭanya walkunu, kanya ngayulu nyuntunya kutju walkunmalpa. Mayutju Katutja. Nyuntu kutju yaṇangu kanalpayi, ngayunyalpi kanala!” Palunyatjanu piitji tiṇa paluru paṇakutu ankula yulkapatjunkula waṭutjunu wati Tjuunanya. Paṇangkalpi waṭungarangi. Palunyatjanu Katutjalu Tjuunanya iyanṭulpi Ninapalakutu.

Ninapanya ngurrara tjuta Katutjakulpiya tjukarurru nyinamalpa

Jonah 3:1-10

Palunyatjanu mayutju Katutjalu Tjuunala alatji watjaṇu, “Tawunu tiṇa palulakutu Ninapalakutu maa yankula tjananya wangka ngayuku tjakultjurra!, panyapananta watjaṇu.” Palunyatjanu Tjuunanya yanu tawunu Ninapalakutu. Waalawana ankula Tjuunalu tjananya tjakultjurinangi alatji, “Kuyanyurra kutu palyaṇingka purayitiyi tjikitjipala nguwanpa ngarala Katutjalu nyurranya mirrintara wiyalku, ngurraṭarra nyurrangarrimpa kilytjuntankula wiyalku.”

Tjuunaku wangkaya yilta kulinu, Katutjakulpiya tjukarurru nyinakitjangku. Tjuṭangkuya mayi, kuka ngalkuwiyangku mantarra kuyakuyangka tjarrparra kuya

palyantjanguru watjilpa nyinangi. Kuya wantirralpiya nyinangi, Katutjakuraya tjukarurru nyinakitja. Ninapaku mayutju tiŋatarra kuya wantirra mantarra kuyakuyangka tjarrparra watjilpa nyinangi. Paluru tjananya palumpa waarrkana tjuta watjaŋu tawunuwana parra yankula yaŋangu tjuta tjingapungkunytjaku alatji, “Mayutju tiŋangku nyurranya watjaŋu kuya palyalwiyyanyurra nyinanytjaku. Kuka an miyi ngalkuwiyyangku nyurrangarri wantirra Katutjanya tjapintjaku. Yalatjila tjapintjala, tjinguru Katutjalulanya mirri pungkuwiyyangku wantiku. Tjinguru kalypalpilampa nyinaku.”

Ninapanya ngurrara tjutaya tjukarurrlipi nyinayananyingka Katutjalu tjanampa yaltururringkula wantingu mirri pungkuwiyyangku.

*Tjuunanya Katutjaku ngurrkurringku
Jonah 4:1-11*

Katutjalu tjananya mirri pungkuwiyyangku wantingutjangka, Tjuunanya Katutjaku ngurrkurrirra yalatjingku watjaŋu, “Mayutju Katutja. Nyuntu tjananya yitjipungkunytjaku. Panyapananta watjaŋu ngurrangkanā nyinakitjangku. Nyuntu yaltururriirra wantipayi, mirri pungkuwiyyangku. Kuya palyalpayi tjutaku nyuntu rawa paṭara ngula kutju yitjipungkupayi. Mirri pungkukitjangku kulira nyuntu altururringkula wantipayi. Ninapanya ngurrara tjuta tjananya nyuntu wantingka waṭalpiṇa

mirrirriku. Ngurrkurrirranangku mirrirrikitja yunytjurringanyi.”

Mayutju Katutjalu Tjuunanya yalatji watjanu, “Nyaaku nyuntu ngurrku nyinanyi?, ngurkuwiyan nyinanytjaku.”

Palunyatjanu Tjuunanya tawunu Ninapangka kakarrara ankula puri pilti wilytjara nyinangi, puri pulkuñpawiyangka. Palula nyinarra nyangangi, Katutjalu tjananya mirri pungkula wiyan-tjaku, ngurra tjutatarra kilytjuntankula wiyan-tjaku.

Palunyangka Katutjalu yukiri pulkuñjarra pakaltjinganu. Tjintu kutjungka parrpatu pakara pulkuñarringu, Tjuunanya wilytjatjunu. Wilytja palumpa yunypa nyinangi. Mungawinki Katutjalu yutunypa tjuta wantirriyanu, wilytja pulkuñpa palunya ngalkula wiyan-tjaku. Palunyangka mungawinki punkara wiyarringu. Tjintu katurringutjangka Katutjalu walpa waru nguwanpa kakarraranguru wantirriyanu. Puri piltingka nyinarra Tjuunanya kata rarrirarrirringu. Tjintungka nyinarra rarrirarrirrirra Katutjanya yalatji tjapinu, “Yiluntarrani!” Katutjalu Tjuunanya tjapinu yarrkalkitjangku, “Nyaakun yukiri pulkuñpa palunya wiyarringutjangka nyuntu ngayuku ngurrku nyinanyi?” Tjuunalu watjanu, “Palyana ngurrku nyinanyi. Ngurrunanta nyinanyingka, palyanin yiluntarra!” Mayutju Katutjalu watjanu, “Yukiri palatja parrpatu walytja pakanu, nyuntu kurpira pakaltjingantjawiya. Tjintu kutju ngarala wiyarringanyingka nyuntu yukiri palaku altururringu. Nyuntu yukiriku

altururrinytja nguwanpa ngayuluña tjanampa Ninapanya ngurrara tjutaku altururringanyi. Palyaña tjanampa yaltururringanyi, yanangu tjuta palaku, pipirri pala tjutaku, kuka pala tjutakutarra.”

Katutjaku wangka watjalpayi tjutangku tjananya langangkatjunku

Yimutja 1:; 5:; 6:; 9:; Wutjiya (Hosea) 1:; 4:; 9: Tjuwula (Joel) 1:; 2:

Katutjalu tjananya wantirriyanmalpa tjakultjunkunytjaku

Yitjurilaku waltya ngan̄titja tjutaya tawunu Tjamiriyala nyinangi. Ngurra palula yila tawunu tjutangkaya nyinangi. Katutjalu tjananya palumpa wangka watjalpayi tjuta iyalpayi. Paluru tjana marrkulpayi Katutjaku tjukarurrulpiya nyinanytjaku. Paluru tjanaya langangkatjunkupayi Katutjalu tjananya yitjipungkutjipingkamarra. Palunyatjanu Katutjalu tjananya kutjupa ngurrara tjuta wantirriyalpayi, pungkunytjaku. Kutjupa ngurrara warrmała tjuta Katutjalu wantirriyalpayi, Yitjurilaku waltya ngan̄titja tjutanya pungkula tjukarurruntjakitjangku.

Katutjaku wangka watjalpayinya Yimutjanya nyinamalpa

Yimutja 1:; 5:; 6:; 9:

Mayutju yini Tjiripumanya tjanampa Tjiyuwatjaku katja nyinangi, Yitjurilaku waltya ngan̄titja tjutaku. Mayutju tiña paluru nyinanyingka wati Yimutjanya nyinangi.

Palunyatjanu Katutjalu Yimutjanya nintira watjaŋu, yankula tjananya yaŋangu tjutangka yalatji tjakultjunkunytjaku, “Maralpa tjutangka tjananya nyurrangarri yalatji kuya palyalpayi. Mayi wiita tjanampanyurra yatjikingku ngunytjilyira mantjilpayi alturuwiyangku. Ngurrangka nyinakitjangkunyurra waala tjuta palyaŋi. Waala palunya tjutangka wiyanurra nyinaku. Kaana tjutanyurra kiripitji tjawara pakaltjingalpayi. Kaana palunya tjutangka wiyanurra kiripitji yantara yintira tjikilku. Kutunyurra kuya palyara nyinapayi. Ngayuku tulukunyurra tjungurringkula nyinapayi, ngayuku walytja palya nguwanpa. Tjawirrilyitju nyurrangarri katirra pungkupayi tjukarurru nyinanytjawiyangku. Tjawirriliyi palunya tjutaku ngayulu yunytjuwiya nyinanyi. Ngayunya pulkapungkukitjangku yinkanytjawiyangku wanti!, yunytjuwiya nyurrampa Katutjanya nyinanyi. Nyurrangarrimpa ngayunya nguwanpa ngaranyi yini Mulakanya palumpaŋu tjaatji wiimangka. Tjaatji wiima palumpaŋunyurra katiyankula pulkapungkupayi, ngayunya Katutjanya tjukarurrungku pulkapungkunytjawiyangku. Palunyatjanu kutjupa tjutangku nyurranya ngalya yankula pikangku pungkula ngurra kutjupakutu katiku ngurra walytja wiyakutulpi, yalinytjarra. Ngurra palulanyurra tawunu Tamatjakatjangka munkarra waarrkana tjutalpinyurra nyinaku.

“Ngurra walytjangka kunpunyurra puntura ngalkula tjkira nyinapayi. Ngurra palya

tjuṭangkanyurra ngarripayi. Yalatji ngurra palyangka nyinarra kulintjawiyanyurra nyinanyi, kutjupa tjuṭangku nyurranya ngalya yankula pikangku pungkula wiyalku. Tjanaya ngalya yankula nyurranya pikangku punganyingka yunypawiyalpinyurra Yitjurilaku waltyja ngantitja tjuṭa nyinaku. Yilta, paluru tjana nyurrangarrinya katiku ngurra waṇma waarrkana tjuṭa nyinanytjaku.

“Ngula ngayulu Katutjalu Tapitaku waltyja ngantitja kutju, mayutju tiṇa nyinatjunku. Ngayuku waltyja tjuṭa tjananya ngayulu ngurra ngaakutu malaku ngalya katirra nyinatjunku. Palunyatjanuya waala yulpuṇutja tjuṭa piyuku palyara ngaratjunku. Kaana tjuṭatarra tjana piyuku tjawara wanara pakaltjingalku. Pakaltjingaraya palya ngalkula tjikilku.”

Katutjaku wangka watjalpayinya Wutjiyanya nyinamalpa

Wutjiya 1:1; 4:1,2; 9:3,4

Mayutju mankurrrpa tjanampa Tjuutaku waltyja ngantitja tjuṭa nyinangi, yini yalatji, Yatjayanya, Tjuutjamanya, Yiiyatjanya Yitjikayanya. Palunyatjanu tjanampa mayutju tiṇa Tjiripumanya Tjiyuwatjaku katja nyinangi, Yitjurilaku waltyja ngantitja tjuṭaku. Mayutju paluru tjutaya nyinanyingka wati Wutjiyalu tjananya yalatji Katutjaku wangka tjakultjunu, “Yitjurilaku waltyja ngantitja tjuṭangkuya kulila! Ngayulu Katutjalu nyurranya yilta yitjipungku, tjukarurru nyinanytjawiyangka, kuyanyurra kutu palyara nyinanytjala. Kutjupa

ngurrara tjutangku nyurranya ngalya yankula pikangku pungkuku. Ngayunyañinyurra kulilwiyangku wantingutjangka iltu ngayulu nyurrangarrinya ngurra kutjupakutu iyalku waarrkana tjuta nyinanytjaku. Mayutju kutjupangkulpi nyurranya kanyilku, wiyanurra mayutju walytjatjarra nyinaku. Ngurra palulanyurra nyinarra wiyalpiñinyurra pungkula kutjanmalpa tjawirrili. Ngula kutjulpiñinyurra ngalya yankula ngayunya pulkapungku, ngurra walytjangka, palyalpinyurra nyinaku.”

Katutjaku wangka watjalpayinya Tjuwulanya nyinamalpa

Tjuwula 1;: 2:

Katutjalu wati Tjuwulanya nintinu yalatji tjananya Katutjaku wangka tjakultjunkunytjaku, Yitjurilaku walytja ngantitja tjutakutu, “Tjutangkuya wangka kulila!, tjilpi tjutangkutarra. Wangka ngaatjanya tjananya katjapitingka yuntałpitjingka nintila! Palunya tjutangkuya kulira tiñarrierra tjanampañu katjapitingka yuntałpitjingka nintintjaku. Kutuya kulila! Kutjupa tjutangku nyurrangrimpa ngurrangka ngalya yankula pikangku pungkula kilytjuntanku. Palunyatjanu kutjupa tjutangku nyurrangarrinya ngalya yankula piyuku pikangku pungkula ngurra tjuta kilytjuntanku. Yalatji nyurranya tjuta kutjupangku tjuta kutjupangkuya ngalya yankula pikangku pungkula ngurra tjuta kilytjuntankula wiyalku.

“Ngula ngayuluña Katutjalu nyurrangarrimpa walytja ngantitja tjutangka tjananya ngayuku kurrunpa wantirriyara tjarrpatjunku. Palunyatjanuya ngayuku wangka tjakultjurinamalpa nyurrangarrimpa walytja ngantitja tjutangku.”

Yatjiriyanya ngurrara tjutangku tjananya pungkula katiku

2 Kiinga 15:—17:

Yitjurilaku walytja ngantitja tjutangkuya kutukuya palyanmalpa

2 Kiinga 15:8-31

Mayutju tiña Yatjarayanya tjanampa Tjuutaku walytja ngantitja tjutaku nyinangi, kanya tjanampa Yitjurilaku walytja ngantitja tjutaku mayutju tiña kutjupa nyinangi, yini Tjakarriyatjanya. Tjakarriyatjanya Katutjaku tjukarurruwiya nyinangi. Pira tjikitjipala mayutju tiña tjanampa nyinanyingka, wati Tjalumalu mayutju nyinakitjangku mirri pungu.

Wati Tjalumanya tjanampa mayutju tiña pira kutju nyinanyingka wati kutjupangku Minayimalu mirri pungu, mayutju nyinakitjangku. Minayimanya Katutjaku wiya tjukarurru nyinangi. Yiiya tiinpala wiyawana nyinarra wiyarringu. Palunyatjanu palumpa katja Pikayayanya mayutju tiña tjanampa Yitjurilaku walytja ngantitja tjutaku nyinangi, yalinytjarra ngurrara tjutaku.

Pikayayanya tjanampa mayutju tiña nyinarra wiyawana nyinangi, Katutjaku tjukarurru nyinanytjawiya. Yiiya kutjarra nyinanyingka wati kutjupangku yini Pikalu mirri pungu, mayutju

nyinakitjangku. Pikanya Katutjaku tjukarurru nyinanytjawiya, wiyawana nyinangi. Yalatji yiya tuuntiyipala nyinanyingka wati kutjupangku Wutjiyalu mirri pungu, mayutju nyinakinitjangku. Wutjiyanya tjanampa mayutju tiña nyinarra wiyarringu. Wati paluru wiya Katutjaku tjukarurru nyinangi. Paluru tjanampa Yitjurilaku walytja ngan̄titja tjutāku mayutju nyinangi yiya nayinpala nguwanpa.

Yitjurilaku walytja ngan̄titja tjutāku tjananya tjanaya ngurra kutjupakutu katiku

2 Kiinga 17:5-12

Wutjiyanya mayutju tiña tjanampa Yitjurilaku walytja ngan̄titja tjutāku nyinanyingka Yatjiriyanya ngurrara tjutā tawunu Tjamiriyalakutu ngalya yanu, pikangku tjananya pungkukitja. Yatjiriyanya ngurrara tjiliirratjarra tjutāku mayutju yini Tjalmanitjanya nyinangi. Tawunu Tjamiriyanya waala tjutangka ilawana parriki tiña ngarangi. Parriki paluru waala palunya tjutanya ngururrtjunkula, kiīta kutjarratjarra ngarangi.

Tjamiriyanya ngurrara tjutangkuya kiīta palunya unnguwanangku patira taayitinu, Yatjiriyanya ngurrara tjutangku tjarrparra mirri pungkutjipingkamarra. Yalatjiya yiya tjirripala unngu nyinangi, Yatjiriyanya ngurrara tjiliirratjarra tjutāaatjayiti nyinarra wanipayi, unnunguruya pakara tjalkalungkutjipingkamarra.

Palunyatjanu tjiliirratjarra tjutangkuya kiīta kilytjuntankula tjarrparra pikangku tjananya

pungu. Kutjupa tju̇ta tjananya tjanaya witiñgingi ngulu tjalkalungkutjipingkamarra. Witira tjananya kanyiñgingi Yitjurilaku walytja ngan̄titja tju̇ta, tjanampañu mayutju tiñatarrha. Paluru tjana kanyira tjananya katingu yalinytjarra ngurra kutjupakutu waarrkana tju̇talpiya nyinanytjaku. Tawunu tju̇tangka yalinytjarra tjananya kanyiñgingi Yatjiriyanya ngurrara tjutaku ngurra walytjangka. Paluru tjana waarrkana tjuta tjananya Yitjurilaku walytja ngan̄titja tju̇ta kanyiñgingi ngurra walytjakutuya malaku yankutjipingkamarra.

Yalatji Katutjalu tjananya Yitjurilaku walytja ngan̄titja tju̇ta payira wantirriyanu ngurra walytjangkaya kutungku kuya palyan̄ingka. Katutjanya nguwanpa tju̇ta tjananya tjanaya Yatjaranya, Paalanyañtarra pul̄kapungkupayi, Katutjanya yulta wantirra. Palunyatjanu Katutjalu tjananya ngurra walytjanguru wantirriyanu ngurra kutjupakutu yitjipungkunytjakitjangku.

*Kutjupa tju̇taya Tjamiriyangkalpi nyinamalpa
2 Kiunga 17:24-41*

Yatjiriyanya ngurrara tjutaku mayutju tiñangku tjananya kutjupa ngurrara tju̇ta watjañu tawunu Tjamiriyangkalpiya yankula nyinanytjaku, tawunu kutjupa tju̇tangkañtaraya yankula nyinanytjaku, Tjamiriyangka yila ngaranytja tju̇tangka. Palunyatjanu kutjupa ngurrara tju̇taya yalatjiya tawunu Tjamiriyangka nyinangi, Papilunanya ngurrara tju̇ta, Kuutjanya ngurrara tju̇ta, Yipanya

ngurrara tjuṭa, Yamatjanya ngurrara tjuṭa,
Tjiparamanya ngurrara tjuṭatarra.

Tjamiriyangka ilawanaya tawunu kutjupa
tjuṭawanaṭarraya nyinarra wañingi, kanyaya
Yitjurilaku walytja ngantitja tjuṭa yalinytjarra
wañmaya waarrkana nyinangi.

Paluru tjanaya tawunu tjuṭawana nyinangi,
Tjamiriyangka, yilawana. Tjana wiya
Katutjanya pulkapungkupayi. Palunyatjanu
Katutjalu tjanaya layina tjikipaka tjuṭa
wantirriyanu patjara yiluntankunytjaku
tjanaya. Palunyatjanulpiya kulinu pana
palunyaku mayutju tiña Katutjanya nyinangi.
Palunyatjanu Yatjiriyanya ngurrara tjuṭaku
mayutju tinangku Yitjurilaku walytja ngantitja
kutju Tjamiriyalakutu wantirriyanu. Wati
paluru Katutjaku tulkuku mayutju tiña nyinangi.
Wati palunya mayutju paluru watjañu yankula
Katutjaku wangka tjanaya nintintjaku. Paluru
tjanaya yankula puṭu nintiñingi. Katutjanyaaya
pulkapungkula Katutjanya nguwanpa kutjupa
tjuṭatarraya pulkapungangi, Katutjanya kuṭju
tjukarurru pulkapungkuwiyangku.

Mayutju tiña tjuṭa yalatji nyinamalpa

2 Kiinga 8:—17:

Yurrunpa Yitjurilaku walytja ngantitja tjuṭaku
mayutju tiña Yiyapanya nyinarra wiyarringu.
Palumpa katja Yiyatjayanya mayutju tiña
tjanampa nyinarra wiyarringu. Palunyatjanu
Tjurumanya tjanampa mayutju tiña nyinarra
wiyarringu. Palunyatjanu Tjiyuwayatjanya
mayutju tiña tjanampa nyinarra wiyarringu.

Palunyatjanu Tjiyuwatjanya mayutju tiṇa tjanampa nyinarra wiyarringu. Palunyatjanu Tjiripuma kutjupa tjanampa mayutju tiṇa nyinarra wiyarringu. Palunyatjanu Tjakarriyatjanya tjanampa mayutju tiṇa nyinarra wiyarringu. Palunyatjanu Tjalumanya mayutju tiṇa tjanampa nyinarra wiyarringu. Palunyatjanu Minayimanya tjanampa mayutju tiṇa nyinarra wiyarringu. Palunyatjanu Pikayayanya tjanampa mayutju tiṇa nyinarra wiyarringu. Palunyatjanu Pikanya mayutju tiṇa tjanampa nyinarra wiyarringu. Palunyatjanu Wutjiyanya mayutju tiṇa nyinangi, Yitjurilaku walytja ngantitja tjutaku. Wutjiyanya mayutju tiṇa nyinanyingka Yatjiriyanya ngurrara tjutangku tjananya yalintjarranguru ngalya yankula pikangku pungkula małaku katingu. Paluru tjana yalintjarra katirra nyinatjunu Yitjurilaku walytja ngantitja tjuta waarrkana tjuta nyinanytjaku. Ngurra palula mayutju tiṇangku pikaṭingku kanyiṇingi.

Palunyangka yurrunpa Tjuutaku walytja ngantitja tjutaku mayutju tiṇa Tjiyutjapatanya Tjarutjalumangka nyinarra wiyarringu. Palunyatjanu palumpa katja Tjiyuramanya mayutju tiṇa tjanampa nyinarra wiyarringu. Palunyatjanu Yiyatjayanya mayutju tiṇa tjanampa nyinarra wiyarringu. Palunyatjanu kungka Yatjalayanya mayutju tiṇa tjanampa nyinarra wiyarringu. Palunyatjanu Tjuwatjanya mayutju tiṇa tjanampa nyinarra wiyarringu. Palunyatjanu Yamatjayanya mayutju tiṇa tjanampa nyinarra wiyarringu. Palunyatjanu

Yatjayanya mayutju tiña tjanampa nyinarra wiyarringu. Palunyatjanu Tjuutjamanya mayutju tiña tjanampa nyinarra wiyarringu. Palunyatjanu Yiyatjanya mayutju tiña tjanampa nyinarra wiyarringu. Palunyatjanu Yitjikayanya mayutju tiña tjanampa Tjuutaku walytja ngantitja tjutaŋku nyinangi. Paluru mayutju tiña nyinanyingka, Yatjiriyanya ngurrara tjutangku tjananya Tjamiriyanya ngurrara tjuta yalintjarra katingu, Yitjurilaku walytja ngantitja tjutaŋku.

Yitjikayanya tjanampa mayutju tiña nyinamalpa

2 Kiunga 18:—20: Yaatjaya (Isaiah) 36:—39:

Yitjikayalu Katutjanya nguwanpa tjuta yulpura wiyalku

2 Kiunga 18:1-12

Mayutju Yitjikayanya Katutjaku tjukarurru nyinangi, mayutju Tapitanya tjukarurru nyinangutja nguwanpa. Palunyangka yaŋangu tjutangku Katutjanya nguwanpa tjuta walkulpayi Yatjaranya Paalanyatarra. Mayutju Yitjikayalu tjananya palumpa waarrkana tjuta watjanu, yankulaya Yatjaranya Paalanyatarra yulpura wiyantjaku, yaŋangu tjutangku tjanaya walkultjipingkamarra. Yitjikayanya yalatji Katutjaku wangkaku tjukarurru nyinanytjala, Katutjalu yanṭayanttalpayi. Palumpa waarrkana tjilirratjarra tjutangku tjananya palya pungkula wantirriyanu Pilitjiyanya ngurrara tjuta, kutjupa tjutatarra, Katutjalu tjananya yanṭayanṭantjala.

Palulanguru Yatjiriyanya ngurrara tjutaku mayutju tiñangku watjañu Yitjikayanyangarri palumpa waarrkana tjuta nyinanytjaku, mirri pungkuwiyangku wantirra. Mayutju Katutjalu Yitjikayanya rapantjala paluru wiya watjara wantingu, waarrkana nyinakitja kulilwiyangku. Tjuutaku walytja ngantitja tjutaku mayutju tiña Yitjikayanya yiya puupala nyinangi. Palunyatjanu Yatjiriyanya ngurrara tjuta tjilirratjarra yanu, tawunu Tjamiriyanya ngurrara tjuta pungkukitja. Ngalya yankula tjananya pikangku pungu, ngurra kanyilkitjangku. Yitjurilaku walytja ngantitja tjutaku tawunu tjuta mantjilkitjangku tjanaya pikangku pungkupayi. Mirri pungkula tjananya kutjupa tjuta kanyinìngi tawunu Tjamiriyala. Yirriti tawunu palula parriki tiña tjutaya parra tjunangi nganytjalpa. Ngururrpa Tjamiriyanya ngurrara tjuta nyinangi. Rawangku tjananya Yatjiriyanya ngurrara tjutangku ngururrtjunkula tawunu palula kanyinìngi yiya tjirripala, Tjamiriyanya ngurrara tjuta pakara tjalkalungkutjipingka. Yalatji tjananya kanyira watiya tiñatjarrangku kiiña kilytjuntankula tawunu Tjamiriyangkalpiya tjarrpangu. Tjarrparraya tawunu tjanampa yulpuraya kilytjuntanu. Yalintjarralpi tjananya katingu ngurra palula waarrkana tjutaya nyinanytjaku. Yalatjiya Yitjurilaku walytja ngantitja tjuta ngurra palula waarrkarirraya nyinangi, Katutjakuya tjukarurru nyinangutja wiya, Katutjaku wangkaya kulira wantipayi.

Palulanguru Tjuutaku walytja ngantitja tjuta tjananya Yitjikayalu palya kanyinìngi tawunu

Tjarutjalumangka.

*Wati Yaatjayalu mayutju Yitjikayanya mar-kulku
2 Kiinga 18:13-37; 19:1-34*

Yitjikayanya tjanampa Tjuutaku walytja ngantitja tjutaku mayutju tiṇa yiya puutinpala nyinangi. Palulanguru Yatjiriyanya ngurrara tjuta tjilirratjarra yanu, Yitjikayanyangarri tjananya pungkuitja. Yitjikayaku waarrkana tjuta tjananya yankula Tjarutjalumangka yalintjarra mirri pungangi. Tjarutjalumalawana piyuku mirri pungkupayingkamarra Yitjikayalu Yatjiriyanya ngurrara mayutju tiṇa palulakutu waarrkana wantirriyanu yalatji tjapintjaku, “Nyaapaṇanta yungkunytjaku nyuntu yunytjurringanyi? Nyuntunin tjapintjala ngayuluṇanta yungku mani kuulta tiṇa ngayuku waarrkana tjuta tjananya pungkutjipingkamarra.” Mayutju paluru Yitjikayanya tjapiṇu puli kuulta tiṇaku, puli tjiilpa tiṇakutarra. Kanarrikitjangku Yitjikayalu puli kuulta puli tjiilpa tiṇanya tjaatji tiṇangka yarralytjankula mantjiṇu. Mantjira wantirriyanu mayutju palulakutu.

Putu tjanampa kuulta tjuta wantirriyanu. Yatjiriyanya ngurrara tjutangkuya yankula tawunu Tjarutjalumanya ngururrtjunu, tjilirratjarra tjutalingkungku. Yitjikayanya palumpa waarrkana tjutatarra yurrunpa parriki tiṇangka yunngu tjarrparra kiiṭa tjuta patiṇu. Yirriṭi tawunu palula parriki tiṇa tjuta tjanaya parra tjunangi nganytjalpa. Ngururṛpa

Tjarutjalumanya ngurrara tjuṭa nyinangi. Yatjiriyanya ngurrara kutjungku mayutju tiṅangku Tjarutjalumangka tjayitingka ngarala ngulultjingalkitjangku tjananya yalatjingku watjañu, “Mayutju nyurrampa Yitjikayanya mungutja nyinanyi. Palumpa wangka kulintjawiyangkuya wanti! Puṭu nyurranya kuwarri kanalku. Kuwarrilpi nganañatju parrikingka tjarrparra nyurrangarrinya mirri pungku, tjilirratjarra tjutangku. Nyurrangarimpa mayutju tiṅangku nyurranya Katutjalu puṭu kanalku. Nganañatju nyurrangarrinya mirri pungkupayingkamarra kiiṭa yalytjurankulaya ngalya yankulaya tjungu ngara!, waarrkana tjutalampatju kana nyinakitja.” Yañangu tjutangku Tjarutjalumanya ngurrara tjutangku parrikingka katu nyinarraya wangka palunya kulin̄ingi wangkawiyangku, mayutju Yitjikayalu tjananya yurrunpa watjañutjangka.

Mayutju Yitjikayalu ngulurringkula waarrkana kutju wantirriyanu wati Yaatjayalakutu, Katutjaku wangka watjalpayilakutu, yankula tjapintjaku. Waarrkanaku wangka Yaatjayalu kulira waarrkana kutjupa wantirriyanu mayutju Yitjikayalakutu, yalatji tjakultjunkunytjaku, “Mayutju Katutjalunta yalatji watjañu. Yatjiriyanya ngurrara tjutaku tjanampa nyuntu wiya ngulurringkunytjaku. Ngayuluna wiyananangku nintintjala Yatjiriyanya ngurrara mayutju tiña palunya, ngurra walytjakutu rayitpayiki yanku, palumpa tjilirratjarra tjutatarra. Ngurra palula kutjupangku mayutju palunya mirri pungku.”

Piyuku tjananya ngulutjingalkitjangku Yatjiriyanya ngurrara tjutaku mayutjungku piipa wakara Yitjikayalakutu wantirriyanu. Yitjikayalu piipa palunya mantjira riitarirra Katutjaku tjaatji tiŋakutu katirra tjunkula yutitjanu Katutjalu nyakunytjaku. Yalatji tjunkula pilara Katutjala tjapiṇu Tjarutjalumanya ngurrara tjuta tjananya mirri pungkutjipingkamarra.

Palunyatjanu Katutjaku wangka watjalpayingku Yaatjayalu waarrkana wantirriyanu Yitjikayalakutu yalatji wangkanytjaku, “Nyuntunu Katutjanya panyapa tjapintjala, Katutjalunta alatji watjanı, ‘Yatjiriyanya ngurrara tjutangkuniya wiyanawangku panypurangkupayi. Yiltana nyurrangarrinya watjanı. Tjanaya Yatjiriyanya ngurrara tjutangku wiya Tjarutjalumangka tjarrparra nyurrangarrinya mirri pungku, wantirra nyurranya ngurra walystjakutuya rayitpayiki yanku.’”

Katutjalu tjananya Yatjiriyanya ngurrara tjuta mirri pungku

2 Kiunga 19:35-37

Palunyatjanu mungangka tjananya Katutjaku waarrkana ilkari ngurrarangku tjarukatirra Yatjiriyanya ngurrara tjutanya mirri pungu. Mirri tjutalingkuya ngarrirra wañingi waan yantañan yiitiyi tjawutjuna. Tawunu Tjarutjalumangka tjayitingkaya ngarrirra wañingi. Palunyatjanu tjilirratjarra kutjupa tjutaya pakara ngulu tjalkalungu ngurra

walytjakutu, tawunu Ninapalakutu. Palunyatjanu Yatjiriyaku mayutju tiñangku paapa Katutjanya nguwanpa walkuntjala, palumpa katja kutjarrangkupula yunytjuwiyarringkula tjula watwaratjarrangku wakara mirrintanu.

Yitjikayanya ngula mirrirrinjtaku Katutjalu watjalku

2 Kiinga 20:1-12

Palunyatjanu mayutju Yitjikayanya pika punturrangkula ngarringi. Katutjaku wangka watjalpayi Yaatjayalu ankula Yitjikayala alatji Katutjaku wangka tjakultjunu, “Mayutju Katutjalunta watjañu alatji. Pikitjarranu ngarrrira yilta kuwarrinu mirrirriku. Kutjupangku tjananya watjalku nyuntupa yulytjaya mantjintjaku.” Mayutju Yitjikayalu kulira yuñurringkula yulangi. Palunyatjanu Yaatjayanya yanu. Yitjikayalu yularra watjilpangku Katutjanya yalatji tjapiñu mirrirritjipingkamarra, “Mayutju Katutja. Kulilañi! Wiyanä yunytjurringanyi mirrirrikitja. Ngayuluñanta tjukarurrungku palyalpayi. Nyuntu yunytjuringkula watjantjala ngayuluñanta tjukarurrungku palyalpayi. Nyuntapananta tjukarurru nyinakitjangkuña kulira nyinapayi.” Yalatji tjapira piyuku yulangi.

Yaatjayalu Yitjikayanya wantirra yankula waalangka tjayitingka yankunytjala mayutju Katutjalu yalatji watjañu, “Rayitpayiki yankula Yitjikayangka yalatji tjakultjurra! Mayutju Katutjaluñanta kuliñu nyuntunu mirrirritjipingkamarra kuwarri tjapintjala.

Kuwarriñanta palyalku. Tjintu tjirripalangka ngarriñranu palya pakara yanku ngayuku tjaatjikutu. Yalatjinqanta kanantjala yiya pipitinpala kutjunu nyinarra mirrirriku." Alatji Yaatjayalu Yitjikayangka tjakultjunkula palumpa waarrkana tjutangka tjananya watjanu mirritjina palyantjaku, witjirrkingka palyara mirritjinangka Yitjikayanya nyapantjaku.

Yitjikayalu Katutjaku wangka palunya kulira alatji kulinulpi, "Tjinguruña kanarriku, tjinguru wiya." Alatji kulira Yaatjayanya yalatji tjapinu, "Tjinguruña piyuku kana nyinaku, tjinguru wiya. Yunytjurringanyina Katutjaluni piyuku nintintjaku." Piyukupula wangkarra Yaatjayalu Katutjanya tjapintjala, Katutjalu watjanu tjintu rayitpayiki kakarrarakutu yankunytjaku, wiima wiyakutju. Tjintu yalatji panyapawana yankunytjala, wilytja rayitpayiki yanu. Yitjikayalu wilytja rayitpayiki yankunytjala nyakula kulinu, "Yilta. Katutjalu wilytja rayitpayiki wantirriyanu, ngayunya nintilkitjangku. Yiltaña pallyarriku."

*Yitjikayalu wiyawana palyara mirrirringku
2 Kiinga 20:12-21*

Palunyatjanu mayutju tiñangku Papilunanya ngurrarangku waarrkana tjirripala wantirriyanu, Yitjikayalakutu munytjangku yungkunytjaku. Paluru mantjira yunyparringu. Palunyatjanu Yitjikayalu tjananya palunya tjirripala Tjarutjalumalawana katirra tjananya parra nintiñangi. Alatji tjananya katirra tjaatji tiñangka nintiñu mani tiña an kuulta tjuta

ngarrinytjala. Palunyatjanu Yaatjayalu tjakulpa kulira Yitjikayanyalpi Katutjaku wangka alatji tjakultjunu, “Nyuntu tjananya Papilunanya ngurrara tjuta nintintjawiyangku wantimara. Ngula, nyuntupa katja tjuta yuntałpa tjuta Papilunanya ngurrara tjutangku tjananya pikangku pungkula rayitpayiki katiku tawunu Papilunalakutu, palunya ngurrara tjutaku waarrkanaya nyinanytjaku.”

Mayutju Yitjikayanya yiiya pipitinpala nyinarra mirrirringu. Palumpa katja Manatjanya mayutju tinalpi tjanampa Tjuutaku ngantitja tjutaku nyinangi.

*Katutjaku wangka watjalpayi kutjarra Yaatjayanyakamu Makayanya nyinamalpa
Yaatjaya 1; 5; 6; 9; 11; 53; Makaya (Micah)
2; 3; 5:*

*Tjakultjunkunytjaku Yaatjayanya wantirriyalku
Yaatjaya 1; 6:*

Tjuutaku walytja ngantitja tjutaku mayutju tjuta yalatji nyinangi, Yatjanya, Tjuutjamanya,Yiiyatjanya, Yitjikayanya. Mayutju palunya tjutaya nyinanytjala, Yaatjayalu tjananya Katutjaku wangka watjalpayingku marrkulpayi Katutjaku tjukarurru nyinanytjaku.

Yaatjayalu tjananya yalatji watjañu, “Mayutju tiña Yitjikayanya mirrirrinytjala tjukurrrpa nguwanpaña nyangu. Mayutju Katutjanyaña tjaatji tinangka mantarra palyatjarra nyangu, mayutjuku tjiyingka nyinanytjala. Katutjala katu ngaranginya yilkari ngurrara tjirripala.

Paluru tjana nyalpi tjutaṭjarra ngarangi, tjikitjipalatjarra. Ilkari ngurrarangku tjakultjunu ilkari ngurrara kutjupanya, ‘Mayutju Katutjanya tjukarurru nyinapayi, palyalampa mayutju tiṇa, maṭupurra. Katutjalu paawu puntutjarrangku tjukarurru palyalpayi ngurra tjutaṇwanangku.’”

Palunyatjanu Yaatjayalu panyapa nyakula Katutjanya watjanu, “Kuunyingkuna kuya kutu palyalpayi.” Palunyatjanu ilkari ngurrara kutjungku waru pirilyi nguwanpa mantjira yankula Yaatjayala tjaangka tjunu. Tjunkula Yaatjyalakutu watjanu, “Pirilyitjarrangkunanta tjaangka pampuntjala nyuntupa kuya Katutjalu wañingu.” Palunyatjanu Katutjalu ilkari ngurrara kutjupa tjutangka wangkangu yalatji, “Ngananya wantirriyalku nganampa waarrka palyantjaku? Ngananyalampa waarrkarriku?” Palunyatjanu Yaatjayalu watjanu, “Ngaatjana ngaranyi. Ngayunyaṇiya wantirriyala!” Palunyatjanu Katutjalu watjanu Yaatjayanya, “Yankula tjananya yanangu tjutangka yalatji tjakultjurra!, ‘Yiltanyurra wangka kulilku. Kuliranyurra wantiku. Yiltanyurra kurungku nyaku Katutjalu palyanṭutja. Nyakulanyurra wantiku.’”

*Yaatjayalu tjananya langangkatjunamalpa
Yaatjaya 1:3; 1:18; 3:16; 5:*

Tjuutaku walytja ngaṇṭitja tjuta Katutjaku tjukarurruwiya nyinanytjala, Yaatjayalu tjananya yalatji langangkatjunu, “Ngayuku pipirri nguwanpa ngayulu nyurrangarrinya

yanṭayanṭara kanyilpayi, kanyanyurra yunytjuwiya nyinanyi. Puluka tjutangku mayutju walytjaku kulira ngaranyi. Tuungkiyitarra mayutju walytjaku kulira ngaranyi, kanya nyurrangarri ngayunya kulira wantinyi. Yitjurilaku walytja ngantitja tjuta nyurrangarri ngayunya mayutju tiṇa kulira wantinyi. “Kutjupa tjutangkunyurra waala tjuta payimilara kanyini, kanya kutjupa tjuta waalawiya nyinanyi. Ngurra paṇa tjutanyurra payimilara kanyini, kanya kutjupa tjuta ngurrawiya nyinanyi. Yalatji payimilara waala tjuta an yulytja tiṇatjarra nyinakitjanyurra yunytjurringanyi, mayutju tiṇa tjuta nguwanpa. Waarrkana tjutatarranyurra kanyini liitjipaka tjutangku. Wiyawananyurra nyinanyi, yanangu kutjupaku wiya nyurrangarri yaltururringanyi. Palunyatjanu ngayuluṇa nyurrangarrinya panitjimilalku.

“Kutjupa tjutanyurra pulakinaku kutju yunytjurringirra nyinapayi. Yunytjurringkulanyurra tjikira nyinapayi. Tilayitikutu pakara pulakinaku tjikilkitjangku kuliranyurra yankupayi. Mungangkanyurra kutu tjikira pikarringkupayi. Palunyatjanu ngayulu nyurrangarrinya panitjimilalku ngayuku Katutjaku kulintjawiya, pulakinaku kutju kulilpayi.

“Pulitjimana tjutangku mayutju kutjupa tjutangkutarraya yanangu maralpa tjutaku tjukarurrungku palyantjawiyangku wantipayi, yanangu kutjupangku yarrkangku tjingapungkula mani yungkunyjtala. Mayutju paluru tjana tjukarurru palyantjawiyangku

wantipayi tjananya, manitjirratjangku. Mayutju kutjupa tjutaṭarra paluru tjana nguwanpa wiyawana nyinangi.” Yalatji Yaatjayalu tjananya marrkuṇu.

“Kungka kutjupa tjutangkuya mantarraku kutju kulira nyinapayi. Kungka kutjupa tjutangkuya riinga tjutaku, nikilitji tjutaku kutju kulira nyinapayi, Katutjaku kulintjawiya.” Palunya tjananya Yaatjayalu marrkuṇu.

Yaŋangu tjutangka tjanala Yaatjayalu yalatji marrkulpayi, kuya palyalwiya nyinanytjaku. “Yalatjiya kulila!, mayutju Katutjalu nyurran-garrinya watjanı, ‘Kuyatjarranyurra nyinanyi mantarra kuyatjarra nguwanpa. Ngayuluna nyurrampa Katutjalu kuya waŋinytjala, mantarra tjulkuratjarralpi, kiliinalpinyurra nyinaku, kuyatjarrawiya.’”

Kanalpayi ngalya yankunytjaku Yaatjayalu watjalku

Yaatjaya 9:; 11:; 53:

Kurayitjanya kanalpayilampa ngalya yankunytjaku Yaatjayalu irriṭi yalatji watjanu, “Yaŋangu tjutaya mungawana nguwanpaya nyinarra waŋinyi, kuya kutjuya kulira nyinapayi, mungangka kutu nyinakitjaya yunytjurringanyi. Yalatji nyinarraya tili tina nguwanpa nyakulpi. Kuyatjarraya nyinaku mirrirrikitja. Paluru tjana tili tina nguwanpa Kurayitjanya nyaku. Nyakulaya yalatji nintingku kulikku, ‘Katutjalulampa palumpa katja nyinatjunu. Yiṭi wiima nyinarra tiŋarriku. Mayutju tiŋalampa yilta

nyinaku. Palunyangkala yalatji katja palunya walkula! Katja palunya palyalingkulampa nyinaku. Palurulanya nintilku Katutjanya. Yilta katja palunya mayutju tiŋalampa nyinaku, Katutjanyapula paawu kutjutjarra. Katja paluru paapa tiŋa nguwanpalampa nyinaku. Palurulanya Katutjaku kalypa nyinatjunkupayi. Kanalpayi paluru Kurayitjalulanya yaŋangu tjuta yanṭayantalku, kutulanya yanṭayantara kanyinmalpa, ngula nyinanytja tjutaṭarra. Mayutju tiŋa Tapitalu tjananya tjukarurru kanyintja nguwanpa, kanalpayi paluru tjananya Tapitaku waltyja nganṭitja tjuta tjukarurrungku tjananya kutu yanṭayantanmalpa.

‘Watiya piltirringu. Palulanguru watiya palula yukiri nyuwana pakaŋu Yukiri nyuwana pakaŋutja nguwanpa, kanalpayi palunya yutirringkula kanalampa nyinaku. Yirriti wati Tjiitjiyinya Tapitaku paapa mirrirringu, palunyatjanu ngula palumpa waltyja nganṭitja kana nyinaku. Kanalpayi paluru ninti puntu nyinaku, Katutjaku kurrunpatjarra. Paluru nguluwiya nyinarra tjukarurrungku tjananya nintinmalpa. Uwankarraku ninti nyinarra Kurayitjanya mayutju Katutjaku waarrkana nguwanpa nyinaku.

‘Kanalpayi paluru tjananya aŋangu tjuta tjukarurrungku watjalku maralpa tjuta yanṭayaŋtalkitjangku, mayutju tjutaku ngulurringkunytjawiyangku. Mayutju paluru tjana puṭu tjingapungku Kurayitjalu maralpa tjutanya wantintjaku.’”

Yaatjayalulanya nintiŋu kanalpayi
 Kurayitjanya nganampa kuya waŋikitja tjitjaku.
 Yaatjaya paluru tjananya yalatji tjakultjunu,
 “Nganaŋanya tjitjantankutjipingkamarra
 Kurayitjanyalampa tjitjaku nganampa kuya
 waŋikitja. Yurrunpala wiyawananangku
 yalatji kuliŋu, ‘Paluru tjitjaku Katutjalu
 ngaparrtjingku pungkunytjala.’ Yalatji
 wiya. Nganampa kuya waŋikitja paluru
 tjitjaku, nganaŋanya kuyatjarra Katutjalu
 pungkupayingkamarra. Kurayitja paluru
 tjitjakulampa, nganana Katutjaku kalypalpi
 nyinanytjaku. Kurayitja palunya tjana yalatji
 tjitjantankunytjala Katutjalu kuyalampa waŋiku
 kana kutu nyinanytjaku. Yalatji Katutjalulanya
 kana nyinatjunku nganampa kuyanguru
 Kurayitjanya mirrirringutjangka.” Yalatji
 Katutjalu Yaatjayanya yirriṭi nintiŋu paluru
 piipangka wakantjaku. Yaatjayalu yalatji
 watjaŋu Kurayitjanyalampa kuya waŋikitja
 waralyngarala tjitjanytjaku, yurrunpa.

Makayalu tjananya marrkulku

Makaya 1; 2; 3:

Tjuutaku walytja ngantitja tjutaku mayutju
 tjuta yalatjiya nyinangi, Tjuutjamanya,
 Yiyyatjanya, Yitjikayanya. Mayutju paluru tjana
 nyinanytjala, Makayalu tjananya Katutjanya
 wangkarra marrkulpayi. Yalatji tjananya
 yaŋangu tjuta Makayalu langangkatjunu,
 “Kutjupa tjutangkunyurra kuya palyalkitjangku
 mungangka kanangku ngarirra kulilpayi.
 Kuliranyurra pakara yalatji kuya palyalpayi.

Maralpa tjutaku waala pañatarra nguntilyira mulyatangku mantjilpayi. Nyurrangarri pikangku pungkula tjananya waala, paña yulytja uwankarra tjanampa mulyatangku mantjilpayi. Nyurrangarri mayutju tjutangku tjanampa maralpa tjutaku tjukarurrungku palyalwiyangku wantipayi. Mani yungkunytjala kutju tjanampa nyurrangarri palyalpayi, manitjirratjangku. Tjukarurrungku tjanampa nyurrangarri palyanmara maniku kulilwiyangku. Kutjupa tjutangkunyurra Katutjaku wangka watjalpayi nguwanpangku manikitjangku nintilpayi. Tjukarurrungku maniku kulilwiyangkunyurra nintilmara.

“Tulkuku mayutju tjutangku tarra manikitjangku nintilpayi. Yalatji wiyanangku nyurrangarri kulilpayi, ‘Palyala irriñi nyinangutja nguwanpa kuya nyinaku, mayutju Katutjanya walytjalampa nyinanyi, wiyalanya panitjimilalku.’ Yalatji wiyanangkunyurra kulinji. Yilta Katutjalu nyurranja kuya palyalpayi tjuta panitjimilalku.” Makayalu tjananya Katutjaku wangka piyuku yalatji watjañu, “Ngayulu nyurranja Katutjalu yilta panitjimilalku. Nyurrangarrimpa ngurra Tjarutjalumanya kutjupa tjutangku ngalyankula yulpura wiyalku. Yulpurringkula ngarirra wañimalpa.”

*Makayalu watjalku Kurayitjanya ngula yutir-rinytjaku
Makaya 4:; 5:*

Puli palula tjaatji tiñanya ngaranyi. Puli palunya ngula tiñarringkula katulingku ngaraku, puli kutjupa tjuta ngaranytjala munkarra. Puli palulakutu ngayuku tjaatji tiñakutuya yañangu tjuta paña kutjupa kutjupa ngurrara yankula tjungurriku. Palulakutu yankukitjangkuya alatji watjalku, "Yarralaka Katutjaku tjaatji tiñakutu!, Yitjurilaku ngantitja tjutaku mayutju tiñakutu. Katutja palurulanya nintilku tjukarurru nyinanytjaku. Kulirala tjukarurru nyinaku. Ngurra palula kutju Tjarutjalumala Katutjalulanya palumpa walytja tjuta nintilpayi."

Kurayitjanya yutirrinytjaku Makayalu yirriti watjanu. Kurayitjanya yilta yutirrinytjala yurrunpa alatji watjanu, "Tawunu Pitjiliyamanya wiima ngaranyi Tjuutaku walytja ngantitja tjutaku ngurrangka. Ngurra palula tawunu tiña tjuta ngarala waninyi. Tawunu wiima palula Kurayitjanya yutirriku. Yitjurilaku walytja ngantitja tjutaku paluru mayutju tiñalpi tjanampa nyinaku. Yitjurilaku walytja ngantitja tjutaku Kurayitja paluru tawunu palula yutirriku."

*Mayutju tina tjuta yalatji nyinamalpa
2 Kiinga 18:; 21:*

Tjuutaku walytja ngantitja tjutaku mayutju tiña Yitjikayanya rawa yiiya tuuntiyi nayinpala nyinarra mirrirringu. Palulanguru palumpa katja Manatjanya mayutju tiña tjanampa nyinangi. Paluru tjananya tjingapungu Katutjanya nguwanpa tjuta piyuku palyara

ngaratjunkunytjaku. Manatjalungarri palunya tjuta wal^kura tjukarurruwiya nyinangi. Yiiya pipitiyi payipala mayutju tjanampa nyinarra mirrirringu. Palunyatjanu palumpa katja Yamananya nyinangi. Katutjanya nguwanpa tjuta wal^kura paluru Katutjaku tjukarurruwiya nyinangi. Yiiya kutjarra nyinangutja palumpa waarrkana tjutangku mirri pungu. Pungkupayi palunya tjuta tjananya Tjuutaku walytja ngantitja tjutangku ngaparrtjingku mirri pungu. Paluru tjana Tjutjayanya Yamanaku katja mayutju tiⁿa nyinatjunu. Tjutjayalu Katutjanya tjukarurru nyinarra wal^kuŋingi, kutjupa tjuta walkuntjawiyangku. Mayutju tjanampa yiiya tjaatiyi waan nyinarra pikakutu paluru yanu. Pika palula kutjupa ngurrara tjutangku mirrintanu. Palulanguruya Tjuutaku walytja ngantitja tjutangku palumpa katja Tjiuwatjanya mayutju tiⁿa nyinatjunu. Tjiuwatjanya Katutjaku tjukarurruwiya nyinangi. Mayutju tiⁿa tjanampa pira tjirripala nyinanytjala Yitjipinya ngurrara tjutangku palunya witira tjiilangka tjarrpatjunu. Palulanguru tjana palunya manta Yitjipilakutu katingu. Paluru ngurra palula nyinarra mirrirringu.

Tjutjayanya mirrirrinytjala Yitjipiku mayutju tiⁿangku Tjutjayaku katja Yilayakimanya mayutju tiⁿa tjanampa nyinatjunu, Tjuutaku walytja ngantitja tjutaku. Nyinatjunkula yini kutjupa watjanu yalatji, Tjiuyakimanya. Paluru Katutjaku tjukarurruwiya nyinangi. Yiiya lipinpala mayutju tiⁿa tjanampa nyinanytjala

Yitjipinya ngurrara tjutangku palunya witira tjilangka tjarrpatjunu. Palulanguru tjananya palunya ngurra Yitjipilakutu katingu. Ngurra palula nyinarra paluru mirrirringu.

Palunyatjanu palumpa katja Tjiyuyatjinanya tjanampa mayutju tiña nyinangi. Katutjaku tjukarurruwiya pira tjirripala nyinangu. Palulanguru Papilunanya ngurrara tjutangku tjilirratjarra tjutangku tjananya yankula pikangku pungu. Pikangku pungkula ngulutjingara kutjupa tjuta tjananya Tjiyuyatjinanyangarri ngurra Papilunalakutu katingu, waarrkana tjutaya nyinanytjaku.

Papilunakutu tjananya palunya tjuta katikitjangku Papilunaku mayutju tiñangku Tjiyuyatjinaku kamuru Matanayanya, mayutju tiña tjanampa nyinatjunu Tjuutaku walytja ngantitja tjutaku. Nyinatjunkula yini kutjupa watjanu yalatji, Tjitikayanya.

Mayutju paluru Katutjaku tjukarurruwiya nyinangi. Tjitikayanya mayutju tiña yiya nayinpala nyinanytjala, Papilunanya ngurrara mayutju tiñangku yini Nipukanitjalungarri, palumpa tjilirratjarra tjutangku yankula tjananya pikangku pungangi. Tjanaya pikangku pungkula ngulutjingara tjananya ngurra tjanampa Tjarutjalumanya yulpura yanangu yuwankarra tjananya kakarrara katingu ngurra Papilunalakutu, Tjuutaku walytja ngantitja tjuta. Aapa nguwanpa tjananya wantingu ngurra walytjangkaya kutu nyinanytjaku, Tjarutjalumangka yila. Ngurra Tjarutjalumala yanangu tjuta tjananya

katikitjangku Nipukanitjalu mayutju kutjupa palunya ngurrara tjutaku nyinatjunu, yini Kitalayanya.

*Mayutju tina Tjutjayanya nyinamalpa
2 Kiinga 21:; 23:; 2 Kuranikula (2 Chronicles)
33:; 35:*

Mayutju Manatjanya an Yamananya nyinamalpa

2 Kiinga 21:1-18,19-26

Papilunakutu tjananya katintjala yurrunpa Tjuutaku walytja ngantitja tjutaku mayutju Yitjikayanya nyinangi. Yitjikayanya nyinarra mirrirrinytjala palumpa katja Manatjanya tjanampa mayutju tina nyinangi. Manatjanya nyinarra wiawanangku palyaningga. Yirriti palumpa mama Yitjikayalu watjantjala Yitjikayaku waarrkana tjutangkuya Yatjaranya Paalanyangarri, Katutjanya nguwanpa tjutanya yulpura wiyanu, mayutju Katutjanyalpiya yanangu tjutangku walkura nyinanytjaku. Yitjikayaku katjangku Manatjalu tjananya watjanu piyku Paalaku Yatjaraku palyara ngaratjunkunytjaku, ngaratjunkula walkuntjaku yanangu tjutangku. Manatjalungarri pintirri tjutatarra walkura nyinapayi. Palunya tjuta walkulkitjangku palumpa katja mirrintara warungka kutjara wiyanu. Katutjaku tjaatji tinangka Manatjalu tjananya waarrkana tjutanya watjanu, Yatjaranya nguwanpa watiyanguru palyara ngaratjunkunytjaku. Palunyatjanu Yatjaranyalpiya walkuningi Katutjaku tjaatji tinangka, Tjarutjalumangka.

Yalatjiya yanangu tjutangku wiwayanangku kuya palyara nyinangi, mayutju tiñangku Manatjalu tjingapungkunytjala.

Palunyatjanu Katutjaku wangka watjalpayi tjutangku tjananya yalatji langangkatjunu, “Mayutju tiñangku Manatjalu nyurranya tjingapungkunytjala, wiwayanalpinyurra nyinarra ngayunya Katutjanya wantirra kuya puntu palyani. Palulanguruña panitjimilalkitjangku ngayulu nyurrangarrinya ngurra kutjupakutu wantirriyalku. Ngurra Tjarutjalumanya ngayulu wiyanjtala, yanangu tjuta wiyalpinyurra nyinaku. Ngurra kutjupakutunyurra yankula nyinamalpa.”

Manatjanya yalatji wiwayana yiya pipitiyi payipala Tjarutjalumangka nyinarra mirrirringu. Palulanguru palumpa katja Yamananya mayutju tina tjanampa nyinangi Tjuutaku walytja ngantitja tjutaku.

Palumpa mama nguwanpa Yamanalu Katutjanya nguwanpa tjuta walkura nyinangi. Katutjaku tjukarurruwiya nyinarra palumpa wangka kulira wantipayi. Mayutju tinaku waalawana Tjarutjalumangka mayutju kutjupa tjuta nyinangi, Yamanalu nyinatjunutja tjuta. Palunya tjutaya Yamanaku mirrpañarrirra yankula mirri pungu. Yiya kutjarra mayutju tiña tjanampa nyinanytjala, palunya tjutangku mirri pungu. Tjuutaku walytja ngantitja tjutangku palunya pungkupayi tjuta ngaparrtjingku tjananya mirri pungu. Paluru tjanaya Yamanaku katja mayutju tiña nyinatjunu, yini Tjutjayanya.

Tjutjayanyalpi tjanampa mayutju tiṇa nyinamalpa

2 Kiinga 22:1,2

Ula Tjutjayanya yiya yiitpala nyinarra mayutju tiṇaya nyinatjunu. Tjutjayanya tjukarurru nyinarra palunya kutju walkulpayi, mayutju tiṇa Tapitanya tjukarurru nyinangutja nguwanpa. Yalatji Katutjaku wangkaku tjukarurru nyinanytjala, mayutju Katutjanyara yunypa nyinangi. Yiya tjaatiyi waan mayutju tiṇa tjanampa Tjarutjalumangka nyinangi.

Katutjaku piipa irriṭitjaya mantjilku yulpatangka

2 Kiinga 22:3-13; 23:1-20

Mayutju tiṇangku Tjutjayalu tjananya watjaṇu Katutjaku tjaatjingka yulpata kiliinamilara waṇinytjaku, tjaatjitarra kiliina ngaranytjaku. Paluru watjaṇu waala ngarala yulpurringutja piyuku tjana palyantjaku. Tjaatji paluru rawa ngarala yulpurringu, mayutju Tjalamunalungarri yirriti palyara ngaratjunutja. Palulanguru mayutju Tjutjayalu watjaṇu waarrkarirra kiliinamilara piyuku palyantjaku. Mayutju Tjutjayaku waarrkana yini Tjapananya tjaatji tiṇa palulakutu yanu maniku Yilkayala wangkanytjaku. Mani palunya yaṇangu tjuṭangku tjaatjingka tjawirrilyi wanipayi. Tjapanalu watjaṇu Yilkayalu waarrkana tiṇa tjuṭa mani palunya yungkunytjaku. Paluru watjaṇu paluru tjana watiya tiimpa tjuṭa, puli tjuṭatarra payimilantjaku, tjaatjiya palyalkitjangku. Paluru

piyuku watjanu tjana mani palunyatjarrangku waarrkana tjuta wiitjimani yungkunytjaku. Palunyangka tulku mayutjungku Yilkayalu waarrkana palunya piipa yungu, Katutjaku wangkatjarra. Yurrunpa Yilkayalungarri tjaatji tinangka kiliinamilara yulpaṭawana mantjiṇu Katutjaku wangka. Tjutjayaku waarrkanangku mantjira mayutju tinakutu Tjutjayalakutu katirra riitarringu. Yalatji riitarringkunytjala kulira mayutju Tjutjayalu ngulurringkula palumpa waarrkanangka alatji watjanu, “Yankula Yilkayanyangarri tjananya watjala!, mayutju Katutjanyaya tjapintjaku nganananya nintintjaku, tjukarurruwiyla nyinanyingka. Yalatji ngarrinyi piipa ngaangka tulku mayutju tjutangku Katutjanya tjapintjaku. Ngayuku waarrkanangku riitarrinytjala ngayulu kulin̄ingi. Palulanguru ngayulu kulin̄i Katutjanyalampa mirrpanpa nyinanyi, piipa ngaakula tjukarurruwiya nyinanytjala, nganampa yirriṭi wiyarringutja tjutakutarra.” Waarrkana paluru wangka palunya katirra tjakultjunu tulku mayutju tina, Yilkayanya. Yilkayalungarri puṭu kulira yankula tjapinu kungka Wultanya, Katutjaku wangka watjalpayinya.

Tjapintjala Wultalu tjananya Katutjaku wangka yalatji tjanala tjakultjunu, “Yankulaya mayutju Tjutjayangka yalatji tjakultjurra!, ‘Ngayulu Katutjalu nyurrangarrinya Tjuutaku walytja ngantitja tjuta yilta panitjimiralku, Tjarutjalumanya ngurrara tjutanyurra piipa wangkatjarra palunyaku tjukarurru

nyinanytjawiyangka. Ngayuku wangkanyurra wantirra ngayunya nguwanpa kutjupa tjuta walkuṇi. Palunyangka mirrpanpaṇa nyinanyi, kanya nyuntu mayutju Tjutjayanya ngayuku wangka piipa palaku kulira palyanu ngulurringu. Ngayuluṇa Tjarutjalumanya ngurrara tjuta panitjimilalkitjangka, nyuntu kulira ngulurringunu mantarra wintarrpungkula palyanu yulangi. Yularra palyaṇin tjapiṇu. Palunyangka kuwarri wiyaṇa Tjarutjalumanya ngurrara tjuta panitjimilalku, ngayulu nyurrangarrinya wantiku. Nyuntu nyinarra mirrirrinnytjala ngaṇti ngayulu tjananya panitjimilalku.’”

Palunyatjanu mayutju Tjutjayalu tjananya Tjarutjalumaku mayutju tjuta, tulkuₕku mayutju tjutatarra yanangu tjutatarra yaltingu, Katutjaku tjaatji tiṇangka tjungurrinytjaku. Yalatjiya tjungurringkula kulin̄ingi, Tjutjayalu piipa palunya Katutjaku wangkatjarra riitarrinytjala. Kuliraya tjungungku Katutjala watjaṇu wangka palunyaku tjukarurru nyinakitjangku.

Palulanguru mayutju Tjutjayalu tjananya watjaṇu Katutjanya nguwanpa kutjarra Yatjara an Paala katirra tjaatjingka tjayitingka waṇinytjaku. Katutjanya nguwanpa tjutaya ngurra winkiwana ngarala wanipayi. Mayutju paluru watjantjala palumpa waarrkana tjutangku yulpura wiyaṇu, Katutjanya kutjuya tjukarurru walkura nyinakitjangku.

*Katutjaku wangka watjalpayi tjirripala nyinamalpa, Yapakakanya, Tjipanayanya, Tjirimayanya
Yapakaka 1:; 2; Tjipanaya (Zephaniah) 1:—3;
Tjirimaya (Jeremiah) 1:—36:*

*Yapakakanya nyinamalpa
Yapakaka 1:; 2:*

Katutjaku wangka watjalpayingku wati Yapakakalu tjananya Tjuutaku walytja ngantitja tjutangka yalatji watjañu, “Ngayuluña Katutjalu Papilunanya ngurrara tjuta nyinatjunku mayutju tjuta nyurrampa nyinanytjaku. Yañangu kutjupa tjutakuñarra paluru tjananya mayutju tjuta nyinaku, paña tjutawana nyinanytja tjutaku. Papilunanya ngurrara tjutangku nyurrangarrinya Tjarutjalumalakutu yankula pikangku pungku althuruwiyangku. Paña kutjupa kutjupa ngurrara tjuta tjananya pungku.” Wati Yapakakalu tjananya piyuku yalatji watjañu, “Papilunanya ngurrara tjutangkuya yankula kuya palyalpayi tjuta mirri pungku, kanya Katutjaku tjukarurru nyinapayi tjuta kana kutu nyinaku.”

*Tjipanayanya nyinamalpa
Tjipanaya 1:—3:*

Tjuutaku walytja ngantitja tjutaku mayutju tina Tjutjayanya nyinanytjala, Katutjaku wangka watjalpayingku Tjipanayalu tjananya yalatji watjañu, “Ngayulu Katutjalu ngurra tjutawana yañangu uwankarra mirri pungkula wiylku, kuka kutjupa kutjupa tjuta, kukawiya tjutatarra. Ngayulu kuya palyalpayi tjuta tjananya mirri pungkula wiylku. Tjarutjalumanya ngurrara

tjuṭa ngayulu tjananya tawunu kutjupa kutjupa ngurrara tjananya panitjimilalku, kuya palyalpayi tjuṭa. Kuwarrin̄a nyurrangarrinyaṭarra panitjimilalku kutjupa tjuṭa ngayulu nyurrangarrinya mirri pungkula wiyalku. Wat̄alpi yulta palunya yilarringulpi. Ngayulu nyurranya panitjimilantjala puṭu kuliranyurra nguļu nyinaku. Palunyatjanu ngayukutjunyurra tjukarurrulpi nyinaku. Yulta palula ngayulu tjananya kutjupa kutjupa ngurrara tjuṭa, panitjimilalwiyangku kanyiłku. Palulanguruya ngayuku wangka kulira tjukarurrulpi nyinaku. Ngayunyalpiya kutu walkunmalpa, Katutjanya nguwanpa tjuṭa walkuntjawiya.”

Tjirimayalu tjananya payira watjalku

Tjirimaya 1:1; 2:5,13,32; 3:12-14

Tjuutaku waltyja nganṭitja tjuṭaku mayutju tiṇa tjuṭa yalatji nyinangu, Tjutjayanya, Tjiyuyakimanya, Tjitikayanyaṭarra.

Mayutju palunya tjuṭa nyinanytjala Tjirimayalu Katutjaku wangka yaŋangu tjuṭa tjananya tjakultjunkupayi. Paluru Katutjaku wangka watjalpayi. Yalatji tjananya paluru Katutjaku wangka watjanu, “Ngayulu Katutjalu nyurrangarrinya tjapini. Ngayulu nyurrangarrinya kuya nyaa palyantjala?, kulilwiyangurra nyinanyi. Nyurrangarrimpa waltyja tjuṭangku irriṭi kulilwiyangkuṇiya wantipayi. Nyaanguruya ngayunya wantirra wiyanalpiya nyinapayi? Ngayuku waltyja tjuṭangkunyurra kuya kutu palyaṇi, irriṭi wiyarringutja tjuṭangku kuya palyalpayi

nguwanpa. Kapi wiila palya wantirra kapi kutjupaku ngurrintja nguwanpanyurra ngayunya wantingu kanalpayinya, ngayunya nguwanpa kutjupa tjuṭa *walkulkitjangku*. Ngayunya nyurrangarri malpa wiyananganuku wantingu.”

Katutjaku wangka Tjirimayalu tjananya piyku watjaṇu, “Kungkangku wiya riingaku nikilitjiku ramarrirra wantipayi, ngurra kutjupakutu yankukitjangku, maṭupurra kulira paluru katipayi. Kungkangku ramarrinytjawiyangku maṭupurra kulilpayi nguwanpa wiyaninyurra Katutjanya maṭupurra kulinī Tjukarurrunyurra ngayunya maṭupurra kulinmara. Yalatji kutuṇinyurra wantipayi, kulilwiyangku. Mayutju Katutjaluna nyurrangarrinya watjanı. Yitjurilaku walytja ngantitja tjuṭangku kulila! Tjukarurrutjuya watjala!, nyurrangarri ngayuku wangkaku kulintjawiya nyinangu. Palulanguru tjukarurrutjuya nyinama! Palulanguruṇa nyurrangarrimpa alṭururringkula kuya waniku, wiyanā nyurrampa pika nyinaku. Kutjupa tjuta nyurranya ngayulu ngurra ngaakutu walytjakutu rayitpayiki ngalya katiku.”

*Kan̄ilpa pilkitjanu palyantjatjarra
Tjirimaya 19:10,11*

Mayutju Katutjalu watjaṇu Tjirimayalu kan̄ilpa pilkitjanu palyanuṭja yankula mantjintjaku. Paluru ankula kan̄ilpa palunya mantjiṇu. Wati kutjupa tjuṭangkuya ngarala nyakunytjala, Tjirimayalu kan̄ilpa wan̄irra

yulpunu, Katutjalu yalatji yulpuntjaku watjañutjangka. Yulpura tjanala yalatji watjañu, “Kañilpa palunyaña yulpunutjala, kutjupangku puťu kulilkul palyantjaku. Mayutju Katutjaluna nyurranya yalatji watjanı. Kañilpa yulpuntjaku nguwanpa ngayulu Katutjaluna nyurrangarrimpa tawunu Tjarutjalumanya yulpura piluntanku. Yalatji piluntankula ngayulu kutjupa tjuta nyurrangarrinya mirrintanku, kutjupa tjuta ngayulu nyurrangarrinya ngurra kutjupakutu wantirriyalku, yunytjuwiyangkutjyunyurra ngayuku wangka wantintjala.”

Tjirimayalu watjilarirra tjapilku

Tjirimaya 8:22; 14:20,21

Tjirimayanya tjanampa yañangu tjutaku watjilpa yulangu, kulintjawiyangkuya kuya kutu palyaningi. Yalatji tjanala watjañu, “Kuya wañirra palyalpayi yaalytji? Ngangkaritjarra nguwanpa yaalytji? Paña Kiliitanya ngurrara tjutangku mirritjina tjuta kanyira puťu ngangkaritjunkupayi, kuya wañikitjangku. Palunyatjanu kutunyurra ngayuku walytja tjuta kuyatjarra nyinarra wañinyi.” Tjirimayalu tjanampa Katutjanya yalatji tjapiňu, “Yiltalatjunta wiyawana nyinarra kuya palyalpayi nganampatju irriți wiyringutja tjutatarra. Tjungungkulatjunta mayutju Katutjala kuya palyara tjakultjunanyi. Irriți nyinanytja tjutanya tjananya nyuntu watjanu tjanampanu ngantitja tjuta yanťayanťalkitjangku. Palunyatjanu nganañanyatju yanťayanťara kanyila!,

wantintjawiyangku. Nyuntupalatju tjukarurru kutu nyinakitja yunytjurringanyi.”

*Katutjaku piipa karrpilpa kutjalku
Tjirimaya 36:2,3,21-27,32*

Mayutju Katutjalu Tjirimayanya watjañu yalatji, “Tjutjayanya irriñi mayutju tiña nyinanytjala ngayulu Katutjalunanta wangka tjuta watjalpayi, nyuntu yañangu tjutangka tjananya tjakultjunkunytjaku. Tjutjayanya nyinanytjala nganti ngayuluñanta kutu watjalpayi tjanala tjakultjunkunytjaku. Piipa karrpilpa mantjira wangka palunya uwankarra wakara wanala!, yañangu tjuta irriñi pinangkatjunkukitjangkuña watjañutjangka.” Palunyatjanu Tjirimayalu tjakultjunkunytjala wati Pirakalu piipa karrpilpa palunya wakaningi. Palunyatjanu yañangu tjutaluya piipa palunya kulira ngulurringu, Pirakalu riitarrinytjala.

Mayutju Tjiuyakimalu tjakulpa kulira palumpa waarrkanangka watjañu, yankula piipa palunya mantjira ngalya katirra riitarrinytjaku. Katutjaku piipa karrpilpa wiima palunya waarrkana paluru mayutju palula riitarripayi. Paluru riitarrinytjala mayutju Tjiuyakimalu tjutangara tjuulangka kuntara tjutangara warungka wañingu, yunytjuwiyangku. Yalatji mayutju paluru piipa palunya kulira kuntara warungka kutjañu. Paluru Katutjaku nguluwiya nyinangi, palumpa wangka kulintjawiya.

Piipa palulanguru mayutju Tjiuyuyakimanya Tjirimayaku yunytjuwiya nyinangu.

Palulanguru Katutjalu Tjirimayanya watjanu piipa karrpilpa kutjupa mantjira wangka palunya piyuku tjunkunytjaku. Palunyatjanu Tjirimayalu piipa nyuwanangka Katutjaku wangka palunya piyuku wakara tjunangi.

Tjirimayalu Kurayitjanya ngalya yankunytjaku yurrunpa watjalku

Tjirimaya 23:5,6; 29:11; 31:31-34

Tjirimayalu Katutjaku wangka yalatji tjananya watjanu, “Mayutju Katutjalu nyurranya yalatji watjanı. ‘Kulilaya! Ngulaña Katutjalu mayutju Tapitaku waltyta ngantitja mayutju tına nyinatjunku. Mayutju paluru ninti pułkangku tjananya tjukarurrungku yanṭayanṭara kanyilku. Paluru tjananya Yitjurilaku waltyta ngantitja tjuṭa kanalku, Tjuutaku waltyta ngantitja tjuṭatarra. Mayutju palunya yini yalatjiya watjalku, “Nganampa mayutjulu yanangu tjuṭa tjukarurrulpayinya.” Mayutju Katutjaluna kulińi yalatji, ngula ngurra palyangkańa nyurranya nyinatjunkukitjangku. Ngurra palulanyurra nyinaku yulytja anta mayi puntutjarra. Ngurra palulanyurra yunypa nyinaku, wiyaná nyurrangarrinya kutu panitjiminta yungku.’”

Tjirimayalu tjananya Katutjaku wangka piyuku tjakultjunu yalatji, “Mayutju Katutjaluna tjananya Yitjurilaku waltyta ngantitja tjuṭa, ngula nyinanytja tjuṭa piyuku watjalku, tjukarurru palyalkitjangku. Yalatjiya ngula

palya nyinaku. Yulta palunya alatji ngaraku. Ngayuluña tjanampa mayutju tiña nyinaku, palulanguruya ngayuku walytja tjuṭa tjukarurru nyinaku. Ngayulu tjananya nintilku tjana pinangku ngayuku wangka kutu kulintjaku. Piipangka wakanutja nganana tjuṭangara riitarringkula ninti nyinanyi. Palunya nguwanpa ngayuluña tjananya tjuṭangara nintilku luwu ngayukunuwanaya tjukarurru nyinanytjaku. Yilta ngayulu tjanampa mayutju tiña nyinaku, tjana ngayuku walytja tjuṭalpi nyinaku. Paluru tjana uwankarra ngayuku wangkaku ninti nyinaku, mayutju tjuṭa, kutjupa tjuṭatarra. Wiya nintilpayi tjuṭangku tjananya rawangku yarrkara nintinmalpa. Paluru tjana kuya palyantjala ngayulu kuya tjanampa wañiku. Ngayulu tjananya kaangkinytjingku yanṭayanṭanmalpa.”

Papilunanya ngurrara tjuṭangku tjananya katiku

2 Kiinga 24:—25; Tjirimaya (Jeremiah) 40; Limintatjana (Lamentations) 1; Tjaama (Psalm) 137; Yitjikiyala (Ezekiel) 1; 2; 34; 36:

Tjarutjalumanya ngurrara tjananyaya pungkula katiku

2 Kiinga 24:—25:

Tjuutjaku walytja nganṭitja tjuṭaku mayutju tiña Tjiyuyakimanya Tjarutjalumala nyinangi. Palulanguru Papilunanya ngurrara tjuṭa yanu Tjarutjalumalakutu. Mayutju tiña tjanampa nyinangi yini Nipukanitjanya. Tjunguya yanu palumpa tjilirratjarra tjuṭatarra.

Palunya tjuta^kku tjanampa ngulurringkula mayutju Tjiuyakimalu Nipukanitjala yalatji watja^ñ, “Pikangkulanku wiya pungkunytjaku, nganañatju waarrkana nyurrangarrimpa palya nyinamalpa.” Palunyatjanuya Tjarutjalumanya ngurrara tjuta waarrkana yiya tjirripala nyinarra yunytjuwiyarringu. Nipukanitjaku kaangkinytjiwiyalpiya nyinangi.

Mayutju Tjiuyakimanya mirrirrinytjala palumpa katja Tjiuyatjinanya mayutju tiña tjanampa Tjarutjalumangka nyinangi. Mayutju Tjiuyatjinanya nyinanytjala Papilunanya ngurrara tjuta piyuku yanu Tjarutjalumalakutu tjilirratjarra tjuta, Tjuutaku walytja ngantitja tjuta pungkukitja. Papilunanya ngurrara tjutangku kutjupa tjuta tjananya pungkula tawunu Tjarutjalumangka ngururrtjunkula ngarala wañingi. Tjarutjalumangka parriki tiña pulitjanu palyanutja ngarangi, kiita tjutatjarra. Waala uwankarra parriki palula ngururrpa ngarangi. Tjarutjalumanya ngurrara tjutangkuya mayutju Tjiuyatjinalungarri kiita palunya tjuta patiraya laakamila^ñ, Papilunanya ngurrara tjutangku tjarrparra tjananya mirri pungkupayingka. Yiya kutjarra nguwanpa tjana yunngu kutu nyinarra mayi tjanampa wiyarringu. Mayiku pu^tu kulira mayutju Tjiuyatjinalungarriya kiita yalara pakara ngarala wañingi. Mayutju Nipukanitjalungarri tjananya ngalya yankula witira mara karpira wañingi. Tjarutjalumangkaya Papilunanya ngurrara tjutangkuya tjarrparra ngurra tjutangkaya

kuulta tjuta mantjira yulpura wantingu. Yalatji tjana ngurra tjuta tjanampa yulpura wantingu. Kutjupa tjuta tjananya tjana wañma kakarrara katingu ngurra Papilunalakutu waarrkana tjutaya nyinanytjaku. Tjuutaku walytja ngan̄tjia tjutalingkuya katingu. Tjana kutjupa tjuta tjananya maralpa tjuta wantingu, ngurra walytjangka waarrkanaya nyinanytjaku.

Palunya tjuta tjananya katikitjangku Nipukanitjalu Tjitikayanya tjanampa mayutju tiña nyinatjunu, Tjarutjalumalawana nyinapayi tjutaku. Tjitikayanya Nipukanitjaku waarrkana Tjarutjalumangka kutu nyinangi yiiya lipinpala.

Palunyatjanu mayutju Tjitikayanya Nipukanitjaku yunytjuwiyarringu, kaangkinytji nyinanytjawiya. Palunyatjanu mayutju Nipukanitjanyanggarriya palumpa kulatjarra tjuta ngalya yankula Tjarutjalumangka ngururrtjunkula nyinarra wañingi, pikangku pungkunytjakitja. Parriki tiñangka pulitjanu palyanutja yunganu, mayutju Tjitikayanyangarri tjarrparra kiña tjuta patira nyinangi, Papilunanya ngurrara tjutangku mirri pungkupayingkamarra. Parriki tiña palula katuwana Tjitikayaku tjilirratjarra tjutaya kalparra pulingkaya kumpira nyakupayi. Yalatji katuya nyinangu puwanarratjarrangku wakalkitja, Papilunanya ngurrara tjutangku laata ngaratjunkula kalparra tjarrparra pungkutjipingkamarra.

Tjarutjalumanya ngurrara tjutaya mayitjirratja pakantjaku Papilunanya ngurrara tjuta tjanampa rawa patañingi, yiiya kutjarra. Putu pataraya yankula parriki tiña palunya

yatura yatura yulpuṇu, watiya tiṇatjarrangku. Yulpuraya tjarrpangu.

Palunyatjanu mungangkaya mayutju Tjitikayanyangarri palumpa tjilirratjarra tjuṭa kiṭa kutjupa yalara kakarrara tjalkalungu. Papilunanya ngurrara tjutangku tjananya kulira wanaranangi. Wanarankulaya mayutju Tjitikayanya witira kanyintjala palumpa tjilirratjarra tjutangkuya wantirra tjalkalungu mayutjuku kulintjawiya. Mayutju Tjitikayanya witiraya katingu mayutju tiṇa Nipukanitjalakutu. Paluru yila nyinangi, tawunu Ripulangka. Mayutju Nipukanitjalu watjantjala Papilunanya ngurrara tjutangku tjananya tjilirratjarra tjutangku Tjitikayaku katja tjirripala mirri pungu, Tjitikayalu nyakunytjala. Palunyatjanuya Tjitikayanyalpiya kuru paanganu, yayina aatatjarrangku. Kuru paangara tjiinangka mara karrpira ngurra Papilunalakutu katingu, waarrkana kutu nyinanytjaku.

Tjarutjalumangkaya Papilunanya ngurrara tjutangku tjilirratjarra tjutangku tjarrparra puli kuulta anta puli tjiilpa yulytjaṭarra mantjira katirra kaputunkula tjunu, ngurra walytjakutu katikitjangku. Kaputunkula wantirra Katutjaku tjaatji yulpura kutjaṇu. Waala kutjupa tjuṭaya kutjara wiyanu. Parriki tiṇa waala tjuta ngururrtjunkupayi paluru tjanā kilytjuntara yulpuṇu. Yalatjiya kilytjuntara wiyanu Tjarutjalumanya.

Tjarutjalumanya ngurrara tjuṭa Papilunanya ngurrara tjutangku tjananya wiipatjarrangku

pungangi. Pungkula tjananya tjuula waṭawaratjarrangku wakara mirrintanu. Tjana Papilunanya ngurrara tjilirratjarra tjutangku wati tjuta tjananya pungu. Tjana yanangu tjutalingku tjananya karrpira ngurra Papilunalakutu katingu, waarrkarringkula nyinanytjaku. Maŋkurra nguwanpa tjananya wantingu Tjarutjalumangka ila kaanangka waarrkarirra mayi pakaltjingantjaku.

Paṇa palunya ngunytji kanyintjaku Nipukanit-jalu wati Kitalayanya mayutju nyinatjunu, kaana ngurrara tjuta yantayantantjaku. Ngurra yini Mitjipangka mayutju Kitalayanyangarriya nyinangi. Maanytja tjirripalangkaya nyinanytjala wati Yitjumilalungarri tjananya ngalya yankula kutjupa tjuta tjananya mirri pungu, kanya kutjupa tjutaya kaana ngurrara palunya tjuta ngulurringkula paṇa Yitjipilakutu yankula nyinangi, Nipukanitjalu tjananya ngalya yankula pungkupayingka.

*Tjirimayanya watjilpa tjanampa yulamalpa
Tjirimaya 40; Limintatjana (Lamentations) 1;:*

3:

Tjirimayanyaaya karrpira nyinatjunu kutjupa tjutawana ngurra Papilunalakutu katikitjangku. Papilunanya ngurrara tjutaku mayutju tinangku Tjirimayanya yalatji watjaṇu, “Nyurrangarri Katutjaku tjukarurru nyinanytjawiyangka, mayutju Katutjalulanyatju yaltirra watjaṇu, ngalya yankula nyurrangarrinya pikangku pungkula panitjimirantjaku. Yalatji nintingkuṇa kulinī.

Tjirimaya. Nyuntu Katutjaku wangka watjalpayi, palulanguruñanta kuwarri walatjunkula wantirriyalku. Tjingurunu paña ngaangka nyinakitja yunytjurrinytjala, palyan nyinaku. Tjingurunu yunytjurringanyi Papilunalakutu yankukitja, tjungula palya yankula nyinaku, ngayuluñanta yañtayanñtalku.” Tjirimayalu watjanu, “Ngayulu ngurra ngaangka nyinaku.” Yankula Tjirimayanya ngurra Mitjipangka nyinangu, mayutju Kitalayalangarri.

Paluru tjana Papilunalakutu tjananya katintjala nganti Tjirimayalu nyangu Tjarutjalumanya yulpura ngarirra wanintjala. Yalatji nyakula yulangu. Tjarutjalumala yañangu nyinanytjawiyalpi yalatji paluru yulangu. Yalatji paluru watjanu, “Tjarutjalumanya wiyalpi ngaranyi, yulpuraya wiyanu. Yañangu yuwankarra wiyarringu. Ngurra waltyjangkaya wiya nyinanyi, waarrkanaya nyinanyi ngurra wañmangka. Ngurra waltyjangkaya, wiyyaya yulytja kanyini, maralpa tjutaya nyinanyi. Wiyyaya Tjarutjalumangka yila nyinarra ngalya yankula tjaatji tiñangka walkulku, wiyalpiya. Tjaatji tiña ngaranytjawiyangka ngaatja ngurrawiya ngaranyi. Yirriti kutju ngaatja palya ngarapayi.”

*Katutjaku wangka watjalpayinya
Yitjikiyalanya nyinamalpa*

*Psalm 137; Yitjikiyala (Ezekiel) 1;; 2;; 3;; 34;;
36:*

Papilunanya ngurrara tjutangku tjananya Tjarutjalumanya ngurrara tjuta tjungura

tjananya katirra kanyiningga ngurra Papilunangka, Tjarutjalumangka yila nyinanytja tjutaṭarra. Tjilirratjarra tjutangku tjananya kanyinangi ngurra walytjakutu rayitpayiki tjalkalungkupayingkamarra.

Ngurra palulaya nyinarra watjilarringu, ngurra walytjaku. Yalatji watjilpa nyinarra kuliraya yalatji piipangka wakaŋu, “Ngurra Papilunangkalatju karrungka nyinarra yulangi, ngurra Tjarutjalumalakutu rayitpayiki yankukitja. Kiitawu wangkatjingantjawiyangkulatju katu tjunkula wantingu. Papilunanya ngurrara tjutangkulanyatju puṭu yinkatjingalkitjangku yalatjiya watjaŋu, ‘Tułku nyurrangarri Tjarutjalumala yinkapayinyurra, kuwarriya wangkatjingaraya yinka!’ Nganaŋatju Tjarutjalumanya ngurrara tjutangku tjananya watjaŋu, ‘Wiya. Ngurra kutjupangka wiyalatju yunyparrirra yinkakitjangku kuliŋi.’”

Ngurra Papilunangka wati Yitjikiyalanya Katutjaku wangka watjalpayi nyinangi. Katutjalu nintintjala Yitjikiyalalu tjukurrrpa nyangu yalatji. Kana nyinapayi puupala parra yankupayi, wiilatjarra nguwanpa. Yalatji nyakula kutjupa nyangu yaŋangu nguwanpa paluru Yitjikiyalanya piipa karrpilpa nintinu. Nintira watjaŋu ngalkunytjaku. Yitjikiyalalu ngalkunu. Palunyatjanu yaŋangu nguwanpa paluru Yitjikiyalanya watjaŋu, yankula Katutjaku wangka tjakultjunkunytjaku, Yitjurilaku walytja ngaṇitja tjutangka. Yalatji Yitjikiyalalu tjukurrmankula nyangu.

Yitjikiyalalu tjananya yanangu tjutangka wangka kutjupa tjuta watjara, wangka yalatji tjananya mayutju tjutangka watjanu, Katutjalu nintintjala, “Ngayulu nyurrangarrinya mayutju tjuta watjanı. Tjiipi tjutaku mayutju nguwanpanyurra nyinanyi. Tjiipi tjuta nguwanpaya Yitjurilaku walytja ngantitja tjuta nyinarra wañinyi. Tjiipiku mayutju tjuta nguwanpangku tjananya wiya nyurrangarri tjukarurrungku kanyilpayi. Tjiipiku mayutjungku mayi palyakutu tjiipi tjuta katipayi. Mayutju palunya nguwanpa wiyanurra nyinanyi, wiyanurra yanangu tjuta palyangku yantayanıtara kanyilpayi. Walytjaku kutjunyurra kulira nyinapayi yanangu tjuta tjukarurru kanyintjawiya. Yitjurilaku ngantitja tjutanyurra kutjupa kutjupa tjutangka kuwarri nyinarra wañinyi, ngurra walytjawiyangka. Ngayulu nyurrangarrinya tjungulku ngurra walytjangkalpinyurra nyinanytjaku. Ngurra walytjangka ngayulu nyurrangarrinya yantayanıtanmalpa.”

Yitjikiyalalu tjananya yanangu tjutangka Katutjaku wangka piyuku watjanu yalatji, “Ngulanı nyurranya Katutjalu ngurra walytjakutu rayitpayiki katiku, Tjarutjalumalakutu. Ngurra palula nyurrangarri tjutalingku nyinaku. Waala palyara mayi pakaltjingara palyalpinyurra piyuku ngurra palula nyinaku. Palunyatjanutjunyurra ngayuku wangkaku ninti nyinamalpa. Yanangu kutjungka kurrunpa walytjaña mantjira tjunku kurrunpa kutjupa. Palunyatjanu yanangu

kutjupangkaṭarra kurrunpa walytja mantjira ngayulu kutjupalpiṇa tjunku. Yalatjīna nyurrangarrila yaṇangu tjuṭangka tjunku kurrunpa kutjupa, ngayukutjunyurra tjukarurru kutu nyinanytjaku. Ngayuku kurrunpaṭarra ngayulu nyurrangarrila tjarrpatjunku. Kurrunpa paluru nyurrangarrinya rapalku, ngayuku wangkaku nyurrangerri tjukarurru kutu nyinanytjaku.”

Taniyalanya nyinamalpa

Taniyala 1:; 2:; 4:—6:

Taniyalanyangarri nintirringkuku

Taniyala 1:1-7

Tjuutaku walytja ngantitja tjuta tawunu tīna palula Papilunangka nyinangi. Papilunanya ngurrara tjuṭaku mayutju tīna Nipukanitjalu palumpa waarrkana yalatji watjanu, “Yitjurilaku ngantitja tjuṭakutu yankula yangupala ninti tjuṭanya ngurrtjara mantjira ngalya kati!, mayutju tjuṭaku katja tjuta. Ngalya kati tjananya!, ngayuku ngurra tiṇawana waarrkarrinytjaku. Yangupala yunpa palya kutju ngalya kati!, tjukarurru kulilpayi tjuta.” Waarrkana paluru yankula tjananya ngurrtjara mantjinu yangupala tjuta, yini yalatjiya nyinangi, Taniyalanya, Yananayanya, Mitjilanya Yatjarayanya. Paluru tjana Tjuutaku walytja ngantitja tjuta nyinangi. Ngalya katirra tjananya rawangku nintiṇingi yiya tjirripala, Papilunanya ngurrara tjuṭaku wangka riitarirra wakantjaku. Kuula nguwanpa palula nyinarra nintirringuya piipa kutjupa tjuṭaku.

Mayutju tiñaku waarrkana paluru tjananya yini kutjupa watjañu. Taniyalanya yini kutjupa Piltatjatjanya watjañu. Yananayanya yini kutjupa Tjatarakanya watjañu. Mitjilanya yini kutjupa Mitjakanya watjañu. Yatjarayanya yini kutjupa Yapinikunya watjañu. Kuula palula tjana nintirringkula wiyarringu. Palulanguru mayutju Nipukanitjalu tjananya yangupala palunya tjananya yilatu yilatu tjapiningi yarrkalkitjangku. Yangupala palunya puupala, Taniyalanyangarriku wangka kulira pukularringu, nintilingkuya nyinanytjala. Palunyatjanu Taniyalanyangarriya palumpa waalawana mayutjulpi waarrkarripayi. Putu kulira nintirrikitjangku tjananya tjapilpayi, mayutju Nipukanitjalu.

*Tjukurrmankunytjala Taniyalalu nintilku
Taniyala 2:1-49*

Palunyatjanu mayutju Nipukanitjalu mungangka yanku ngarirra tjukurrrpa nyangu. Kanarrirra ngulu ngarringi, nintirrikitjangku putu kulira. Palumpa waarrkana ninti tjuta tjananya yaltingu ngalya yankula tjukurrrpa panyapa nintintjaku. Nipukanitjalu kuliñu, “Ngayuluña tjananya wiya tjakultjunku tjukurrrpa, paluru tjana ngayunya nintingku watjantjaku.” Paluru tjananya watjañu, “Munga kuwarrinya tjukurrrpa nyangutjangka tjakultjurrañiya! Yalatjininya tjakultjunkula tjukurrrpatjanungkaninya nintila!” Tjanaya watjañu, “Nyuntu tjukurrrpa nyakula nganañanya tjakultjurra!

Tjakultjunkunytja kulira kutjulatjunta nintilku.” Nipukanitjalu tjananya piyuku watjañu, “Wiya. Nyurrangarri ngayunya tjukurrrpa palunya tjakultjurra! Tjukarurrungkuñinyurra tjakultjunkunytjawiyangka watjalkuna tjananya waarrkana kutjupa tjutangku nyurrangarrinya mirrintankunytjaku yalatji. Mara kutjarra nyurrangarrinya watiya tiñangka tiana tayimapilku. Tjina kutjarratarralpi ruupatjarrangku tayimapira pulukangka tjunku, puulamilara mirrintankunytjaku. Yalatjina tjananya watjalku ninti tjuta nyurrangarrinya puulamilara mirrintankunytjaku. Tjinguru tjukarurrungkuñinyurra tjakultjunkula nintintjala mani yulytja tiñana nyurranya yungku.” Puñuya tjukurr palunyaku kulira tjakultjunkunytjawiyaya. Nipukanitjanya tjanampa pikarringkula tjananya watjañu ninti tjuta tjananya puulamilara mirrintankunytjaku, kutjupa tjutatarra waala kutjupangka yunngu nyinanytja tjuta. Taniyalanyangarriya ninti tjuta waala palula nyinangi.

Nipukanitjaku wangka kulira Taniyalalu tjananya palumpa malpa tjutanya watjañu tjungungkuya Katutjanya tjapintjaku. Palunyta tjutangkuya Katutjanya tjapiñu, tjukurrrpa palunya Nipukanitjaku tjukarurru tjakultjunkula nintintjaku. Munga palula Katutjalu tjukurrrpa palunya nintiñu Taniyalanya. Kulira paluru Katutjanya wañkuñu. Aali pakara Taniyalalu yankula mayutju panyapangka watjañu mayutju tiñakutu yankula tjukurrrpa nintilkitjangku. Mayutju paluru Taniyalanya

katingu Nipukanitjala tjakultjunkunytjaku, kanya mayutju kutjupangku tjananya ninti tjuta mirrintankutjipingkamarra. Mayutju paluru mayutju tiña Nipukanitjala yalatji watjañu, “Tjuwu kutju ngaangku, yini Taniyalalunta tjukurrpa panyapa tjakultjunkula nintilku.” Taniyalalu ngarala Nipukanitjala yalatji tjakultjunu, “Mayutju Katutjaluni munga kuwarri nintinu nyuntu tjukurrpa nyangutjangka. Yalatjinu nyangu. Yañangu manpaña wañawara ngaranyingka nyuntu nyangu, paluru tili nguwanpa. Kata palunya kuultatjanu palyanütja ngarangi. Ngarrka anta miña tjiilpatjanu palyanütja ngarangi. Tjuni anta yangkalpa yayina tjatjakatjanu palyanütja ngarangi. Tjunta kutjarra yayina anta mantatjanu palyanütja ngarangi. Palunyatjanu puli tiñangku katunguru punkara tjina palira yulpuñu. Palunyangka yañangu nguwanpa palunya punkara yulpurirra paña nguwanpa ngarringi. Palunyangka walpangku rungkara wiyanu, kanya puli paluru tiñarringkula ngarangi, ngurra tjutangka.”

Nipukanitjala Taniyalalu piyuku watjañu, “Mayutju, tjukurrpatjanungkananta nintilku. Kata kuulta palunya nyakula nyuntu yalatji kulintjaku. Kuulta mani tiña. Mani tiña nguwanpa nyuntu mayutju tiña nyinanyi. Ngula mayutju kutjupangku tjananya yañangu tjuta kanyilku. Ngarrka anta miña tjiilpatjanu palyanütja nyuntu nyangu. Tjiilpa palunya mani tiña nguwanpa mayutju tiña kutjupa nyinaku. Nyuntu mayutju nyinarra wiyarriku, mayutju

tiña kutjupalpi nyinaku. Palunyatjanu mayutju kutjupangku tjananya yaŋangu tjuta kanyilku. Yalatji mayutju tjirripalangku tjananya kanyilku. Palunyatjanu Katutjalulpi tjananya mayutju tiŋangku yanṭayaŋṭara kanyilku.”

Yalatji Taniyalalu tjakultjunkula tjukarurru nintintjala, mayutju Nipukanitjanya yunyparringu. Palunyatjanu Taniyalaku mani anta yulytja tiña yungkula mayutju tiña tjanampa nyinatjunu, Papilunanya ngurrara tjutaku. Taniyalaku malpa tjirripalaṭarra tjananya mayutju nyinatjunu.

*Waalangka yatjikingku wangka wakara wanalku
Taniyala 5:1-31*

Papilunanya ngurrara tjutaku mayutju tiña Nipukanitjanya nyinarra mirriringu. Palunyatjanu palumpa katja Pilytjatjanya tjanampa mayutju tiña nyinangi. Mayutju Pilytjatjalu tjananya palumpa waarrkana mayutju tjuta yaltingu, tjunguya ngalkula tjikira yunyparryntjaku. Tjungurringkulaya pulakina tjikintjala Pilytjatjalu tjananya waarrkana kutjupa tjutangka watjanu yankula panikina palya tjuta mantjira ngalya katintjaku. Panikina palunya tjuta palumpa paapangkungarri yirriti mantjiṇu Katutjaku tjaatjingka, tawunu Tjarutjalumangka. Mantjiraya ngalya katintjala panikina palunya tjutangka tjana pulakina yintira tjikilpayi, Katutjanya nguwanpa

kutjupa tjuṭa walkulpayi. Katutjaku yulytjangka tjikira Katutjanya nguwanpa kutjupa tjuṭa walkuntjawiyangkuya wantimara.

Palunyangka waalangka katu marangku kutu wangka wakara wanaṇu, yanangungku ngarala wakantjawiya. Mayutju Pilytjatjalu wakanutja nyakula puṭu riitarirra ngulurringkula tititingarangu. Waarrkana kutjungka paluru raapangku watjaṇu ninti tjuṭa tjananya yalṭirra ngalya katinytjaku. Ngalya yankulaya ngaranytjala mayutju Pilytjatjalu tjananya watjaṇu, “Katuya nyawa!, waalangka wakanutja ngaranyi. Puṭulatju riitarringu, wangka kutjupa ngaranyi. Kutjungkuṇi riitarirra nintintjala, wati palunya mantarra palyangkalpiṇa tjarrpatjunkula nyinatjunku.” Puṭuya riitarirra nintintjala kutjupangku watjaṇu Taniyalanya yalṭinytjaku.

Taniyalanya ngalya yankula ngaranytjala, mayutju Pilytjatjalu tjapiṇu wangka palunya riitarirra nintintjaku. Palunyatjanu Taniyalalu Pilytjatjanya alatji watjaṇu, “Nyuntupa paapa, kutu Katutjaku wiyawana nyinarra tjukarurruringkula palyalpi nyinapayi. Palunya nguwanpa, nyuntu Pilytjatja, wiyanu palya nyinanyi. Katutjaku yulytjanyurra panikina tjuṭa mantjira tjikilpayi, Katutjaku ngulurringkunytjawiyangku. Yalatjinyurra tjikira Katutjanya nguwanpa tjuṭa walkulpayi, Katutjanya kutju kulintjawiyangku. Palunyatjanu Katutjalu wangka palatja wakara tjunu, nyuntunyanta nintilkitjangku. Wangka palatja yalatji ngaranyi. Nyuntu mayutjuwiyalpi

nyinaku. Mayutju kutjarra kutjupangkulpi tjananya nyuntupa waarrkana tjuta kanyilku, kutju Mitiyanya ngurrarangku kutjupa Patjanya ngurrarangku."

Palunyangka mayutju Pilytjatjalu watjantjala, Taniyalanya mantarra palyangka tjarpatjunkula nikilitji mayutjuku waralytjunu nguntiwana. Papilunanya ngurrara tjutaku mayutju tiŋalpi nyinangu, nampa tjirri. Munga palula kutjupa tjutangkuya Pilytjatjanya mirrin-tanu. Wati Tjaratjanyalpi tjanampa mayutju tiŋalpi nyinangi.

Wati tjirripalaya waru tinangka yuntura tjarpatjunku

Taniyala 3:

Mayutjulu watjalku warungka tjananya tjarpatjunkunytjaku

Taniyala 3:1-19

Mayutju Nipukanitjanya kana nyinanytjala, palumpa waarrkana tjutangkuya Nipukanitjanya nguwanpa tiŋaya kuultatjanu palyara ngaratjunu, Nipukanitjalu tjananya watjantjala. Tawunu Papilunangka yila yurilpangka palyara ngaratjunu. Palunyatjanu tjana altingu aŋangu tjuta, kuultatjanu palyanütja palula tjungurrinytjaku. Tjungurringkula tjananya mayutju Nipukanitjaku waarrkanalu watjanu, "Turampata kiitawuṭarraya tjintukarrangu tjintungka wangkatjingalku. Yalatji mutjika wangkatjingantjalanyurra ngurrangurungku kulira pupakatirranyurra ngaatjanya Nipukanitjanya nguwanpa

palyanutja walkuntjaku. Yaŋangungku kulira wantintjala walkuntjawiyangku, waru tiŋakutulatju katirra yunta ŋura waŋiku, kamparra wiyarrinytjaku.” Palunyangka yaŋangu tjuṭangkuya mutjika palunya kulira kuultatjanu palyanutja palulakutu yankula walkuŋingi.

Palunyangka Tjuwu tjuṭaku yunytjuwiya tjuṭangkuya mayutju Nipukanitjala yankula yalatji tjakultjunu, “Tjuwu palunya tjirripala nyuntu tjananya mayutju nyinatjunu. Paluru tjana wiya walkuni ngaratjunutjanya. Yini yalatjiya nyinanyi Tjatarakanya, Mitjakanya, Yapinikunya. Nyuntupaya mayutjuku kulintjawiya nyinanyi, palunya ngaratjunutja walkuntjawiyaya. Nyuntupa wangkaya kulira wantinyi.” Kulira mayutju Nipukanitjalu yunpa wayilarrirra waarrkana wantirriyanu witira tjananya Tjatarakanyangarri ngalya katintjaku. Ngalya yankulaya ngaranytjala tjapinu tjananya, “Nyaaku nyurrangarri ngaratjunutja nyangangi walkuntjawiyangku?” Piyku tjananya watjanu, “Nyurrangarrimpa mayutju tiŋa Katutjalu nyurranya puṭu kanalku, waru tiŋangkanyurra kamparra wiyarriku.” Tjatarakalungarri yalatji watjanu, “Yiltalatju wiya kuultatjanu palyanutja palunya walkulpayi, mayutju Katutjalulanyatju kanalku waru tiŋangkamarra. Yalatjilatju kulini. Tjinguru Katutjalulanyatju kanalkitjangku kulintjawiyancka, kutulatju Katutja palunya walkunmalpa, wantiwiyancka. Kuultatjanu palyanutja palunya wiyalatju walkulku.”

Palunyatjanu mayutju Nipukanitjalu tjananya wayilarringkula watjañu waarrkana tjutangku tjananya katirra waru tinangka yuntura tjarrpatjunkunytjaku.

*Katutjalu tjananya waru tinangka
yantayançara kanyinmalpa
Taniyala 3:20-30*

Tjana wati tjirripala palunya Tjatarakanya, Mitjakanya, Yapinikunya ruupangka tayimapi-rayा katirra waru tiña palula yuntura tjarrpatjunu, tjilirratjarra tjirripalangku. Tjilirrat-jarra tjirripala palunya waru tinangku kam-parra yiluntanu, yunturaya tjarrpatjunkunyt-jala.

Palunyangka mayutju Nipukanitjalu warukutu nyakula puñu kulira waarrkanangka yalatji tjapiñu, "Wati tjirripalampaya katirra warungka tjarrpatjunu, yulta?" Waarrkana paluru yuwa watjañu. Nipukanitjalu watjañu, "Wati puupalaña nyanganyi warungka parra ngaranytjala. Ruupawiyaya parra ngaranyi. Wati kutjupa Katutjanya nguwanpaña nyanganyi." Nyakula Nipukanitjalu warungka ilarringkula raapangku tjananya watjañu, "Tjataraka, Mitjaka, Yapiniku, ngalya pakalaya! Mayutju tiña Katutjaku waarrkana tjuta kananyurra ngaranyi." Palunyangkaya palya pakanu mantarratarra kam-pawiya.

Nipukanitjalu tjananya yañangu tjuta watjañu, "Mayutju Katutjanyalaka wal'kula! Katutjalu palumpa waarrkana ilkari ngurrara wantirriyañu Tjatarakanyangarri kanantjaku.

Katutja palunya wiyla panypurangkunytjaku, yañangungku panypurangkunytjala ngayuluna panitjimilaltjipingkamarra.” Nipukanitjalu watjañu Tjatarakanyangarri mayutju tiña tjirripalalpiya nyinanytjaku.

Taniyalanya layina pikati tjutangka tjarpatjunku

Taniyala 6:

Taniyalakupula yunytjuwiya nyinamalpa

Taniyala 6:1-9

Mayutju Nipukanitjanya mirrirrinytjala palumpa katja Pilytjatjanya wiyawana nyinangi. Palumpa waarrkana tjirripalangku mungangka mirri pungu. Palunyatjanu tjanampa Papilunanya ngurrara tjutaku mayutju tiña Tarayatjanya nyinangi.

Mayutju Tarayatjalu yañangu tjuta ngurrtjara mayutju tjuta waan yantañan tuuntiyi ngaratjunu. Kamantaku mayutju palunya tjutangku paña kutjupa kutjupa ngurrara tjananya kanyiningi. Palunyatjanu tjananya mayutju Tarayatjalu Taniyalanya anta mayutju kutjarra kutjupa ngurrtjañu mayutju tiña tjirripalalpiya nyinanytjaku. Tjanaya mayutju panyapa tjuta, waan yantañan tuuntiyiku mayutju tiña nyinangi. Taniyalanya waarrka yatjikingu palyalpayi nyinangi. Palunyatjanu mayutju tiña Tarayatjanyara yunypa nyinangi, kanya mayutju palunya kutjarratarrara Taniyalaku yunytjuwiya nyinangi, mayutju kutjupa tjutañarra. Tjanaya yunytjurringu mayutju Tarayatjalu Taniyalanya payira

cdiv

wantirriyantjaku. Puṭuya kulinu Tarayatjanya tjingapungkunytjaku Taniyalanya payira wantirriyantjaku. Palunyatjanuya rawangku kulira mayutju Tarayatjalakutu yankula yalatji watjañu, Taniyalanya wantirriyalkitjangku. Yalatjiya watjañu, “Tarayatja. Nyuntu mayutju tiŋalampa palya nyinanyi. Nganaŋatju kulinu nyuntunya kutjulatjunta yaŋangu tjutangku tjapira walkuntjaku, kutjupa tjapira walkuntjawiyangku. Katutjanya nguwanpa kutjupangka yaŋangu kutjupangkaṭarra, wiyalatju tjapira walkuntjaku. Purayitiyi puupala nyuntunya kutjulatjunta Tarayatjanya tjapira walkuntjaku.”

Wangka yalatji kulira mayutju Tarayatjalu yunyparringkula watjañu luwu palunya nguwanpa ngaranytjaku, Tarayatjanya kutjuya walkuntjaku. Mayutju paluru watjañu tjinguru yaŋangungku, Katutjangka tjinguru Katutjanya nguwanpa kutjupangka, tjinguru yaŋangu kutjupangka tjapira walkuntjala, katirraya layina tjutangka tjarrpatjunkunytjaku, ngalkulaya wiyanjtjaku. Yalatji luwu watjara wantingu Purayitiyi puupala ngaranytjaku. Yirriti yalatji luwu watjara wantirra wiya mayutjulu tjinytjimilalpayi.

*Taniyalalu tjukarurru nyinarra Katutjanya
tjapinmalpa*
Taniyalalu 6:10-15

Luwu palunya mayutju Tarayatjalu watjara wantintjala, Taniyalalu kulira ngurrakutu yankula waalangka kalparra katu nyinangu.

Palulanguru paluru tawunu Tjarutjalumalakutu wintawuwana nyakula pupakatirra Katutjanya tjapiñu. Yalatji Katutjanya irriñi tjapilpayi, aali, kañaña, mungarrtji.

Mayutju paluru tjana nintiya nyinangu Taniyalalu ngurrangurungku Katutjanya tjapilpayi. Paluru tjana palumpa ngurrakutu yankula nyangu, Taniyalalu pupakatirra tjapintjala. Nyakulaya yankula mayutju tiña Tarayatjangka yalatji tjakultjunu, “Nyuntupa wangka kulintjawiyangku Taniyalalu mayutju Katutjanya kutu tjapilpayi, aali, kañaña, mungarrtji. Katutjanya kutju tjapilpayi nyuntu Tarayatjanya tjapira walkuntjawiyangku.”

Mayutju Tarayatjalu kulira Taniyalaku watjilarringu, layina tjutangkamarra kanalkitjangku puñu kulinangi, tjintu maa tjarrpanytjala. Tjintu maa tjarrpanytjala mayutju paluru tjana yankula mayutju tiñangka yalatji watjanu, “Paluru nyuntunya kutju tjapira walkuntjaku, yalatji luwu ngaranyi. Nyuntu luwu watjara wantintjala, Taniyalanya layina tjutakutuya katirra tjarrpatjunkunytjaku, nyuntunya walkuntjawiya.”

Katutjalu Taniyalanya kanalku Taniyala 6:16-28

Palunyatjanu mayutju Tarayatjalu watjanu, Taniyalanya witira katirra layina tjutangka tjarrpatjunkunytjaku. Paluru tjana tjarrpatjunkukitjangka mayutju Tarayatjalu Taniyalanya yalatji watjanu, “Yunytjurringanyina nyuntupa mayutju tiñangkunta Katutjalu kanantjaku layina pikati

tjuŋangkamarra. Nyuntu palumpa tjukarurru nyinapayi.” Yalatji watjara wantirriyanu layina tjuŋakutuya katintytjaku. Mayutju paluru mungangka puŋu yanku ngarringu. Taniyalanyatjirratjangku kulira kana ngarringi.

Aali pakara mayutju Tarayatjalu layina tjuŋaku ngurrakutu yankula Taniyalanya yalatji yaltirra watjañu, “Taniyala, nyuntu mayutju Katutjaku tjukarurru nyinapayi. Tjinguru mayutju tiñangku Katutjalunta kanañu?, layina tjikipaka tjuŋangkamarra.” Taniyalalu layina tjuŋangka nyinarra watjañu, “Mayutju tiñangku Katutjalu palumpa waarrkana ilkari ngurrara ngalya wantirriyanu, layina tjikipaka tjuŋa tjananya marrkuntjaku, ngayunyañiya patjalpayingkamarra. Tjanaya ngayunya tjarrpatjunkunytjawiyangku wantimara. Wiya ngayuluña kuya palyalpayi. Yalatji Katutjalu kulira palumpa ilkari ngurraratju ngalya wantirriyanu.”

Palunyatjanu mayutju Tarayatjalu yunyparringkula waarrkana tjuŋangka watjañu, Taniyalanyaya alytjurankula pakaltjingantjaku. Taniyalalu mayutju Katutjanya kulinutja kana nyinangi, palumpa walytja.

Palunyatjanu mayutju Tarayatjalu watjanu tjana mayutju palunya tjuŋa tjananya Taniyalaku yunytjuwiya tjuta, witira katirra layina tjikipaka tjuŋangka tjarrpatjunkunytjaku. Palunyangka tjananya waarrkana tjuŋangku mayutju palunya tjananya witira katirra layina tjuŋangka waningu, tjanampa walytja tjuŋatarra. Layina tjuŋangku tjananya patjara wiyanu. Mayutju Tarayatjalu tjananya yanangu uwankarra

watjañu, Taniyalaku mayutju tiña Katutjaku ngulurrirra nyinanytjaku.

Yitjurilaku walytja nganitja tjuta Tjarutjalumalakutu małaku yanku

Yitjara 1:—10; Niyamaya (Nehemiah) 1:—9:

Mayutju tiñalu tjananya watjalku Tjarutjalumalakutu yankunytjaku

Yitjara 1:1-11

Papilunanya ngurrara tjutaku mayutju Tjaratjanya nyinangi. Mayutju Katutjalu palunya nintintjala paluru yañangu tjutaku tjanampa pipa wakanu. Paluru watjañu mayutju tjutangku riitarrinytjala, yañangu tjutangku kulintjaku.

Yalatji tjanampa wakanu, “Patjaku walytja nganitja tjutaku mayutju tiñangku ngayulu nyurrangarrimpa Tjaratjalu wangka yalatji wakara wantirriyanı, ngurra tjutawananyurra kulintjaku. Mayutju tiñalunu Katutjalu nyinatjunu. Paluruñi watjañu palumpa tjaatji tiña tawunu Tjarutjalumangka palyantjaku. Palulanguru Tjuwu tjutanyurra ngurra Papilunalawana nyinanytja tjuta pakara yankunytjaku Tjarutjalumalakutu. Yankulanyurra tjaatji tiña ngurra palula palyantjaku. Katutjaku walytja nyurrangarri Tjuwu tjuta nyinanyi. Nyurrangarri ngurra palulakutu yankukitjangku tjinguru puťu kulilkü, mani, yulytja, tuungkiyitarra katikitjangku. Yalatjinyurra puťu kulintjala, ngurrara kutju ngurrara tjutangku nyurrangarrinya yungkunytjaku, Papilunanya ngurrara tjutangku. Kuka tjawirrilyi tjutatarra nyurrangarrinya

yungkunytjaku, Tjarutjalumalakutunyurra katirra pungkunytjaku. Mayutju Katutjaku tjaatji tiñangkanyurra katirra pungkula kutjantjaku." Palunyatjanuya Tjuwu tjuta, Tjuutaku walytja ngan̄titja tjuta, Pintjiminaku walytja ngan̄titja tjutatarrar Kuliraya yunyparringu. Yunyparrirra yankukitjangku mani yulytjañarraya mantjiñu.

*Mayutju Tjarapapulalu tjananya Tjarutjalumalakutu katiku
Yitjara 2:1,68-70; 3:1-13*

Mayutju Tjaratjalu Papilunangka Katutjaku yulytja mantjira tjananya yungu, panikina tjuta, kañilpa tjuta kuultatjanu palyañutja. Yalatji tjananya Tjuwu tjutaku yungu, Tjarutjalumakutuya katirra Katutjaku tjaatjingka tjunkunytjaku.

Tjuwu tjutalingkuya tjawutjuna puutiyi tuupala tjungurringkulaya rayitpayiki Tjarutjalumalakutu yanu.

Wilurarraya yankula ngurra walytjakutuya rayitpayiki yankula nyinangu. Ngurra Tjarutjalumangka tjayitiwana tawunu yulpuñutja tjuta ngarala wañingi. Yalatjiya tawunu palula tjutakutuya yankula piyuku palyañu, ngurra walytja. Yalatjiya palyara tawunu nyuwana tjutangkalpiya nyinarra wañingi, yirrititja tjutaya nyinarra wanipayi. Mayutju tjanampa Tjarapapulalungarri Tjarutjalumangka tiipula nguwanpa pulitjanu palyañu, tiipula yirrititja ngarangutja, palulaya palyañu, tjaatji yirrititja ngaranytjala yila. Tiipulaya palyara tjintu kutjupangka tjintu

kutjupangka kuka tjawirrilyi pungkula
 Katutjaku kutjalpayi, Muutjalu yirriți yalatji
 kutjantjaku watjañu. Yalatjiya tjawirrilyi
 pungkula Katutjanya wal̄kulpayi, Katutjaku
 tjaatji tiña ngaranytjawiyangka.

*Tjamiriyanya ngurrara tjutangku tjananya
 ngulutjingalku*

Yitjara 3:7-11; 4:1-6,24; 5:1-17; 6:1-8

Tjarutjalumanya ngurrara tjutangku tjaatji
 tiña Katutjakuya palyalkitjangku tjanampa
 uwankarra yungu, tjira tjuta, mayi tjuta, waama
 tjutatarra, Taayanya anta Tjayitananya ngurrara
 tjutaku. Paluru tjana ngaparrtjingku tiimpa
 tjuta yungu puli tjutatarra, Tjuwu tjutangku
 tjaatji tiña palyantjaku. Tiimpa tjuta yaturaya
 maa katirra tjunkupayi tjaatjingka yila. Puli
 palya tjutatarraya yulpura tjunkula katipayi
 Tjarutjalumalakutu, tjaatji palunya palyantjaku.

Waarrkana tjutangkuya tjaatji palyalkitjangku
 puli palya tjuta mantjira tjunkunytjala yanangu
 kutjupa tjutangkuya nyakula yunyparringkula
 mayutju Katutjanya wal̄kuñangi. Tul̄kuku
 mayutju tjutangkuya turampata tjuta yuny-
 pangku mirratjingañangi. Tjaatji tiñaya palyan-
 tjala Tjamiriyanya ngurrara tjutangku ngalya
 yankula mayutju Tjarapapulanyangarri tjananya
 yalatji tjapiñu, “Tjungungkula palyala!, Katut-
 jaku tjaatji tiña. Katutjanyalatju ngurra
 yalinytjarratjayiti nyinarra wal̄kulpayi, Papilu-
 nangkanyurra nyinanytjala.” Tjarapulalungarri
 tjananya yalatji wiya watjañu, “Wiya, palyalatju

tjaatji tiŋa Katutjaku palyalku, mayutju Tjaratjalulanyatju watjaŋutjangka. Nyurrangarri wiya tjungurringkula palyantjaku.”

Yalatjiya wiya watjantjala yalinytjarra ngurrara tjuṭa tjanampa yunytjuwiyarringu. Paluru tjana watjara payilpayi. “Wiyanyurra tjaatji ngaatja palyantjaku. Tjinguru nyurrangarri kutu palyantjala nganaŋatju nyurrangarrinya pungku.”

Palunyatjanu yalinytjarra ngurrara tjutangku pungkukitjangku watjantjala, Tjarapapululungarriya ngulurringkula tjaatji palunya aapuwaiyi palyara wantingu.

Palunyatjanu ngula Katutjaku wangka watjalpayi kutjarrangku tjananya watjaŋu Katutjaku tjaatji piyku palyantjaku, wati Yakayilu anta Tjakarriyalu. Palulanguruya Tjuwu tjutangku piyku palyaŋingi tjaatji palunya. Kamanta ngurrarangku tjanampa yini Tatinayalu yunytjuwiyarrinkula piipa wakara wantirriyanu mayutju Tarayatjalakutu, Papilunanya ngurrara tjutaku mayutju tiŋakutu.

Mayutju tiŋa Tjaratjanya mirrirrinjtala, mayutju tiŋa Tarayatjanya tjanampa nyinangi, tawunu Papilunangka. Piipangka yalatji Tatinayalu wakara wantirriyanu mayutju Tarayatjalakutu. “Tjuwu tjutangkuya mayutju Katutjaku tjaatji tiŋa palyani. Tjana watjaŋulanyatju mayutju Tjaratjalu yirriṭi watjaŋutjangka tjaatji palunya palyantjaku. Tjinguru yalatji yiltaya Tjuwu tjutangku watjaŋu, tjinguru wiya. Puṭuṇa kuliŋi. Tjinguru watjantjawiyangka palyantjawiyangkuya

wantinytjaku. Wangka ngaatjanyañanta wakañutja nyuntu palya piipa tjutangka tañañamilara nyawa!, mayutju Tjaratjalu wakañutja. Yalatji wakanmara, ‘Tjuwu tjutangkuya tjaatji palunya Tjarutjalumangka palyantjaku.’” Piipa yalatji Tatinayalu wakara wantirriyañu mayutju Tarayatjalakutu. Palunyangka mayutju paluru piipa tjutangka tañañamilara wangka panyapangka nyangu. Y尔ta paluru Tjaratjalu tjananya yirriti wakara watjañu tjaatji tiña Tjarutjalumangkaya palyantjaku. Piipa palunya nyakula Tarayatjalu piipa kutjupa wakara wantirriyañu kamantaku mayutju Tatinayalakutu. Piipa palunyangka watjañu palyaya Tjuwu tjutangku Katutjaku tjaatji kutu palyara pinitjimilantjaku.

Palunyatjanuya tjaatji tiña palyara pinitjimilañu. Yalatjiya pinitjimilara Tjuwu tjutaya yunyparringkula Katutjaku tjawirrilyi pungkula kutjara Katutjanyalpiya walkuñangi.

*Mayutju Yitjaralu tjananya kutjupa tjuta
Tjarutjalumalakutu katiku
Yitjara 7:—10:*

Patjanya ngurrara tjutaku mayutju tiña yini Yatikatjatjinya ngurra Papilunala nyinanytjala, wati Yitjaranya Katutjaku tulukku mayutju nyinangi, Muutjaku luwu tjananya nintilpayi. Mayutju tiña paluru Yitjaranya yalatji watjañu, “Tjuwu tjutaya ngurra Tjarutjalumalakutu yankunytjakuya yunytjurringanyi. Palulanguru

nyuntu mayutjulu tjananya kati!, ngurra palulakutu. Tjawirriliyi yalatjiya mantjira kati!, kulta tjuta, tjiilpa tjuta, yulytja tjuta~~tarra~~. Katirra tjawirriliyi palunya Katutjaku tjaatji tiñangka tjurra!” Mayutju paluru Yitjaranya piyuku watjanu yalatji, “Tjarutjalumanya ngurrara tjuta tjinguru mayutju Katutjaku tjukarurru nyinanyi, tjinguru wiya. Nyuntu yarra nyakula tjananya nintila!, Katutjaku luwu. Nyuntu yankula tjanampa kamantaku mayutju tjuta nyinatjurra!, yan~~taya~~yan~~tara~~ tjananya kanyintjaku.”

Palulanguru Tjuwu tjuta~~yaya~~ Yitjaranyangarri tawunu Papilunangka tjungurringu, Tjarutjalumalakutu yankukitja. Mayutju Katutjanyaya tjapinu, yan~~taya~~yan~~tara~~ tjananya katiyankunytjaku ngurra palulakutu. Wati tjutalingku waan tjawutjunan payip anta~~ta~~ tjunguya yanu, kungka tjuta anta pipirri tjuta~~tarra~~.

Tjarutjalumangka tjarrparra Yitjaralu tjananya nyangu Katutjaku wiyawana nyinanytjala. Tjuwu tjutangkuya kungka kutjupa kutjupa ngurrara tjuta tjananya yaltirra kanyinangi. Muutjaku luwu tjanampa ngarangu kungka Tjuwu kutjuya ngurra walytja ngurrara kutjuya altirra kanyintjaku, wiya kungka Tjuwuwiya ngurra kutjupatjanu yaltirra kanyintjaku.

Palunyatjanu Yitjaralu tjananya payinu kungka kutjupa tjuta kanyira Katutjaku luwu kilytjuntankunytjala. Kun~~t~~arringkulaya Katutjaku tjukarurru nyinakitjangku kungka

kutjupa ngurrara tjuta tjananya watjara wantirriyanu.

Mayutju Niyamayalu tjananya Tjarut-jalumalakutu katiku

Niyamaya 1:—4:

Papilunanya ngurrara tjutawana wati Niyamanya nyinangi, tawunu Tjuutjangka. Nyinarra tjakulpa kulinu, Tjarutjalumanya ngurrara tjutangkuya waala kutju palyara wantingu, palulanguru tjana purrkarringu. Parriki tinatarra tjana palyalwiyangku wantingu. Parriki tiña yirriti kutju ngarangi waala tjuta ngarangitja, ngururrtjunkula. Parriki palunya pulitjanu palyanutja yirriti ngarangi. Tjakulpa kulira wati Niyamayalu mayutju tiña Yatikat-jatjinya tjapiñu, Tjarutjalumalakutu Niyamay-alungarri yankula parriki waalatarra palyant-jaku. Mayutju paluru yuwa wangkarra yalatji watjanu, “Piipananta wakara yungku, tiimpa kanyilpayi tjutakutu nyuntu katirra yungkunyt-jaku, tjanaya tiimpa yatura Tjarutjalumalakutu katinytjaku, nyurrangarrimpa.” Mayutju tiña paluru piipa kutjupa tjutatarrha wakara yungu, Niyamayaku, paluru katirra mayutju kutjupa tjutaku yungkunytjaku, tjanaya Niyamayakun-garri tiimpa puli tjuta katirra tjunkunytjaku.

Mayutju tiña paluru watjantjala tjilirratjarra tjutangku tjananya Tjarutjalumalakutu katingu Niyamayanya an palumpa waarrkana tjutatarrha. Niyamayanyangarri Tjuwu tjuta nyinangu.

Tjarutjalumangka yankula nyinarra mungangka pakara Niyamayanya anta palumpa

malpa tjirripala waalangka tjayitiwana yanangi. Yalatjiya yanangi parriki tiña yirriti yulpuṇutjawana tjanaya nyakula piyku palyantjaku wangkayinangi. Parra nyakuyinkulaya tjana rayitpayiki yanu, tjintu pakantjala. Palulanguru tjana tjungurringu mayutju kutjupa tjutangka anta, yanangu kutjupa tjutangkaṭarra.

Niyamayalungarri paluru tjanaya yalatji marrkuṇu, "Yunytjuwiya tjutangku nganañanya ngalya yankula pungkupayingkamarra kulira nganaña nguļu nyinanyi. Palunya tjutangkamarra nganaña tjungungku waarrkarringkula palyantjaku, parriki tiña yirriti ngarangitja nguwanpa." Wangka kutjupaṭarra tjanala watjaṇu mayutju tiña paluru Yatikatjatjilu waala anta parriki palyantjaku watjara wantingu.

Palulanguru tjana waarrkarringuya, parriki tiñaya palyalkitja. Tjamiriyanha ngurrara tjutangkuya kulinu tjanaya parriki palyantjala. Kuliraya tjungurringkula wangkangu yankula tjananya pikangku pungkunytjaku. Niyamayalungarri tjakulpa kulira ngulurringkula Katutjala tjapinu paluru tjananya yanṭayanṭantjaku. Yalatji kuliraya Tjarutjalumanya ngurrara tjuta yaltingu tjungurringkunytjaku. Miitingiya wangkarra wiyarringu. Palulanguru kutjupa tjutangku parriki palyaṇingi, kutjupa tjutangku ngarala yanṭayanṭalpayi, tjilirratjarra tjutangku. Tjamiriya ngurrara tjutangkamarra yalatji tjana aapangku ngarala nyakunytjala, aapa

kutjupangkuya parriki palyara wiyanu. Tuuwa tjutatarraya tiimpatjanu palyara ngaratjunkula wanañu.

Watjalkuya Katutjaku tjukarurru nyinakitjangku

Niyamaya 8:1-10; 9:1-3; 10:10-39

Palunyatjanu Tjuwu tjutaya Tjarutjalumangka tjungurringu, ila ngurrara tjutañarra. Wati Yitjaranyaya tjapiñu Katutjaku wangka piipa mantjira ngalya katirra riitarrinytjaku. Piipa mantjira aali tiipula nguwanpangka kalparra ngarala tjanampa riitarringkula kañalarringu. Riitarrinytjala yanangu yuwankarrangkuya, wati tjutangku, kungka tjutangku pipirri tjutangkutarra yarrkangku kuliñangi. Yitjaralu Yipuru wangka riitarrinytjala kutjupa tjutangku tjanampa tañamilalpayi Yaramayika wangkaya, tjukarurrungku kulintjaku. Wangka Yaramayikakuya nganñitja tjuta nintirringu ngurra Papilunangka nyinarra.

Katutjaku wangka yutiya kulira yulangi, wiyawana nyinangutja. Palunyangka mayutju tjutangku tjananya marrkuñu, “Yulawiyaya ngarama!, kuwarrila yunyparryingkula Katutjanya walkuntjaku. Yulta tiña ngaatjanya ngaranyi.”

Palulanguru tjintu kutjupangkaya yanangu tjutangku Katutjanya tjakultjunu, kuya palyaraya nyinangutja. Katutjaku tjukarurru nyinakitjaya tjananya piipangka yini tjunu. Yuwankarraya wangkangu Katutjaku wangkawanaya tjukarurru nyinanytjaku.

Katutjaku wangka palunya Muutjalu piipangka yirriṭi wakaṇu.

*Wati Malakayilu Katutjaku wangka watjalku
Malakayi 1; 3:1; 4:5*

Tjuwu tjuṭaya wiyawana nyinanytjala, Katutjalu wati Malakayinya nintiṇu, yankula tjananya palumpa wangka nintintjaku. Wangka tjuṭa tjananya nintiṇangi, Katutjakulpiya tjukarurru nyinanytjaku. Malakayilu tjananya Katutjaku wangka piyuku yalatji watjaṇu, “Kulilaya! Wati kutju, ngayuku wangka tjakultjunkupayi, ngayulu Katutjaluṇa nyurrangarrimpa wantirriyalku, nintintjaku nyurrangarrinya. Palunyatjanu mayutju tiṇa nyurrangarrimpa ngalya yankula nyinaku. Mayutju palumpanyurra patara nyinanytjaku. Paluru yankula ngayuku tjaatji tiṇangka nyinarra, paluru nyurranya nintilku ngayuku wangka. Paluru nyurrangarrinya watjalku, ‘Katutjalu yirriṭi watjaṇu nyurrangarrinya yantayantalkitjangku.’” Malakayilu tjananya Katutjaku wangka yalatji piyuku tjakultjunu, “Kulilaya! Ngayulu Katutjalu nyurrangarrinya watjaṇi. Ngayuku wangka watjalpayinya, Yilaatjanya ngayulu nyurrangarrimpa wantirriyalku yurrunpa. Palunyatjanu ngayuluṇa tjananya kuya palyalpayi tjuṭa kuutawutjungka wangkarra pikantanku. Palula yurrunpa nyurrampa Yilaatjanya yanku.”

*Wati Tjuupanya nyinamalpa
Tjuupa 1:1-22; 2:1-13; 3:1-13; 19:1-6,25-27;
42:10-17*

*Wati Tjuupanya tjukarurru nyinamalpa
Tjuupa 1:1-3*

Wati Tjuupanya Katutjaku tjukarurru nyinangi. Miitarrarrapula nyinarra katja tjapanpala mantjiñu, yuntałpa tjirripalatarra. Tjuupalu tjanampa rawangku kuka tjawirrilyi pungkupayi. Pungkula tjawirrilyi yungkupayi tulkuku mayutjungku kutjantjaku, Katutjalu kuya tjanampa wañinytjaku. Mani tiña anta yulytja tiñatjarra Tjuupanya yalatji nyinangu. Yalatji paluru kanyiñangi, tjiipi tjutalingku tjawutjuna tjapanpala, kamula tjutalingku tjawutjuna tjirripala, puluka tjuṭa tjawutjuna kutju, tuungkiyi tjutatarra yantaṭa payipala. Yalatjira wati Tjuupaku ngarangu.

*Mamuku mayutjungku Tjuupanya yarrkant-jaku watjalku
Tjuupa 1:6-12*

Yilkari ngurrara tjutaya mamuku mayutjutarra Katutjala tjungurringu. Palunyangka Katutjalu mamuku mayutjungka yalatji tjapiñu, “Kuwarri yaalytjinguru nyuntu ngalya yanu?” Mamuku mayutju paluru watjanu, “Manta tjutawanaña yankulaña ngalya yanu.” Katutjalu tjapiñu, “Ngayuku walytja wati Tjuupanya palya nyinanytjala nyuntu nyangu, yilta?” Yalatji tjapira paluru Tjuupanya walkunu yalatji, “Yañangu kutjupa tjutangka wirrili Tjuupanya ngayuku tjukarurru nyinanyi. Ngayunya paluru tjukarurrungku walkulpayi, kutu, kuya palyantjawiya.”

Mamuku mayutjungku watjañu, “Nyuntu palumpa kutu tjukarurru palyantjala Tjuupanya nyuntupa tjukarurru nyinanyi. Kala nyuntu tjukarurru palyalwiyangku wantintjala, wiyanta nyuntunya kutu walkulku. Tjuupanyangarri tjananya nyuntu kutu yanṭayanttalpayi. Nyuntu tjanampa kutu mayi anta kapi yungkupayi. Palumpa kuka tjuta nyuntu tjutalingku nyinatjunu.” Mamuku mayutjungku Katutjanya piyuku watjañu, “Waṭalpi nyuntu palumpa waala yulytjaṭarra yulpura wiyal! Palumpa walytja tjuta kuka tjutaṭarra mirrintarra wiyal! Yalatjinu wiyanṭjala, wantirranta wiya walkulku. Maralpa nyinarra nyuntunya panypurangkula wantiku.” Katutjalu kulira yalatji watjañu mamuku mayutjunya, “Palya nyuntu yankula Tjuupanya yarrkala! Palumpa waala yulytjaṭarra yulpura wiyal! Palumpa walytja tjuta mirrintarra wiyal!, palumpa kuka tjutaṭarra. Tjuupanya kutju wanti!, mirrintankunytjawiyyangku.” Yalatji Tjuupanya yarrkara kuyalkitja mamuku mayutju paṇakutu yanu.

*Katutjalu watjanutjangka Tjuupaku walytja
tjuṭa anta yulytja wiyarringku
Tjuupa 1:13-22*

Tjuupanya ngurrangka nyinanytjala, palumpa waarrkanangku ngalya yankula alatji tjakultjunu, “Nganaṇatju waarrka pulukatjarrangku paṇa yulpurinkupayi. Palunyatjanu wati tjikipaka tjutangkulanyatju

pikangku pungkula puluka uwankarra katingu, tuungkiyi tjutatarra, Tjapiyanya ngurrara tjutangku. Paluru tjana nyuntupa waarrkana tjutatarra tjananya mirri pungu. Ngayulu kutjuña kanarringkula ngalya yanu.”

Palunyatjanu waarrkana kutjupangku ngalya tjalkalungkula Tjuupanya yalatji tjakultjunu, “Kuwarri mañngirringku rungkara tilintjala nyuntupa tjiipi tjuta kamparra yiluntanu. Tji-ipiku mayutjutarra tjananya kamparra yiluntanu. Ngayulu kutjuña kanarringkula ngalya yanu.”

Palunyatjanu waarrkana kutjupangku ngalya tjalkalungkula Tjuupanya yalatji tjakultjunu, “Tjaltjiyanya ngurrara tjutangkulanyatju ngalya yankula pikangku pungangi. Tjana kamulaku mayutju tjuta tjananya mirri pungkula tjananya kamula uwankarra katingu. Ngayulu kutjuña kanarringkula ngalya yanu.”

Palunyatjanu waarrkana kutjupangku ngalya tjalkalungkula yalatji wati palula tjakultjunu, “Nyuntupa katja tjuta yuntałpa tjuta waala kutjungka tjarrparra tjikira ngalkula yunyparringangi. Palunyatjanu walpa tiñangku tjanampa waala yulpura waningu. Yulpura tjananya nyuntupa walytja tjuta palira yiluntanu. Ngayulu kutjuña kanarringkula ngalya yanu.”

Kulira Tjuupanya pakara mantarra wintarpungkula yulangi. Kata muṭura nyapara yulangi. Yularra watungarala yalatji watjanu, “Yiti tjukutjukuña maralpa yutirirra ngarringi. Nyinarraña maralpa mirrirriku. Mayutju

Katutjalunu katja tjuṭa yuntaalpa tjuta yulytja uwankarra yungu. Paluruṇi kuwarri uwankarra wiyanu. Walytjangku kuliranu uwankarra yungkula, palya katirra wiyanu. Katutjanya kutjuṇa kutu walkulkku.” Yalatji uwankarra wiyarrinytjala, Tjuupalu wiya Katutjanya pany-purangu.

Tjuupanya pikatjarrarirra mikinpa nyinamalpa

Tjuupa 2:1-10

Mamuku mayutjungku Katutjanya tjapinu Tjuupanya pikatjarralkitjangku. Palunyatjanu Katutjalu yuwa watjantjala, mamuku mayutjungku yankula Tjuupanya pikatjarranu. Tjuupanya kutu Katutjaku tjukarurru nyinangi, panypurangkunytjawiya. Yalatji mamuku mayutjungku kuliningga, “Tjuupanya pikatjarrarringkula Katutjanya panypurangkula wantiku.” Palunyatjanu pika kutjupatjarra Tjuupanya nyinangu pika taltu taltutjarra. Mikin tiñatjarralpi nyinarra yankula rapitjingka nyinangi. Ngurra palula rapitjiya katirra wanipayi. Nyinarra watiyatjarrangku wakara yuna tjuṭa yintiningga. Palumpa miitangku yankula Tjuupanya yalatji tjingapungu, “Katutjalunta yarrkanı, palunyatjanu nyuntu Katutjanya kuru watjala! Nyuntu Katutjanya wantirra wiyara nyinama! Wiyanta paluru nyuntunya yanṭayantanı. Palunya nyuntu wantirra kuru watjala!” Tjuupalu palumpa miiṭa payinu, “Wiyawanangkun watjantjawiya. Palyalinya Katutjalu walytjalu kulira yarrkanı.

Kutuli tjukarurru nyinanytjaku.” Yalatji Tjuupanya pikatjarra nyinarra tjukarurru nyinangi, Katutjanya panypurangkunytjawiya.

Tjuupaku malpaya ngalya yankula tjungu nyinamalpa

Tjuupa 2:11-13

Tjuupanya pikatjarra nyinanytjala, kulira Tjuupaku malpa tjirripalaya ngalya yankula tjungu nyinangi, mal pangku kanyilkitja. Tjunguya yularra nyinangi wangkanytjawiya, tjintu tjapanpala.

Tjuupanya watjilpa nyinamalpa

Tjuupa 3:1-13

Wati Tjuupanya pikatjarra nyinarra watjilpa nyinangi, wangkanytjawiya. Rawa yalatji nyinarra yalatjilpi watjanu, “Maamangkuni yititjunkuwiyangku wantimara pipirri wiimana mirririinytjaku. Palulanguru wiya pika tiñatjarraña nyinamara.”

Malpa tjirripalangkuya Tjuupanya watjalku

Tjuupa 4:—11:

Tjuupaku malpa tjirripalangkuya Tjuupanya alatji watjanu, “Nintingkulatju kulinî. Nyuntu kuya tiña palyañutjangka Katutjalunta mirrpañarriirra pikatjarrañi. Nyuntu kulila! Tjukarurru nyinapayi Katutjalu wiya pikatjarrañi. Palunyatjanu nyuntu yulta kuya tiña palyanu. Palulanguru Katutjalunta pikatjarrañi. Nyuntu kuya palyara Katutjanya tjukarurrungku tjakultjunamara.” Wangka palunya nguwanpaya tjuñangara watjanu.

Palunyatjanu Tjuupalu tjananya yalatji watjalpayi, "Wiya. Kuya puntu ngayuluña palyantjawiya. Ngayuluña mungutja nyinanyi, kuya tiṇa wiyaṇa palyalpayi."

Tjuupalu tjukarurru kulilku, Katutjanya ngula nyakukitjangku

Tjuupa 19:1-6,25-27

Tjuupalu tjananya palumpa malpa tjirripala yalatji watjaṇu, "Nyaakuṇinyurra alturuwiyangku panypuranganyi? Kuya puntuña wiya palyalpayi. Kulintjakunyurra yalatji. Katutjalu walytjangku kuliranı yarrkaṇi. Paluru ngayuku walytja tjuṭa, mani, yulytja uwankarra wiyaṇu yarrkalkitjangku. Palunyatjanu yalturunyurra ngayuku nyinanytjaku." Tjuupanya watjilpa nyinarra mirrirrikitjangku kulira yalatji watjanu, "Yalatjiṇa kulinı yilkari ngurrara kutjutju patjuri nyinaku. Pikatjarra mirrirringkula ngayulu paṇarriku. Katutjanyaṇa yuti nyakuku. Paluru ngayuku walytja nyinanyi. Ngayulu yulta palunya nyakuku."

Katutjalulpi Tjuupaku tjukarurru palyalku
Tjuupa 42:10-17

Palunyatjanu mayutju Katutjalu wati Tjuupanya palyara waala yulytja manitjarralpi nyinatjunu. Palunyangkaraya palumpa kuṭa tjutangku malanypa tjutangku altururringkula kuulta mani uwankarra yungu.

Palunyatjanu Katutjalu Tjuupanya uwankarra yungu mani anta yulytja tiṇa. Tjiipi tjutalingku,

tjawutjuna puutinpala Tjuupalu kanyinu, kamula tjutaṭarra tjawutjuna tjikitjipala. Puluka tjuta tjawutjuna kutju paluru kanyinu, tuungkiyi tjutaṭarra tjawutjuna kutju. Yalatji Tjuupanya Katutjalu uwankarra yungu. Katja tjanpalara yungu, yuntałpa tjirripalatarr. Yuntałpa paluru tjana yunta palyaya nyinangi. Yirriti Tjuupalu tjiipi tjuta, puluka tjuta, kamula tjuta kanyilpayi. Palula tjutangka wirrili Tjuupalupi kanyinu. Yirriti Tjuupalu mani puntu, yulytja tjuta kanyilpayi. Palula wirrili Tjuupalupi kanyinu.

Yalatji Tjuupanya kuka tjutatjarra, yulytja tiñatjarra kutu nyinangi yiiya waan yantaṭan puutiyipala. Yalatji nyinarra paluru mirrirringu.

Katutjaku walytjaya yalatji nyinamalpa, Yiitju Kurayitjanya mantangka pipirri yutitjarrinytjala yurrunpa

*KATUTJAKU WANGKA NGAANGURU
WIYARRINGU.*

Ngaatjanya wangka kutjupalpi, nganana kulintjaku

Katutjalu watjantja yirrititja wiyarringu. Wangka ngaatjanya yañangu ngantitja tjutangku kulira wakanu, Katutjaku wangkawiya. Wangka ngaatjanyaya wakanu nintilkitjangku.

Tjuwu tjutaya tawunu Papilunangka nyinarra Tjarutjalumalakutu rayitpayiki ankula palya nyinangu, tawunu kutjupa tjutangkaṭarra palula ila. Ngurra palula tjutangkaya nyinangu rawa,

yiiya tuu yantaṭa. Palunyatjanu mayutju Patjanya ngurrara tjutangku tjananya Tjuwu tjuta kanyinangi. Palulanguru Matjatuniyanya ngurrara tjutangku, mayutju tiṇa Yalikitjantalungarri pikangku tjananya pungu. Palulanguru Patjanya ngurrara tjutangku tjungurringkula pikangku pungkula tjananya ngulutjingara wantirriyanu. Palulanguru Yalikitjantalu tjananya mayutju tinangku Tjuwu tjuta kanyinangi, ngurra palula.

Mayutju paluru wiarrinytjala, Yitjipinya ngurrara mayutju tjutangku tjananya yanṭayantara Tjuwu tjuta kanyinangi, kutjutu kutjutu. Tjana rawangku tjananya kanyinangi yiiya waan yantaṭa. Mayutju palyangku tjananya Yitjipingka tjukarurru kanyilpayi. Tjuwu kutjupa tjutaya yankula ngurra Yitjipingkalpi nyinangu. Tjuwu kutjupa tjutaya kutu Tjarutjalumalawana nyinangu paṇa yini Palatjayinalawana.

Palulanguru Tjuwu palunya tjananya Palatjayinanya ngurrara tjuta, mayutju kutjupa tjutangku kanyinangi, paṇa Tjiriyanya ngurrara tjutangku. Mayutju Tjiriyanya ngurrara yini Yantayakutjalu tjananya yurrunpa palya kanyinangi. Mayutju paluru wiarrinytjala palumpa katjangkulpi tjananya yunytjuwiyangku kanyilpayi, yini Yantayakutja Yipipinitjalu. Mayutju palumpa tjilirratjarra tjutangku Tjarutjalumalakutu yankula pikangku tjananya pungu. Pungkula tjananya waala tjutatarralpiya tiliṇu. Parriki tiṇa waalangka tjayitiwana ngaranytjalaya yulpura piluntanu.

Katutjaku tjaatjingka mayutju paluru Katutjanya nguwanpa kutjupa yini Tjupitanya ngaratjunu. Palunyatjanu Tjuwu tjutangku Katutjanya wantirra Katutjanya nguwanpa palunya walkuŋangi.

Kutjupa tjutaya Katutjaku tjukarurru nyinangi. Katutjaku yunytjuwiya tjutangku tjananya mirri pungangi. Palulanguru Katutjaku palya nyinapayi kutjupa tjuta nyinangi. Matatjayatjanya tjanampa tulkuku mayutju nyinangi. Paluru tjananya yaltingu Tjuwu tjuta tjilirratjarra tjungurringkunytjaku. Tjungurringkulaya puliwana nyinapayi. Paluru tjana yankula Tjiriyanya ngurrara tjuta pikangku pungkula ngulutjingara wantirriyalpayi. Palulanguru paluru tjana paña Palatjayinalawana yankula Katutjanya nguwanpaku tiipula yulpulpayi, Katutjanya nguwanpaya walkulpayingkamarra.

Mayutju Matatjayatjanya wiyarrinytjala palumpa katja Tjuutatja Makapiyatjanya mayutju tjanampa Tjuwu tjutaku nyinangi. Paluru tjana Tjiriyanya ngurrara tjuta tjananya pikangku pungkula payira tjananya iyanu Tjarutjalumalanguru, tawunu palulalpiya nyinakitjangku. Mayutju Tjuutatja paluru Katutjaku tjaatjingka mantjira katirra wañingu, Katutjanya nguwanpa palunya. Tjaatji palula yulpata tjuta wañirra kiliinamilanu. Palulanguru paluru yaŋangu tjuta watjanu Katutjanya yilta kutju tjaatjingka walkuntjaku. Tjuutjalungarri tjananya palumpa malanypa kutjarrangku palya kanyiŋangi. Ngula

Tjuwu tjutayanaku pika wangkarra yankula
wiyarringu tjaalpan tjaalpalpiya nyinangu paña
Palatjayinalawana.

Palulanguru mayutju Ruumanya ngurraralu,
yini Pampiyilu palumpa tjilirratjarra
tjutalutarra Tjuwu tjuta tjananya pikangku
pungu. Yalatji tjananya pungkula Pampiyilu
Yirutanya nyinatjunu, kamantaku mayutju
tjanampa nyinanytjaku. Mayutju Yirutalu
tjananya Tjuutatja Makapiyatjaku walytja tjuta
pungkula mirrintanu. Tjuwu tjuta tjananya
Yirutalu yunytjuwiyangku kanyilpayi. Paluru
palumpa katja mirri pungu, palumpa miitatarra,
paluru kutjarra mayutjurripayingkamarra.
Mayutju Yiruta paluru yi Yiitjunya mirri
pungkukitjangku yarrkaṇu.

Ngula Tjuwu tjutaku walytjarrikitjangku
mayutju Yirutalu mani tiṇa tjananya yungu
tjaatji tiṇalingku Tjarutjalumangka palyantjaku.
Pika tiṇatjarralpi paluru mirrirringu. Palumpa
katja maṇkurr kutjupalpiya Tjuwu tjutaku
mayutju tjanampa nyinangu. Katja paluru tjananya
yalatji mayutju tjuta nyinangi. Yakilayutjanya
tjanampa Tjuutiyanaya ngurrara tjutaku mayutju
nyinangi, Tjamiriyanaya ngurrara tjutaku tarra.
Yantipatjanya tjanampa Kaliliyinya ngurrara
tjutaku mayutju nyinangi. Pilipanya tjanampa
Pirinyanya ngurrara tjutaku mayutju nyinangi.

Mayutju Yakilayutjulu tjananya yun-
ytjuwiyangku kanyintjala, mayutju tiṇa
paluru Yukatjatjalu Ruumanya ngurrarangku
payira wantirriyanu. Palunyatjanu paluru
mayutju kutjupa tjuta tjanampa Tjuwu tjutaku

nyinatjunu, Tjiriyanya ngurrara tjuta, Panytjatja Payilatanyangarri. Paluru tjana kamantaku mayutju tjuta tjanampa Tjuwu tjutaku nyinangi.

Ruumanya ngurrara mayutju tiña Yukatjatjanya pana uwankarra ngurrara tjutaku nyinangi yini kutjupa Tjiyitjanya.

Palulanguruya Tjuwu kutjupa tjutangku kulilpayi, yanangu yuwankarra Katutjaku tjukarurru nyinanytjaku. Yalatji kulira tjana yanangu tjuta tjananya nintilpayi. Nintilpayi paluru tjana yini yalatji nyinangu, “Paratji tjuta.” Wiyawanangkuya Katutjaku wangka yanangukuñu wangkañarra nintilpayi.

Tjuwu kutjupa tjutaya Katutjaku tjukarurru nyinakitja yara kutjupawanangku kulira nyinangu. Katutjaku wangka kutjupa tjuta kulira, Katutjaku wangka kutjupa tjuta wantipayi. Yalatjiya wiyawana nyinapayi. Paluru tjana yini yalatji nyinangu, “Tjatakaku wangka kulilpayi tjuta.”

Tjuwu kutjupa tjutaya yini yalatji nyinangu, “Muutjaku wangka nintilpayi tjuta.” Katutjaku piipa yulpattrinytjala piipa nyuwanalpiya marangku wakalpayi, tjukarurru ngarrinytjaku. Katutjaku luwu palunya tjana wakara yanangu tjuta tjananya nintilpayi. Tjana Tjuwuku tjaatji wiima tjutangka tjananya nintilpayi.

Mayutju Ruumananya ngurrarangku tjananya yunytjuwiyangku kanyintjala Tjuwu tjutangku kulira pañaningi, “Kuwarri mayutju tiñalampa Kurayitjanya ngalya yanku, Katutjalu yirriñi watjara ngalya wantirriyalku. Kurayitja paluru

ngalya yankunytjala tjungungkula tjananya Ruumanya ngurrara tjuṭa pikangku pungkula wantirriyalku. Yilta mayutju tiṇa paluru Kurayitjalu ngalya yankula yaṇṭayantaṛa kanyilku, Tapitaku walytja nganṭitjangku.”

Katutjalu watjantja yirrititjanu nyurrangarri riitarringkula ninti nyinanytjaku, panya Kurayitjanya ngalya yankunytjaku. Kutuya Tjuwu tjutangku Katutjanya tjapilpayi mayutju tiṇa Kurayitjanya ngalya wantirriyantjaku.

Luritja Bible

The New Testament and selected portions of the Old Testament in the Luritja language of Australia

copyright © 2006 Bible Society of Australia

Language: Luritja (Pintupi-Luritja)

Dialect: Luritja

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-01-06

PDF generated using Haiola and XeLaTeX on 11 Nov 2022 from source files dated 7 Jan 2020

87b44b8a-66cc-5a79-8b77-3942a674d88b